






OTIVM'
SINE LITERIS
MORS EST
Seneca

Ex Libris Joannis Nencini
1874



D. 1

M. TULLII
CICERONIS
OPERA.
TOMUS SECUNDUS.

HOC VOLUMINE
continentur

DE ORATORE LIBRI III.
BRUTUS, SIVE DE CLARIS ORATORIBUS.
DE OPTIMO GENERE ORATORUM.
DE PETITIONE CONSULATUS.

THE
SIXTH
VOLUME

OF THE
HISTORY OF THE
UNITED STATES

BY
JAMES M. SMITH
OF THE
UNITED STATES ARMY
AND
OF THE
UNITED STATES NAVY



M. TULLII
CICERONIS
OPERA.

Recensuit J. N. LALLEMAND.

TOMUS SECUNDUS.



PARISIIS,

Apud { SAILLANT, viâ S. Joannis Bellov.
DESAIN, viâ Fœneâ.
{ BARBOU, viâ Mathurinensium.

M DCC LXVIII.



THE UNIVERSITY OF CHICAGO

LIBRARY

1900

1900

1900

1900

1900

1900

1900

1900



M. T. CICERONIS
DE ORATORE DIALOGI.

CICERO sub personis L. Licinii Crassi & M. Antonii, Oratorum superioris seculi principum, rhetoricæ præcepta tradit. His senibus adjungit duos excellentis ingenii adolescentes, Cottam & Sulpicium, qui, quum de studio dicendi sermo incidisset, rogant utrumque, ut ea, quæ sentiant de omni ratione dicendi subtiliter persequantur. Hæc disputatio habita fingitur in Tusculano L. Crassi, puero Cicerone, qui hanc scripsit anno urbis 698, ætatis 52. Vide Epist. ad Atticum 4, 13. & 13, 19.

In primo libro Crassus perfectum Oratorem instituit, eique omnium
Tomus II. A.

artium cognitionem subjungit : singulas percurrit , probatque & exemplis & rationibus quàm utilis sit unaquæque Oratori. Antonius verò eloquentiam a ceteris artibus segregat , eique solam bene dicendi scientiam adjungit. Percurrit argumenta , quæ Crassus attulerat , eaque verbo magis , quàm re dissolvit. Interest huic sermoni Q. Mucius , Crassi socer , cujus a studiis non erat aliena disputatio de jure civili : sed hunc a libris sequentibus Cicero dimovit : neque enim decebat virum tam gravem proximæ de jocis disputationi interesse. PEARCIUS.





M. TULLII
CICERONIS
DE
ORATORE
AD Q. FRATREM
LIBER PRIMUS.

COGITANTE mihi sæpenumero, & nemoriâ vetera repèrenti, perbeatè fuisse, Quinte frater, illi videri solent, qui in optima republica, quum & honoribus, & rerum gestarum gloriâ florent, eum vitæ cursum tenere potuerunt, ut vel in negotio sine periculo, vel in otio cum dignitate esse possent. Ac fuit tempus illud, quum mihi quoque initium requiescendi, atque animum ad utriusque nostrum præclara studia referendi fore, justum & propè ab omnibus concessum arbitrarer,

si infinitus forensium rerum labor, & ambitionis occupatio, decursu honorum, etiam ætatis flexu constitisset.

2. Quam spem cogitationum & consiliorum meorum, quum graves communium temporum, tum nostri casus fefellerunt. Nam qui locus quietis & tranquillitatis plenissimus fore videbatur, in eo maximæ moles molestiarum, & turbulentissimæ tempestates exstiterunt. Neque verò nobis cupientibus, atque exoptantibus fructus otii datus est ad eas artes, quibus a pueris dediti fuimus, celebrandas, inter nosque recolendas.

3. Nam primâ ætate incidimus in ipsam perturbationem disciplinæ veteris: & consulatu devenimus in medium rerum omnium certamen, atque discrimen: & hoc tempus omne post consulatum objecimus iis fluctibus, qui, per nos a communi peste depulsi, in nosmetipsos redundarunt. Sed tamen in his vel asperitatibus rerum, vel angustiis temporis, obsequar studiis nostris; &, quantum mihi vel fraus inimicorum, vel causæ amicorum, vel respublica tribuet otii, ad scribendum potissimum conferam. Tibi verò, frater, neque hortanti deero, neque roganti: nam neque auctoritate quisquam apud me plus valere te potest, neque voluntate.

II. Ac mihi repetenda est veteris cujus-
am memoriæ non sanè satis explicata re-
ordatio, sed, ut arbitror, apta ad id,
quod requiris, ut cognoscas, quæ viri
summum eloquentissimi, clarissimique sen-
serint de omni ratione dicendi.

5. Vis enim, ut mihi sæpe dixisti; quo-
iam quæ pueris, aut adolescentulis nobis
ex commentariolis nostris inchoata, ac ru-
dia exciderunt, vix hac ætate digna, &
hoc usu, quem ex causis, quas diximus,
pot tantisque consecuti sumus; aliquid iis-
em de rebus politius a nobis, perfec-
tusque proferri: solesque nonnumquam
de re a me in disputationibus nostris
dissentire, quod ego prudentissimorum
hominum artibus eloquentiam contineri
statuam; tu autem illam ab elegantia doc-
trinæ segregandam putes, & in quodam
ingenii atque exercitationis genere po-
nendam.

6. Ac mihi quidem sæpenumero in sum-
mos homines, ac summis ingeniis prædi-
cos intuenti, quærendum esse visum est,
quid esset; cur plures in omnibus artibus,
quàm in dicendo admirabiles exstitissent.
Nam, quocumque te animo, & cogita-
tione converteris, permultos excellentes
in quoque genere videbis, non medio-
rium artium, sed propè maximarum.

7. Quis enim est, qui, si clarorum ho-

minum scientiam, rerum gestarum vel utilitate vel magnitudine metiri velit, non anteponat oratori imperatorem? quis autem dubitet, quin belli duces ex hac una civitate præstantissimos pene innumerabiles, in dicendo autem excellentes vix paucos proferre possimus?

8. Jam verò consilio, ac sapientiâ qui regere, ac gubernare rempublicam possent, multi nostrâ, plures patrum memoriâ, atque etiam majorum exstiterunt; quum boni per diu nulli, vix autem singulis ætatibus singuli tolerabiles oratores invenirentur. Ac, ne quis fortè cum aliis studiis, quæ reconditis in artibus, atque in quadam varietate litterarum versentur, magis hanc dicendi rationem, quàm cum imperatoris laude, aut cum boni senatoris prudentia comparandam putet; convertat animum ad ea ipsa artium genera, circumspiciatque qui in iis floruerint, quàmque multi: sic facillimè, quanta oratorum sit, semperque fuerit paucitas, judicabit.

III. Neque enim te fugit, omnium laudatarum artium procreatricem quamdam, & quasi parentem eam, quam φιλοσοφίαν Græci vocant, ab hominibus doctissimis judicari; in qua difficile est enumerare, quot viri, quantâ scientiâ, quantâque in suis studiis varietate, & copiâ fuerint: qui non una aliqua in re separatim elaborarint,

sed omnia, quaecumque possent, vel scientiæ pervestigatione, vel differendi ratione, comprehenderint.

10. Quis ignorat, ii, qui mathematici vocantur, quanta in obscuritate rerum, & quàm recondita in arte, & multiplici, subtilique versentur? quo tamen in genere ita multi perfecti homines exstiterunt, ut nemo ferè studuisse ei scientiæ vehementius videatur, quin, quod voluerit, consecutus sit. Quis musicis, quis huic studio litterarum, quod profitentur ii, qui grammatici vocantur, penitus se deditit, quin omnem illarum artium pene infinitam vim, & materiam, scientiæ cogitatione comprehenderit.

11. Verè mihi hoc videor esse dicturus, ex omnibus iis, qui in harum artium studiis liberalissimis sint, doctrinisque versari, minimam copiam poëtarum egregiorum exstitisse: atque in hoc ipso numero, in quo perraro exoritur aliquis excellens, si diligenter & ex nostrorum, & ex Græcorum copia comparare voles, multò tamen pauciores oratores, quàm poëtæ boni reperientur.

12. Quod hoc etiam mirabilius debet videri, quia ceterarum artium studia ferè reconditis atque abditis e fontibus hauriuntur; dicendi autem omnis ratio in medio posita, communi quodam in usu, atque in

hominum more & sermone versatur; ut in ceteris id maximè excellat, quod longissimè sit ab imperitorum intelligentia, sensuque disjunctum; in dicendo autem vitium vel maximum sit a vulgari genere orationis, atque a consuetudine communis sensûs abhorrrere.

IV. Ac ne illud quidem verè dici potest, aut plures ceteris artibus inservire, aut majore delectatione, aut spe uberiore, aut præmiis ad perdiscendum amplioribus commoveri. Atque ut omittam Græciam, quæ semper eloquentiæ princeps esse voluit, atque illas omnium doctrinarum inventrices Athenas, in quibus summa dicendi vis & inventa est, & perfecta: in hac ipsa civitate profectò nulla umquam vehementius, quàm eloquentiæ studia viguerunt.

14. Nam posteaquam, imperio omnium gentium constituto, diuturnitas pacis otium confirmavit, nemo ferè laudis cupidus adolescens non sibi ad dicendum studio omni enitendum putavit. Ac primò quidem totius rationis ignari, qui neque exercitationis ullam viam, neque aliquod præceptum artis esse arbitrarentur; tantum, quantum ingenio & cogitatione poterant, consequebantur. Post autem, auditis oratoribus Græcis, cognitisque eorum litteris, adhibitisque doctoribus, incredibili quodam nostri homines dicendi studio flagra-
verunt.

15. Excitabat eos magnitudo & varietas, multitudoque in omni genere causarum, ut ad eam doctrinam, quam suo quisque studio assecutus esset, adjungeretur usus frequens, qui omnium magistrorum praecepta superaret. Erant autem huic studio maxima, quæ nunc quoque sunt, exposita præmia, vel ad gratiam, vel ad opes, vel ad dignitatem. Ingenia verò (ut multis rebus possumus judicare) nostrorum hominum multum ceteris hominibus omnium gentium præstiterunt. Quibus de causis quis non jure miretur, ex omni memoria ætatum, temporum, civitatum, tam exiguum oratorum numerum inveniri? Sed nimirum majus est hoc quiddam, quàm homines opinantur, & pluribus ex artibus studiisque collectum.

V. Quis enim aliud in maxima discen-
tium multitudine, summâ magistrorum co-
piâ, præstantissimis hominum ingeniis, in-
finitâ causarum varietate, amplissimis elo-
quentiæ propositis præmiis, esse causæ pu-
tet, nisi rei quamdam incredibilem magni-
tudinem, ac difficultatem?

17. Est enim & scientia comprehenden-
da rerum plurimarum, sine qua verborum
volubilitas inanis atque irridenda est: &
ipsa oratio conformanda non solum elec-
tione, sed etiam constructione verbo-
rum: & omnes animorum motus, quos

A v

hominum generi rerum natura tribuit, penitus pernoscenti, quod omnis vis ratioque dicendi, in eorum, qui audiunt, mentibus, aut sedandis, aut excitandis expromenda est. Accedat eodem oportet lepos quidam, facetiæque & eruditio libero digna, celeritasque & brevis & respondendi, & laceffendi, subtili venustate, atque urbanitate conjuncta.

18. Tenenda præterea est omnis antiquitas, exemplorumque vis; neque legum, aut juris civilis scientia negligenda est. Nam quid ego de actione ipsa plura dicam? quæ motu corporis, quæ gestu, quæ vultu, quæ vocis conformatione, ac varietate moderanda est; quæ sola per se ipsa quanta sit, histrionum levis ars & scena declarat; in qua quum omnes in otis, & vocis, & motus moderatione elaborarent, quis ignorat, quam pauci sint, fuerintque, quos animo æquo spectare possimus? Quid dicam de thesauro rerum omnium memoria, quæ nisi custos inventis, cogitatisque rebus, & verbis adhibeatur, intelligimus, omnia, etiam si præclarissima fuerint, in oratore peritura.

19. Quamobrem mirari desinamus, quæ causa sit eloquentium paucitatis, quum ex iis rebus universis eloquentia constet, quibus in singulis elaborare permagnum est; hortemurque potius liberos nostros, cete-

rosque, quorum gloria nobis & dignitas cara est, ut animo rei magnitudinem complectantur, neque his aut præceptis, aut magistris, aut exercitationibus, quibus utuntur omnes, sed aliis quibusdam se id, quod expetunt, consequi posse confidant.

VI. Ac meâ quidem sententiâ nemo poterit esse omni laude cumulatus orator, nisi erit omnium rerum magnarum, atque artium scientiam consecutus. Etenim exterum cognitione efflorescat, & redundet oportet oratio; quæ, nisi subest res ab oratore percepta & cognita, inanem quamdam habet elocutionem, & pene puerilem.

21. Neque verò ego hoc tantum oneris imponam nostris præsertim oratoribus; in hac tanta occupatione urbis, ac vitæ, nihil ut his putem licere nescire: quamquam vis oratoris, professioque ipsa bene dicendi, hoc suscipere, ac polliceri videatur, ut omni de re, quæcumque sit proposita, ab eo ornate, copioseque dicatur.

22. Sed quia non dubito, quin hoc plebisque immensum, infinitumque videatur, & quod Græcos homines non solum ingenio, & doctrinâ, sed etiam otio, studioque abundantes; partitionem quamdam artium fecisse video, neque in universo genere singulos elaborasse, sed fe-

posuisse a ceteris dictionibus eam partem dicendi, quæ in forensibus disceptationibus iudiciorum, aut deliberationum versaretur, & id unum genus oratori reliquisse; non complectar in his libris amplius, quàm quod huic generi, re quæsità, & multum disputatâ, summorum hominum propè consensu est tributum.

23. Repetamque non ab incunabulis nostræ veteris puerilisque doctrinæ quemdam ordinem præceptorum, sed ea, quæ quondam accepi in nostrorum hominum eloquentissimorum, & omni dignitate principum, disputatione esse versata: non quod illa contempnam, quæ Græci, dicendi artifices, & doctores reliquerunt; sed quum illa pateant, in promptuque sint omnibus, neque ea interpretatione meâ aut ornatiùs explicari, aut planiùs exprimi possint, dabis hanc veniam, mi frater, ut opinor, ut eorum, quibus summa dicendi laus a nostris hominibus concessa est, auctoritatem Græcis anteponam.

VII. Quum igitur vehementiùs inveheretur in causam principum consul Philippus, Drusique tribunatus pro senatûs auctoritate susceptus, infringi jam, ac debilitari videretur: dici mihi memini, ludorum Romanorum diebus L. Crassum, quasi colligendi sui causâ, se in Tusculanum contulisse: venisse eodẽ, socer ejus qui fuerat,

Quintus Mucius dicebatur, & M. Antonius, homo & consiliorum in republica socius, & summa cum Crasso familiaritate conjunctus.

25. Exierant autem cum ipso Crasso, adolescentes duo, & Drusi maximè familiares, & in quibus magnam tum spem majores natu dignitatis suæ collocarant, C. Cotta, qui tum tribunatum plebis pètebat, & P. Sulpicius, qui deinceps eum magistratum petiturus putabatur.

26. Hi primo die de temporibus illis, deque universa republica, quam ob causam venerant, multum inter se usque ad extremum tempus diei colloqui sunt. Quod quidem in sermone multa divinitus a tribus illis consularibus Cotta deplorata, & commemorata narrabat; ut nihil incidisset postea civitati mali, quod non impendere illi tantò antè vidissent.

27. Eo autem omni sermone confecto, tantam in Crasso humanitatem fuisse, ut, quum lauti accubuissent, tolleretur omnis illa superioris tristitia sermonis; eaque esset in homine jucunditas; & tantus in jocando lepos, ut dies inter eos curiæ fuisse videretur, convivium Tusculani.

28. Postero autem die, quum illi majores natu satis quiescent, & in ambulationem ventum esset; dicebat tum Scævola duobus spatiis tribusve factis, dixisse, Cur

non imitamur, Crasse, Socratem illum, qui est in Phædro Platonis? nam me hæc tua platanus admonuit; quæ non minus ad opacandum hunc locum patulis est diffusa ramis, quàm illa, cujus umbram secutus est Socrates; quæ mihi videtur non tam ipsâ aquulâ, quæ describitur, quàm Platonis oratione crevisse: &, quod illè durissimis pedibus fecit, ut se abjiceret in herbam, atque ita illa, quæ philosophi divinitus ferunt esse dicta, loqueretur, id meis pedibus certè concedi est æquius. Tum Crassum, immo verò commodius etiam: pulvinosque poposcisse, & omnes in iis sedibus, quæ erant sub platano, confedissee dicebat.

VIII. Ibi, ut ex pristino sermone relaxarentur animi omnium, solebat Cotta narrare, Crassum sermonem quemdam de studio dicendi intulisse.

30. Qui quum ita esset exorsus: Non sibi cohortandum Sulpicium & Cottam, sed magis utrumque collaudandum videri, quòd tantam jam essent facultatem adepti, ut non æqualibus suis solùm anteponerentur, sed cum majoribus natu compararentur. Neque verò mihi quidquam, inquit, præstabilius videtur, quàm posse dicendo tenere hominum cœtus, mentes allicere, voluntates impellere quòd velis; unde autem velis, deducere. Hæc una res in omni

libero populo, maximèque in pacatis tranquillisque civitatibus, præcipuè semper floruit, semperque dominata est.

31. Quid enim est aut tam admirabile, quàm ex infinita multitudine hominum existere unum, qui id, quod omnibus naturâ sit datum, vel solus, vel cum paucis facere possit? aut tam jucundum cognitæ atque auditu, quàm sapientibus sententiis gravibusque verbis ornata oratio, & polita? aut tam potens, tamque magnificum, quàm populi motus, judicum religiones, senatûs gravitatem, unius oratione converti?

32. Quid porrò tam regium, tam liberale, tam munificum, quàm opem ferre supplicibus, excitare afflictos, dare salutem, liberare periculis, retinere homines in civitate? Quid autem tam necessarium, quàm tenere semper arma, quibus vel testus ipse esse possis, vel provocare improbos, vel te ulcisci lacessitus?

33. Age verò, ne semper forum, subsellia, rostra, curiamque meditare, quid esse potest in otio jucundius, aut magis proprium humanitatis, quàm sermo factus, ac nulla in re rudis? Hoc enim uno præstamus vel maximè feris, quòd colloquimur inter nos, & quòd exprimere dicendo sensa possumus. Quamobrem quis hoc non jure miretur, summèque in eo elaborandum esse arbitretur, ut, quo uno

homines maximè bestiis præstent ; in hoc hominibus ipsis antecellat ? Ut verò jam ad illa summa veniamus ; quæ vis alia potuit aut dispersos homines unum in locum congregare , aut a fera , agrestique vita ad hunc humanum cultum , civilemque deducere ; aut jam constitutis civitatibus , leges , judicia , jura describere ?

34. Ac , ne plura , quæ sunt pene innumerable , confectè , comprehendam brevè ; sic enim statuo , perfecti oratoris moderatione & sapientiâ , non solum ipsius dignitatem , sed & privatorum plurimorum , & universæ reipublicæ salutem maximè contineri. Quamobrem pergite , ut facitis , adolescentes ; atque in id studium , in quo estis , incumbite , ut & vobis honori , & amicis utilitati , & reipublicæ emolumento esse possitis.

IX. Tum Scævola comiter , ut solebat , Cetera , inquit , assentior Crasso , ne aut de C. Lælii , soceri mei , aut de hujus generi aut arte , aut gloriâ detraham : sed illa duo , Crasse , vereor , ut tibi possim concedere ; unum , quòd ab oratoribus civitates & ab initio constitutas , & sæpe conservatas esse dixisti : alterum , quòd , remoto foro , concione , judiciis , senatu , statuisti , oratorem in omni genere sermonis , & humanitatis esse perfectum.

36. Quis enim tibi hoc concesserit , aut

initio genus hominum in montibus ac silvis dissipatum, non prudentium consiliis compulsus potius, quàm disertorum oratione delinitum, se oppidis, mœnibusque sepsisse? aut verò reliquas utilitates, aut in instituendis, aut conservandis civitatibus, non a sapientibus & fortibus viris, sed a disertis, & ornatè dicentibus esse constitutas.

37. An verò tibi Romulus ille aut pastores & convenas congregasse, aut Sabiorum connubia conjunxisse, aut finitimorum vim repressisse eloquentiâ videtur, non consilio, & sapientiâ singulari? Quid enim? in Numa Pompilio, quid? in Ser. Tullio, quid? in ceteris regibus, quorum multa sunt eximia ad constituendam rem publicam, num quod eloquentiæ vestigium apparet? Quid? exactis regibus (tametsi ipsam exactionem mente, non linguâ, perfectam L. Bruti esse cernimus) sed deinceps omnia, nonne plena consiliorum, inania verborum videmus?

38. Ego verò si velim & nostræ civitatis exemplis uti, & aliarum, plura proferre possim detrimenta publicis rebus, quàm adjumenta per homines eloquentissimos importata: sed, ut reliqua prætermittam, omnium mihi videor, exceptis, Crasse, vobis duobus, eloquentissimos audisse Tib. & C. Sempronios, quorum pater, homo

prudens, & gravis, haudquaquam eloquens, & sæpe aliàs, & maximè censor, salutis reipublicæ fuit. Atque is non accuratâ quadam orationis copiâ, sed nutu atque verbo libertinos in urbanas tribus transtulit; quod nisi fecisset, rempublicam, quam nunc vix tenemus, jamdiu nullam haberemus. At verò ejus filii disertis, & omnibus vel naturæ vel doctrinæ præsiidiis ad dicendum parati, quum civitatem vel paterno consilio, vel avitis armis florentissimam accepissent, istâ præclarâ gubernatrice, ut ais, civitatum eloquentiâ rempublicam dissipaverunt.

X. Quid? leges veteres, moresque majorum; quid? auspicia, quibus & ego, & tu, Crasse, cum magna reipublicæ salute præsumus: quid? religiones & cæremoniæ: quid? hæc jura civilia, quæ jampridem in nostra familia sine ulla eloquentiæ laude versantur, num aut inventa sunt, aut cognita, aut omnino ab oratorum genere tractata?

40. Equidem & Servium Galbam memoriâ teneo, divinum hominem in dicendo, & M. Æmilium Porcinam, & C. ipsum Carbonem, quem tu adolescentulus perculisti, ignarum legum, hæsitantem in majorum institutis, rudem in jure civili: & hæc ætas nostra, præter te, Crasse, qui tuo magis studio, quam proprio munere aliquo diser-

orum, jus a nobis civile didicisti, quod interdum pudeat, juris ignara est.

41. Quòd verò in extrema oratione, quasi tuo jure, sumpsisti, oratorem in omnis sermonis disputatione copiosissimè posse versari, id, nisi hic in tuo regno flemus, non tulissem, multisque præssem, ui aut interdicto tecum contenderent, ut te ex jure manu confertam vocarent, uòd in alienas possessiones tam temerè ruisses.

42. Agerent enim tecum lege primùm Pythagorei omnes, atque Democritici, eterique jure suo physici vindicarent; ornati homines in dicendo & graves, quibuscum tibi justo sacramento contendere non liceret. Urgerent præterea philosophorum greges, jam ab illo fonte & capite Socrate, nihil te de bonis rebus, de vita, nihil de malis, nihil de animi perturbationibus, nihil de hominum moribus, nihil de ratione vitæ didicisse, nihil omnino quæsisse, nihil scire convincerent; & quum universi in te impetum fecissent, eum singulæ familiæ litem tibi intenderent.

43. Instaret Academia, quæ, quidquid dixisses, id te ipsum scire negaret. Stoici verò nostri disputationum suarum atque interrogationum laqueis te irretitum tenerent. Peripatetici autem etiam hæc ipsa,

quæ propria oratorum putas esse adjumenta, atque ornamenta dicendi, ab se peti vincerent oportere; ac non solum meliora, sed etiam multò plura Aristotelem, Theophrastumque de his rebus, quàm omnes dicendi magistros scripsisse ostenderent.

44. Missos facio mathematicos, grammaticos, musicos, quorum artibus vestra ista dicendi vis ne minimâ quidem societate conjungitur. Quamobrem ista tantâ, tamque multa, profitenda, Crasse, non censeo: satis id est magnum, quod potes præstare, ut in judiciis ea causa, quamcumque tu dicis, melior & probabilior esse videatur: ut in concionibus, ut in sententiis dicendis ad persuadendum tua plurimum valeat oratio: denique ut prudentibus disertè, stultis etiam verè dicere videaris. Hoc amplius si quid poteris, non id mihi videbitur orator, sed Crassus suâ quâdam propriâ, non communi oratorum facultate posse.

XI. Tum ille, Non sum, inquit, nescius, Scævola, ista inter Græcos dici, & disceptari solere: audiavi enim summos homines, quum quæstor ex Macedonia venissem Athenas, florente Academiâ, ut temporibus illis ferebatur; quòd eam Charmadas, & Clitomachus, & Æschines obtinebant. Erat etiam Metrodorus, qui cum illis unâ ipsum illum Carneadem diligen-

illis audierat, hominem omnium in dicendo, ut ferebant, acerrimum, & copiosissimum. Vigebat auditor Panætii illius tui Mnesarchus; & peripatetici Critolai Diodorus.

46. Multi erant præterea præclari in philosophia, & nobiles, a quibus omnibus inâ pene repelli voce oratorem a gubernaculis civitatum, excludi ab omni doctrina, rerumque majorum scientia, ac tantum in judicia & conciunculas, tamquam in aliquod pistrinum, detrudi, & compingi videbam.

47. Sed ego neque illis assentiebar, neque harum disputationum inventori, & principi longè omnium in dicendo gravissimo, & eloquentissimo, Platoni, cujus cum Athenis cum Charmada diligentius egi Gorgiam: quo in libro, hoc maxime admirabar Platónem, quòd mihi in oratoribus irridendis ipse esse orator summus videbatur. Verbi enim controversia jamdiu torquet Græculos homines, contentionis cupidiores quàm veritatis.

48. Nam si quis hunc statuit esse oratorem, qui tantummodo in jure, aut in judiciis possit, aut apud populum, aut in senatu copiosè loqui, tamen huic ipsi multa tribuat, & concedat necesse est. Neque enim sine multa pertractatione omnium rerum publicarum, neque sine legum, mo-

rum, juris scientiâ, neque naturâ homin-
um incognitâ, ac moribus, in his ipsis re-
bus satis callidè versari, & petite potest:
qui autem hæc cognoverit, sine quibus ne
illa quidem minima in causis quisquam rectè
tueri potest, quid huic abesse poterit de ma-
ximarum rerum scientia? Sin oratoris nihil
vis esse, nisi compositè, ornatè, copiosè
eloqui: quæro, id ipsum qui possit asse-
qui sine ea scientia, quam ei non concedi-
tis? Dicendi enim virtus, nisi ei, qui di-
cit, ea, de quibus dicit, percepta sint, ex-
stare non potest.

49. Quamobrem; si ornatè locutus est,
sicut fertur, & mihi videtur, physicus ille
Democritus; materies illa fuit physici, de
qua dixit: ornatus verò ipse verborum,
oratoris putandus est. Et, si Plato de re-
bus a civilibus controversiis remotissimis
divinitus est locutus, quod ego concedo:
si item Aristoteles, si Theophrastus, si
Carneades in rebus iis, de quibus disputa-
verunt, eloquentes, & in dicendo suaves,
atque ornati fuerunt: sint hæc res, de qui-
bus disputant, in aliis quibusdam studiis:
oratio quidem ipsa propria est hujus unius
rationis, de qua loquimur, & quærimus.
Etenim videmus, iisdem de rebus jejunè
quosdam, & exiliter, ut eum, quem acu-
tissimum ferunt, Chrysippum, disputa-
visse; neque ob eam rem philosophiæ non

atisfecisse, quòd non habuerit hanc dicendi ex arte alienam facultatem.

XII. Quid ergo interest? aut quì discernes eorum, quos nominavi, ubertatem in dicendo, & copiam, ab eorum exilitate, qui hac dicendi varietate & elegantia non utuntur? Unum erit profectò, quòd ii, qui bene dicunt, afferunt proprium; compositam orationem & ornatam; & artificio quodam & expolitione distinctam. Hæc autem oratio, si res non subest ab oratore percepta & cognita, aut nulla sit necesse est, aut omnium irrisione ludatur.

§ 1. Quid est enim tam furiosum, quàm verborum, vel optimorum atque ornatissimorum, sonitus inanis, nullâ subjectâ sententiâ, nec scientiâ? Quidquid erit igitur quacumque ex arte, quocumque de genere, id orator, si, tamquam clientis causam, didicerit, dicet melius & ornatiùs, quàm ille ipse ejus rei inventor, atque artifex.

§ 2. Nam si quis erit, qui hoc dicat, esse quasdam oratorum proprias sententias atque causas, & certarum rerum forensibus cancellis circumscriptam scientiam; fatebor equidem in his magis assiduè versari hanc nostram dictionem: sed tamen in his ipsis rebus permulta sunt, quæ isti magistri, quì rhetorici vocantur, nec tradunt, nec tenent.

53. Quis enim nescit, maximam vim existere oratoris in hominum mentibus vel ad iram, aut ad odium, aut dolorem incitandis, vel ab hisce iisdem permotionibus ad lenitatem, misericordiamque revocandis? quæ, nisi qui naturas hominum, vimque omnem humanitatis, causasque eas, quibus mentes aut incitantur, aut reflectuntur, penitus perspexerit, dicendo, quod volet, perficere non poterit.

54. Atqui totus hic locus philosophorum putatur proprius; neque orator, me auctore, umquam repugnabit: sed, quum illis cognitionem rerum concesserit, quod in ea solum illi voluerint elaborare; tractationem orationis, quæ sine illa scientia nulla est, sibi assumet. Hoc enim est proprium oratoris, quod sæpe jam dixi, oratio gravis, & ornata, & hominum sensibus, ac mentibus accommodata.

XIII. Quibus de rebus Aristotelem, & Theophrastum scripsisse fateor. Sed vide, ne hoc, Scævola, totum sit a me. Nam ego, quæ sunt oratori cum illis communia, non mutuor ab illis: isti quæ de his rebus disputant, oratorum esse concedunt. Itaque ceteros libros, artis isti suæ nomine, hos Rhetoricos & inscribunt, & appellant.

56. Etenim quum illi in dicendo incidant loci, quod persæpe evenit, ut de diis immortalibus,

immortalibus, de pietate, de concordia, de amicitia, de communi civium, de hominum, de gentium jure, de æquitate, de emperantia, de magnitudine animi, de omni virtutis genere sit dicendum, clamant, credo, omnia gymnasia, atque omnes philosophorum scholæ, sua hæc esse omnia propria; nihil omnino ad oratorem pertinere.

57. Quibus ego, ut de his rebus omnibus in angulis, consumendi otii causâ, disserant, quum concessero, illud tamen ratori tribuam, & dabo, ut eadem, de quibus illi tenui quodam, ex sanguique sermone disputant, hic cum omni gravitate & jucunditate explicet. Hæc ego cum ipsis philosophis tum Athenis differebam. Coëbat enim me M. Marcellus hic noster, qui nunc ædilis curulis est: & profectò, nisi ludos nunc faceret, huic nostro sermioni interesset; ac jam tum erat adolescentulus his studiis mirificè deditus.

58. Jam verò de legibus instituendis, de bello, de pace, de sociis, de vestigaliis, de jure civium generatim in ordines, tatesque descripto, dicant vel Græci, volunt, Lycurgum, aut Solonem (quamquam illos quidem censemus in numeroloquentium reponendos) scisse melius, iam Hyperidem aut Demosthenem, perfectos jam homines in dicendo, & perpo-

litos : vel nostri , decemviros qui XII tabulas perscripserunt , quos necesse est fuisse prudentes , antepoñant in hoc genere & Ser. Galbae , & socero tuo C. Lælio , quos constat dicendi gloriâ præstitisse. Numquam enim negabo , esse quasdam artes proprias eorum , qui in his cognoscendis , atque tractandis studium suum omne posuerunt : sed oratorem plenum atque perfectum esse eum dicam , qui de omnibus rebus possit variè , copiosèque dicere.

XIV. Etenim sæpe in iis causis , quas omnes proprias esse oratorum confitentur , est aliquid , quod non ex usu forensi , quem solum oratoribus conceditis , sed ex obscuriore aliqua scientia sit promendum , atque sumendum.

60. Quæro enim , num possit aut contra imperatorem , aut pro imperatore dici sine rei militaris usu , aut sæpe etiam sine regionum terrestrium aut maritimarum scientia : num apud populum de legibus jubendis , aut vetandis , num in senatu de omni reipublicæ genere dici sine summa rerum civilium cognitione , & prudentia : num admoveri possit oratio ad sensus animorum , atque motus vel inflammandos , vel etiam extinguendos (quod unum in oratore dominatur) sine diligentissima peruestigatione earum omnium rationum , quæ de naturis humani gene-

s ac moribus a philosophis explicantur.

61. Atque haud scio an minus hoc vobis sim probaturus ; equidem non dubitabo , quod sentio , dicere. Physica ista , & mathematica , & quæ paulò antè veterarum artium propria posuisti , scientiæ sunt eorum , qui illa profitentur : illustrare item oratione si quis istas ipsas artes velit , ad oratoris ei confugiendum est facultatem.

62. Neque enim , si Philonem illum architectum , qui Atheniensibus armamentarium fecit , constat perdisertè populo rationem operis sui reddidisse , existimandum est architecti potius artificio disertum , quam oratoris , fuisse. Nec , si huic M. Annio pro Hermodoro fuisset de navalium opere dicendum , non , quum ab illo cauere didicisset , ipse ornatè de alieno artificio , copiosèque dixisset. Neque verò Clepiades is , quo nos medico amico uti sumus , tum , quum eloquentiam docebat ceteros medicos , in eo ipso , quod ornatè dicebat , medicinæ facultate utebatur , non eloquentiæ.

63. Atque illud est probabilius , neque non verum , quod Socrates dicere solebat , omnes in eo , quod scirent , satis esse eloquentes. Illud verius , neque quemquam eo disertum esse posse , quod nesciat ; neque , si id optimè sciat , ignarusque sit

faciundæ ac poliendæ orationis, difertè id ipsum posse, de quo sciat, dicere.

XV. Quamobrem si quis universam, & propriam oratoris vim definire complectique vult, is orator erit, meâ sententiâ, hoc tam gravi dignus nomine, qui, quæcumque res inciderit, quæ sit dictione explicanda, prudenter, & compositè, & ornatè, & memoriter dicat, cum quadam etiam actionis dignitate.

65. Sin cuiquam nimis infinitum videtur, quod ita posui, *quæcumque de re*, licet hinc, quantum cuique videbitur, circumcidat, atque amputet: tamen illud tenebo, si, quæ ceteris in artibus aut studiis sita sunt, orator ignoret, tantumque ea teneat, quæ sint in disceptationibus, aut in usu forensi; tamen his de rebus ipsis si sit ei dicendum, quum cognoverit ab iis, qui tenent quæ sint in quaque re; multò oratorem meliùs, quàm ipsos illos, quorum eæ sunt artes, esse dicturum.

66. Ita si de re militari dicendum huic erit Sulpicio, quæret a C. Mario affini nostro, &, quum acceperit, ita pronuntiabit, ut ipsi C. Mario pene hic meliùs, quàm ipse, illa scire videatur: sin de jure civili; tecum communicabit, teque hominem prudentissimum, & peritissimum in iis ipsis rebus, quas abs te didicerit, dicendi arte superabit.

67. Sin quæ res inciderit, in qua de natura, de vitiis hominum, de cupiditatibus, de modo, de continentia, de dolore, de morte dicendum sit; forsitan, i ei sit visum (etsi hæc quidem nosse debet orator) cum Sex. Pompeio, erudito nomine in philosophia, communicabit. Hoc profectò efficiet, ut quamcumque rem a quoque cognorit, de ea multò dicat ornatius, quàm ille ipse, unde cognorit.

68. Sed si me audierit, quoniam philosophia in tres partes est distributa, in naturæ obscuritatem, in differendi subtilitatem, in vitam atque mores; duo illa relinquamus, idque largiamur inertiae nostræ: tertium verò, quod semper oratoris fuit, nisi tenebimus, nihil oratori, in quo magnus esse possit, relinquemus. Quare hic locus de vita & moribus totus est oratori perdiscendus: cetera si non didicerit, tamen poterit, si quando volet, ornare dicendo, quum erunt ad eum delata, & tradita.

XVI. Etenim si constat inter doctos, hominem ignarum astrologiæ, ornatissimis, atque optimis versibus Aratum, de cælo, stellisque dixisse: si de rebus rusticis hominem ab agro remotissimum, Nicandrum Colophonium, poëticâ quadam facultate, non rusticâ, scripsisse præclarè:

quid est, cur non orator de rebus iis eloquentissimè dicat, quas ad certam causam, tempusque cognorit?

70. Est enim finitimus oratori poëta, numeris adstrictior paulò, verborum autem licentiâ liberior, multis verò ornandi generibus socius, ac pene par: in hoc quidem certè propè idem, nullis ut terminis circumscribat, aut definiat jus suum, quominus ei liceat eâdem illâ facultate & copiâ vagari, quâ velit.

71. Namque illud quare, Scævola, negasti te fuisse laturum, nisi in meo regno esses, quòd in omni genere sermonis, in omni parte humanitatis dixerim oratorem perfectum esse debere? Numquam mehercule hoc dicerem, si eum, quem fingo, meipsum esse arbitrarer.

72. Sed, ut solebat C. Lucilius sæpe dicere (homo tibi subiratus, mihi propter eam ipsam causam minùs, quàm volebat, familiaris, sed tamen & doctus & perurbanus) sic sentio, neminem esse in oratorum numero habendum, qui non sit omnibus iis artibus, quæ sunt libero dignæ, perpolitus: quibus ipsis, si in dicendo non utimur, tamen apparet, atque exstat, utrùm simus earum rudes, an didicerimus.

73. Ut, qui pilâ ludunt, non utuntur in ipsâ lusione artificio proprio palæstræ,

ed indicat ipse motus, didicerintne pæstram, an nesciant: & qui aliquid fingunt, etsi tum picturâ nihil utuntur, tamen, utrum sciant pingere, an nesciant, non obscurum est: sic in orationibus hisce psis judiciorum, concionum, senatûs, etiamsi propriæ ceteræ non adhibeantur artes, tamen faciliè declaratur, utrum is qui dicat, tantummodò in hoc declamatorio sit opere jactatus, an ad dicendum omnibus ingenuis artibus instructus accesserit.

XVII. Tum ridens Scævola, Non luctabor, inquit, tecum, Crasse, amplius: id enim ipsum, quod contra me locutus es, artificio quodam es consecutus, ut & mihi, quæ ego vellem non esse oratoris, concederes; & ipsa, nescio quomodo, rursus detorqueres, atque oratori propria traderes.

75. Hæc, quum ego prætor Rhodum venissem, & cum summo illo doctore istius disciplinæ Apollonio, ea, quæ a Pannatio acceperam, contulissem: irrisit ille quidem, ut solebat, philosophiam, atque contempsit; multaque non tam graviter dixit, quam faceret. Tua autem fuit prætio ejusmodi, non ut ullam artem, doctrinamve contemneres, sed ut omnes comites ac ministras oratoris esse diceres.

76. Quas ego, si quis sit unus comple-

xus omnes, idemque si ad eas facultatem istam ornatissimæ orationis adjunxerit; non possum dicere, eum non egregium quemdam hominem, atque admirandum fore. Sed is, si quis esset, aut si etiam umquam fuisset, aut verò si esse posset, tu esses unus profectò, qui & meo judicio, & omnium, vix ullam ceteris oratoribus (pace horum dixerim) laudem reliquisti.

77. Verùm si tibi ipsi nihil deest, quod in forensibus rebus, civilibusque versetur, quin scias; neque eam tamen scientiam, quam adjungis oratori, complexus es; videamus, ne plus ei tribuas, quàm res & veritas ipsa concedat.

78. Hic Crassus, Memento, inquit, me non de mea, sed de oratoris facultate dixisse. Quid enim nos aut didicimus, aut scire potuimus, qui antè ad agendum, quàm ad cognoscendum venimus; quos in foro, quos in ambitione, quos in republica, quos in amicorum negotiis res ipsa antè confecit, quàm possemus aliquid de rebus tantis suspicari?

79. Quòd si tibi tantum in nobis videtur esse, quibus etiamsi ingenium, ut tu putas, non maximè defuit, doctrina certè, & otium, & hercule etiam studium illud discendi acerrimum defuit; quid censes, si ad alicujus ingenium vel majus illa, quæ ego non attigi, accefferint? qualem illum, & quantum oratorem futurum?

XVIII. Tum Antonius, Probas mihi, inquit, ista, Crasse, quæ dicis: nec dubito, quin multò locupletior in dicendo futurus sit, si quis omnium rerum atque artium rationem, naturamque comprehenderit.

81. Sed primùm id difficile est factu; præsertim in hac nostra vita, nostrisque occupationibus: deinde illud etiam vendendum est, ne abstrahamur ab hac exercitatione, & consuetudine dicendi populari, & forensi. Aliud enim mihi quoddam genus orationis esse videtur eorum hominum, de quibus paulò antè dixisti, quamvis illi ornate, & graviter aut de natura rerum, aut de humanis rebus loquantur. Nitidum quoddam genus est verborum, & lætum; sed palæstræ magis, & olei, quàm hujus civilis turbæ, ac fori.

82. Namque egomet, qui serò, ac leviter Græcas litteras attigissem, tamen quum proconsul in Ciliciam proficiscens Athenas venissem, complures tum ibi dies sum propter navigandi difficultatem commoratus: sed, quum quotidie mecum haberem homines doctissimos, eos ferè ipsos, qui abs te modò sunt nominati, quumque hoc, nescio quomodo, apud eos increbuisse, me in causis majoribus, sicuti te, solere versari; pro se quisque ut poterat, de officio & ratione oratoris disputabat.

83. Horum alii, sicut iste ipse Mnesarchus, hos, quos nos oratores vocaremus, nihil esse dicebat, nisi quosdam operarios linguâ celeri & exercitatâ: oratorem autem, nisi qui sapiens esset, esse neminem: atque ipsam eloquentiam, quod ex benedicendi scientia constaret, unam quamdam esse virtutem, & qui unam virtutem haberet, omnes habere, easque ipsas esse inter se æquales & pares: ita, qui esset eloquens, eum virtutes omnes habere, atque esse sapientem. Sed hæc erat spinosa quædam, & exilis oratio; longèque a nostris sensibus abhorrebat.

84. Charmadas verò multò uberius iisdem de rebus loquebatur; non quò aperiret sententiam suam (hic enim mos erat patrius Academiæ, adversari semper omnibus in disputando) sed quum maximè tamen hoc significabat, eos, qui rhetores nominarentur, & qui dicendi præcepta traderent, nihil planè tenere, neque posse quemquam facultatem assequi dicendi, nisi qui philosophorum inventa didicisset.

XIX. Disputabant contrà disertii homines, Athenienses, & in republica causisque versati, in quibus erat etiam is, qui nuper Romæ fuit, Menedemus, hospes meus: qui quum diceret esse quamdam prudentiam, quæ versaretur in perspicendis rationibus constituendarum, & regendarum

erum publicarum, excitabatur homo promptus ab homine abundanti doctrinâ, & quadam incredibile varietate rerum atque copiâ. Omnes enim partes illius ipsius prudentiæ petendas esse a philosophia docebat, neque ea, quæ statuerentur in re publica de diis immortalibus, de disciplina uventutis, de iustitia, de patientia, de temperantia, de modo rerum omnium, ceteraque, sine quibus civitates aut esse, aut bene moratæ esse non possent, usquam in eorum inveniri libellis.

86. Quod si tantam vim rerum maximarum arte suâ rhetorici illi doctores complecterentur; quærebat, cur de proœmiis: & de epilogis, & de hujusmodi nugis (sic enim appellabat) referti essent eorum libri, de civitatibus instituendis, de scribendis egibus, de æquitate, de iustitia, de fide, de frangendis cupiditatibus, de conformandis hominum moribus, littera in eorum libris nulla inveniretur.

87. Ipsa verò præcepta sic illudere solebat, ut ostenderet, non modò eos illius expertes esse prudentiæ, quam sibi adsciscerent, sed ne hanc quidem ipsam dicendi rationem ac viam nosse. Caput enim esse arbitrabatur oratoris, ut & ipsis, apud quos ageret, talis, qualem se ipse optaret, videretur: id fieri vitæ dignitate, de qua nihil rhetorici isti doctores in præceptis

suis reliquissent : & uti eorum , qui audirent , sic afficerentur animi , ut eos affici vellet orator ; quod item fieri nullo modo posse , nisi cognosceret is , qui diceret , quot modis hominum mentes , & quibus rebus , & quo genere orationis in quamque partem moverentur. Hæc autem esse penitus in media philosophia reclusa , atque abdita , quam isti rhetores ne primoribus quidem labris attigissent.

88. Ea Menedemus exemplis magis , quàm argumentis , conabatur refellere : memoriter enim multa ex orationibus Demosthenis præclare scripta pronuntians , docebat , illum in animis vel iudicum , vel populi , in omnem partem dicendo permovendis , non fuisse ignarum , quibus ea rebus consequeretur , quæ negaret ille sine philosophia quemquam scire posse.

XX. Huic ille respondebat non se negare , Demosthenem summam prudentiam , summamque vim habuisse dicendi : sed sive ille hoc ingenio potuisset , sive , id quod constaret , Platonis studiosus audiendi fuisset ; non , quid ille potuisset , sed quid isti docerent , esse quærendum.

90. Sæpe etiam in eam partem ferebatur oratione , ut omnino disputaret , nullam artem esse dicendi : idque quum argumentis docuerat , quod ita nati essemus , ut & blandiri suppliciter iis , a quibus esset :

petendum, & adversarios minaciter ter-
 ere possemus, & rem gestam exponere,
 & id, quod intenderemus, confirmare, &
 id, quod contrà diceretur, refellere, &
 id extremum deprecari aliquid, & con-
 queri; quibus in rebus omnis oratorum ver-
 aretur facultas; & quòd consuetudo, exer-
 citatioque & intelligendi prudentiam acue-
 ret, & eloquendi celeritatem incitaret:
 tum etiam exemplorum copiâ nitebatur.

91. Nam primum, quasi deditâ operâ, ne-
 minem scriptorem artis ne mediocriter qui-
 dem disertum fuisse dicebat, quum repeteret
 usque a Corace nescio quo, & Tisia, quos
 artis illius inventores & principes fuisse
 constaret: eloquentissimos autem homi-
 nes, qui ista nec didicissent, nec omnino
 cure curassent, innumerabiles quosdam no-
 minabat; in quibus etiam (sive ille irridens,
 sive quod ita putaret, atque ita audis-
 set) me in illo numero, qui illa non didicis-
 sem, & tamen, ut ipse dicebat, pos-
 sem aliquid in dicendo, proferebat. Quo-
 rum ego illi alterum, facile assentiebar,
 nihil me didicisse; in altero autem me illudi
 ab eo, aut etiam ipsum errare arbitrabar.

92. Artem verò negabat esse ullam, nisi
 quæ cognitis, penitusque perspectis, & in-
 finum exitum spectantibus, & numquam
 allentibus rebus contineretur: hæc autem
 omnia, quæ tractarentur ab oratoribus,

dubia esse & incerta ; quum & dicerentur ab iis , qui ea omnia non planè tenebant , & audirentur ab iis , quibus non scientia esset tradenda , sed exigui temporis aut falsa , aut certè obscura opinio.

93. Quid multa ? sic mihi tum persuadere videbatur , neque artificium ullum esse dicendi , neque quemquam posse , nisi qui illa , quæ a doctissimis hominibus in philosophia dicerentur , cognosset , aut calidè aut copiosè dicere. Quibus dicere Charmadas solebat , ingenium tuum , Crasse , vehementer admirans , me sibi perfacilem in audiendo , te perpugnacem in disputando esse visum.

XXI. Tumque ego hac eadem opinione adductus , scripsi etiam illud quodam in libello , qui me imprudentè , & invito excidit , & pervenit in manus hominum , *disertos* me cognosse nonnullos , *eloquentem* adhuc neminem : quòd eum statuebam disertum , qui posset satis acutè atque dilucidè apud mediocres homines ex communi quadam hominum opinione dicere ; eloquentem verò , qui mirabiliùs , & magnificentius augere posset , atque ornare quæ vellet , omnesque omnium rerum quæ ad dicendum pertinerent , fontes animo ac memoriâ contineret. Id si est difficile nobis , qui antè , quàm ad discendum ingressi sumus , obruimur ambitione & foro ; sit

amen in re positum, atque natura.

95. Ego enim, quantum auguror con-
ecturâ, quantaque ingenia in nostris ho-
minibus esse video, non despero fore ali-
quem aliquando, qui & studio acriore,
quàm nos sumus, atque fuimus, & otio-
re facultate discendi majore, ac maturiore,
& labore atque industriâ superiore, quan-
tè ad audiendum, legendum, scribendum-
que dediderit, exsistat talis orator, qua-
em quærimus; qui jure non solum diser-
tus, sed etiam eloquens dici possit: qui
tamen, meâ sententiâ, aut hic est jam Cras-
sus, aut, si quis pari fuerit ingenio, plu-
raque quàm hic, & audierit, & lectitarit,
& scripserit, paulum huic aliquid poterit
addere.

96. Hoc loco Sulpicius, Insperanti mihi,
inquit, & Cottæ, sed valde optanti utri-
que nostrum, cecidit, ut in istum sermo-
nem, Crasse, delaberemini. Nobis enim
nunc venientibus jucundum satis fore vide-
batur, si, quum vos de rebus aliis loque-
mini, tamen nos aliquid ex sermone
vestro memoriâ dignum excipere posse-
mus: ut verò penitus in eam ipsam to-
tius hujus vel studii, vel artificii, vel fa-
cultatis disputationem pene intimam per-
veniretis, vix optandum nobis vide-
batur.

97. Ego enim, qui ab ineunte ætate in-

census essem studio utriusque vestrum ,
Crassi verò etiam amore , quum ab eo nus-
quam discederem , verbum ex eo num-
quam elicere potui de vi ac ratione dicen-
di , quum & per memetipsum egissem , &
per Drusum sæpe tentassem : quo in genere
tu , Antoni , verè loquar , numquam mihi
percunctanti , aut quærenti aliquid , de-
fuiſti , & persæpe me , quæ soleres in di-
cendo observare , docuisti .

98. Nunc quoniam uterque vestrum
patefecit earum rerum ipsarum aditum ,
quas quærimus , & quoniam princeps Cras-
sus ejus sermonis ordiendi fuit , date nobis
hanc veniam , ut ea , quæ sentitis de omni
genere dicendi , subtiliter persequamini .
Quod quidem si erit a vobis impetratum ,
magnam habebò , Crasse , huic palæstræ &
Tusculano tuo gratiam , & longè Acade-
miæ illi ac Lyceo tuum hoc suburbanum
gymnasium anteponam .

XXII. Tum ille , Immo verò , inquit ,
Sulpici , rogemus Antonium , qui & po-
test facere id , quod requiris , & consuevit ,
ut te audio dicere . Nam me quidem sem-
per a genere hoc toto sermonis refugisse ,
& tibi cupienti atque instanti sæpissimè ne-
gasse , tute paulò antè dixisti . Quod ego
non superbiâ , neque inhumanitate facie-
bam , neque quò tuo studio rectissimo ,
atque optimo non obsequi vellem , præ-

ferim quum te unum ex omnibus ad dicendum maximè natum, aptumque cognossem; sed mehercule istius disputationis insolentiâ, atque earum rerum, quæ quasi in arte traduntur, inscitiâ.

100. Tum Cotta, Quoniam id, quod difficillimum nobis videbatur, ut omnino de his rebus, Crasse, loquerere, affecuti sumus; de reliquo jam nostra culpa fuerit, si te, nisi omnia, quæ percunctati erimus, explicâris, dimiserimus. De his, credo, rebus, inquit Crassus, ut in cretionibus scribi solet, *Quibus sciam, poteroque.*

101. Tum ille, Namque quod tu non poteris, aut nescies, quis nostrum tam impudens est, qui se scire, aut posse postulet? Jam verò istâ conditione, dum mihi liceat negare posse quod non potero, & fateri nescire quod nesciam, licet, inquit Crassus, vestro arbitratu percunctemini.

102. Atque, inquit Sulpicius, hoc primum ex te, de quo modò Antonius exposuit, quid sentias, quærimus; existimesne artem aliquam esse dicendi. Quid? mihi nunc vos, inquit Crassus, tamquam alicui Græculo otioso & loquaci, & fortasse docto atque erudito, quæstiunculam, de qua meo arbitratu loquar, ponitis? Quando enim me ista curasse, aut cogitasse arbitramini, & non semper irrisisse potius eorum hominum impudentiam, qui quum

in schola assedissent, ex magna hominum frequentia dicere juberent, si quis quid quæreretur?

103. Quod primum ferunt Leontinum fecisse Gorgiam: qui permagnum quiddam suscipere, ac profiteri videbatur, quum se ad omnia, de quibus quisque audire vellet, esse paratum denuntiaret. Postea verò vulgò hoc facere cœperunt, hodieque faciunt; ut nulla sit res, neque tanta, neque tantum nova, de qua non se omnia, quæ dici possunt, profiteantur esse dicturos.

104. Quodd si te, Cotta, arbitrarer, aut te, Sulpici, de iis rebus audire velle, adduxissem huc Græcum aliquem, qui vos istiusmodi disputationibus delectaret: quod ne nunc quidem difficile factu est: est enim apud M. Pisonem, adolescentem jam huius studio deditum, summo hominem ingenio, nostrique cupidissimum, peripateticus Staseas, homo nobis sanè familiaris, & ut inter homines peritos constare video, in illo suo genere omnium princeps.

XXIII. Quem tu mihi, inquit Mucius, Staseam, quem peripateticum narras? Gerendus est tibi mos adolescentibus, Crasse; qui non Græci alicujus quotidianam loquacitatem sine usu, neque ex scholis cantilenam requirunt, sed ex homine omnium sapientissimo atque eloquentissimo, atque ex eo, qui non in libellis, sed in maximis

usis, & in hoc domicilio imperii & glorie, sit consilio linguâque princeps; cujus astigia persequi cupiunt, ejus sententiam scitantur.

106. Equidem te quum in dicendo semper putavi deum, tum verò tibi numquam eloquentiæ majorem tribui laudem, quàm humanitatis: quâ nunc te uti vel maximè decet, neque defugere eam disputationem, ad quam te duo excellentis ingenii lolescentes cupiunt accedere.

107. Ego verò, inquit, istis obsequi studeo, neque gravabor breviter meo more, nihil quaque de re sentiam, dicere. Ac primum illud (quoniam auctoritatem tuam negligere, Scævola, fas mihi esse non puto) spondeo, mihi dicendi aut nullam artem, ut pertenuem videri, sed omnem esse contentionem inter homines doctos in verbis controversia positam.

108. Nam si ars ita definitur, ut paulò citè exposuit Antonius, ex rebus penitus inspectis, planèque cognitis, atque ab opinionis arbitrio sejunctis, scientiâque comprehensis; non mihi videtur ars oratoris esse ulla. Sunt enim varia, & ad vulgarem popularemque sensum accommodata, omnia genera hujus forensis nostræ actionis.

109. Sin autem ea, quæ observata sunt usu ac ratione dicendi, hæc ab homini-

bus callidis ac peritis animadversa ac notata, verbis designata, generibus illustrata, partibus distributa sunt (id quod fieri potuisse video) non intelligo, quamobrem non, si minùs illâ subtili definitione, at hac vulgari opinione, ars esse videatur. Sed sive est ars, sive artis quædam similitudo, non est quidem ea negligenda: verùm intelligendum est, alia quædam ad consequendam eloquentiam esse majora.

XXIV. Tum Antonius vehementer se assentire Crasso dixit, quòd neque ita amplecteretur artem, ut ii solerent, qui omnem vim dicendi in arte ponerent; neque rursus eam totam, sicut plerique philosophi facerent, repudiaret. Sed existimo, inquit, gratum te his, Crasse, facturum, si ista exposueris, quæ putas ad dicendum plus, quàm ipsam artem, posse prodesse.

111. Dicam equidem, quoniam institui, petamque a vobis, inquit, ne has meas ineptias efferatis: quamquam moderabor ipse, ne, ut quidam magister, atque artifex, sed quasi unus e togatorum numero, atque ex forensi usu homo mediocris, neque omnino rudis, videar, non ipse aliquid de me promisisse, sed fortuitò in sermonem vestrum incidisse.

112. Equidem, quum peterem magis-

tratus, solebam in prensando dimittere a me Scævolam, quum ei ita dicerem, me velle esse ineptum: id erat petere blandius; quod nisi ineptè fieret, bene non posset fieri: hunc autem esse hominem unum ex omnibus, quo præsentem ego ineptus esse minimè vellem: quem quidem nunc mearum ineptiarum testem & spectatorem fortuna constituit. Nam quid est ineptius, quàm de dicendo dicere, quum idipsum, dicere, numquam sit non ineptum, nisi quum est necessarium? Perge verò, Crasse, inquit Mucius. Istam enim culpam, quam vereris, ego præstabo.

XXV. Sic igitur censeo, inquit Crassus, naturam primùm, atque ingenium ad dicendum vim afferre maximam: neque verò istis, de quibus paulò antè dixit Antonius, scriptoribus artis, rationem dicendi & viam, sed naturam defuisse. Nam & animi, atque ingenii celeres quidam motus esse debent, qui & ad excogitandum acuti, & ad explicandum, ornandumque sint uberes, & ad memoriam firmi, atque diuturni.

114. Et si quis est, qui hæc putet arte accipi posse, quod falsum est (præclare enim se res habeat, si hæc accendi, aut commoveri arte possint: inferi quidem, & donari ab arte non possunt; omnia sunt

enim illa dona naturæ) quid de illis dicet, quæ certè cum ipso homine nascuntur, linguæ solutio, vocis sonus, latera, vires, conformatio quædam, & figura totius oris, & corporis?

115. Neque hæc ita dico, ut ars aliquid limare non possit: neque enim ignoro, & quæ bona sint, fieri meliora posse doctrinâ, & quæ non optima, aliquo modo acui tamen, & corrigi posse: sed sunt quidam aut ita linguâ hæsitantes, aut ita voce absoni, aut ita vultu motuque corporis vasti, atque agrestes, ut, etiamsi ingeniis, atque arte valeant, tamen in oratorum numerum venire non possint. Sunt autem quidam ita in iisdem rebus habiles, ita naturæ muneribus ornati, ut non nati, sed ab aliquo deo ficti esse videantur.

116. Magnum quoddam est onus atque munus, suscipere, atque profiteri, se esse, omnibus silentibus, unum maximis de rebus, magno in conventu hominum, audiendum. Adest enim ferè nemo, quin acutiùs, atque acriùs vitia in dicente, quàm recta videat. Ita, quidquid est, in quo offenditur, id etiam illa, quæ laudanda sunt, obruit.

117. Neque hæc in eam sententiam disputo, ut homines adolescentes, si quid naturale fortè non habeant, omnino a dicendi studio deterream. Quis enim non

videt, C. Cœlio; æquali meo, magno honori fuisse, homini novo, illam ipsam, quamcumque assequi potuerit, in dicendo mediocritatem? Quis vestrum æqualem, Q. Varium, vastum hominem, atque fœdum, non intelligit illâ ipsâ facultate, quamcumque habet, magnam esse in civitate gratiam consecutum?

XXVI. Sed quia de oratore quærimus, fingendus est nobis oratione nostrâ, detractis omnibus vitiis, orator, atque omni laude cumulatus. Neque enim, si multitudo litium, si varietas causarum, si hæc turba, & barbaria forensis dat locum vel vitiosissimis oratoribus, idcirco nos hoc, quod quærimus, omitemus. Itaque in iis artibus, in quibus non utilitas quæritur necessaria, sed animi libera quædam oblectatio, quàm diligenter, & quàm propè fastidiosè judicamus? Nullæ enim lites, neque controversiæ sunt, quæ cogant homines, sicut in foro non bonos oratores, item in theatro actores malos perpeti.

119. Est igitur oratori diligenter providendum, non uti illis satisfaciatur, quibus necesse est; sed ut iis admirabilis esse videatur, quibus liberè liceat judicare. Ac, si quæritis, planè, quid sentiam, enuntiabo apud homines familiarissimos, quod dhuc semper tacui, & tacendum putavi. Alii etiam qui optimè dicunt, quique

id facillimè, atque ornatissimè facere possunt, tamen, nisi timidè ad dicendum accedunt, & in ordienda oratione perturbantur, pene impudentes videntur: tametsi id accidere non potest.

120. Ut enim quisque optimè dicit, ita maximè dicendi difficultatem, variosque eventus orationis, expectationemque hominum pertimescit. Qui verò nihil potest dignum re, dignum nomine oratoris, dignum hominum auribus efficere, atque edere, is mihi, etiamsi commovetur in dicendo, tamen impudens videtur. Non enim pudendo, sed non faciendo id, quod non decet, impudentiæ nomen effugere debemus.

121. Quem verò non pudet (id quod in plerisque video) hunc ego non reprehensione solum, sed etiam pœnâ dignum puto. Equidem & in vobis animadvertere soleo, & in me ipso sæpissimè experior, ut exalbescam in principiis dicendi, & totâ mente atque omnibus artibus contremiscam. Adolescentulus verò sic initio accusationis exanimatus sum, ut hoc summum beneficium Q. Maximo debuerim, quod continuò consilium dimiserit, simul ac me fractum, ac debilitatum metu viderit.

122. Hic omnes assensi, significare inter sese, & colloqui cœperunt. Fuit enim mirificus quidam in Crasso pudor, qui tamen

men non modò non obesset ejus orationi, sed etiam probitatis commendatione prodesset.

XXVII. Tum Antonius, Sæpe, ut dicis, inquit, animadverti, Crasse, & te, & ceteros summos oratores, quamquam tibi par, meâ sententiâ, nemo umquam fuit, in dicendi exordio permoveri.

123. Cujus quidem rei quum causam quærerem, quidnam esset, cur, ut in quoque oratore plurimùm esset, ita maximè is pertimesceret, has causas inveniebam duas: unam, quòd intelligerent ii, quos usus ac natura docuisset, nonnumquam summis oratoribus non satis ex sententia eventum dicendi procedere: ita non injuriâ, quotiescumque dicerent, id, quod aliquando posset accidere, ne tum accideret, timere.

124. Altera est hæc, de qua queri sæpe soleo: ceterarum homines artium spectati, & probati, si quando aliquid minùs bene fecerunt, quàm solent, aut noluisse, aut valetudine impediti non potuisse consequi id quod scirent, putantur. Noluit, inquit, hodie agere Roscius; aut, Crudior fuit.

125. Oratoris peccatum, si quod est animadversum, stultitiæ peccatum videtur: stultitia autem excusationem non habet; quia nemo videtur, aut quia crudus

fuerit, aut quòd ita maluerit, stultus fuisse. Quòd etiam gravius iudicium in dicendo subimus: quoties enim dicimus, toties de nobis iudicatur: &, qui semel in gestu peccavit, non continuò existimatur nescire gestum; cuius autem in dicendo aliquid reprehensum est, aut æterna in eo, aut certè diuturna valet opinio tarditatis.

XXVIII. Illud verò, quod a te dictum est, esse permulta, quæ orator, nisi a natura haberet, non multùm a magistro adjuvaretur; valde tibi assentior, inque eo vel maximè probavi summum illum doctorem, Alabandensem Apollonium, qui quum mercede doceret, tamen non patiebatur, eos, quos iudicabat non posse oratores evadere, operam apud sese perdere, dimittebatque; & ad quam quemque artem putabat esse aptum, ad eam impellere atque hortari solebat.

127. Satis est enim ceteris artificiis percipiendis, tantummodo similem esse hominis; & id, quod tradatur, vel etiam inculcetur, si quis fortè sit tardior, posse percipere animo, & memoriâ custodire. Non quæritur mobilitas linguæ, non celeritas verborum, non denique ea, quæ nobis non possumus fingere, facies, vultus, sonus.

128. In oratore autem acumen dialecticorum, sententiæ philosophorum, verba

propè poëtarum, memoria jurisconsultorum, vox tragoëdorum, gestus pene summorum actorum est requirendus. Quamobrem nihil in hominum genere rarius perfecto oratore inveniri potest: quæ enim singularum rerum artifices singula si mediocriter adepti sunt, probantur, ea, nisi omnia summa sunt in oratore, probari non possunt.

129. Tum Crassus, Atqui vide, inquit, in artificio perquam tenui & levi, quanto plus adhibeatur diligentiae, quam in hac re, quam constat esse maximam. Sæpe enim soleo audire Roscium, quum ita dicat, se adhuc reperire discipulum, quem quidem probaret, potuisse neminem: non quò non essent quidam probabiles, sed quia, si aliquid modò esset vitii, id ferre ipse non posset. Nihil est enim tam insigne, nec tam ad diuturnitatem memoriæ stabile, quam id, in quo aliquid offenderis.

130. Itaque ut ad hanc similitudinem hujus histrionis, oratoriam laudem dirigamus; videtisne, quam nihil ab eo, nisi perfectè, nihil nisi cum summa venustate fiat? nihil nisi ita, ut deceat, & uti omnes moveat, atque delectet? Itaque hoc jamdiu est consecutus, ut, in quo quisque artificio excelleret, is in suo genere Roscius diceretur. Hanc ego absolutionem, perfectionemque in oratore desiderans, a qua

ipse longè absum, faciō impudenter: mihi enim volo ignosci, ceteris ipse non ignosco. Nam qui non potest, qui vitiosè facit, quem denique non decet, hunc (ut Apollonius jubebat) ad id, quod facere possit, detrudendum puto.

XXIX. Num tu igitur, inquit Sulpicius, me, aut hunc Cottam, jus civile, aut rem militarem jubes discere? nam quis ad ista summa, atque in omni genere perfecta potest pervenire? Tum ille, Ego verò, inquit, quod in vobis egregiam quamdam ac præclaram indolem ad dicendum esse cognovi, idcirco hæc exposui omnia: nec magis ad eos deterrendos, qui non possent, quàm ad vos, qui possetis, exacuendos accommodavi orationem meam: & quamquam in utroque vestrùm summum esse ingenium studiumque perspexi, tamen hæc, quæ sunt in specie posita, de quibus plura fortasse dixi, quàm solent Græci dicere, in te, Sulpici, divina sunt.

132. Ego enim neminem, nec motu corporis, neque ipso habitu atque formâ aptiorem, neque pleniorē, aut suaviorē mihi videor audisse: quæ quibus a natura minora data sunt, tamen illud assequi possunt, ut iis, quæ habeant, modicè & scienter utantur, & ut ne dedeceat. Id enim est maximè vitandum, & de hoc

uno minimè est facile præcipere, non mihi modò, qui sicut unus paterfamilias his de rebus loquor, sed etiam ipsi illi Roscio, quem sæpe audio dicere, caput esse artis, *decere*: quod tamen unum id esse, quod tradi arte non possit. Sed, si placet, sermonem aliò transferamus, & nostro more aliquando, non rhetorico, loquamur.

133. Minimè verò, inquit Cotta. Nunc enim te jam exoremus necesse est, quoniam retines nos in hoc studio, nec ad aliam dimittis artem, ut nobis explices, quidquid est, istud quod tu in dicendo potes: neque enim sumus nimis avidi: istà tuâ mediocri eloquentià contenti sumus, idque ex te quærimus (ut ne plus nos assequamur, quàm quantulum tu in dicendo assecutus es) quoniam, quæ a naturâ expetenda sunt, ea dicis non nimis deesse nobis, quid præterea esse assumendum putes.

XXX. Tum Crassus arridens: Quid censes, inquit, Cotta, nisi studium, & ardorem quemdam amoris? sine quo quum in vita nihil quidquam egregium, tum certè hoc, quod tu expetis, nemo umquam assequatur. Neque verò vos ad eam rem video esse cohortandos; quos, quum mihi quoque sitis molesti, nimis etiam flagrare intelligo cupiditate.

135. Sed profectò studia nihil profunt perveniendi aliquò, nisi illud, quod eò,

quò intendas, ferat, deducatque, cognor-
ris. Quare, quoniam mihi levius quoddam
onus imponitis, neque ex me de oratoris
arte, sed de hac mea, quantulacumque est,
facultate quæritis, exponam vobis: quam-
dam, non aut perreconditam; aut valde
difficilem, aut magnificam, aut gravem ra-
tionem consuetudinis meæ, quâ quondam
solitus sum uti, quum mihi in isto studio
versari adolescenti licebat.

136. Tum Sulpicius, O diem, Cotta,
nobis, inquit, optatum! quod enim neque
precibus umquam, nec insidiando, nec
speculando assequi potui, ut, quid Cras-
sus ageret, meditandi, aut dicendi causâ,
non modò videre mihi, sed ex ejus scrip-
tore, & lectore Diphilo suspicari liceret;
id spero nos esse adeptos, omniaque jam
ex ipso, quæ diu cupimus, cognituros.

XXXI. Tum Crassus, Atqui arbitror,
Sulpici, quum audieris, non tam te hæc
admitaturum, quæ dixerò, quam existima-
turum, tum, quum ea audire cupiebas,
causam, cur cuperes, non fuisse: nihil
enim dicam reconditum, nihil expecta-
tione vestrâ dignum, nihil aut inauditum
vobis, aut cuiquam novum. Nam princi-
piò illud, quod est hominè ingenuo, libe-
raliterque educato dignum, non negabo
me ista omnium communia & contrita præ-
cepta didicisse.

138. Primum, oratoris officium esse, dicere ad persuadendum accommodatè; deinde esse omnem orationem aut de infinitæ rei quæstione, sine designatione personarum, & temporum; aut de re certis in personis, ac temporibus locata.

139. In utraque autem re quidquid in controversiam veniat, in eo quæri solere, aut factumne sit, aut, si est factum, quale sit, aut etiam quo nomine vocetur, aut, quod nonnulli addunt, rectène factum esse videatur.

140. Existere autem controversias etiam ex scripti interpretatione, in quo aut ambiguitè quid sit scriptum, aut contrariè, aut ita, ut a sententia scriptum dissideat: his autem omnibus partibus subjecta quædam esse argumenta propria.

141. Sed causarum, quæ sint a communi quæstione sejunctæ, partim in judiciis versari, partim in deliberationibus: esse etiam genus tertium, quod in laudandis, aut vituperandis hominibus poneretur: certosque esse locos, quibus in judiciis uteremur, in quibus æquitas quæreretur: alios in deliberationibus, qui omnes ad utilitatem dirigerentur eorum, quibus consilium daretur: alios item in laudationibus, in quibus ad personarum dignitatem omnia referrentur.

142. Quumque esset omnis oratoris vis,

ac facultas in quinque partes distributa, ut deberet reperire primum, quid diceret; deinde inventa non solum ordine, sed etiam momento quodam, atque iudicio dispensare, atque componere; tum ea denique vestire, atque ornare oratione; post memoriâ sepire; ad extremum agere cum dignitate & venustate.

143. Etiam illa cognoram, & acceperam, antequam de re diceremus, initio conciliandos eorum esse animos, qui audirent; deinde rem demonstrandam; postea controversiam constituendam; tum id, quod nos intenderemus, confirmandum; post, quæ contrâ dicerentur, refellenda; extremâ autem oratione ea, quæ pro nobis essent, amplificanda & augenda; quæque essent pro adversariis, infirmenda atque frangenda.

XXXII. Audieram etiam quæ de orationis ipsius ornamentis traderentur; in qua præcipitur primum, ut purè, & Latine loquamur; deinde ut planè & dilucidè; tum ut ornatè; post ad rerum dignitatem aptè, & quasi decorè: singularumque rerum præcepta cognoram.

145. Quin etiam, quæ maximè propria essent naturæ, tamen his ipsis artem adhiberi videram. Nam de actione, & de memoria quædam brevia, sed magna cum exercitatione præcepta gustaram. In his

enim ferè rebus omnis istorum artificum doctrina versatur, quam ego si nihil dicam adjuvare, mentiar: habet enim quædam quasi ad commonendum oratorem, quò quidque referat, & quò intuens, ab eo, quodcumque sibi proposuerit, minùs aberret.

146. Verùm ego hanc vim intelligo esse in præceptis omnibus, non ut ea secuti oratores, eloquentiæ laudem sint adepti, sed, quæ suâ sponte homines eloquentes facerent, ea quosdam observasse, atque id egisse: sic esse non eloquentiam ex artificio, sed artificium ex eloquentia natum; quod tamen, ut antè dixi, non ejicio: est enim, etiamsi minùs necessarium ad bene dicendum, tamen ad cognoscendum, non illiberale.

147. Ea exercitatio quædam suscipienda vobis est: quamquam vos quidem jampridem estis in cursu: sed iis, qui ingrediuntur in stadium, quique ea, quæ agenda sunt in foro, tamquam in acie, possunt etiam nunc exercitatione quasi ludicrâ prædiscere, ac meditari.

148. Hanc ipsam, inquit Sulpicius, nosse volumus: attamen ista, quæ abs te breviter de arte decursa sunt, audire cupimus, quamquam sunt nobis quoque non inaudita. Verùm illa mox: nunc de ipsa exercitatione quid sentias, quærimus.

XXXIII. Equidem probò ista, Crassus inquit, quæ vos facere soletis, ut, causâ aliquâ positâ consimili causarum earum, quæ in forum deferuntur, dicatis quàm maximè ad veritatem accommodatè. Sed plerique in hoc vocem modò, neque eam scienter, & vires exercent suas, & linguæ celeritatem incitant, verborumque frequentiam delectantur: in quo fallit eos, quod audierunt, *dicendo homines, ut dicant, efficere solere.*

150. Verè enim etiam illud dicitur, *perverse dicere, homines, perverse dicendo, facillimè consequi.* Quamobrem in istis ipsis exercitationibus, etsi utile est, etiam subito sæpe dicere, tamen illud utilius, sumpto spatio ad cogitandum, paratius, atque accuratius dicere. Caput autem est, quod (ut verè dicam) minimè facimus (est enim magni laboris, quem plerique fugimus) quàm plurimum scribere. *Stilus optimus, & præstantissimus dicendi effector, ac magister:* neque injuriâ: nam si subitam & fortuitam orationem commentatio, & cogitatio facillè vincit; hanc ipsam profectò assidua, ac diligens scriptura superabit.

151. Omnes enim sive artis sunt loci, sive ingenii cujusdam atque prudentiæ, qui modò insunt in ea re, de qua scribimus, anquirentibus nobis, omnique acie ingenii contemplantibus ostendunt se & occurrunt;

omnesque sententiæ, verbaque omnia, quæ sunt cujusque generis maximè illustria, sula acumen stili subeant, & succedant necesse est: tum ipsa collocatio, conformatioque verborum perficitur in scribendo, non poëtico, sed quodam oratorio numero, & modo.

152. Hæc sunt, quæ clamores, & admirationes in bonis oratoribus efficiunt; neque ea quisquam, nisi diu, multumque scriptitarit, etiamsi vehementissimè se in his subitis dictionibus exercuerit, consequetur; & qui a scribendi consuetudine ad dicendum venit, hanc affert facultatem, ut, etiam subito si dicat, tamen illa, quæ dicantur, similia scriptorum esse videantur; atque etiam, si quando in dicendo scriptum attulerit aliquid, quum ab eo discesserit, reliqua similis oratio consequetur.

153. Ut concitato navigio, quum remiges inhibuerunt, retinet tamen ipsa navis motum, & cursum suum, intermisso impetu, pulsuque remorum: sic in oratione perpetuâ, quum scripta deficiunt, parem tamen obtinet oratio reliqua cursum, scriptorum similitudine & vi concitata.

XXXIV. In quotidianis autem commutationibus equidem mihi adolescentulus proponere solebam illam exercitationem: maximè, quâ C. Carbonem nostrum illum inimicum solitum esse uti sciebam, ut aut.

versibus propositis quàm maximè gravibus, aut oratione aliquâ lectâ ad eum finem, quem memoriâ possem comprehendere, eam rem ipsam, quam legissem, verbis aliis quàm maximè possem lectis pronuntiarem. Sed post animadverti, hoc esse in hoc vitii, quòd ea verba, quæ maximè ejusque rei propria, quæque essent ornatissima atque optima, occupasset, aut Ennius, si ad ejus versus me exercerem, aut Gracchus, si ejus orationem mihi fortè proposuissem: ita, si iisdem verbis uterer, nihil prodesse; si aliis, etiam obesse, quum minùs idoneis uti consuescerem.

155. Postea mihi placuit, eoque summus adolescens, ut summorum oratorum Græcas orationes explicarem: quibus lectis hoc assequebar, ut, quum ea, quæ legerem Græcè, Latine redderem, non solum optimis verbis uterer, & tamen usitatis, sed etiam exprimerem quædam verba imitando, quæ nova nostris essent, dummodo essent idonea.

156. Jam vocis, & spiritûs, & totius corporis, & ipsius linguæ motus, & exercitationes, non tam artis indigent, quàm laboris: quibus in rebus habenda est ratio diligenter, quos imitemur, quorum similes velimus esse. Intuendi nobis sunt non solum oratores, sed etiam actores, ne malâ consuetudine ad aliquam deformitatem pravitatemque veniamus.

157. Exercenda est etiam memoria, ediscendis ad verbum quàm plurimis & nostris scriptis, & alienis. Atque in eâ exercitatione non sanè mihi displicet adhibere, si consueris, etiam istam locorum simulacrorumque rationem, quæ in arte traditur. Educenda deinde dictio est ex hac domestica exercitatione, & umbratili, medium in agmen, in pulverem, in clamorem, in castra, atque in aciem forensem: fubeundus usus omnium, & periclitandæ vires ingenii; & illa commentatio inclusa, in veritatis lucem proferenda est.

158. Legendi etiam poëtæ, cognoscenda historia, omnium bonarum artium scriptores ac doctores & legendi & pervolvendi, & exercitationis causâ laudandi, interpretandi, corrigendi, vituperandi, refellendi; disputandumque de omni re in contrarias partes, &, quidquid erit in quaque re, quod probabile videri possit, eliciendum atque dicendum.

159. Perdiscendum jus civile, cognoscendæ leges, percipienda omnis antiquitas, senatoria consuetudo, disciplina rei publicæ, jura sociorum, foedera, pactiones, causa imperii cognoscenda est. Libandus est etiam ex omni genere urbanitatis facetiarum quidam lepos, quo, tamquam sale, perspergatur omnis oratio. Effudi vobis omnia, quæ sentiebam; quæ fortasse,

quemcumque patremfamilias attipuissetis ex aliquo circulo, eadem vobis percunctantibus respondisset.

XXXV. Hæc quum Crassus dixisset, silentium est consecutum. Sed quamquam satis iis, qui aderant, ad id, quod erat propositum, dictum videbatur, tamen sentiebant celerius esse multò, quàm ipsi velent, ab eo peroratum. Tum Scævola, Quid est, Cotta? inquit, quid tacetis? nihilne vobis in mentem venit, quod præterea a Crasso requiratis?

161. Immo id mehercule, inquit, ipsum attendo. Tantus enim cursus verborum fuit, & sic evolavit oratio, ut ejus vim, atque incitationem adspexerim; vestigia, ingressumque vix viderim: & tamquam in aliquam locupletem ac refertam domum venerim, non explicatâ veste, neque proposito argento, neque tabulis & signis propalam collocatis, sed his omnibus multis, magnificisque rebus constructis ac reconditis: sic modò in oratione Crassi divitias, atque ornamenta ejus ingenii per quædam involucra, atque integumenta perspexi; sed ea quum contemplari cuperem, vix adspiciendi potestas fuit. Ita neque hoc possum dicere, me omnino ignorare quid possideat, neque planè nosse, ac vidisse.

162. Quin tu igitur facis idem, inquit Scævola, quod faceres, si in aliquam do-

mum, plenam ornamentorum illam, venisſes? ſi ea ſepoſita, ut dicis, eſſent; tuque valde ſpectandi cupidus eſſes; non dubitares rogare dominum, ut proferri juberet, præſertim ſi eſſes familiaris: ſimiliter nunc petis a Crasso, ut eam copiam ornamentorum ſuorum, quam conſtructam uno in loco, quaſi per tranſennam prætereuntes ſtriſtim adſpeximus, in lucem proferat, & ſuo quidque in loco collocet?

163. Ego verò, inquit Cotta, a te peto, Scævola: me enim, & hunc Sulpicium impedit pudor ab homine omnium graviſſimo, qui genus hujusmodi diſputationis ſemper contempſerit, hæc, quæ iſti forſitan puerorum elementa videantur, exquirere. Sed tu hoc nobis da, Scævola, & perſice, ut Crasſus hæc, quæ coarctavit, & peranguſtè reſerſit in oratione ſua, dilatet nobis, atque explicet.

164. Ego mehercule, inquit Mucius, antea veſtrâ magis hoc cauſâ volebam, quàm meâ: neque enim tantopere hanc a Crasso diſputationem deſiderabam, quantopere ejus in cauſis oratione deſector. Nunc verò, Crasſe, meâ quoque etiam cauſâ rogo, ut quoniam tantum habemus otii, quantum jamdiu nobis non contigit; ne graveris exædificare id opus, quod inſtituiſti. Formam enim totius negotii opinione majorem, melioremque video; quam vehementer probo.

XXXVI. Enimvero, inquit Crassus, mirari satis non queo; etiam te hæc, Scævola, desiderare, quæ neque ego teneo, uti ii, qui docent; neque sunt ejus generis; ut, si optimè tenerem, digna essent istâ sapientiâ, ac tuis auribus. Ain' tu, inquit ille? si de istis communibus & pervagatis vix huic ætati audiendum putas, etiamne illa negligere possumus, quæ tu oratori cognoscenda esse dixisti, de naturis hominum, de moribus, de rationibus iis, quibus hominum mentes & incitarentur, & reprimerentur, de historia, de antiquitate, de administratione reipublicæ, denique de nostro ipso jure civili? Hanc enim ego omnem scientiam, & copiam rerum in tua prudentia sciebam inesse: in oratoris vero instrumento tam lautam suppellectilem numquam videram.

166. Potes igitur, inquit Crassus (ut alia omittam innumerabilia, & immensa, & ad ipsum tuum jus civile veniam) oratores putare eos, quos multas horas expectavit, quum in campum properaret, & ridens & stomachans Scævola, quum Hypseus maximâ voce, plurimis verbis a M. Crasso prætore contenderet, ut ei, quem defendebat, causâ cadere liceret: Cn. autem Octavius, homo consularis, non minus longâ oratione recusaret, ne adversarius causâ caderet, ac ne is, pro quo ipse di-

ceret, turpi tutelæ judicio, atque omni molestiâ, stultitiâ adversarii, liberaretur?

167. Ego verò istos, inquit (memini enim mihi narrare Mucium) non modò oratoris nomine, sed ne foro quidem dignos putarim. Atqui non defuit illis patronis, inquit Crassus, eloquentia, neque dicendi ratio, aut copia, sed juris civilis prudentia; quòd alter plus, lege agendo, petebat, quàm quantum lex in XII tabulis permiserat; quod quum impetrasset, causâ caderet: alter iniquum putabat plus secum agi, quàm quod erat in actione; neque intelligebat, si ita esset actum, litem adversarium perditurum.

XXXVII. Quid? his paucis diebus, nonne, nobis in tribunali Q. Pompeii, prætoris urbani, familiaris nostri, sedentibus, homo ex numero disertorum postulabat, ut illi, unde peteretur, vetus atque usitata exceptio daretur, *Cujus pecuniæ dies fuisset?* quod petitoris causâ comparatum esse non intelligebat: ut, si ille infitiator probasset judici, antè petitam esse pecuniam, quàm esset cœpta deberi, petitor, rursus quum peteret, exceptione excluderetur, *Quòd ea res in judicium antea venisset.*

169. Quid ergo hoc fieri turpius, aut dici potest, quàm eum, qui hanc personam suscepit, ut amicorum controversias,

causasque rueatur, laborantibus succurrat; ægris medeatur, afflictos excitet; hunc in minimis tenuissimisque rebus ita labi, ut aliis miserandus, aliis irridendus esse videatur?

170. Equidem propinquum nostrum P. Crassum illum Divitem, & multis aliis in rebus elegantem hominem & ornatum, & præcipuè in hoc efferendum & laudandum puto, quod, quum P. Scævola frater esset, solitus est ei persæpe dicere, neque illum in jure civili satis illi arti facere posse, nisi dicendi copiam assumpsisset (quod quidem hic, qui mecum consul fuit, filius ejus est consecutus) neque se antè causas amicorum tractare, atque agere cœpisse, quàm jus civile didicisset.

171. Quid verò ille M. Cato? nonne & eloquentiâ tantâ fuit, quantam illa tempora, atque illa ætas in hac civitate ferè maximam potuit, & juris civilis omnium peritissimus? Verecundius hac de re jamdudum loquor, quod adest vir in dicendo summus, quem ego unum oratorem maximè admirror: sed tamen idem hoc semper jus civile contempsit. Verum, quoniam sententiæ, atque opinionis meæ voluistis esse participes, nihil occultabo; & quoad potero, vobis exponam, quid de quaque re sentiam.

XXXVIII. Antonii incredibilis quæ-

dam, & propè singularis, & divina vis ingenii videtur, etiamsi hac scientiâ juris nudata sit, posse faciliè ceteris armis prudentiæ causas tueri, atque defendere. Quamobrem hic nobis sit exceptus: ceteros verò non dubitabo primùm inertiae condemnare sententiâ meâ, post etiam impudentiæ.

173. Nam volitare in foro, hæere in jure ac prætorum tribunalibus, judicia privata magnarum rerum obire, in quibus sæpe non de facto, sed de æquitate ac jure certetur, jactare se in causis centumviralibus, in quibus usufructuorum, tutelarum, gentilitatum, agnationum, alluvionum, circumluvionum, nexorum, mancipiorum, parietum, luminum, fillicidiorum, testamentorum ruptorum aut ratorum, ceterarumque rerum innumerabilium jura versentur, quum omnino, quid suum, quid alienum; quare denique civis aut peregrinus, servus aut liber quispiam sit, ignoret, insignis est impudentiæ.

174. Illa verò deridenda arrogancia est, in minoribus navigiis rudem esse se confiteri; quinquereemes, aut etiam majores, gubernare didicisse. Tu mihi quum in circulo decipiare adversarii stipulationunculâ; & quum obsignes tabellas clientis tui, quibus in tabellis id sit scriptum, quò ille capiat, ego tibi ullam causam majorem com-

mittendam putem? Citiùs hercule is, qui duorum scalmorum naviculam in portu everterit, in Euxino ponto Argonautarum navem gubernarit.

175. Quid, si ne parvæ quidem causæ sunt, sed sæpe maximæ, in quibus certatur de jure civili; quod tandem os est illius patroni, qui ad eas causas sine ulla scientia juris audet accedere? Quæ potuit igitur esse causa major, quàm illius militis; de cujus morte, quum domum falsus ab exercitu nuntius venisset, & pater ejus, re creditâ, testamentum mutasset, & quem ei visum esset, fecisset heredem, essetque ipse mortuus, res delata est ad centumviros, quum miles domum revenisset, egissetque lege in hereditatem paternam testamento exheres filius? Nempe in ea causa quæsitum est de jure civili, possetne paternorum bonorum exheres esse filius, quem pater testamento neque heredem, neque exheredem scripsisset nominatim.

XXXIX. Quid, qua de re inter Marcellos, & Claudios patricos centumviri judicarunt? quum Marcelli ab liberti filio stirpe, Claudii patricii, ejusdem nominis hereditatem gente ad se rediisse dicerent, nonne in ea causa fuit oratoribus de toto stirpis ac gentilitatis jure dicendum?

177. Quid, quod item in centumvirali judicio certatum esse accepimus qui Ro-

mam in exsilium venisset, cui Romæ exsulare jus esset, si se ad aliquem quasi patronum applicavisset, intestatōque esset mortuus, nonne in ea causa jus applicationis, obscurum sanè & ignotum, patefactum in judicio, atque illustratum est a patrono?

178. Quid nuper, quum ego C. Sergii Auratæ contra hunc nostrum Antonium judicio privato causam defenderem, nonne omnis nostra in jure versata defensio est? Quum enim Marius Gratidianus ædes Auratæ vendidisset, neque servire quamdam earum ædium partem in Mancipii lege dixisset; defendebamus, quidquid fuisset incommodi in Mancipio, id si venditor scisset, neque declarasset, præstare debere.

179. Quo quidem in genere familiaris noster M. Bucculeius, homo neque meo judicio stultus, & suo valdè sapiens, & a juris studio non abhorrens, simili in re quodam modo nuper erravit. Nam quum ædes L. Fusio venderet, in Mancipio lumina, uti tum essent, ita recepit. Fusius autem, simul atque ædificari cœptum est in quadam parte urbis, quæ modò ex illis ædibus conspici posset, egit statim cum Bucculeio, quòd; cuicumque particulæ cœli officeretur, quamvis esset procul, mutari lumina putabat.

180. Quid verò? M. Curii causa, & M. Coponii nuper apud centumviros, quo

concurſu hominum, quâ expectatione de-
fenſa eſt? quum Q. Scævola, æqualis, &
collega meus, homo omnium & disciplinâ
juris civilis eruditiffimus, & ingenio, pru-
dentiâque acutiſſimus, & oratione maximè
limatus atque ſubtilis, atque, ut ego ſoleo
dicere, juris peritorum eloquentiſſimus,
èloquentium juris peritiſſimus, ex ſcripto
teſtamentorum jura defenderet, negaret-
que, niſi poſtumus & natus, &, ante-
quam in ſuam tutelam veniſſet, mortuus
eſſet, heredem eum eſſe poſſe, qui eſſet
ſecundùm poſtimum & natum, & mor-
tuum, heres inſtitutus; ego autem defen-
derem, hac eum tum mente fuiſſe, qui
teſtamentum feciſſet, ut, ſi filius non eſſet,
qui in tutelam veniret, M'. Curius eſſet
heres. Num deſtitit uterque noſtrùm in ea
cauſa, in auctoritatibus, in exemplis, in
teſtamentorum formulis, hoc eſt, in medio
jure civili verſari?

XL. Omitto jam plura exempla cauſa-
rum ampliſſimarum, quæ ſunt innumera-
bilia. Capitis noſtri ſæpe poteſt accidere
ut cauſæ verſentur in jure. Etenim ſic C.
Mancinum, nobiliſſimum, atque optimum
virum, ac conſularem, quum eum prop-
ter invidiam Numantini fœderis paterpa-
tratus ex S. C. Numantinis deditiſſet,
eumque illi non recepiffent, poſteaue
Mancinus domum reveniſſet, neque in ſe-

natum introire dubitasset; P. Rutilius; M. filius, tribunus plebis de senatu jussit educi, quòd eum civem negaret esse; quia memoriâ esset proditum, quem pater suus, aut populus vendidisset, aut paterpatratus dedidisset, ei nullum esse postliminium.

182. Quam possumus reperire ex omnibus rebus civilibus causam, contentionemque majorem quàm de ordine, de civitate, de libertate, de capite hominis consularis, præsertim quum hæc non in crimine aliquo, quod ille posset infitiari, sed in civili jure consisteret? Similique in genere, inferiore ordine, si quis apud nos servisset ex populo fœderato, seseque liberasset, ac postea domum revenisset; quæsitum est apud majores nostros, num is ad suos postliminio rediisset, & amisisset hanc civitatem.

183. Quid? de libertate, quo judicium gravius esse nullum potest; nonne ex jure civili potest esse contentio, quum quæritur, is, qui domini voluntate census sit, continuone, an ubi lustrum conditum; liber sit? Quid, quod usu, memoriâ patrum, venit, ut paterfamilias, qui ex Hispania Romam venisset, quum uxorem prægnantem in provincia reliquisset, Romæque alteram duxisset, neque nuntium priori remisisset, mortuusque esset intestatò, & ex utraque filius natus esset; mediocrisne res in controversiam adducta est? quum quæreretur

de duobus civium capitibus, & de puero; qui ex posteriore natus erat, & de ejus matre; quæ, si judicaretur certis quibusdam verbis, non novis nuptiis, fieri cum superiore divortium, in concubinæ locum duceretur.

184. Hæc igitur, & horum similia jura suæ civitatis ignorantem, erectum & celsum, alacri & prompto ore, ac vultu; huc atque illuc intuentem, vagari magna cum caterva toto foro, præsidium clientibus, atque opem amicis, & propè cunctis civibus lucem ingenii, & consilii sui porrigentem, atque tendentem, nonne in primis flagitiosum putandum est?

XLI. Et quoniam de impudentia dixi, castigemus etiam segnitiam hominum, atque inertiam. Nam si esset ista cognitio juris magna ac difficilis, tamen utilitatis magnitudo deberet homines ad suscipiendum discendi laborem impellere. Sed, ô dii immortales, non dicerem hoc audiente Scævola, nisi ipse dicere soleret, nullius artis faciliorem sibi cognitionem videri.

186. Quod quidem certis de causis a plerisque aliter existimatur: primum quia veteres illi, qui huic scientiæ præfuerunt, obtinendæ atque augendæ potentiæ suæ causâ, pervulgari artem suam noluerunt: deinde, posteaquam est editum, expositis a Cn. Flavio primum actionibus, nulli fuerunt,

fuerunt, qui illa artificiosè digesta generatim componerent. Nihil est enim, quod ad artem redigi possit, nisi ille prius, qui illa tenet, quorum artem instituere vult, habeat illam scientiam, ut ex iis rebus, quarum ars nondum sit, artem efficere possit. Hoc video, dum breviter voluerim dicere, dictum a me esse paulò obscurius: sed experiar, & dicam, si potero, planius.

XLII. Omnia ferè, quæ sunt conclusa, nunc artibus, dispersa, & dissipata quondam fuerunt; ut in musicis, numeri, & voces, & modi: in geometria, lineamenta, formæ, intervalla, magnitudines: in astrologia, cœli conversio, ortus, obitus, motusque siderum: in grammaticis, poëtarum pertractatio, historiarum cognitio, verborum interpretatio, pronuntiandi quidam sonus: in hac denique ipsa ratione dicendi, excogitare, ornare, disponere, meminisse, agere; ignota quondam omnibus, & diffusa latè videbantur.

188. Adhibita est igitur ars quædam extrinsecus ex alio genere quodam, quod sibi totum philosophi assumunt, quæ rem dissolutam, divulsamque conglutinaret; & ratione quadam constringeret.

189. Sit ergo in jure civili finis hic, legitimæ, atque usitatæ in rebus causisque civium, æquabilitatis conservatio. Tum sunt

notanda genera, & ad certum numerum paucitatemque revocanda (genus autem est id, quod sui similes communione quadam, specie autem differentes, duas, aut plures complectitur partes: partes autem sunt, quæ generibus iis, ex quibus emanant, subjiciuntur) omniaque, quæ sunt vel generum vel partium nomina, definitionibus, quam vim habeant, est exprimendum. Est enim definitio, earum rerum, quæ sunt ejus rei propriæ, quam definire volumus, brevis, & circumscripta quædam explicatio.

190. Hisce ego rebus exempla adjungerem, nisi, apud quos hæc haberetur oratio, cernerem: nunc complectar quod proposui, brevi. Si enim aut mihi facere licuerit, quod jamdiu cogito, aut alius quispiam, aut me impedito occuparit, aut mortuo effecerit, ut primum omne jus civile in genera digerat, quæ perpauca sunt; deinde eorum generum quasi quædam membra dispertiat; tum propriam cujusque vim definitione declaret; perfectam artem juris civilis habebitis, magis magnam atque uberem, quam difficilem atque obscuram. Atque interea tamen, dum hæc, quæ dispersa sunt, coguntur, vel passim licet carpentem, & colligentem undique, repleti justâ juris civilis scientiâ.

XLIII. Nonne videtis, equitem Roma-

num, hominem acutissimo omnium ingenio, sed minime ceteris artibus eruditum, C. Aculeonem, qui mecum vivit, semperque vixit, ita tenere jus civile, ut ei, quum ab hoc discesseritis, nemo de iis, qui peritissimi sunt, anteponatur?

192. Omnia enim sunt posita ante oculos, collocata in usu quotidiano, in congressione hominum, atque in foro; neque ita multis litteris, aut voluminibus magnis continentur: eadem enim sunt elata primum a pluribus; deinde, paucis verbis commutatis, etiam ab iisdem scriptoribus scripta sunt sapius.

193. Accedit verò, quò facilius percipi cognoscique jus civile possit (quod minime plerique arbitrantur) mira quædam in cognoscendo suavitas, & delectatio. Nam, sive quæ aliena studia delectant, plurima est in omni jure civili, & in pontificum libris, & in XII tabulis antiquitatis effigies, quòd & verborum prisca vetustas cognoscitur, & actionum genera quædam, majorum consuetudinem vitamque declarant: sive quis civilem scientiam contempletur (quam Scævola non putat oratoris esse propriam, sed cujusdam ex alio genere prudentiæ) totam hanc, descriptis omnibus civitatis utilitatibus ac partibus, XII tabulis contineri videbitis: sive quem ista præpotens, & gloriosa philosophia de-

lectat, dicam audacius, hosce habet fontes omnium disputationum suarum, qui jure civili & legibus continentur.

194. Ex his enim & dignitatem maximè expetendam videmus, quum verus, justus, atque honestus labor honoribus, præmiis, splendore decoratur; vitia autem hominum atque fraudes, damnis, ignominiiis, vinculis, verberibus, exsiliis, morte multantur: & docemur non infinitis, concertationumque plenis disputationibus, sed auctoritate, nutuque legum domitas habere libidines, coercere omnes cupiditates, nostra tueri, ab alienis mentes, oculos, manus abstinere.

XLIV. Fremant omnes licet, dicam quod sentio: bibliothecas mehercule omnium philosophorum unus mihi videtur XII tabularum libellus, si quis legum fontes & capita viderit, & auctoritatis pondere, & utilitatis ubertate superare.

196. Ac si nos, id quod maximè debet, nostra patria delectat, cujus rei tanta est vis, ac tanta natura, ut Ithacam illam in asperrimis saxulis, tamquam nidulum, affixam, sapientissimus vir immortalitati anteponeret; quo amore tandem inflammati esse debemus in ejusmodi patriam, quæ una in omnibus terris domus est virtutis, imperii, dignitatis? cujus primùm nobis mens, mos, disciplina, nota esse debet;

vel quia est patria parens omnium nostrum, vel quia tantâ sapientiâ fuisse in jure constituendo putanda est, quantâ fuit in his tantis opibus imperii comparandis.

197. Percipietis etiam illam ex cognitione juris lætitiâ, & voluptatem, quod, quantum præstiterint nostri majores prudentiâ ceteris gentibus, tum facillimè intelligetis, si cum illorum Lycurgo, & Dracone, & Solone nostras leges conferre volueritis. Incredibile est enim, quàm sit omne jus civile, præter hoc nostrum, inconditum, ac pene ridiculum: de quo multa soleo in sermonibus quotidianis dicere, quum hominum nostrorum prudentiâ ceteris hominibus, & maxime Græcis, antepono. His ego de causis dixeram, Scævola, iis, qui perfecti oratores esse vellent, juris civilis cognitionem esse necessariam.

XLV. Jam verò ipsa per sese quantum afferat iis, qui ei præsumt, honoris, gratiæ, dignitatis, quis ignorat? Itaque, ut apud Græcos infimi homines, mercedulâ adducti, ministros se præbent in judiciis oratoribus, ii, qui apud illos *εργαγῆται* vocantur: sic in nostra civitate contrâ amplissimus quisque, & clarissimus vir, ut ille, qui propter hanc juris civilis scientiam sic appellatus a summo poëta est,

D ii]

Egregiè cordatus homo, catus Æliu' Sextus,

multique præterea, qui, quum ingenio sibi auctore dignitatem reperissent, perfecerunt, ut in respondendo jure, auctoritate plus etiam, quàm ipso ingenio valerent.

199. Senectuti verò celebrandæ & ornandæ quod honestius potest esse perfugium, quàm juris interpretatio? Equidem mihi hoc subsidium jam inde ab adolescentia comparavi, non solum ad causarum usum forensem, sed etiam ad decus atque ornamentum senectutis; ut, quum me vires (quòd ferè jam tempus adventat) deficere cœpissent, istâ ab solitudine domum meam vindicarem. Quid est enim præclarior, quàm honoribus & reipublicæ muneribus perfunctum senem posse suo jure dicere idem, quod apud Ennium dicat ille Pythius Apollo, se esse eum, unde sibi, si non populi & reges, at omnes sui cives consilium expetant,

Suarum rerum incerti? quos ego meâ ope ex

Incertis certos, compotesque consili

Dimitto, ut ne res temerè trastept turbidas.

200. Est enim sine dubio domus juris-consulti, totius oraculum civitatis. Testis est hujusce Q. Mucii janua, & vestibulum,

quod in ejus infirmissima valetudine, affectaque jam ætate, maximâ quotidie frequentia civium, ac summorum hominum splendore celebratur.

XLVI. Jam verò illa non longam orationem desiderant, quamobrem existimem publica quoque jura, quæ sunt propria civitatis, atque imperii, tum monumenta rerum gestarum, & vetustatis exempla, oratori nota esse debere. Nam ut in rerum privatarum causis atque judiciis depromenda sæpe oratio est ex jure civili, & idcirco, ut antè diximus, oratori juris civilis scientia necessaria est: sic in causis publicis judiciorum, concionum, senatûs, omnis hæc antiquitatis memoria, & publici juris auctoritas, & regendæ reipublicæ ratio ac scientia, tamquam aliqua materies, his oratoribus, qui versantur in republica, subiecta esse debent.

202. Non enim causidicum nescio quem, neque proclamatorem, aut rabulam hoc sermone nostro conquirimus, sed eum virum, qui primum sit ejus artis antistes, cujus quum ipsa natura magnam homini facultatem daret, tamen esse deus putatur; ut & ipsum, quod erat hominis proprium, non partum per nos, sed divinitus ad nos delatum videretur: deinde qui possit non tam caduceo, quàm nomine oratoris ornatus, incolumis vel inter hostium tela ver-

fari: tum qui scelus, fraudemque nocentis possit dicendo subicere odio civium, supplicioque constringere: idemque ingenii præsidio, innocentiam judiciorum poenâ liberare: idemque languentem, labentemque populum aut ad decus excitare, aut ab errore deducere, aut inflammare in improbos, aut incitatum in bonos mitigare: qui denique, quemcumque in animis hominum motum res & causa postulet, eum dicendo vel excitare possit, vel sedare.

203. Hanc vim si quis existimat, aut ab iis, qui de dicendi ratione scripserunt, expositam esse, aut a me posse exponi tam brevi, vehementer errat: neque solum inscientiam meam, sed ne rerum quidem magnitudinem perspicit. Equidem vobis, quoniam ita voluistis, fontes, unde hauriretis; atque itinera ipsa ita putavi esse demonstranda, non ut ipse dux essem (quod & infinitum est, & non necessarium) sed ut commonstrarem tantum viam, &, ut fieri solet, digitum ad fontes intenderem.

XLVII. Mihi verò, inquit Mucius, satis superque abs te videtur istorum studiis, si modò sunt studiosi, esse factum. Nam, ut Socratem illum solitum aiunt dicere, perfectum sibi opus esse, si quis satis esset concitatus cohortatione suâ ad studium cognoscendæ, percipiendæque virtutis:

quibus enim id persuasum esset, ut nihil mällent se esse, quàm bonos viros, iis reliquam facilem esse doctrinam: sic ego intelligo, si in hæc quæ patefecit oratione suâ Crassus, intrare volueritis, facillimè vos ad ea, quæ cupitis, perventuros ab hoc aditu, januaque patefacta.

205. Nobis verò, inquit Sulpicius, ista sunt pergrata perque jucunda: sed pauca etiam requirimus, in primisque ea, quæ valde breviter a te, Crasse, de ipsa artè percurta sunt, quum illa te & non contemnere, & didicisse confiterere. Ea si paulò latius dixeris, expleris omnem expectationem diuturni desiderii nostri. Nam nunc, quibus studendum rebus esset, accepimus, quod ipsum est tamen magnum; sed vias earum rerum, rationemque cupimus cognoscere.

206. Quid si, inquit Crassus, quoniam ego, quò faciliùs vos apud me tenerem, vestræ potiùs obsecutus sum voluntati, quàm aut consuetudini aut naturæ meæ, petimus ab Antonio, ut ea, quæ continet neque adhuc protulit, ex quibus unum libellum sibi excidisse jamdudum questus est, explicet nobis, & illa dicendi mysteria enuntiet? Ut videtur, inquit Sulpicius: nam Antonio dicente, etiam quid tu intelligas, sentiemus. Peto igitur, inquit Crassus, a te, quoniam id nobis, Antoni,

D v

hominibus id ætatis, oneris ab horum adolescentium studiis imponitur, ut exponas, quid iis de rebus, quas a te quæri vides, sentias.

XLVIII. Deprehensum equidem me, inquit Antonius, planè video, atque sentio, non solum quod ea requiruntur a me, quorum sum ignarus atque insolens, sed quia, quod in causis valde fugere soleo, ne tibi, Crasse, succedam, id me nunc isti vitare non sinunt.

208. Verùm hòc ingrediar ad ea, quæ vultis, audaciùs, quòd idem mihi spero usu esse venturum in hac disputatione, quod in dicendo solet, ut nulla expectetur ornata oratio. Neque enim sum de arte dicturus, quam numquam didici, sed de mea consuetudine; ipsaque illa, quæ in commentarium meum retuli, sunt ejusmodi, non aliquâ mihi doctrinâ tradita, sed in rerum usu causisque tractata: quæ si vobis, hominibus eruditissimis, non probabuntur, vestram iniquitatem accusatote, qui ex me ea quæsieritis, quæ ego nescirem: meam facilitatem laudatote, quum vobis non meo judicio, sed vestro studio inductus non gravatè respondero.

209. Tum Crassus, Perge modò, inquit, Antoni: nullum est enim periculum, ne quid tu eloquere, nisi ita prudenter, ut neminem nostrum poeniteat ad hunc te

fermonem impulisse. Ego verò, inquit, pergam: & id faciam, quod in principio fieri in omnibus disputationibus oportere censeo, ut, quid illud sit, de quo disputetur, explanetur; ne vagari & errare cogatur oratio, si ii, qui inter se dissenserint, non idem esse illud, quo de agitur, intelligent.

210. Nam, si fortè quæreretur, quæ esset ars imperatoris, constituendum putarem: principio, quis esset imperator: qui quum esset constitutus administrator quidam belli gerendi, tum adjungeremus de exercitu, de castris, de agminibus, de signorum collationibus, de oppidorum oppugnationibus, de commeatu, de insidiis faciendis, atque vitandis, de reliquis rebus, quæ essent propriæ belli administrandi: quarum qui essent animo & scientiâ compotes, eos esse imperatores dicerem; uterque exemplis Africanorum, & Maximorum: Epaminondam, atque Annibalem, atque ejus generis homines nominarem.

211. Sin autem quæreremus, quis esset is, qui ad rempublicam moderandam usum, & scientiam, & studium suum contulisset, definirem hoc modo: Qui, quibus rebus utilitas reipubl. pararetur, augereturque, teneret, iisque uteretur, hunc reipublicæ rectorem, & consilii publici

auctorem esse habendum; prædicaremque P. Lentulum, principem illum, & Tib. Gracchum patrem, & Q. Metellum, & P. Africanum, & C. Lælium, & innumerales alios quum ex nostra civitate, tum ex ceteris. Sin autem quæreretur, quisnam jurisconsultus verè nominaretur; eum dicerem, qui legum, & consuetudinis ejus, quâ privati in civitate uterentur, & ad respondendum, & ad agendum, & ad cavendum, peritus esset; & ex eo genere Sex. Ælium, M. Manilium, P. Mucium nominarem.

XLIX. Atque, ut jam ad leviora artium studia veniam, si musicus, si grammaticus, si poëta quærat, possim similiter explicare, quid eorum quisque profiteatur, & quo non amplius ab quoque sit postulandum. Philosophi denique ipsius, qui de sua vi, ac sapientia unus omnia pene proficitur, est tamen quædam descriptio, ut is, qui studeat omnium rerum divinarum, atque humanarum vim, naturam, causasque nosse, & omnem benè vivendi rationem tenere, & persequi, nomine hoc appelletur.

213. Oratorem autem, quoniam de eo quærimus, equidem non facio eundem, quem Crassus; qui mihi visus est omnem omnium rerum, atque artium scientiam comprehendere uno oratoris officio, ac

nomine : atque eum puto esse , qui & ven-
bis ad audiendum jucundis , & sententiis
ad probandum accommodatis uti possit
in causis forensibus , atque communibus.
Hunc ego appello oratorem , eumque esse
præterea instructum voce , & actione , &
leptore quodam volo.

214. Crassus verò mihi noster visus est
oratoris facultatem non illius artis termi-
nis , sed ingenii sui finibus , immensis pene ,
describere. Nam & civitatum regendarum
oratori gubernacula sententiâ suâ tradidit ;
in quo per mihi mirum visum est , Scæ-
vola , te hoc illi concedere ; quum sæpis-
sime tibi senatus breviter impolitèque di-
centi maximis sit de rebus assensus. M. ve-
rò Scaurus , quem non longè ruri apud se
esse audio , vir regendæ reipublicæ scien-
tissimus , si audierit , hanc auctoritatē
gravitatis & consilii sui vindicari a te ,
Crasse , quòd eam oratoris propriam esse
dicas ; jam , credo , huc veniat , & hanc
loquacitatem nostram vultu ipso , adspec-
tuque conterreat : qui quamquam est in
dicendo minimè contemnendus , prudentiâ
tamen rerum magnarum magis , quàm di-
cendi arte , nititur.

215. Neque verò , si quis utrumque po-
test , aut ille consilii publici auctor , ac se-
nator bonus , ob eam ipsam causam orator
est ; aut hic disertus , atque eloquens , si

est idem in procuratione civitatis egregius, illam scientiam dicendi copiâ est consecutus. Multum inter se distant istæ facultates, longèque sunt diversæ, atque sejunctæ; neque eâdem ratione ac viâ M. Cato, P. Africanus, Q. Metellus, C. Lælius, qui omnes eloquentes fuerunt, orationem suam, & reipublicæ dignitatem exornabant.

L. Neque enim est interdictum aut a rerum natura, aut a lege aliqua, atque more, ut singulis hominibus ne amplius, quàm singulas artes, nosse liceat. Quare non, etsi eloquentissimus Athenis Pericles, idemque in ea civitate plurimos annos princeps consilii publici fuit, idcirco ejusdem hominis, atque artis utraque facultas existimanda est; nec, si P. Crassus idem fuit eloquens, & juris peritus, ob eam causam inest in facultate dicendi juris civilis scientia.

217. Nam si quisque, ut in aliqua arte & facultate excellens, aliam quoque artem sibi assumpserit, is perficiet, ut, quod præterea sciet, id ejus, in quo excellet, pars quædam esse videatur: licet istâ ratione dicamus, pilâ bene & duodecim scriptis ludere, proprium esse juris civilis, quoniam utrumque eorum P. Mucius optimè fecerit; eademque ratione dicantur, quos *ῥωμῆες* Græci nominant, iidem

poëta, quoniam Empedocles physicus egregium poëma fecerit. At hoc ne philosophi quidem ipsi, qui omnia, sicut propria, sua esse, atque a se possideri volunt, dicere audent, geometriam aut musicam philosophi esse, quia Platonem omnes in illis artibus præstantissimum fuisse fateantur.

218. Ac, si jam placet omnes artes oratori subungere, tolerabilius est sic potius dicere, ut, quoniam dicendi facultas non debeat esse jejuna atque nuda, sed aspersa, atque distincta multarum rerum jucundâ quadam varietate, sit boni oratoris multa auribus accepisse, multa vidisse, multa animo & cogitatione, multa etiam legendo percurrisse: neque ea, ut sua, possedisse; sed, ut aliena, libasse. Fateor enim, callidum quemdam hunc, & nulla in re tiro-nem, ac rudem, nec peregrinum, atque hospitem in agendo esse debere.

LI. Neque verò istis tragœdiis tuis, quibus uti philosophi maximè solent, Crasse, perturbor; quòd ita dixisti, neminem posse eorum mentes, qui audirent, aut inflammare dicendo, aut inflammatas restringere, quum eo maximè vis oratoris magnitudoque cernatur, nisi qui rerum omnium naturam, mores hominum, atque rationes penitus perspexerit: in quo philosophia sit oratori necessario percipienda: quo

in studio hominum quoque ingeniosissimorum otiosissimorumque totas ætates videmus esse contritas : quorum ego copiam , magnitudinemque cognitionis , atque artis non modò non contemno , sed etiam vehementer admiror : nobis tamen , qui in hoc populo foroque versamur , satis est ea de moribus hominum & scire , & dicere , quæ non abhorrent ab hominum moribus.

220. Quis enim umquam orator magnus , & gravis , quum iratum adversario judicem facere vellet , hæsitavit ob eam causam , quòd nesciret quid esset iracundia , fervor-
ne mentis , an cupiditas puniendi doloris ? Quis , quum ceteros animorum motus aut iudicibus , aut populo dicendo miscere , atque agitare vellet , ea dixit , quæ a philosophis dici solent ? qui partim omnino motus negant in animis ullos esse debere , quique eos in iudicum mentibus concitent , scelus eos nefarium facere ; partim , qui tolerabiliiores volunt esse , & ad veritatem vitæ propiùs accedere , permediocres , ac potiùs lèves motus debere esse dicunt

221. Orator autem omnia hæc , quæ putantur in communi vitæ consuetudine mala , ac molesta , & fugienda , multò maiora & acerbiora verbis facit : itemque ea , quæ vulgò expetenda atque optabilia videntur , dicendo amplificat atque ornat : neque vult

ita sapiens inter stultos videri, uti, qui audiant, aut illum ineptum, & Græculum putent, aut, etiamsi valde probent ingenium oratoris, sapientiam admirentur, se esse stultos molestè ferant.

222. Sed ita peragrat per animos hominum, ita sensus mentesque pertractat, ut non desideret philosophorum descriptiones, neque exquirat oratione, summum illud bonum in animone sit, an in corpore; virtute, an voluptate definiatur; an hæc inter se jungi copularique possint: an verò, ut quibusdam visum, nihil certum sciri, nihil planè cognosci, & percipi possit: quarum rerum fateor magnam, multiplicemque esse disciplinam, & multas; copiofas, variasque rationes.

223. Sed aliud quiddam, longè aliud, Crasse, quærimus: acuto homine nobis opus est, & naturâ, usuque callido; qui sagaciter peruestiget, quid sui cives, nique homines, quibus aliquid dicendo persuadere velit, cogitent, sentiant, opinentur, expectent.

LII. Teneat oportet venas cujusque generis, ætatis, ordinis; & eorum, apud quos aliquid aget, aut erit acturus, mentes, sensusque degustet. Philosophorum autem libros reservet sibi ad hujuscemodi Tusculani requiem atque otium, ne, si quando ei dicendum erit de justitia & fide,

mutuetur a Plarone; qui, quum hæc exprimenda verbis arbitraretur, novam quamdam finxit in libris civitatem: usque eò illa, quæ dicenda de justitia putabat, a vitæ consuetudine, & a civitatum moribus abhorrebant.

225. Quòd si ea probarentur in populis, atque in civitatibus, quis tibi, Crasse, concessisset, clarissimo viro, & amplissimo principi civitatis, ut illa diceres in maxima concione tuorum civium, quæ dixisti? *Eripite nos ex miseriis, eripite nos ex faucibus eorum, quorum crudelitas nostro sanguine non potest expleri: nolite sinere nos cuiquam servire, nisi vobis universis, quibus & possumus & debemus.* Omitto miseras, in quibus, ut illi aiunt, vir fortis esse non potest: omitto fauces, ex quibus te eripi vis, ne iudicio iniquo exorbeatur sanguis tuus; quod sapienti negant accidere posse. *Servire* verò non modò te, sed universum senatum, cujus tum causam agebas, ausus es dicere?

226. Potestne virtus, Crasse, servire, istis auctoribus, quorum tu præcepta oratoris facultate complecteris? quæ & semper, & sola libera est, quæque, etiamsi corpora capta sint armis, aut constricta vinculis, tamen suum jus atque omnium rerum impunitam libertatem tenere debeat. Quæ verò addidisti, non modò se-

natum servire *posse* populo, sed etiam *de-
bere*, quis hoc philosophus tam mollis,
tam languidus, tam enervatus, tam omnia
ad voluptatem corporis, doloremque re-
ferens, probare posset? Senatum servire
populo, cui populus ipse moderandi & re-
gendi sui potestatem, quasi quasdam habe-
nas, tradidisset?

LIII. Itaque hæc, quum a te divinitus
ego dicta arbitrarer, P. Rutilius Rufus,
homo doctus, & philosophiæ deditus, non
modo parum commodè, sed etiam turpi-
ter & flagitiosè dicta esse dicebat. Idem-
que Servium Galbam, quem hominem
probè commeminisse se aiebat, pergravi-
ter reprehendere solebat, quòd is, L.
Scribonio quæstionem in eum ferente, po-
puli misericordiam concitasset, quum M.
Cato, Galbæ gravis atque acer inimicus,
asperè apud populum Romanum & vehe-
menter esset locutus: quam orationem in
Originibus suis exposuit ipse.

228. Reprehendebat igitur Galbam Ru-
tilius, quòd is C. Sulpicii Galli, propinqui
sui, Q. pupillum filium ipse pene in hu-
meros suos extulisset, qui patris clarissimi
recordatione & memoriâ fletum populo
moveret, & duos filios suos parvos tu-
telæ populi commendasset, ac se, tam-
quam in procinctu testamentum faceret,
sine libra atque tabulis populum Romanum

tutorem instituere dixisset illorum orbitati. Itaque quum & invidiâ, & odio populi tum Galba premeretur, his quoque eum tragœdiis liberatum ferebat; quod item apud Catonem scriptum esse video, *nisi pueris & lacrymis usus esset, pœnas eum daturum fuisse*. Hæc Rutilius valde vituperabat, & huic humilitati dicebat vel exsiliū fuisse vel mortem antepōnendam.

229. Neque verò hoc solum dixit, sed ipse & sensit, & fecit. Nam quum esset ille vir exemplum, ut scitis, innocentiae; quumque illo nemo neque integrior esset in civitate, neque sanctior; non modò supplex iudicibus esse noluit, sed ne ornatius quidem, aut liberius causam dici suam, quàm ratio veritatis ferebat. Paulum huic Cottæ tribuit partium, discretissimo adolescenti, sororis suæ filio. Dixit item causam illam quadam ex parte Q. Mucius, more suo, nullo apparatu, purè & dilucidè.

230. Quòd si tu tunc, Crasse, dixisses, qui subsidium oratori ex illis disputationibus, quibus philosophi utuntur, ad dicendi copiam, petendum esse paulò antè dicebas; &, si tibi pro P. Rutilio non philosophorum more, sed tuo licuisset dicere: quamvis scelerati illi fuissent; sicuti fuerunt, pestiferi cives, supplicioque digni, tamen omnem eorum importunitatem ex intimis

mentibus evellisset vis orationis tuæ: nunc talis vir amissus est, dum causa ita dicitur, ut si in illa commentitia Platonis civitate res ageretur. Nemo ingemuit, nemo in-clamavit patronorum, nihil cuiquam do-luit, nemo est quæstus, nemo rempubli-cam imploravit, nemo supplicavit. Quid multa? pedem nemo in illo judicio sup-plosit; credo, ne Stoicis renuntiaretur.

LIV. Imitatus est homo Romanus & consularis veterem illum Socratem, qui, quum omnium sapientissimus esset, sanc-tissimèque vixisset, ita in judicio capitis pro se ipse dixit, ut non supplex, aut reus, sed magister aut dominus videretur esse judi-cum. Quin etiam, quum ei scriptam ora-tionem disertissimus orator Lysias attulis-set, quam, si ei videretur, edisceret, ut eâ pro se in judicio uteretur, non invitus legit, & commodè scriptam esse dixit: sed, inquit, ut, si mihi calceos Sicyonios attu-lisses, non uterer, quamvis essent habiles, & apti ad pedem, quia non essent viriles; sic illam orationem disertam sibi & orato-riam videri, fortem & virilem non videri. Ergo ille quoque damnatus est: neque so-lum primis sententiis, quibus tantum sta-tuebant iudices, damnarent an absolve-rent, sed etiam illis, quas iterum legibus ferre debebant. Erat enim Athenis, reo damnato, si fraus capitalis non esset, quasi poenæ æstimatio.

232. Ex sententia, quum iudicibus daretur, interrogabatur reus, quam quasi æstimationem commervisse se maximè confiteretur: quod quum interrogatus Socrates esset, respondit, sese meruisse, ut amplissimis honoribus & præmiis decoraretur, & ut ei victus quotidianus in Prytaneo publicè præberetur; qui honos apud Græcos maximus haberetur.

233. Cujus responso sic iudices exarsunt, ut capitis hominem innocentissimum condemnarent. Qui quidem si absolutus esset (quod mehercule etiamsi nihil ad nos pertinet, tamen propter ejus ingenii magnitudinem vellem) quonam modo istos philosophos ferre possemus, qui nunc, quum ille damnatus est nullam aliam ob culpam, nisi propter dicendi inscientiam, tamen a se oportere dicunt peti præcepta dicendi? Quibuscum ego non pugno, utrum sit melius, aut verius: tantum dico, & aliud illud esse atque hoc, & hoc sine illo summum esse posse.

LV. Nam quòd jus civile, Crasse, tam vehementer amplexus es, video quid egeris: tum, quum dicebas, videbam. Primum Scævolæ te dedidisti, quem omnes amare meritissimò pro ejus eximia suavitate debemus; cujus artem quum indotatam esse, & incomptam videres, verborum eam dote locupletasti, & ornasti.

Deinde quòd in ea tu plus operæ; laborisque consumpseras, quum ejus studiū tibi & hortator, & magister esset domi; veritus es, nisi istam artem oratione exaggerasses, ne operam perdidisses.

235. Sed ego ne cum ista quidem arte pugno: sit sanè tanta, quantam tu illam esse vis: etenim sine controversia & magna est, & latè patet, & ad multos pertinet, & summo in honore semper fuit, & clarissimi cives ei studio etiam hodie præsent: sed vide, Crasse, ne, dum novo & alieno ornatu velis ornare juris civilis scientiam, suo quoque eam concessio & tradito spolies, atque denudes.

236. Nam, si ita diceres, qui jurisconsultus esset, esse eum oratorem; itemque qui esset orator, juris eundem esse consultum; præclaras duas artes constitueres, atque inter se pares, & ejusdem socias dignitatis. Nunc verò jurisconsultum sine hac eloquentia, de qua quærimus, fateris esse posse, fuisseque plurimos: oratorem negas, nisi illam scientiam assumpserit, esse posse. Ita & tibi jurisconsultus ipse per se nihil, nisi leguleius quidam cautus & acutus, præco actionum, cantor formularum, auceps syllabarum. Sed quia sæpe utitur orator subsidio juris in causis, idcirco istam juris scientiam eloquentiæ, tamquam ancillulam pedissequamque, adjunxisti.

LVI. Quòd verò impudentiam admiratus es eorum patronorum, qui aut, quum parva nescirent, magna profiterentur, aut ea, quæ maxima essent in jure civili, tractare auderent in causis, quum ea nescirent, numquamque didicissent; utriusque rei facilis est, & prompta defensio. Nam neque illud est mirandum, qui, quibus verbis coëmptio fiat, nesciat, eundem ejus mulieris, quæ coëmptionem fecerit, causam posse defendere. Nec si parvi navigii, & magni eadem est in gubernando scientia; idcirco qui, quibus verbis erc-tum cieri oporteat, nesciat, idem erciscundæ familiæ causam agere non possit.

238. Nam, quòd maximas centumvira-les causas in jure positas protulisti; quæ tandem earum causa fuit, quæ ab homine eloquenti, juris imperito, non ornatissimè potuerit dici? quibus quidem in causis omnibus, sicut in ipsa M. Curii, quæ abs te nuper est dicta, & in C. Hostilii Mancini controversia, atque in eo puero, qui ex altera natus erat uxore, non remisso nuntio superiori, fuit inter peritissimos homines summa de jure dissensio.

239. Quæro igitur, quid adjuverit oratorem in his causis juris scientia, quum hic jurisconsultus superior fuerit discessurus, qui esset non suo artificio, sed alieno, hoc est, non juris scientiâ, sed eloquentiâ,

quentiâ, sustentatus. Equidem hoc sæpe audiui, quum ædilitatem P. Crassus peteret, eumque major natu, etiam consularis, Ser. Galba affectaretur, quòd Crassi filiam C. filio suo despondisset, accessisse ad Crassum consulendi causâ quemdam rusticum: qui quum Crassum seduxisset, atque ad eum retulisset, responsumque ab eo verum magis, quàm ad suam rem accomodatam abstulisset; ut eum tristem Galba vidit, nomine appellavit, quæsivitque, qua de re ad Crassum retulisset: ex quo ut audivit, commotumque ut vidit hominem, Suspenso, inquit, animo, & occupato Crassum tibi respondisse video.

240. Deinde ipsum Crassum manu prehendit, &, Heus tu, inquit, quid tibi in mentem venit ita respondere? Tum ille fidenter, homo peritissimus, confirmare, ita se rem habere, ut respondisset; nec dubium esse posse. Galba autem alludens variè & copiosè, multas similitudines afferre, multaque pro æquitate contra jus dicere: atque illum, quum differendo par esse non posset (quamquam fuit Crassus in numero disertorum, sed par Galbæ nullo modo) ad auctores confugisse, & id, quod ipse diceret, & in P. Mucii fratris sui libris, & in Sex. Ælii commentariis scriptum protulisse; ac tamen concessisse,

Galbæ disputationem sibi probabilem & propè veram videri.

LVII. Attamen quæ causæ sunt ejusmodi, ut de earum jure dubium esse non possit, omnino in judicium vocari non solent. Num quis eo testamento, quod paterfamiliās antè fecit, quàm ei filius natus est, hereditatem petit? nemo: quia conflât, agnascendo rumpi testamentum. Ergo in hoc genere juris judicia nulla sunt. Licet igitur impunè oratori omnem hanc partem juris incontestati ignorare, quæ pars sine dubio multò maxima est.

242. In eo autem jure; quod ambigitur inter peritissimos, non est difficile oratori, ejus partis, quamcumque defendet, auctorem aliquem invenire: a quo quum amenitas hastas acceperit, ipse eas oratoris laertis, viribusque torquet. Nisi verò (bonâ veniâ hujus optimi viri dixerim Scævolæ) tu libellis, aut præceptis soceri tui causam M'. Curii defendisti: nonne arripuisti patrocinium æquitatis, & defensionem testamentorum, ac voluntatis mortuorum?

243. Ac meâ quidem sententiâ (frequens enim te audiui, atque affui) multò majorem partem sententiarum sale tuo, & politissimis facetiis pellexisti, quum & illud nimium acumen illuderes, & admi-

rarere ingenium Scævolæ, qui excogitasset, nasci prius oportere, quàm emori: quumque multa colligeres & ex legibus, & ex senatusconsultis, & ex vita, ac sermone communi, non modò acutè, sed etiam ridiculè ac facetè; ubi si verba, non rem sequeremur, confici nihil posset. Itaque hilaritatis plenum iudicium, ac lætitiæ fuit: in quo quid tibi juris civilis exercitatio profuerit, non intelligo; dicendi vis egregia, summâ festiuitate, & venustate conjuncta profuit.

244. Ipse ille Mucius paterni juris defensor, & quasi patrimonii propugnator sui, quid in illa causa, quum contra te diceret, attulit, quod de jure civili depromptum videretur? quam legem recitavit? quid patefecit dicendo, quod fuisset imperitis occultius? Nempe ejus omnis oratio versata est in eo, ut scriptum plurimùm valere oportere defenderet. At in hoc genere pueri apud magistros exercentur omnes, quum in ejusmodi causis aliàs scriptum, aliàs æquitatem defendere docentur.

245. Et credo in illa militis causa, si tu aut heredem, aut militem defendisses, ad Hostilianas te actiones, non ad tuam vim & oratoriam facultatem contulisses. Tu verò, vel si testamentum defenderes, sic ageres, ut omne omnium testamentorum

ius in eo iudicio positum videretur : vel si causam ageres militis , patrem ejus , ut fortes , dicendo a mortuis excitasses ; statuis- ses ante oculos ; complexus esset filium , flensque eum centumviris commendasset : lapides mehercule omnes flere ac lamen- tari coëgisset ; ut totum illud , *Uti lingua nuncupasset* , non in XII tabulis , quas tu omnibus bibliothecis anteponis , sed in ma- gistri carmine scriptum videretur.

LVIII. Nam quòd inertiam accusas ado- lescentium , qui istam artem primùm facil- limam non ediscant ; quæ quàm sit facilis , illi viderint , qui ejus artis arrogantiam , quasi difficillima sit , ita subnixa ambulant : dein- de etiam tu ipse videris , qui eam artem facilem esse dicis , quam concedis adhuc artem omnino non esse , sed aliquando , si quis aliam artem didicerit , ut hanc artem efficere possit , tum esse illam artem futu- ram : deinde , quòd sit plena delectatio- nis ; in qua tibi remittunt omnes istam vo- luptatem , & eâ se carere patiuntur , nec quisquam est eorum , qui , si jam sit edis- cendum sibi aliquid , non Teucrum Pacu- vii malit , quàm Manilianas venalium ven- dendorum leges ediscere.

247. Tum autem , quòd amore patriæ censes nos nostrorum majorum inventa nosse debere ; non vides , veteres leges aut ipsâ suâ vetustate consenuisse , aut no-

vis legibus esse sublatas? Quòd verò viros bonos jure civili fieri putas, quia legibus & præmia proposita sint virtutibus & supplicia vitiis; equidem putabam, virtutem hominibus (si modò tradi ratione possit) instituendo & persuadendo, non minis, & vi, ac metu tradi. Nam ipsum quidem illud, etiam sine cognitione juris, quàm sit bellum cavere malum, scire possumus.

248. De me autem ipso, cui uni tu concedis, ut sine ulla juris scientia tamen causis satisfacere possim, tibi hoc, Crasse, respondeo, neque me umquam jus civile didicisse, neque tamen in iis causis, quas in jure possem defendere, umquam istam scientiam desiderasse. Aliud est enim esse artificem cujusdam generis atque artis, aliud in communi vita & vulgari hominum consuetudine nec hebetem, nec rudem.

249. Cui nostrum non licet fundos nostros obire, aut res rusticas vel fructus causâ, vel delectationis, invisere? tamen nemo tam sine oculis, tam sine mente vivit, ut, quid sit sementis ac messis, quid arborum putatio ac vitium, quo tempore anni, aut quo modo ea fiant, omnino nesciat. Num igitur, si cui fundus inspicendus, aut si mandandum aliquid procuratori de agricultura, aut imperandum

villico sit, Magonis Carthaginiensis sunt libri perdiscendi? an hac communi intelligentiâ contenti esse possumus? Cur ergo non iidem in jure civili, præsertim quum in causis, & in negotiis, & in foro conteramur, satis instructi esse possumus ad hoc duntaxat, ne in nostra patria peregrini atque advenæ esse videamur?

250. Ac si jam sit causa aliqua ad nos delata obscurior, difficile, credo, sit cum hoc Scævola communicare; quamquam ipsi omnia, quorum negotium est, consulta ad nos, & exquisita deferunt. An verò si de re ipsa, si de finibus, quum in rem præsentem non venimus, si de tabulis, & præscriptionibus controversia est, contortas res, & sæpe difficiles necessario perdiscimus: si leges nobis, aut si hominum peritorum responsa cognoscenda sunt, veremur ne ea, si ab adolescentia juri civili minùs studuerimus, non queamus cognoscere?

LIX. Nihilne igitur prodest oratori juris civilis scientia? Non possum negare prodesse ullam scientiam, ei præsertim, cujus eloquentia copiâ rerum debeat esse ornata: sed multa, & magna, & difficilia sunt ea, quæ sunt oratori necessaria, ut ejus industriam in plura studia distrahere nolim.

251. Quis neget opus esse oratori in hoc oratorio motu, statuque, Roscii ges-

tum, & venustatem? tamen nemo suaserit studiosis dicendi adolescentibus in gestu discendo histrionum more elaborare. Quid est oratori tam necessarium, quàm vox? tamen me auctore nemo dicendi studiosus, Græcorum more tragædorum voci serviet, qui & annos complures sedentes declamitant, & quotidie antequam pronuntient, vocem cubantes sensim excitant, eandemque, quum egerunt, sedentes ab acutissimo sono usque ad gravissimum sonum recipiunt, & quasi quodammodo colligunt. Hoc nos si facere velimus, antè commendemur ii, quorum causas receperimus, quàm toties, quoties præscribitur, Pæanem, aut Munionem citarimus.

252. Quòd si in gestu, qui multum oratorem adjuvat, & in voce, quæ una maximè eloquentiam vel commendat, vel sustinet, elaborare nobis non licet; ac tantum in utroque assequi possumus, quantum, in hac acie quotidiani muneris, spatii nobis datur: quantò minùs est ad juris civilis perdiscendi occupationem descendendum? quod & summatim percipi sine doctrina potest, & hanc habet ab illis rebus dissimilitudinem; quòd vox & gestus subito sumi, & aliunde arripi non potest; juris utilitas ad quamque causam, quamvis repentè, vel a peritis, vel de libris depromi potest.

253. Itaque illi disertissimi homines ministros habent in causis juris peritos, quum ipsi sint peritissimi, & qui, ut abs te paulò antè dictum est, *pragmatici* vocantur. In quo nostri omnino melius multò, quòd clarissimorum hominum auctoritate leges, & jura testata esse voluerunt. Sed tamen non fugisset hoc Græcos homines, si ita necesse esse arbitrati essent, oratorem ipsum erudire in jure civili, non ei pragmaticum adiutorem dare.

LX. Nam quòd dicis *senectutem a solitudine vindicari juris civilis scientiâ*, fortasse etiam pecuniæ magnitudine. Sed nos non quid nobis utile, verum quid oratori necessarium sit, quærimus. Quamquam, quoniam multa ad oratoris similitudinem ab uno artifice sumimus, solet idem Roscius dicere, se, quò plus sibi ætatis accederet, eò tardiores tibicinis modos, & cantus remissiores esse facturum. Quod si ille, adstrictus certâ quadam numerorum moderatione, & pedum, tamen aliquid ad requiem senectutis excogitat; quantò facilius nos non laxare modos, sed totos mutare possumus? Neque enim hoc te, Crasse, fallit, quàm multa sint, & quàm varia genera dicendi; quod haud sciam, an tu primus ostenderis, qui jamdiu multò dicis remissiùs, & leniùs, quàm solebas: neque minùs hæc tamen tua gravissimè

fermonis lenitas, quàm illa summa vis & contentio probatur: multique oratores fuerunt, ut illum Scipionem audimus, & Lælium, qui omnia sermone conficerent paulò intentiore, nunquam, ut Servius Galba, lateribus aut clamore contenderent.

255. Quòd si jam hoc facere non poteris, aut noles: vereris, ne tua domus, talis & viri, & civis, si a litigiosis hominibus non colatur, a ceteris deferatur? Equidem tantum absum ab ista sententia, ut non modò non arbitrer subsidium senectutis, in eorum, qui consultum veniant, multitudine esse ponendum, sed tamquam portum aliquem, expectem istam, quam tu times, solitudinem. Subsidium enim bellissimum existimo esse senectuti otium.

256. Reliqua verò etiamsi adjuvant (historiam dico, & prudentiam juris publici, & antiquitatis iter, & exemplorum copiam) si quando opus erit, a viro optimo, & istis rebus instructissimo, familiari meo, Longino mutuabor. Neque repugnabo, quominus (id quod modò hortatus es) omnia legant, omnia audiant, in omni recto studio, atque humanitate versentur: sed mehercule non ita multum spatii mihi videtur, si modò ea facere, & persequi volent, quæ a te, Crasse, præ-

E v

cepta sunt : qui mihi propè etiam nimis duras leges imponere visus es huic ætati, sed tamen ad id, quod cupiunt, adipiscendum propè necessarias.

257. Nam & subitæ ad propositas causas exercitationes, & accuratæ & meditatæ commentationes, ac stilus ille tuus, quem tu verè dixisti *perfectorem dicendi esse ac magistrum*, multi fudoris est; & illa orationis suæ cum scriptis alienis comparatio, & de alieno scripto subita vel laudandi, vel vituperandi, vel comprobandi, vel refellendi causâ, disputatio, non mediocris contentionis est, vel ad memoriam, vel ad imitandum.

LXI. Illud verò fuit horribile, quod mehercule vereor ne maiorem vim ad deterrendum habuerit, quàm ad cohortandum. Voluisti enim in suo genere unumquemque nostrum quasi quemdam esse Roscium; dixistiquè, non tam ea, quæ recta essent, probari, quàm, quæ prava sunt, fastidiis adhærescere: quod ego non tam fastidiosè in nobis, quàm in histrionibus, spectari puto.

259. Itaque nos raucos sæpe attentissimè audiri video: tenet enim res ipsa, atque causa: at Æsopum, si paulum irrauerit, explodi. A quibus enim nihil præter voluptatem aurium quæritur, in iis offenditur, simul atque imminuitur aliquid

de voluptate. In eloquentia autem multa sunt, quæ teneant: quæ si omnia summa non sunt, & pleraque tamen magna sunt, necesse est, ea ipsa, quæ sunt, mirabilia videri.

260. Ergo, ut ad primum illud revertar, sit orator nobis is, qui, ut Crassus descripsit, accommodatè ad persuadendum possit dicere. Is autem concludatur in ea, quæ sunt in usu civitatum vulgari, ac forensi: remotisque ceteris studiis, quamvis ea sint ampla, atque præclara, in hoc uno opere, ut ita dicam, noctes & dies urgeatur: imiteturque illum, cui sine dubio summa vis dicendi conceditur, Atheniensem Demosthenem, in quo tantum studium fuisse tantusque labor dicitur, ut primum impedimenta naturæ diligentiam industriæque superaret: quumque ita balbus esset, ut ejus ipsius artis, cui studeret, primam litteram non posset dicere, perfecit meditando, ut nemo planius eo locutus putaretur.

261. Deinde quum spiritus ejus esset angustior, tantum continendâ animâ in dicendo est affecutus, ut unâ continuatione verborum (id quod ejus scripta declarant) binæ ei contentiones vocis, & remissiones continerentur. Qui etiam (ut memoriæ proditum est) coniectis in os calculis, summâ voce versus multos uno

spiritu pronuntiare consueſcebat; neque is conſiſtens in loco, ſed inambulans, atque adſcenſu ingrediens arduo.

262. Hiſce ego cohortationibus, Crasſe, ad ſtudio, & ad laborem incitandos juvenes vehementer aſſentior: cetera, quæ collegiſti ex variis, & diverſis ſtudiis, & artibus, tametsi ipſe es omnia conſecutus, tamen ab oratoris proprio officio atque munere ſejuncta eſſe arbitror.

LXII. Hæc quum Antonius dixiſſet, ſanè dubitare viſus eſt Sulpicius, & Cotta, utrius oratio propius ad veritatem videretur accedere. Tum Crasſus, Operarium nobis quemdam, Antoni, oratorem facis; atque haud ſcio, an aliter ſentias, & utare tuâ illâ mirificâ ad reſellendum conſuetudine, quâ tibi nemo umquam præſtitit: cujus quidem ipſius facultatis exercitatio oratorum propria eſt, ſed jam in philoſophorum conſuetudine verſatur, maximèque eorum, qui de omni re propoſita in utramque partem ſolent copioſiſſimè dicere.

264. Verum ego non ſolùm arbitrabar, his præſertim audientibus, a me informari oportere, qualis eſſe poſſet is, qui habitaret in ſubſelliis, neque quidquam ampliùs afferret, quàm quod cauſarum neceſſitas poſtularet: ſed majus quiddam videbam, quum cenſebam, oratorem, præ-

fertim in nostra republica , nullius ornamenti expertem esse oportere. Tu autem , quoniam exiguis quibusdam finibus totum oratoris munus circumdedisti , hòc faciliùs nobis expones ea , quæ abs te de officiis , præceptisque oratoris quæsita sunt : sed , opinor , secundùm hunc diem. Satis enim multa a nobis hodie dicta sunt. Nunc & Scævola , quoniam in Tusculanum ire constituit , paulùm requiescet , dum se calor frangat : & nos ipsi , quoniam id temporis est , valetudini demus operam.

265. Placuit sic omnibus. Tum Scævola , Sanè , inquit , vellem non constituiissem ; in Tusculanum me hodie venturum esse , Lælio : libenter audirem Antonium : & , quum exsurgeret , simul arridens , Neque enim , inquit , tam mihi molestus fuit ; quòd jus nostrum civile pervellit , quàm jucundus , quòd se id nescire confessus est.



LIBER SECUNDUS.

IN hoc Libro partes Inventionis Antonio traduntur, in qua potius, quam in ornatu orationis excelluit. Omnia igitur præcepta ponit, ex quibus ea ducuntur argumenta, quæ ad animos judicum commoverendos aut conciliandos valeant. Tria illa genera, judiciale, deliberativum, demonstrativum tractat, digitumque ad fontes intendens, docet quomodo ea, quæ universè dicuntur, ad unamquamque causam referri possint. Ad Inventionem pertinent joci, quorum plura sunt genera. Cæsar igitur, qui in iis longè omnibus præstitit, huic disputationi adest cum fratre Catulo, & ea quæ de jocis acceperat, aut observarat, in medium profert. Deinde An-

zonius loquitur de memoria , scil.
Artificiali : nam ea sola Inventionis
est propria ; brevibusque omnia , quæ
ad illam spectant , præceptis conclu-
dit. PEARCIUS.



LIBER SECUNDUS.

I. **M**AGNA nobis pueris, Quinte frater, si memoriâ tenes, opinio fuit, L. Crassum non plus attigisse doctrinæ, quàm quantum primâ illâ puerili institutione potuisset: M. autem Antonium omnino omnis eruditionis expertem, atque ignarum fuisse: erantque multi, qui, quamquam non ita se rem habere arbitrarentur, tamen, quò faciliùs nos incensos studio dicendi a doctrina deterrent, libenter id, quod dixi, de illis oratoribus prædicarent; ut, si homines non eruditi summam essent prudentiam atque incredibilem eloquentiam consecuti, inanis omnis noster esse labor, & stultum in nobis erudiendis, patris nostri, optimi ac prudentissimi viri, studium videretur.

2. Quos tum, ut pueri, refutare domesticis testibus, patre, & C. Aculeone propinquo nostro, & L. Cicerone patruo, solebamus; quòd de Crasso pater, & Aculeo, quocum erat nostra matertera, quem Crassus dilexit ex omnibus plurimùm; & patruus, qui cum Antonio in Ciliciam profectus unâ decesserat, multa nobis de ejus studio doctrinaque sæpe narravit: quum-

que nos cum consobrinis nostris, Aculeonis filiis, & ea disceremus, quæ Crasso placerent, & ab his doctoribus, quibus ille uteretur, erudiremur, etiam illud sæpe intelleximus (quum essemus ejusmodi, quod vel pueri sentire poteramus) illum & Græcè sic loqui, nullam ut nosse aliam linguam videretur, & doctoribus nostris ea ponere in percunctando, eaque ipsum omni in sermone tractare, ut nihil esse ei novum, nihil inauditum videretur.

3. De Antonio verò, quamquam sæpe ex humanissimo homine, patruo nostro, acceperamus, quemadmodum ille vel Athenis, vel Rhodi se doctissimorum hominum sermonibus dedisset; tamen ipse adolescentulus, quantum illius ineuntis ætatis meæ patiebatur pudor, multa ex eo sæpe quæsi. Non erit profectò tibi, quod scribo, hoc novum; nam jam tum ex me audiebas mihi illum ex multis, variisque sermonibus, nullius rei, quæ quidem esset in his artibus, de quibus aliquid existimare possem, rudem aut ignarum esse visum.

4. Sed fuit hoc in utroque eorum, ut Crassus non tam existimari vellet non didicisse, quàm illa despicere, & nostrorum hominum in omni genere prudentiam Græcis anteferre: Antonius autem probabiliorèm hòc populo orationem fore censebat suam, si omnino didicisse numquam puta-

retur : atque ita se uterque gravio-
re, si alter contemnere, alter ne nosse
quidem Græcos videretur. Quorum con-
siliū quale fuerit, nihil sanè ad hoc tem-
pus. Illud autem est hujus institutæ scrip-
tionis ac temporis, neminem eloquentiā,
non modò sine dicendi doctrina, sed ne
sine omni quidem sapientia, florere um-
quam & præstare potuisse.

II. Etenim ceteræ ferè artes se ipsæ per
se tuentur singulæ : bene dicere autem,
quod est scienter, & peritè, & ornatè di-
cere, non habet definitam aliquam regio-
nem, cujus terminis septa teneatur. Omnia,
quæcumque in hominum disceptationem
cadere possunt, bene sunt ei dicenda,
qui hoc se posse profitetur; aut eloquen-
tiæ nomen relinquendum est.

6. Quare equidem & in nostra civitate,
& in ipsa Græcia, quæ semper hæc summa
duxit, multos & ingeniis, & magnâ laude
dicendi sine summa rerum omnium scien-
tia fuisse fateor : talem verò exsistere elo-
quentiam, qualis fuerit in Crasso, & An-
tonio, non cognitis rebus omnibus, quæ
ad tantam prudentiam pertinerent, tan-
tamque dicendi copiam, quanta in illis fuit,
non potuisse confirmo.

7. Quò etiam feci libentiùs, ut eum ser-
monem, quem illi quondam inter se de
his rebus habuissent, mandarem litteris ;

vel ut illa opinio, quæ semper fuisset, tolleretur, alterum non doctissimum, alterum planè indoctum fuisse : vel ut ea, quæ existimarem a summis oratoribus de eloquentia divinitus esse dicta, custodirem litteris, si ullo modo assequi, complectique potuissem : vel mehercule etiam ut laudem eorum jam propè senescentem, quantum ego possem, ab oblivione hominum, atque a silentio vindicarem.

8. Nam si ex scriptis cognosci ipsi suis potuissent, minùs hoc fortasse mihi esse putassem laborandum. Sed quum alter non multùm (quod quidem exstaret) & idipsum adolescens; alter nihil admodum scripti reliquisset : deberi hoc a me tantis hominum ingeniis putavi, ut, quum etiam nunc vivam illorum memoriam teneremus, hanc immortalem redderem, si possem.

9. Quod hòc etiam spe aggredior majore ad probandum, quia non de Servii Galbæ, aut C. Carbonis eloquentia scribo aliquid, in quo liceat mihi fingere, si quid velim, nullius memoriâ jam me refellente : sed edo hæc iis cognoscenda, qui eos ipsos, de quibus loquor, sæpe audierunt; ut duos summos viros iis, qui neutrum illorum viderint, eorum, quibus ambo illi oratores cogniti sint, vivorum & præsentium memoriâ teste, commendemus.

III. Nec verò te, carissime frater, atque optime, rhetoricis nunc quibusdam libris, quos tu agrestes putas, insequor ut erudiam. Quid enim tuâ potest oratione aut subtilius, aut ornatius esse? Sed quoniam sive iudicio, ut soles dicere; sive, ut ille pater eloquentiæ de se Isocrates scripsit ipse, pudore, a dicendo, & timiditate ingenuâ quâdam refugisti; sive, ut ipse joculari soles, unum putasti satis esse non modò in una familia rhetorem, sed pene in tota civitate: non tamen arbitror tibi hos libros in eo fore genere, quod meritò propter eorum, qui de dicendi ratione disputarunt, jejunitatem bonarum artium possit illudi.

11. Nihil enim mihi quidem videtur in Crassi, & Antonii fermone esse præteritum, quod quisquam summis ingeniis, acerrimis studiis, optimâ doctrinâ, maximo usu cognosci, ac percipi potuisse arbitraretur: quod tu facillimè poteris judicare, qui prudentiam, rationemque dicendi per te ipsum; usum autem per nos percipere voluisti. Sed quò citius hoc, quod suscepimus, non mediocre munus conficere possimus, omisâ nostrâ adhortatione, ad eorum, quos proposuimus, sermonem, disputationemque veniamus.

12. Postero igitur die, quàm illa erant acta, horâ ferè secundâ, quum etiam tura

in lecto Crassus esset, & apud eum Sulpicus sederet, Antonius autem inambularet cum Cotta in porticu, repentinè eò Q. Catulus senex cum C. Julio fratre venit: quod ubi audivit, commotus Crassus surrexit; omnesque admirati, majorem aliquam esse causam eorum adventûs suspicati sunt.

13. Qui quum inter se, ut ipsorum usus ferebat, amicissimè consalutassent, Quid vos tandem? Crassus; num quidnam, inquit, novi? Nihil fanè, inquit Catulus: etenim vides esse ludos: sed vel tu nos ineptos licet, inquit, vel molestos putes. Quum ad me in Tusculanum, inquit, heri, vesperi venisset Cæsar de Tusculano suo, dixit mihi, a se Scævola hinc euntem esse conventum, ex quo mira quædam se audisse dicebat, te, quem ego toties omni ratione tentans ad disputandum elicere non potuisssem, permulta de eloquentiâ cum Antonio disseruisse, & tamquam in schola propè ad Græcorum consuetudinem disputasse.

14. Ita me frater exoravit, ne ipsum quidem a studio audiendi nimis abhorrentem, sed mehercule verentem tamen, ne molesti vobis interveniremus, ut huc secum venirem: Scævola enim ita dicere aiebat, bonam partem sermonis in hunc diem esse dilatam. Hoc si tu cupidius fac-

tum existimas, Cæsari attribues : si familiarius, utrique nostrum : nos quidem, nisi fortè molesti intervenimus, venisse delectat.

IV. Tum Crassus, Equidem, quæcumque causa vos huc attulisset, lætarer, quum apud me viderem homines mihi carissimos, & amicissimos : sed tamen (verè dicam) quævis malletm fuisset, quàm ista, quam dicis. Ego enim (ut quemadmodum sentio, loquar,) numquam mihi minùs, quàm hesterno die, placui : magis adeo id facilitate, quàm aliâ ullâ culpâ meâ contigit ; qui, dum obsequor adolescentibus, me senem esse sum oblitus : fecique id, quod ne adolescens quidem feceram, ut iis de rebus, quæ doctrinâ aliquâ continerentur, disputarem. Sed hoc tamen cecidit mihi peropportunè, quòd transactis jam meis partibus, ad Antonium audiendum venistis.

16. Tum Cæsar, Equidem, inquit, Crasse, ita sum cupidus te in illa longiore ac perpetua disputatione audiendi, ut, si id mihi minùs contingat, vel hoc sim quotidiano tuo sermone contentus. Itaque experiar equidem illud, ut ne Sulpicius, familiaris meus, aut Cotta, plus quàm ego apud te valere videatur, & te exorabo profectò, ut mihi quoque & Catulo tuæ suavitatis aliquid impertias. Sin tibi id mi-

nus libebit, non te urgebo, neque committam, ut, dum vereare ne tu sis ineptus, me esse iudices.

17. Tum ille, Ego mehercule, inquit, Cæsar, ex omnibus Latinis verbis hujus verbi vim vel maximam semper putavi. Quem enim nos ineptum vocamus, is mihi videtur ab hoc nomen habere ductum, quod non sit aptus: idque in sermonis nostri consuetudine perlatè patet. Nam qui aut, tempus quid postulet, non videt, aut plura loquitur, aut se ostentat, aut eorum, quibuscum est, vel dignitatis, vel commodi rationem non habet, aut denique in aliquo genere, aut inconcinnus, aut multus est, is *ineptus* dicitur.

18. Hoc vitio cumulata est eruditissima illa Græcorum natio. Itaque quod vim hujus mali Græci non vident, ne nomen quidem ei vitio imposuerunt: ut enim quæras omnia, quomodo Græci *ineptum* appellent, non reperies. Omnium autem iæptiarum, quæ sunt innumerabiles, haud scio, an ulla sit major, quàm, ut illi solent, quocumque in loco, quoscumque inter homines visum est, de rebus aut difficillimis, aut non necessariis argutissimè disputare. Hoc nos ab istis adolescentibus facere, inviri & recusantes, heri coacti sumus.

V. Tum Catulus, Ne Græci quidem,

inquit, Crasse, qui in civitatibus suis clari, & magni fuerunt, sicuti tu es, nosque omnes in nostra republica volumus esse, horum Græcorum, qui se inculcant auribus nostris, similes fuerunt: nec tamen in otio sermones huiusmodi, disputationesque fugiebant.

20. Ac si tibi videntur, qui temporis, qui loci, qui hominum rationem non habent, inepti, sicut debent videri; num tandem aut locus hic non idoneus videtur, in quo porticus hæc ipsa, ubi inambulamus, & palæstra, & tot locis sessiones, gymnasiorum, & Græcarum disputationum memoriam quodam modo commovent? aut inopportunum tempus in tanto otio, quod & rarò datur, & nunc peroptatò nobis datum est? aut homines ab hoc genere disputationis alieni, qui omnes hi sumus, ut sine his studiis vitam nullam esse ducamus?

21. Omnia ista, inquit Crassus, ego alio modo interpretor, qui primùm palæstram, & sedes, & porticus, etiam ipsos, Catule, Græcos, exercitationis & delectationis causâ, non disputationis invenisse arbitror. Nam & seculis multis antè gymnasia inventa sunt, quam in his philosophi garrere cœperunt; & hoc ipso tempore, quum omnia gymnasia philosophi teneant, tamen eorum auditores discum
audire,

audire, quàm philosophum, malunt: qui simul ut increpuit, in media oratione de maximis rebus & gravissimis disputantem philosophum omnes unctionis causâ relinquunt: ita levissimam delectationem gravissimâ, ut ipsi ferunt, utilitati anteponunt. Otium autem quod dicis esse, assentior: verùm otii fructus est, non contentio animi, sed relaxatio.

VI. Sæpe ex focero meo audiui, quum is diceret, focerum suum Lælium semper ferè cum Scipione solitum rusticari, eosque incredibiliter repuerascere esse solitos, quum rus ex urbe, tamquam e vinculis, evolavissent. Non audeo dicere de talibus viris, sed tamen ita solet narrare Scævola, conchas eos, & umbilicos ad Cajetam, & ad Laurentum legere consuesse, & ad omnem animi remissionem ludumque descendere.

23. Sic enim se res habet, ut, quemadmodum volucres videmus procreationis atque utilitatis suæ causâ fingere & construere nidos; easdem autem, quum aliquid effecerint, levandi laboris sui causâ; passim ac liberè solutas opere volitare: sic nostri animi forensibus negotiis, atque urbano opere defessi, gestiunt, ac volitare cupiunt, vacui curâ atque labore.

24. Itaque illud, quod ego in causa Curiana Scævolæ dixi, non dixi secus, ac

sentiebam. Nam si, inquam, Scævola, nullum erit testamentum rectè factum, nisi quod tu scripseris, omnes ad te cives cum tabulis veniemus; omnium testamenta tu scribes unus. Quid igitur? inquam: quando ages negotium publicum? quando amicorum? quando tuum? quando denique nihil ages? Tum illud addidi: Mihi enim liber esse non videtur, qui non aliquando nihil agit. In qua permaneo, Catule, sententia; meque, quum huc veni, hoc ipsum nihil agere, & planè cessare delectat.

25. Nam, quòd addidisti tertium, vos esse, qui vitam insuavem sine his studiis putaretis, id me non modò non hortatur ad disputandum, sed etiam deterret. Nam ut C. Lucilius, homo doctus, & perurbanus, dicere solebat, ea, quæ scriberet, neque se ab indoctissimis, neque ab doctissimis legi velle; quòd alteri nihil intelligerent, alteri plus fortasse, quàm ipse; quòd etiam scripsit, *Persium non curo legere* (hic enim fuit, ut noramus, omnium ferè nostrorum hominum doctissimus) *Laetium Decimum volo* (quem cognovimus virum bonum, & non illitteratum, sed nihil ad Persium) sic ego, si jam mihi disputandum sit de his nostris studiis, nolim equidem apud rusticos, sed multò minùs apud vos. Malo enim non intelligi orationem meam, quàm reprehendi.

VII. Tum Cæsar, Equidem, inquit, Catule, jam mihi videor navasse operam, quòd huc venerim. Nam hæc ipsa recusatio disputationis, disputatio quædam fuit mihi quidem perjucunda. Sed cur impedimus Antonium, cujus audio esse partes, ut de tota eloquentia differat, quemque jamdudum Cotta & Sulpicius expectant?

27. Ego verò, inquit Crassus, neque Antonium verbum facere patiar, & ipse obmutescam, nisi prius a vobis impetraro. Quidnam? inquit Catulus. Ut hîc sitis hodie. Tum, quum ille dubitaret, quòd ad fratrem promiserat, Ego, inquit Julius, pro utroque respondeo: sic faciemus: atque istâ quidem conditione, vel ut verbum nullum faceres, me teneres.

28. Hîc Catulus arrisit: & simul, Præcisa, inquit, mihi quidem dubitatio est, quoniam neque domi imperaram; & hic, apud quem eram futurus, sine mea sententia tam facillè promisit. Tum omnes oculos in Antonium conjecerunt: & ille, Audite verò, audite, inquit: hominem enim audietis de schola, atque a magistro, & Græcis litteris eruditum: & eò quidem loquar confidentiùs, quòd Catulus auditor accessit; cui non solum nos Latini sermonis, sed etiam Græci ipsi solent suæ linguæ subtilitatem elegantiamque concedere.

29. Sed tamen, quoniam hoc totum, quidquid est, sive artificium, sive studium dicendi, nisi accessit os, nullum potest esse; docebo vos, discipuli, id, quod ipse non didici, quid de omni genere dicendi sentiam.

30. Hic posteaquam arriserunt, Res mihi videtur esse, inquit, facultate præclara, arte mediocris: ars enim earum rerum est, quæ sciuntur; oratoris autem omnis actio opinionibus, non scientiâ continetur. Nam & apud eos dicimus, qui nesciunt; & ea dicimus, quæ nescimus ipsi. Itaque & illi aliàs aliud iisdem de rebus & sentiunt, & judicant; & nos contrarias sæpe causas dicimus: non modò ut Crassus contra me dicat aliquando, aut ego contra Crassum, quum alterutri necesse sit falsum dicere; sed etiam ut uterque nostrum eadem de re aliàs aliud defendat, quum plus uno verum esse non possit. Ut igitur in ejusmodi re, quæ mendacio nixa sit, quæ ad scientiam non sæpe perveniat, quæ opiniones hominum & sæpe errores aucupetur, ita dicam, si causam putatis esse, cur audiat.

VIII. Nos verò, & valde quidem, Catulus inquit, putamus; atque eò magis, quòd nullâ mihi ostentatione videris esse usurus. Exorsus es enim non gloriose magis a veritate, ut tu putas, quam a nescio qua dignitate.

32. Ut igitur de ipso genere sum confessus, inquit Antonius, artem esse non maximam: sic illud affirmo, præcepta posse quædam dari peracuta ad pertractandos animos hominum, & ad excipiendo eorum voluntates. Hujus rei scientiam si quis volet magnam quamdam artem esse dicere, non repugnabo. Etenim quum plerique temerè ac nullâ ratione causas in foro dicant; nonnulli autem propter exercitationem, aut propter consuetudinem aliquam callidiùs id faciant; non est dubium, quin, si quis animadverterit, quid sit quare alii meliùs quàm alii dicant, id possit notare. Ergo id qui toto in genere fecerit, is si non planè artem, at quasi artem quamdam invenerit.

33. Atque utinam, ut mihi illa videre videor in foro atque in causis, ita nunc, quemadmodum ea reperirentur, possem vobis exponere! Sed de me videro: nunc hoc propono, quod mihi persuasi, quamvis ars non sit, tamen nihil esse perfectò oratore præclarius. Nam, ut usum dicendi omittam, qui in omni pacata & libera civitate dominatur, tanta oblectatio est in ipsa facultate dicendi, ut nihil hominum aut auribus aut mentibus jucundius percipi possit.

34. Qui enim cantus moderatæ orationis pronuntiatione dulcior inveniri potest?

quod carmen artificiosâ verborum conclusionem aptius? qui actor in imitanda, quàm orator in suscipienda veritate jucundior? Quid autem subtilius, quàm acutæ, crebræque sententiæ? quid admirabilius, quàm res splendore illustrata verborum? quid plenius, quàm omni rerum genere cumulata oratio? Neque enim ulla non propria oratoris est res, quæ quidem ornatè dici graviterque debeat.

IX. Hujus est in dando consilio de maximis rebus cum dignitate explicata sententia: ejusdem & languentis populi incitatio, & effrenati moderatio. Eâdem facultate & fraus hominum ad perniciem, & integritas ad salutem vocatur. Quis cohortari ad virtutem ardentius, quis a vitâ acrius revocare, quis vituperare improbos asperius, quis laudare bonos ornatius, quis cupiditatem vehementius frangere accusando potest? quis mœrorem levare mitius consolando?

36. Historia verò testis temporum, lux veritatis, vita memoriæ, magistra vitæ, nuntia vetustatis, quâ voce aliâ, nisi oratoris, immortalitati commendatur? Nam si qua est ars alia, quæ verborum, aut faciendorum, aut deligendorum scientiam profiteatur: si quisquam dicitur, nisi orator, formare orationem, eamque variare, & distinguere quasi quibusdam verborum

sententiarumque insignibus : aut si via ulla, nisi ab hac una arte, traditur, aut argumentorum, aut sententiarum, aut denique descriptionis atque ordinis : fateamur aut hoc, quod hæc ars profiteatur, alienum esse, aut cum aliqua alia arte esse commune.

37. Sed, si in hac una est ea ratio atque doctrina : non, si qui aliarum artium bene locuti sunt, eò minùs id est hujus unius proprium. Sed, ut orator de iis rebus, quæ ceterarum artium sunt, si modò eas cognorit, ut heri Crassus dicebat, optimè potest dicere : sic ceterarum artium homines ornatius illa sua dicunt, si quid ab hac arte didicerunt.

38. Neque enim si de rusticis rebus agricola quispiam, aut etiam, id quod multi, medicus de morbis, aut de pingendo pictor aliquis disertè dixerit, aut scripserit, idcirco illius artis putanda sit eloquentia : in qua quia vis magna est in hominum ingeniis, eò multi etiam sine doctrina aliquid omnium generum atque artium consequuntur : sed, quid cujusque sit proprium, etsi ex eo judicari potest, quum videris quid quæque doceant, tamen hòc certius nihil esse potest, quàm quòd omnes artes aliæ sine eloquentia suum munus præstare possunt, orator sine ea nomen suum obtinere non potest : ut ceteri, si disertí sint, aliquid ab

hoc habeant ; hic nisi domesticis se instruxerit copiis , aliunde dicendi copiam petere non possit.

X. Tum Catulus , Etsi , inquit , Antoni , minimè impediendus est interpellatione iste cursus orationis tuæ , pati tamen , mihi que ignosces. Non enim possum , quin exclamem , ut ait ille in Trinummo : ita mihi vim oratoris quum exprimere subtiliter visus es , tum laudare copiosissimè ; quod quidem eloquentem vel optimè facere oportet , ut eloquentiam laudet : debet enim ad eam laudandam , ipsam illam adhibere , quam laudat. Sed perge porrò : tibi enim assentior , vestrum hoc totum , disertè dicere , idque si quis in alia arte faciat , eum assumpto aliunde uti bono , non proprio , nec suo.

40. Et Crassus , Nox te , inquit , nobis , Antoni , expolivit , hominemque reddidit : nam hesterno sermone unius cujusdam operis , ut ait Cæcilius , remigem aliquem , aut bajulum , nobis oratorem descripseras , inopem quemdam humanitatis , atque inurbanum.

41. Tum Antonius , Heri enim , inquit , hoc mihi proposueram , ut , si te refellissem , hos a te discipulos abducerem : nunc , Catulo audiente , & Cæsare , videor debere non tam pugnare tecum , quàm , quid ipse sentiam , dicere. Sequitur igitur , quo-

niam nobis est hic, de quo loquimur, in foro, atque in oculis civium constituendus, ut videamus, quid ei negotii demus, cuique eum muneri velimus esse præpositum. Nam Crassus heri, quum vos, Catule & Cæsar, non adessetis, posuit breviter in artis distributione idem, quod Græci plerique posuerunt: neque sanè quid ipse sentiret, sed quid ab illis diceretur, ostendit: duo prima genera questionum esse, in quibus eloquentia versaretur, unum infinitum, alterum certum.

42. Infinitum mihi videbatur id dicere, in quo aliquid generatim quæreretur, hoc modo: Expetendane esset eloquentia: expetendine honores. Certum autem, in quo quid in personis, & in constituta re, & definita quæreretur: cujusmodi sunt, quæ in foro, atque in civium causis, disceptationibusque versantur.

43. Ea mihi videntur aut in lite ordinanda, aut in consilio dando esse posita. Nam illud tertium, quod & a Crasso tactum est, &, ut audio, ille ipse Aristoteles, qui hæc maximè illustravit, adjunxit, etiamsi opus est, tamen minùs est necessarium. Quidnam? inquit Catulus, an laudationes? id enim video poni genus tertium.

XI. Ita, inquit Antonius, & in eo quidem genere scio & me, & omnes, qui

affuerunt ; delectatos esse vehementer , quum abs te est Popilia , mater vestra , laudata ; cui primum mulieri hunc honorem in nostra civitate tributum puto : sed non omnia , quaecumque loquimur , mihi videntur ad artem & ad præcepta esse revocanda.

45. Ex his enim fontibus , unde omnia ornatè dicendi præcepta sumuntur , licebit etiam laudationem ornare , neque illa elementa desiderare , quæ ut nemo tradat , quis est , qui nesciat , quæ sint in homine laudanda ? Positis enim iis rebus , quas Crassus in illius orationis suæ , quam contra collegam censor habuit , principio dixit , *Quæ naturâ , aut fortunâ darentur hominibus , in iis rebus se vinci , posse animo æquo pati : quæ ipsi sibi homines parare possent , in iis rebus se pati vinci non posse* : qui laudabit quempiam , intelliget , exponenda sibi esse fortunæ bona.

46. Ea sunt , generis , pecuniæ , propinquorum , amicorum , opum , valetudinis , formæ , virium , ingenii , ceterarumque rerum , quæ sunt aut corporis , aut extraneæ : si habuerit , bene his usum : si non habuerit , sapienter caruisse : si amiserit , moderatè tulisse. Deinde quid sapienter is , quem laudet , quid liberaliter , quid fortiter , quid justè , quid magnificè , quid piè , quid gratè , quid humaniter , quid de-

nique cum aliqua virtute aut fecerit, aut tulerit. Hæc, & quæ sint ejus generis, facile videbit, qui volet laudare quempiam; & qui vituperare, contraria.

47. Cur igitur dubitas, inquit Catulus, facere hoc tertium genus, quoniam inest in ratione rerum? non enim, si est facilius, eo de numero quoque est excerpendum. Quia nolo, inquit, omnia, quæ cadunt aliquando in oratorem, quamvis egregia sint, ea sic tractare, quasi nihil possit dici sine præceptis suis.

48. Nam & testimonium sæpe dicendum est, ac nonnumquam etiam accuratius, ut mihi necesse fuit in Sex. Titium, seditiosum civem, & turbulentum: explicavi in eo testimonio dicendo, omnia consilia consulatûs mei, quibus illi tribuno plebis pro republica restitisssem; quæque ab eo contra rempublicam facta arbitrarer; exposui: diu retentus sum, multa audiui, multa respondi. Num igitur placet, quum de eloquentia præcipias, aliquid etiam de testimoniis dicendis, quasi in arte tradere? Nihil fanè, inquit Catulus, necesse est.

XII. Quid si (quod sæpe summis viris accidit) mandata sint exponenda, aut in senatu ab imperatore, aut ad imperatorem, aut ad regem, aut ad populum aliquem a senatu? num quia genere oratio-

nis in hujusmodi causis accuratiore est utendum, idcirco pars etiam hæc causarum numeranda videtur, aut propriis præceptis instruenda? Minimè verò, inquit Catulus: non enim deerit homini disertò in ejusmodi rebus facultas, ex ceteris rebus & causis comparata.

50. Ergo item, inquit, illa, quæ sæpe disertè agenda sunt, & quæ ego paulò antè (quum eloquentiam laudarem) dixi oratoris esse, neque habent suum locum ullum in divisione partium, neque certum præceptorum genus, & agenda sunt non minùs disertè, quàm quæ in lite dicuntur, objurgatio, cohortatio, consolatio: quorum nihil est, quod non summa dicendi ornamenta desideret: sed ex artificio res istæ præcepta non quærunt. Planè, inquit Catulus, assentior.

51. Age verò, inquit Antonius, qualis oratoris, & quanti hominis in dicendo putas esse historiam scribere? Si, ut Græci scripserunt, summi, inquit Catulus: si, ut nostri, nihil opus est oratore: satis est non esse mendacem. Atqui, ne nostros contemnas, inquit Antonius, Græci quoque sic initio scriptitarunt, ut noster Cato, ut Pictor, ut Piso.

52. Erat enim historia nihil aliud, nisi annalium confectio: cujus rei, memoriæque publicæ retinendæ causâ, ab initio re-

rum Romanarum usque ad P. Mucium, Pontificem maximum, res omnes singulorum annorum mandabat litteris pontifex maximus, efferebatque in album, & proponebat tabulam domi, potestas ut esset populo cognoscendi, hique etiam nunc Annales maximi nominantur.

53. Hanc similitudinem scribendi multi secuti sunt, qui sine ullis ornamentis monumenta solum temporum, hominum, locorum, gestarumque rerum reliquerunt. Itaque qualis apud Græcos Pherecydes, Hellanicus, Acusilas fuit, aliique permulti; talis noster Cato, & Pictor, & Piso, qui neque tenent quibus rebus ornatur oratio (modò enim huc ista sunt importata) &, dum intelligatur quid dicant, unam dicendi laudem putant esse, brevitatem. Paululum se erexit, & addidit historiæ majorem sonum vocis vir optimus, Crassi familiaris, Antipater: ceteri non exornatores rerum, sed tantummodo narratores fuerunt.

XIII. Est, inquit Catulus, ut dicis. Sed iste ipse Cœlius neque distinxit historiam varietate locorum; neque verborum collocatione, & tractu orationis leni & æquali perpolivit illud opus; sed ut homo neque doctus, neque maximè aptus ad dicendum, sicut potuit, dolavit: vicit tamen, ut dicis, superiores.

55. Minimè mirum, inquit Antonius, si ista res adhuc nostrâ linguâ illustrata non est. Nemo enim studet eloquentiæ nostrorum hominum, nisi ut in causis atque in foro eluceat: apud Græcos autem eloquentissimi homines, remoti a causis forensibus, quum ad ceteras res illustres, tum ad scribendam historiam maximè se applicaverunt. Namque & Herodotum illum, qui princeps genus hoc ornavit, in causis nihil omnino versatum esse accepimus: atqui tantâ est eloquentiâ, ut me quidem, quantum ego Græcè scripta intelligere possim, magnopere delectet.

56. Et post illum Thucydides omnes dicendi artificio, meâ sententiâ, facile vicit: qui ita creber est rerum frequentiâ, ut verborum propè numerum sententiarum numero consequatur; ita porro verbis aptus, & pressus, ut nescias, utrùm res oratione, an verba sententiis illustrentur. Atqui ne hunc quidem, quamquam est in republica versatus, ex numero accepimus eorum, qui causas dictitarunt: & hos libros tum scripsisse dicitur, quum a republica remotus, atque, id quod optimo cuique Athenis accidere solitum est, in exilium pulsus esset.

57. Hunc consecutus est Syracusius Philistus, qui quum Dionysii tyranni familiarissimus esset, otium suum consumpsit in

hïstoria scribenda , maximèque Thucydidem est , sicut mihi videtur , imitatus. Postea verò , quasi ex clarissima rhetoris officina , duo præstantes ingenio , Theopompus , & Ephorus , ab Hocrate magistro impulsì , se ad historiam contulerunt : causas omnino nunquam attigerunt.

XIV. Denique etiam a philosophia profectus princeps Xenophon , Socraticus ille ; post ab Aristotele Callisthenes , comes Alexandri , scripsit historiam : & hic quidem rhetorico pene more : ille autem superior leniore quodam sono est usus , & qui illum impetum oratoris non habeat , vehemens fortasse minùs , sed aliquantò tamen est , ut mihi quidem videtur , dulcior. Minimus nam horum omnium Timæus , quantum autem judicare possum , longè eruditissimus , & rerum copiâ & sententiarum varietate abundantissimus , & ipsâ compositione verborum non impositus , magnam eloquentiam ad scribendum attulit , sed nullum usum forensem.

59. Hæc quum illè dixisset , Quid est , inquit , Catule , Cæsar ? ubi sunt , qui Antonium Græcè negant scire ? quot historicos nominavit ? quàm scienter ? quàm propriè de unoquoque dixit ? Id mehercule , inquit Catulus , admirans , illud jam mirari desino , quod multò magis antè mirabar ,

hunc, quum hæc nesciret, in dicendo posse tantum. Atqui, Catule, inquit Antonius, non ego utilitatem aliquam ad dicendum aucupans, horum libros, & nonnullos alios, sed delectationis causâ, quum est otium, legere soleo.

60. Quid ergo est? fatebor aliquid tamen: ut, quum in sole ambulem, etiamsi aliam ob causam ambulem, fieri natura tamen, ut colorer: sic, quum istos libros ad Misenum (nam Romæ vix licet) studiosius legerim, sentio orationem meam illorum cantu quasi colorari. Sed ne latius hoc vobis patere videatur, hæc duntaxat in Græcis intelligo, quæ ipsi, qui scripserunt, voluerunt a vulgo intelligi.

61. In philosophos vestros si quando incidi, deceptus indicibus librorum, quod sunt ferè inscripti de rebus notis & illustribus, de virtute, de iustitia, de honestate, de voluptate, verbum prorsus nullum intelligo: ita sunt angustis & concisis disputationibus illigati. Poëtas omnino, quasi aliâ quadam linguâ locutos, non conor attingere: cum his me (ut dixi) oblecto, qui res gestas, aut qui orationes scripserunt suas, aut qui ita loquuntur, ut videantur voluisse esse nobis, qui non sumus eruditissimi, familiares. Sed illuc redeo.

XV. Videtisne, quantum munus sit oratoris historia? haud scio, an flumine ora-

tionis, & varietate maximum: neque tamen eam reperio usquam separatim instructam rhetorum præceptis: sita sunt enim ante oculos. Nam quis nescit, primam esse historiæ legem, ne quid falsi dicere audeat; ne quid veri non audeat; ne qua suspicio gratiæ sit in scribendo; ne qua simultatis? Hæc scilicet fundamenta nota sunt omnibus.

63. Ipsa autem exædificatio posita est in rebus & in verbis. Rerum ratio ordinem temporum desiderat, regionum descriptionem: vult etiam, quoniam in rebus magnis, memoriæque dignis consilia primùm, deinde acta, postea eventus expectantur, & de consiliis significari quid scriptor probet, & in rebus gestis declarari non solum quid actum, aut dictum sit, sed etiam quomodo: & quum de eventu dicatur, ut causæ explicentur omnes, vel casus, vel sapientiæ, vel temeritatis: hominumque ipsorum non solum res gestæ, sed etiam, qui famâ ac nomine excellant, de cujusque vita, atque natura.

64. Verborum autem ratio, & genus orationis, fusum atque tractum, & cum lenitate quadam æquabili profluens, sine hac judiciali asperitate, & sine sententiarum forensium aculeis persequendum est. Harum tot, tantarumque rerum videtisne nulla esse præcepta, quæ in artibus rhe-

torum reperiantur ? In eodem silentio multa alia oratorum officia jacuerunt , cohortationes , consolationes , præcepta , aut monita , quæ tractanda sunt omnia discretissimè : sed locum suum in illis artibus , quæ traditæ sunt , habent nullum.

65. Atque in hoc genere illa quoque est infinita silva , quòd oratori plerique (ut etiam Crassus ostendit) duo genera ad dicendum dederunt : unum , de certa definitaque causa , quales sunt , quæ in litibus , quæ in deliberationibus versantur ; addat , si quis volet , etiam laudationes : alterum , quod appellant omnes ferè scriptores , explicat nemo , infinitam generis sine tempore , & sine persona , quæstionem. Hoc quid , & quantum sit , quum dicunt , intelligere mihi non videntur.

66. Si enim est oratoris , quæcumque res infinitè posita sit , de ea posse dicere , dicendum erit ei , quanta sit solis magnitudo , quæ forma terræ : de mathematicis , de musicis rebus non poterit , quin dicat , hoc onere suscepto , recusare. Denique ei , qui profitetur esse suum , non solum de iis controversiis , quæ temporibus , & personis notatæ sunt , hoc est , de omnibus forensibus , sed etiam de generum infinitis quæstionibus dicere , nullum potest esse genus orationis , quod sit exceptum.

XVI. Sed si illam quoque partem quaestionum oratori volumus adjungere vagam, & liberam, & latè parentem, ut de rebus bonis aut malis, expetendis aut fugiendis, honestis aut turpibus, utilibus aut inutilibus, de virtute, de justitia, de continentia, de prudentia, de magnitudine animi, de liberalitate, de pietate, de amicitia, de fide, de officio, de ceteris virtutibus, contrariisque vitiis, dicendum oratori putemus: itemque de republica, de imperio, de re militari, de disciplina civitatis, de hominum moribus: assumamus eam quoque partem, sed ita, ut sit circumscripta modicis regionibus.

68. Equidem omnia, quæ pertinent ad usum civium, morem hominum, quæ versantur in consuetudine vitæ, in ratione reipublicæ, in hac societate civili, in sensu hominum communi, in natura, in moribus, comprehendenda esse oratori puto; si minùs, ut separatim de his rebus philosophorum more respondeat, at certè ut in causa prudenter possit intexere: hisce autem ipsis de rebus ut ita loquatur, ut ii, qui jura, qui leges, qui civitates constituerunt, locuti sunt, simpliciter & splendè, sine ulla serie disputationum, & sine jejuna concertatione verborum.

69. Hoc loco, ne qua sit admiratio, si tot, tantarumque rerum nulla a me præ-

cepta ponentur, sic statuo. Ut in ceteris artibus, quum tradita sunt cujusque artis difficillima, reliqua, quia, aut faciliora, aut similia sint, tradi non necesse esse: ut in pictura, qui hominis speciem pingere perdidicerit, posse eum cujusvis vel formæ, vel ætatis, etiamsi non didicerit, pingere: neque esse periculum, qui leonem aut taurum pingat egregiè, ne idem in multis aliis quadrupedibus facere non possit: neque enim est omnino ars ulla, in qua omnia, quæ illâ arte effici possunt, a doctore tradantur; sed qui primarum & certarum rerum genera ipsa didicerunt, reliqua non incommodè persequuntur.

70. Similiter arbitror, in hac sive ratione, sive exercitatione dicendi, qui illam vim adeptus sit, ut eorum mentes, qui aut de republica, aut de ipsius rebus, aut de iis, contra quos, aut pro quibus dicat, cum aliqua statuendi potestate audiant, ad suum arbitrium movere possit, hunc de toto illo genere reliquarum orationum non plus quæsiturum esse quid dicat, quàm Polycletum illum, quum Herculem fingeat, quemadmodum pellem, aut hydram fingeret, etiamsi hæc numquam separatim facere didicisset.

XVII. Tum Catulus: Præclarè mihi videris, Antoni, posuisse ante oculos, quid discere oporteret eum, qui orator esset fu-

turus; quid, etiamsi non didicisset, ex eo, quod didicisset, assumeret: deduxisti enim totum hominem in duo solum genera causarum; cetera innumerabilia exercitationi, & similitudini reliquisti. Sed videto, ne in istis duobus generibus hydra tibi sit & pellis: Hercules autem, & alia opera majora, ne in illis rebus, quas prætermittis, relinquantur. Non enim mihi minus operis videtur de universis generibus rerum, quàm de singulorum causis, ac multò etiam majus de natura deorum, quàm de hominum litibus dicere.

72. Non est ita, inquit Antonius. Dicam enim tibi, Catule, non tam doctus, quàm (id quod est majus) expertus. Omnium ceterarum rerum oratio, mihi crede, ludus est homini non hebeti, neque inexercitato; neque communium litterarum, & politioris humanitatis experti. In causarum contentionibus magnum est quoddam opus, atque haud sciam an de humanis operibus longè maximum; in quibus vis oratoris plerumque ab imperitis exitu & victoriâ judicatur; ubi adest armatus adversarius, qui sit & feriendus & repellendus; ubi sæpe is, qui rei dominus futurus est, alienus atque iratus, aut etiam amicus adversario, & inimicus tibi est; quum aut docendus is est, aut dedocendus, aut reprimendus, aut incitandus,

aut omni ratione ad tempus, ad causam oratione moderandus; in quo sæpe benevolentia ad odium, odium autem ad benevolentiam deducendum est; qui tamquam machinatione aliquâ, tum ad severitatem, tum ad remissionem animi, tum ad tristitiam, tum ad lætitiâ est contorquendus.

73. Omnium sententiarum gravitate, omnium verborum ponderibus est utendum: accedat oportet actio varia, vehemens, plena spiritûs, plena doloris, plena veritatis. In his operibus si quis illam artem comprehenderit, ut, tamquam Phidias, Minervæ signum efficere possit; non sanè, quemadmodum in clypeo idem ille artifex minora illa opera facere discat, laborabit.

XVIII. Tum Catulus: Quò ista majora, ac mirabilia fecisti, eò me major expectatio tenet, quibusnam rationibus, quibusve præceptis ea tanta vis comparetur: non quò mea quidem jam intersit (neque enim ætas id mea desiderat, & aliud quoddam genus dicendi nos secuti sumus, qui numquam sententias de manibus iudicum vi quadam orationis extorsimus, ac potius placatis eorum animis, tantum quantum ipsi patiebantur, accepimus) sed tamen ista tua, nullum ad usum meum, tantum cognoscendi studio adductus, requiro.

75. Nec mihi opus est Græco aliquo doctore, qui mihi pervulgata præcepta decantet, quum ipse numquam forum, numquam ullum iudicium adspexerit: ut Peripateticus ille dicitur Phormio; quum Annibal Carthagine expulsus Ephesum ad Antiochum venisset exsul, proque eo, quodd ejus nomen erat magnâ apud omnes gloriâ, invitatus esset ab hospitibus suis, ut eum, quem dixi, si vellet, audiret, quumque se non nolle dixisset; locutus esse dicitur homo copiosus aliquot horas de imperatoris officio, & de omni re militari. Tum, quum ceteri, qui illum audierant, vehementer essent delectati, quærebant ab Annibale, quidnam ipse de illo philosopho judicaret. Hic Pœmus non optimè Græcè, sed tamen liberè respondisse fertur, multos se deliros senes sæpe vidisse; sed qui magis, quàm Phormio, deliraret, vidisse neminem.

76. Neque mehercule injuriâ: quid enim aut arrogantius, aut loquacius fieri potuit, quàm Annibali, qui tot annos de imperio cum populo Romano omnium gentium victore certasset, Græcum hominem, qui numquam hostem, numquam castra vidisset, numquam denique minimam partem ullius publici muneris attigisset, præcepta de re militari dare? Hoc mihi facere omnes isti, qui de arte dicendi præ-

cipiunt, videntur: quod enim ipsi experti non sunt, id docent ceteros. Sed hoc minùs fortasse errant, quòd non te, ut ille Annibalem, sed pueros, aut adulescentulos docere conantur.

XIX. Erras, Catule, inquit Antonius: nam egomet in multos jam Phormiones incidi. Quis enim est istorum Græcorum, qui quemquam nostrum quidquam intelligere arbitretur? Ac mihi quidem non ita molesti sunt; facile omnes perpetior & perfero: nam aut aliquid afferunt, quod mihi non displiceat; aut efficiunt, ut me non didicisse minùs pœniteat. Dimitto autem eos non tam contumeliosè, quàm philosophum illum Annibal, & eò fortasse plus habeo etiam negotii: sed tamen est eorum doctrina, quantum ego judicare possum, perridicula.

78. Dividunt enim totam rem in duas partes, in causæ controversiam, & in quæstionis. *Causam* appellant, rem positam in disceptatione rerum & controversia: *quæstionem* autem, rem positam in infinita dubitatione. De causa præcepta dant; de altera parte dicendi mirum silentium est.

79. Denique quinque faciunt quasi membra eloquentiæ, invenire quid dicas, inventa disponere, deinde ornare verbis, post memoriæ mandare, tum ad extremum
agere,

agere, ac pronuntiare; rem fanè non reconditam. Quis enim hoc non suâ sponte viderit, neminem posse dicere, nisi & quid diceret, & quibus verbis, & quo ordine diceret, haberet, & ea meminisset? Atque hæc ego non reprehendo: sed ante oculos posita esse dico, ut eas item quatuor, quinque, sexve partes, vel etiam septem (quoniam aliter ab aliis digeruntur) in quas est ab his omnis oratio distributa.

80. Jubent enim exordiri ita, ut eum, qui audiat, benevolum nobis faciamus, & docilem, & attentum: deinde rem narrare ita, ut verisimilis narratio sit, ut aperta, ut brevis: post autem dividere causam, aut proponere: nostra confirmare argumentis, ac rationibus: deinde contraria refutare. Tum autem alii conclusionem orationis, & quasi perorationem collocant; alii jubent, antequam peroretur, ornandi, aut augendi causâ, digredi; deinde concludere, ac perorare.

81. Ne hæc quidem reprehendo: sunt enim concinnè distributa; sed tamen, id quod necesse fuit hominibus expertibus veritatis, non peritè. Quæ enim præcepta principiorum, & narrationum esse voluerunt, ea in totis orationibus sunt conservanda.

82. Nam ego mihi benevolum judicem facilius facere possum in cursu orationis,

quàm quum omnia sunt inaudita : docilem autem , non quum polliceor me demonstraturum , sed tum , quum doceo , & explano : attentum verò , crebrò totâ actione excitandis mentibus judicum , non primâ denuntiatione efficere possumus.

83. Jam verò narrationem quòd jubent verisimilem esse , & apertam , & brevem , rectè nos admonent : quòd hæc narrationis magis putant esse propria , quàm totius orationis , valde mihi videntur errare : omninoque in hoc omnis est error , quòd existimant , artificium esse hoc quoddam non dissimile ceterorum , cujusmodi de ipso jure civili hesterno die Crassus componi posse dicebat ; ut genera rerum primùm exponerentur , in quo vitium est , si genus ullum prætermittatur ; deinde singulorum generum partes , in quo & deesse aliquam partem , & superare , mendosum est ; tum verborum omnium definitiones , in quibus neque abesse quidquam decet , neque redundare.

84. Sed hoc si in jure civili , si etiam in parvis aut mediocribus rebus doctiores assequi possunt ; non idem sentio tanta hac in re , tamque immensa posse fieri. Sin autem qui arbitrantur ; deducendi sunt ad eos , qui hæc docent : omnia jam explicata & perpolita assequuntur : sunt enim innumerabiles de his rebus libri , neque

abdit, neque obscuri. Sed videant quid velint, ad ludendumne, an ad pugnandum arma sint sumpturi. Aliud enim pugna, & acies; aliud ludus, campusque noster desiderat. Attamen ars ipsa ludicra armorum, & gladiatori, & militi prodest aliquid: sed animus acer, & præsens, & acutus idem atque versutus invictos viros efficit, non difficilius arte conjunctâ.

XX. Quare ego tibi oratorem sic jam instituam, si potuero, ut, quid efficere possit, antè perspiciam. Sit enim mihi tinctus litteris; audierit aliquid, legerit; ista ipsa præcepta acceperit: tentabo quid deceat, quid voce, quid viribus, quid spiritu, quid linguâ efficere possit. Si intelligam posse ad summos pervenire; non solum hortabor, ut elaboret, sed etiam, si vir quoque mihi bonus videbitur, obsecrabo: tantum ego in excellente oratore, & eodem viro bono, pono esse ornamentum universæ civitati. Sin videbitur, quum omnia summè fecerit, tamen ad mediocres oratores esse venturus; permittam ipsi, quid velit; molestus magnopere non ero. Sin planè abhorrebit, & erit absurdus; ut se contineat, aut ad aliud studium transferat, admonebo.

86. Nam neque is, qui optimè potest, deferendus ullo modo est a cohortatione nostra; neque is, qui aliquid potest, de-

terrendus : quòd alterum , divinitatis mihi cujusdam videtur ; alterum , vel non facere quod non optimè possis , vel facere quod non pessimè facias , humanitatis : tertium verò illud , clamare contrà quàm deceat , & quàm possit , hominis est , ut tu , Catule , de quodam declamatore dixisti , stultitiæ suæ quàm plurimos testes domestico præconio colligentis.

87. De hoc igitur , qui erit talis , ut cohortandus adjuvandusque sit , ita loquamur , ut ei tradamus ea duntaxat , quæ nos usus docuit , ut nobis ducibus veniat eò , quòd sine duce ipsi pervenimus , quoniam meliora docere non possumus.

XXI. Atque , ut a familiari nostro exordiar , hunc ego , Catule , Sulpicium , primum in causâ parvula adolescentulum audivi , voce , & formâ , & motu corporis , & reliquis rebus aptum ad hoc munus , de quo quærimus ; oratione autem celerî & concitatâ , quod erat ingenii , & verbis effervescentibus , & paulò nimium redundantibus , quod erat ætatis , non sum aspernatus. Volo enim se efferat in adolescente fecunditas : nam faciliùs , sicut in vitibus , revocantur ea , quæ sese nimium profuderunt , quàm , si nihil valer materies , nova farmenta culturâ excitantur : ita volo esse in adolescente , unde aliquid amputem : non enim potest in eo

fuccus esse diuturnus, quod nimis celeriter est maturitatem affecutum.

89. Vidi statim indolem, neque dimisi tempus, & eum sum cohortatus, ut forum sibi ludum putaret esse ad discendum; magistrum autem, quem vellet, eligeret; me quidem si audiret, L. Crassum. Quod iste arripuit, & ita sese facturum confirmavit, atque etiam addidit, gratiæ scilicet causâ, me quoque sibi magistrum futurum. Vix annus intercesserat ab hoc sermone cohortationis meæ, quum iste accusavit C. Norbanum, defendente me. Non est credibile, quid interesse mihi sit visum inter eum, qui tum erat, & qui anno antè fuerat. Omnino in illud genus eum Crassi magnificum, atque præclarum natura ipsa ducebat: sed ea non satis proficere potuisset, nisi eodem, studio atque imitatione, incidisset, atque ita dicere consueisset, ut totâ mente Crassum atque omni animo intueretur.

XXII. Ergo hoc sit primum in præceptis meis, ut demonstramus, quem imitetur, atque ita, ut, quæ maximè excellent in eo quem imitabitur, ea diligentissimè persequatur. Tum accedat exercitatio, quâ illum, quem antè delegerit, imitando effingat, atque ita exprimat, non ut multos imitatores sæpe cognovi, qui aut ea, quæ facilia sunt, aut etiam illa, quæ in-

signia, ac pene vitiosa, conſectantur imitando.

91. Nihil eſt facilius, quàm amiſtum imitari alicujus, aut ſtatum, aut motum. Si verò etiam vitioſè aliquid eſt, id ſumere, & in eo vitioſum eſſe, non magnum eſt: ut ille, qui nunc etiam, amiſſâ voce, furit in republica Fuſius, nervos in dicendo Fimbriæ, quos tamen habuit ille, non aſſequitur; oris pravitatem, & verborum latitudinem imitatur. Sed tamen ille nec deligere ſcivit, cujus potiſſimùm ſimilis eſſet, & in eo ipſo, quem delegerat, imitari etiam vitia voluit.

92. Qui autem ita faciet, ut oportet, primùm vigilet neceſſe eſt in deligendo: deinde, quem probavit, in eo, quæ maximè excellent, ea diligentiffimè perſequatur. Quid enim cauſæ cenſetis eſſe, cur ætates extulerint ſingulæ ſingula propè genera dicendi? quod non tam facile in noſtris oratoribus poſſumus judicare, quia ſcripta, ex quibus judicium fieri poſſet, non multa fanè reliquerunt, quàm in Græcis; ex quorum ſcriptis, cujuſque ætatis quæ dicendi ratio, voluntasque fuerit, intelligi poteſt.

93. Antiquiſſimi ferè ſunt, quorum quidem ſcripta conſtent, Pericles atque Alcibiades, & eâdem ætate Thucydides, ſubtiles, acuti, breves; ſententiis magis,

quàm verbis abundantes. Non potuisset accidere, ut unum esset omnium genus, nisi aliquem sibi proponerent ad imitandum. Consecuti sunt hos Critias, Theramenes, Lysias: multa Lysiae scripta sunt, nonnulla Critiae, de Theramene audivimus: omnes etiam tum retinebant illum Periclis succum, sed erant paulò uberiore filo. Ecce tibi exortus est Isocrates, magister istorum omnium, cujus e ludo, tamquam ex equo Trojano, meri principes exierunt: sed eorum partim in pompa, partim in acie illustres esse voluerunt.

XXIII. Itaque & illi, Theopompi, Ephori, Philisti, Naucratae, multique alii naturis differunt; voluntate autem similes sunt & inter sese, & magistri: & ii, qui se ad causas contulerunt, ut Demosthenes, Hyperides, Lycurgus, Aeschines, Dinarchus, alique complures, etsi inter se pares non fuerunt, tamen sunt omnes in eodem veritatis imitandae genere versati, quorum quamdiu mansit imitatio, tamdiu genus illud dicendi, studiumque vixit.

95. Posteaquam extinctis his, omnis eorum memoria sensim obscurata est & evanuit; alia quaedam dicendi molliora, ac remissiora genera viguerunt. Inde Demochares, quem aiunt sororis filium fuisse Demosthenis; tum Phalereus ille Deme-
trius, omnium istorum, meâ sententiâ;

politissimus, alique eorum similes exstiterunt. Quæ si volumus usque ad hoc tempus persequi, intelligemus, ut hodie Alabandensem illum Meneclem, & ejus fratrem Hieroclem, quos ego audiui, tota imitatur Asia: sic semper fuisse aliquem, cujus se similes plerique esse vellent.

96. Hanc igitur similitudinem qui imitatione assequi volet, tum exercitationibus crebris atque magnis, tum scribendo maximè persequatur: quod si hic noster Sulpicius faceret, multò ejus oratio esset pressior; in qua nunc interdum, ut in herbis rustici solent dicere, in summa ubertate inest luxuries quædam, quæ stilo depascenda est.

97. Hic Sulpicius: me quidem, inquit, rectè mones, idque mihi gratum est: sed ne te quidem, Antoni, multum scriptitasse arbitror. Tum ille: Quasi verò, inquit, non ea præcipiam aliis, quæ mihi ipsi defunt. Sed tamen ne tabulas quidem conficere existimor: verum & in hoc, ex re familiari mea, & in illo, ex eo, quod dico, quantum id cumque est, quid faciam, judicari potest.

98. Atque esse tamen multos videmus, qui neminem imitentur, & suapte naturâ, quod velint, sine cujusquam similitudine consequantur: quod & in vobis animadverti rectè potest, Cæsar, & Cotta, quo-

rum alter inusitatum quidem nostris oratoribus leporem quemdam, & falem; alter acutissimum, & subtilissimum dicendi genus est consecutus. Neque verò vester æqualis Curio, patre, meâ sententiâ, vel eloquentissimo temporibus illis, quemquam mihi magnopere videtur imitari; qui tamen verborum gravitate, & elegantia, & copiâ, suam quamdam expressit quasi formam, figuramque dicendi, quod ego maximè potui judicare in ea causa, quam ille contra me apud centumviros pro fratribus Cossis dixit: in qua nihil illi defuit, quod non modò copiosus, sed etiam sapiens orator habere deberet.

XXIV. Verùm, ut aliquando ad causas deducamus illum, quem constituimus, & eas quidem, in quibus plusculum negotiū est, judiciorum, atque litium (riferit aliquis fortasse hoc præceptum: est enim non tam acutum, quàm necessarium, magisque monitoris non fatui, quàm eruditi magistri) hoc ei primum præcipientus, quas-cumque causas erit acturus, ut eas diligenter, penitusque cognoscat.

100. Hoc in ludo non præcipitur: faciles enim causæ ad pueros deferuntur. Lex peregrinum vetat in murum adscendere: adscendit: hostes repulit: accusatur. Nihil est negotii hujusmodi causam cognoscere. Rectè igitur nihil de causa discenda præci-

piunt : hæc est enim in ludo causarum ferè formula. At verò in foro, tabulæ, testimonia, pacta, conventa, stipulationes, cognationes, affinitates, decreta, responsa, vita denique eorum, qui in causa versantur, tota cognoscenda est : quarum rerum negligentia plerasque causas, & maximè privatas (sunt enim multò sæpe obscuriores) videmus amitti.

101. Ita nonnulli, dum operam suam multam existimari volunt, ut toto foro volitare, & a causa ad causam ire videantur, causas dicunt incognitas. In quo est illa quidem magna offensio, vel negligentia, susceptis rebus; vel perfidia, receptis : sed etiam illa major opinione, quòd nemo potest de ea re, quam non novit, non turpissimè dicere. Ita dum inertia vituperationem, quæ major est, contempnunt, assequuntur etiam illam, quam magis ipsi fugiunt, tarditatis.

102. Equidem soleo dare operam, ut de sua quisque re me ipse doceat, & ut ne quis alius adsit, quòd liberius loquatur; & agere adversarii causam, ut ille agat suam, & quidquid de sua re cogitarit, in medium proferat. Itaque quum ille discessit, tres personas unus sustineo summâ animi æquitate, meam, adversarii, judicis. Qui locus est talis, ut plus habeat adjumenti, quàm incommodi, hunc judico

esse dicendum : ubi plus mali , quàm boni reperio , id totum abjudico , atque ejicio.

103. Ita assequor , ut alio tempore cogitem , quid dicam , & alio dicam : quæ duo plerique ingenio freti ; simul faciunt. Sed certè iidem illi meliùs aliquantò dicerent , si aliud sumendum sibi tempus ad cogitandum , aliud ad dicendum putarent. Quum rem penitus causamque cognovi , statim occurrit animo , quæ sit causa ambigui.

104. Nihil est enim , quod inter homines ambigatur ; sive ex crimine causa constet , ut facinoris ; sive ex controversia , ut hereditatis ; sive ex deliberatione , ut belli ; sive ex persona , ut laudis ; sive ex disputatione , ut de ratione vivendi ; in quo non aut quid factum sit , aut fiat , futurumve sit , quærat , aut quale sit , aut quid vocetur.

XXV. Ac nostræ ferè causæ , quæ quidem sunt criminum , plerumque infitiatione defenduntur. Nam & de pecuniis repetundis , quæ maximæ sunt , neganda ferè sunt omnia : & de ambitu rarò illud datur , ut possis liberalitatem ac benignitatem ab ambitu atque largitione sejungere. De siciariis , de veneficiis , de peculatu , infitari necesse est. Id est igitur genus primum causarum in judiciis , ex controversia facti. In deliberationibus plerumque ex futuri , rarò etiam ex instantis , aut facti. Gvj

106. Sæpe autem res non, sit, necne, sed qualis sit, quæritur: ut quum L. Oppidii causam defendebat apud populum, audiente me, C. Carbo consul, nihil de C. Gracchi nece negabat; sed id jure pro salute patriæ factum esse dicebat; ut eidem Carboni tribuno plebis aliâ tum mente rempublicam capeßenti, P. Africanus de Tib. Graccho interroganti, responderat, jure cæsum videri. Jure autem omnia defenduntur, quæ sunt ejus generis, ut aut oportuerit, aut licuerit, aut necesse fuerit, aut imprudentiâ, aut casu facta esse videantur.

107. Jam quid vocetur, quæritur, quum, quo verbo quid appellandum sit, contenditur: ut mihi ipsi cum hoc Sulpicio fuit in Norbani causa summa contentio. Pleraque enim de iis, quæ ab isto objiciebantur, quum confiterer, tamen ab illo majestatem minutam negabam: ex quo verbo lege Apuleiâ tota illa causa pendebat.

108. Atque in hoc genere causarum nonnulli præcipiunt, ut verbum illud, quod causam facit, lucidè breviterque definiatur. Quod mihi quidem perquam puerile videri solet. Alia est enim, quum inter doctos homines de iis ipsis rebus, quæ versantur in artibus, disputatur, verborum definitio: ut, quum quæritur, quid sit ars,

quid sit lex, quid sit civitas. In quibus hoc præcipit ratio atque doctrina, ut vis ejus rei, quam definias, sic exprimatur, ut neque absit quidquam, neque supersit.

109. Quod quidem in illa causa neque Sulpicius fecit, neque ego facere conatus sum. Nam, quantum uterque nostrum potuit, omni copiâ dicendi dilatavit, quid esset majestatem minuere. Etenim definitio primum reprehenso verbo uno, aut addito, aut dempto, sæpe extorquetur e manibus: deinde genere ipso doctrinam redolet, exercitationemque pene puerilem: tum in sensum, & in mentem judicis intrare non potest. Antè enim præterlabitur, quàm percepta est.

XXVI. Sed in eo genere, in quo, quale sit quid, ambigitur, existit etiam ex scripti interpretatione sæpe contentio; in quo nulla potest esse, nisi ex ambiguo, controversia. Nam illud ipsum, quum scriptum a sententia discrepat, genus quoddam habet ambigui: quod tum explicatur, quum ea verba, quæ defunt, suggesta sunt: quibus additis defenditur, sententiam scripti perspicuam fuisse: & ex contrariis scriptis si quid ambigitur, non novum genus nascitur, sed superioris generis causa duplicatur. Itaque aut nunquam dijudicari poterit, aut ita dijudicabitur, ut referendis præteritis verbis, id

scriptum, quodcumque defendimus; suppleatur. Ita fit, ut unum genus in iis causis, quæ propter scriptum ambiguntur, relinquatur, si est scriptum aliquid ambiguum.

111. Ambiguorum autem quum plura genera sunt, quæ mihi videntur ii melius nosse, qui dialectici appellantur; hi autem nostri ignorare, qui non minùs nosse debeant: tum illud est frequentissimum in omni consuetudine vel sermonis, vel scripti, quum idcirco aliquid ambigitur, quòd aut verbum, aut verba sint prætermissa.

112. Iterum autem peccant, quum genus hoc causarum, quod in scripti interpretatione versatur, ab illis causis, in quibus, qualis quæque res sit, disceptatur, sejungunt. Nusquam enim tam quaeritur, quale sit genus ipsum rei, quàm in scripto, quod totum a facti controversia separatum est.

113. Ita tria sunt omnino genera, quæ in disceptationem & controversiam cadere possunt; Quid fiat, factum, futurumve sit, aut Quale sit, aut Quomodo nominetur. Nam & illud quidem, quod quidam Græci adjungunt, Rectene factum sit, totum in eo est, quod, Quale sit, quaerimus.

XXVII. Sed jam ad institutum rever-

tar meum. Quum igitur, accepto causæ genere, & cognito, rem tractare cœpi, nihil prius constituo, quàm quid sit illud, quò mihi referenda sit omnis illa oratio, quæ sit propria quæstionis & iudicii: deinde illa duo diligentissimè considero, quorum alterum commendationem habet nostram, aut eorum, quos defendimus, alterum est accommodatum ad eorum animos, apud quos dicimus, ad id, quod volumus, commovendos.

115. Ita ratio omnis dicendi tribus ad persuadendum rebus est nixa: ut probeamus vera esse ea, quæ defendimus: ut conciliemus nobis eos, qui audiunt: ut animos eorum, ad quemcumque causa postulabit motum, vocemus.

116. Ad probandum autem duplex est oratori subjecta materies: una rerum earum, quæ non excogitantur ab oratore, sed in re positæ, ratione tractantur: ut tabulæ, testimonia, pacta, conventa, quæstiones, leges, senatusconsulta, res iudicatæ, decreta, responsa, & reliqua, si quæ sunt, quæ non reperiuntur ab oratore, sed ad oratorem a causa, atque a reis deferuntur. Altera est, quæ tota in disputatione, & argumentatione oratoris collocata est.

117. Ita in superiore genere de tractandis argumentis, in hoc autem etiam de

inveniendis cogitandum est. Atque isti quidem, qui docent, quum causas in plura genera secuerunt, singulis generibus argumentorum copiam suggerunt: quod etiamsi ad instituendos adolescentulos magis aptum est, ut, simul ac posita sit causa, habeant quò se referant, unde statim expedita possint argumenta depromere; tamen & tardi ingenii est rivulos consecrari, fontes rerum non videre: & jam ætatis est usûsque nostri, a capite, quod velimus, arcessere, & unde omnia manant, videre.

118. Et primùm genus illud earum rerum, quæ ad oratorem deferuntur, meditatam nobis in perpetuum ad omnem usum similium rerum esse debet. Nam pro tabulis & contra tabulas; pro testibus & contra testes; pro quæstionibus & contra quæstiones; & item de ceteris rebus ejusdem generis, vel separatim dicere solemus de genere universo, vel definitè de singulis temporibus, hominibus, causis: quos quidem locos (vobis hoc, Cotta, & Sulpici, dico) multa commentatione, atque meditatione paratos atque expeditos habere debetis.

119. Longum est enim nunc me explicare, quâ ratione aut confirmare, aut infirmare testes, tabulas, quæstiones oporteat. Hæc sunt omnia ingenii vel mediocris, exercitationis autem maximæ: artem

quidem, & præcepta duntaxat hætenus requirunt, ut certis dicendi luminibus ornentur.

120. Itemque illa, quæ sunt alterius generis, quæ tota ab oratore pariuntur, excogitationem non habent difficilem, explicationem magis illustrem perpolitamque desiderant. Itaque quum hæc duo nobis quærenda sint in causis, primum, quid; deinde, quomodo dicamus: alterum, quod totum arte tinctum videtur, tametsi artem requirit, tamen prudentiæ est pene mediocris, quid dicendum sit, videre: alterum est, in quo oratoris vis illa divina virtusque cernitur, ea, quæ dicenda sunt, ornatè, copiosè, varièque dicere.

XXVIII. Quare illam partem superiorem, quoniam semel ita vobis placuit, non recusabo, quominus perpoliam atque conficiam (quantum consequar, vos iudicabitis) quibus ex locis ad eas tres res, quæ ad fidem faciendam solæ valent, ducatur oratio, ut & concilientur animi, & doceantur, & moveantur: hæc sunt enim tria numero. Ea verò quemadmodum illustrentur, præstò est, qui omnes docere possit, qui hoc primus in nostros mores induxit, qui maximè auxit, qui solus effecit.

122. Namque ego, Catule (dicam enim non reverens assentandi suspensionem) ne-

minem esse oratorem paulò illustriorem arbitror, neque Græcum, neque Latinum, quem ætas nostra tulerit, quem non & sæpe & diligenter audierim (itaque, si quid est in me, quod jam sperare videor, quoniam quidem vos, his ingeniis homines, tantum operæ mihi ad audiendum datis, ex eo est, quòd nihil quisquam umquam me audiente egit orator, quod non in memoria mea penitus infederit) atque ego is, qui sum, quantuscumque sum ad judicandum, omnibus auditis oratoribus; sine ulla dubitatione sic statuo & judico, neminem omnium tot, & tanta, quanta sint in Crasso, habuisse ornamenta dicendi.

123. Quamobrem, si vos quoque hoc idem existimatis, non erit, ut opinor, iniqua partitio, si, quum ego hunc oratorem, quem nunc fingo, ut institui, crearo, aluerò, confirmaro; tradam eum Crasso, & vestiendum, & ornandum.

124. Tum Crassus: Tu verò, inquit, Antoni, perge, ut instituisti. Neque enim est boni, neque liberalis parentis, quem procrearit, & eduxerit, eum non & vestire, & ornare; præsertim quum te locupletem esse negare non possis. Quod enim ornamentum, quæ vis, qui animus, quæ dignitas illi oratori defuit, qui in causa peroranda non dubitavit excitare reum

consularem, & ejus diloricare tunicam; & judicibus cicatrices adversas senis imperatoris ostendere? qui idem, hoc accusante Sulpicio, quum hominem seditiosum furiosumque defenderet, non dubitavit seditiones ipsas ornare, ac demonstrare gravissimis verbis, multos sæpe impetus populi non injustos esse, quos præstare nemo possit? multas etiam e republica seditiones sæpe esse factas, ut quum reges essent exacti, ut quum tribunitia potestas esset constituta? illam Norbani seditionem, ex luctu civium, & ex Cæpionis odio, qui exercitum amiserat, neque reprimi potuisse, & jure esse conflata?

125. Potuit hic locus tam anceps, tam inauditus, tam lubricus, tam novus, sine quadam incredibile vi & facultate dicendi tractari? Quid ego de Cn. Manlii, quid de Q. Regis commiseratione dicam? quid de aliis innumerabilibus? in quibus hoc non maximè enituit, quod tibi omnes dant, acumen quoddam singulare; sed hæc ipsa, quæ nunc ad me delegare vis, ea semper in te eximia & præstantia fuerunt.

XXIX. Tum Catulus: Ego verò, inquit, in vobis hoc maximè admirari soleo, quòd, quum inter vos in dicendo dissimilimi sitis, ita tamen uterque vestrùm dicat, ut ei nihil neque a natura denegatum, neque a doctrina non delatum esse videatur.

Quare, Crasse, neque tu tuâ suavitate nos privabis, ut, si quid ab Antonio aut prætermisum, aut relictum sit, non explices: neque te, Antoni, si quid non dixeris, existimabimus non potuisse potius, quam a Crasso dici maluisse.

127. Hic Crassus: Quin tu, inquit, Antoni, omittis ista, quæ proposuisti, quæ nemo horum desiderat: quibus ex locis ea, quæ dicenda sunt in causis, reperiantur: quæ quàmquam abs te novo quodam modo, præclareque dicuntur, sunt tamen & re faciliora, & præceptis pervagata: illa deprome nobis, unde afferas quæ sæpissime tractas, semperque divinitus.

128. Depromam equidem, inquit Antonius, & quò facilius id a te exigam, quod peto, nihil tibi a me postulanti recusabo. Meæ totius orationis, & istius ipsius in dicendo facultatis, quàm modò Crassus in cælum verbis extulit, tres sunt rationes, ut antè dixi; una conciliandorum hominum, altera docendorum, tertia concitandorum.

129. Harum trium partium prima lenitatem orationis, secunda acumen, tertia vim desiderat. Nam hoc necesse est, ut is, qui nobis causam adjudicaturus sit, aut inclinatione voluntatis propendeat in nos, aut defensionis argumentis adducatur, aut animi permotione cogatur. Sed quoniam

illa pars, in qua rerum ipsarum explicatio ac defensio posita est, videtur omnem hujus generis quasi doctrinam continere, de ea primùm loquemur, & pauca dicemus. Pauca enim sunt, quæ usu jam tractata, & animo quasi notata habere videamur.

XXX. Ac tibi sapienter monenti, L. Crasse, libenter assentiemur, ut singulorum causarum defensiones, quas solent magistri pueris tradere, relinquamus: aperiamus autem ea capita, unde omnis ad omnem & causam, & orationem disputatio ducitur. Neque enim, quoties verbum aliquod est scribendum nobis, toties ejus verbi litteræ sunt cogitatione conquirendæ: nec quoties causa dicenda est, toties ad ejus causæ seposita argumenta revolvi nos oportet: sed habere certos locos, qui, ut litteræ ad verbum scribendum, sic illi ad causam explicandam, statim occurrant.

131. Sed hi loci ei demum oratori prodesse possunt, qui est versatus in rebus, vel usu, quem ætas denique affert; vel auditione, & cogitatione, quæ studio & diligentia præcurrit ætatem. Nam si tu mihi quamvis eruditum hominem adduxeris, quamvis acrem & acutum in cogitando, quamvis ad pronuntiandum expeditum, si erit idem in consuetudine civitatis, in

exemplis, in institutis, in moribus ac voluntatibus civium suorum hospes, non multum ei loci proderunt illi, ex quibus argumenta promuntur. Subactio mihi ingenio opus est, ut agro non semel arato, sed novato, & iterato, quod meliores foetus possit & grandiores edere. Subactio autem est usus, auditio, lectio, litteræ.

132. Ac primum naturam causæ videat, quæ numquam latet, factumne sit, quærat, an, quale sit, an, quod nomen habeat: quo perspecto, statim occurrit naturali quadam prudentiâ, non his subductionibus, quas isti docent, quid faciat causam, id est, quo sublato controversia stare non possit: deinde, quid veniat in iudicium, quod isti sic jubent quærere: Interfecit Opimius Gracchum. Quid facit causam? quod reipublicæ causâ, quum ex senatusconsulto ad arma vocasset: hoc tolle, causa non erit. At id ipsum negat contra leges licuisse Decius. Veniet igitur in iudicium, Licueritne ex senatusconsulto, servandæ reipublicæ causâ. Perspicua sunt hæc quidem, & in vulgari prudentia sita: sed illa quærenda, quæ ab accusatore & defensore argumenta, ad id, quod in iudicium venit, spectantia, debeant afferri.

XXXI. Atque hic illud videndum est, in quo summus est error istorum magistrorum, ad quos liberos nostros mittimus,

non quòd hoc quidem ad dicendum magnopere pertineat, sed tamen ut videatis, quàm sit genus hoc eorum, qui sibi eruditi videntur, hebes, atque impositum. Constituunt enim in partiendis orationum modis duo genera causarum: unum appellant, in quo sine personis atque temporibus de universo genere quærat; alterum, quod personis certis, & temporibus definiatur: ignari omnes controversias ad universi generis vim & naturam referri.

134. Nam in ea ipsa causa, de qua antè dixi, nihil pertinet ad oratoris locos Opimii persona, nihil Decii. De ipso enim universo genere infinita quæstio est, num pœnâ videatur esse afficiendus, qui civem ex senatusconsulto patriæ conservandæ causâ interemerit, quum id per leges non liceret. Nulla denique est causa, in qua id, quod in iudicium venit, ex reorum personis, non generum ipsorum universa disputatione quærat.

135. Quin etiam in iis ipsis, ubi de facto ambigitur, Ceperitne contra leges pecunias P. Decius, argumenta & criminum & defensionis revocentur oportet ad genus, & ad naturam universam: quòd sumptuosus, de luxuria: quòd alieni appetens, de avaritia: quòd seditiosus, de turbulentis & malis civibus: quòd a multis arguitur, de genere testium: con-

trâque, quæ pro reo dicentur, omnia necessariò a tempore atque homine ad communes rerum & generum summas revolvuntur.

136. Atque hæc forsitan homini, non omnia, quæ sunt in natura rerum, celeriter animo comprehendenti, permulta videantur, quæ veniant in judicium tum, quum de factò quærat: sed tamen criminum est multitudo, non defensionum, aut locorum infinita.

XXXII. Quæ verò, quum de factò non ambigitur, quærentur, qualia sint, ea si ex reis numeres, & innumerabilia sunt, & obscura: si ex rebus, valde & modica, & illustria. Nam si Mancini causam in uno Mancino ponimus, quotiescumque is, quem paterpatratus dediderit, receptus non erit, toties causa nova nascetur. Sin illa controversia causam facit, Videaturne ei, quem paterpatratus dediderit, si is non sit receptus, postliminium esse: nihil ad artem dicendi, nec ad argumenta defensionis, Mancini nomen pertinet.

138. Ac, si quid affert præterea hominis aut dignitas, aut indignitas, extra quæstionem est; & ea tamen ipsa oratio ad universi generis disputationem referatur necesse est. Hæc ego non eo consilio disputo, ut homines eruditos redarguam: quamquam reprehendendi sunt, qui in
genere

genere definiendo istas causas describunt in personis & in temporibus positas esse.

139. Nam etsi incurrunt tempora & personæ, tamen intelligendum est, non ex iis, sed ex genere quæstionis pendere causas. Sed hoc nihil ad me. Nullum enim nobis certamen cum istis esse debet. Tantum satis est intelligi, ne hoc quidem eos consecutos, quod in tanto otio, etiam sine hac forensi exercitatione efficere potuerunt, ut genera rerum discernere, eaque paulò subtiliùs explicarent. Verum hoc, ut dixi, nihil ad me. Illud ad me, ac multò etiam magis ad vos, Cotta noster, & Sulpici.

140. Quomodo nunc se istorum artes habent, pertimescenda est multitudo causarum: est enim infinita. Si in personis ponitur; quot homines, tot causæ: sin ad generum universas quæstiones referuntur; ita modicæ & paucæ sunt, ut eas omnes, diligentes, & memores, & sobrii oratores percurfas animo, & propè decantatas habere debeant: nisi fortè existimatis, a Mⁱ. Curio causam didicisse L. Crassum; & eâ re multa attulisse, quamobrem posthumo non nato Curium tamen heredem Coponii esse oporteret.

141. Nihil ad copiam argumentorum, neque ad causæ vim ac naturam nomen Coponii, aut Curii, pertinuit. In genere erat

universo rei negotiique, non in tempore ac nominibus omnis quæstio, quum scriptum ita sit, *Si mihi filius genitur, isque prius moritur, & cetera, tum ut mihi ille sit heres*: Si natus filius non sit, videaturne is, qui filio mortuo institutus heres sit, heres esse.

XXXIII. Perpetui juris, & universi generis quæstio non hominum nomina, sed rationem dicendi, & argumentorum fontes desiderat. In quo etiam isti nos jurisconsulti impediunt, a discendoque deterrent. Video enim in Catonis & Bruti libris nominatim ferè referri, quid alicui de jure viro aut mulieri responderint: credo, ut putaremus, in hominibus, non in re, consultationis aut dubitationis causam aliquam fuisse; ut, quòd homines essent innumerabiles, debilitati a jure cognoscendo, voluntatem discendi simul cum spe perdiscendi abjiceremus. Sed hæc Crassus aliquando nobis expediet, & exponet descripta generatim: est enim, ne fortè nescias, heri nobis ille hoc, Catule, pollicitus, se jus civile, quod nunc diffusum & dissipatum est, in certa genera coacturum, & ad artem facilè redacturum.

143. Et quidem, inquit Catulus, haudquaquam id est difficile Crasso, qui & quod disci potuit de jure, didicit; & quod iis, qui eum docuerunt, defuit, ipse afferet;

ut, quæ sint in jure, vel acutè describere, vel ornatè illustrare possit. Ergo ista, inquit Antonius, tum a Crasso discemus, quum se de turba, & a subselliis, in otium, ut cogitat, soliumque contulerit.

144. Jam id quidem sæpe, inquit Catulus, ex eo audiui, quum diceret, sibi certum esse a judiciis causisque discedere: sed, ut ipsi soleo dicere, non licebit. Neque enim ipse auxilium suum sæpe a viris bonis frustra implorari patietur, neque id æquo animo feret civitas: quæ si voce L. Crassi carebit, ornamento quodam sese spoliata putabit. Nam hercle, inquit Antonius, si hæc verè a Catulo dicta sunt, tibi mecum in eodem est pistrino, Crasse, vivendum: & istam oscitantem & dormitantem sapientiam, Scævolarum & ceterorum beatorum otio concedamus. Arrisit hîc Crassus leniter, &, Pertexe modò, inquit, Antoni, quod exorsus es: me tamen ista oscitans sapientia, simul atque ad eam confuget, in libertatem vindicabit.

XXXIV. Hujus quidem loci, quem modò sum exorsus, hic est finis, inquit Antonius: quoniam intelligitur, non in hominum innumerabilibus personis, neque in infinita temporum varietate, sed in generum causis atque naturis omnia sita esse, quæ in dubium vocarentur: genera autem esse definita non solum numero, sed etiam

paucitate: ut eam materiam orationis; quæ cujusque esset generis, studiosi qui essent dicendi, omnibus locis descriptam, instructam, ornatamque comprehenderent, rebus dico, & sententiis. Eæ vi suâ verba parient, quæ semper satis ornata mihi quidem videri solent, si ejusmodi sunt, ut ea res ipsa peperisse videatur.

146. Ac, si verum quæritis, quod mihi quidem videatur (nihil enim aliud affirmare possum, nisi sententiam, & opinionem meam) hoc instrumentum causarum & generum universorum in forum deferre debemus, neque, ut quæque res delata ad nos erit, tum denique scrutari locos, ex quibus argumenta eruamus: quæ quidem omnibus, qui ea mediocriter modò considerarint, studio adhibito & usu pertractata esse possunt; sed tamen animus referendus est ad ea capita, & ad illos, quos sæpe jam appellavi, locos, ex quibus omnia ad omnem orationem inventa ducuntur. Atque hoc totum est sive artis, sive animadversionis, sive consuetudinis, nosse regiones, intra quas venire, & pervestiges quod quæras. Ubi eum locum omnem cogitatione sepseris, si modò usum rerum percallueris, nihil te effugiet, atque omne, quod erit in re, occurret, atque incidet.

XXXV. Et sic, quum ad inveniendum in dicendo tria sint; acumen, deinde ra-

tio, quam licet, si volumus, appellemus artem, tertium diligentia: non possum equidem non ingenio primas concedere: sed tamen ipsum ingenium diligentia etiam ex tarditate incitat.

148. Diligentia, inquam, quum omnibus in rebus, tum in causis defendendis plurimum valet. Hæc præcipuè colenda est nobis; hæc semper adhibenda; hæc, nihil est quod non assequatur. Causa ut penitus, quod initio dixi, nota sit, diligentia est: ut adversarium attentè audiamus, atque ut ejus non solum sententias, sed etiam verba omnia excipiamus, vultus denique perspiciamus omnes, qui sensus animi plerumque indicant, diligentia est.

149. Id tamen dissimulanter facere, ne sibi ille aliquid proficere videatur, prudentia est. Deinde ut in iis locis, quos proponam paulò post, pervolvatur animus, ut se penitus insinuet in causam, ut sit curâ & cogitatione intentus, diligentia est: ut his rebus adhibeat, tamquam lumen aliquod, memoriam, ut vocem, ut vires: hæc magna sunt.

150. Inter ingenium quidem, & diligentiam perpaululum loci reliquum est arti. Ars demonstrat tantum, ubi quæras, atque ubi sit illud, quod studeas invenire: reliqua sunt in cura, attentione animi, cogitatione, vigilantia, assiduitate, labore;

complectar uno verbo , quo sæpe jam usi sumus , diligentia ; quâ unâ virtute omnes virtutes reliquæ continentur.

151. Nam orationis quidem copiâ videmus ut abundant philosophi , qui , ut opinor (sed tu hæc , Catule , melius) nulla tradant præcepta dicendi , nec idcirco minùs , quæcumque res proposita est , suscipiunt , de qua copiosè & abundanter loquantur.

XXXVI. Tum Catulus , Est , inquit , ut dicis , Antoni , ut plerique philosophi nulla tradant præcepta dicendi , & habeant paratum tamen , quid de quaque re dicant. Sed Aristoteles is , quem maximè ego admiror , proposuit quosdam locos , ex quibus omnis argumentatio , non modò ad philosophorum disputationem , sed etiam ad hanc , quâ in causis utimur , inveniretur : a quo quidem homine jamdudum , Antoni , non aberrat oratio tua , sive tu similitudine illius divini ingenii in eadem incurris vestigia , sive etiam illa ipsa legisti , atque didicisti : quod quidem magis verisimile videtur. Plus enim te operæ Græcis dedisse rebus video , quàm putamus.

153. Tum ille , Verum , inquit , ex me audies , Catule : semper existimavi , jucundior , & probabilior huic populo oratorem fore , qui primùm quàm minimam artificii alicujus , deinde nullam Græcarum

rerum significationem daret: atque ego idem existimavi, pecudis esse, non hominis, quum tantas res Græci susciperent, profiterentur, agerent, seseque & videndi res obscurissimas, & bene vivendi, & copiosè dicendi rationem hominibus daturus pollicerentur, non admoveere aurem, & si palam audire eos non auderes, ne minueres apud tuos cives auctoritatem tuam, subauscultando tamen excipere voces eorum, & procul, quid narrarent, attendere. Itaque feci, Catule, & istorum omnium summatim causas & genera ipsa gustavi.

XXXVII. Valde hercule, inquit Catulus, timidè, tamquam ad aliquem libidinis scopulum, sic tuam mentem ad philosophiam appulisti: quam hæc civitas aspernata numquam est. Nam & referta quondam Italia Pythagoreorum fuit, tum, quum erat in hac gente magna illa Græcia: ex quo etiam quidam Numam Pompilius, regem nostrum, fuisse Pythagoreum ferunt; qui annis permultis antè fuit, quàm ipse Pythagoras: quò etiam major vir habendus est, quum illam sapientiam constituendæ civitatis duobus propè seculis antè cognovit, quàm eam Græci natam esse senserunt. Et certè non tulit ullos hæc civitas aut gloriâ clariores, aut auctoritate graviores, aut humanitate politiores, P. Africa-

no, C. Lælio, L. Furio, qui secum eruditissimos homines ex Græcia palam semper habuerunt.

155. Atque ego ex istis sæpe audiui, quum dicerent, pergratum Athenienses & sibi fecisse, & multis principibus civitatis, quòd, quum ad senatum legatos de suis maximis rebus mitterent, tres illius ætatis nobilissimos philosophos misissent, Carneadem, & Critolaum, & Diogenem: itaque eos, dum Romæ essent, & a se, & ab aliis frequenter auditos: quos tu quum haberes auctores, Antoni, miror, cur philosophiæ, sicut Zethus ille Pacuvianus, propè bellum indixeris.

156. Minimè, inquit Antonius: ac sic decrevi philosophari potius, ut Neoptolemus apud Ennium, *paucis: nam omnino haud placet*. Sed tamen hæc est mea sententia, quam videbar exposuisse: ego ista studia non improbo, moderata modò sint; opinionem istorum studiorum, & suspensionem artificii apud eos, qui res judicent, oratori adversariam esse arbitror: imminuit enim & oratoris auctoritatem, & orationis fidem.

XXXVIII. Sed, ut eò revocetur, unde huc declinavit oratio; ex tribus istis clarissimis philosophis, quos Romam venisse dixisti, videsne Diogenem eum fuisse, qui diceret, artem se tradere bene differendi;

& vera ac falsa dijudicandi , quam verbo Græco *διαλεκτική* appellaret ? In hac arte , si modò est hæc ars , nullum est præceptum quo modo verum inveniatur , sed tantum est quo modo judicetur.

158. Nam omne , quod eloquimur , eloquimur sic , ut id aut esse dicamus , aut non esse ; & si simpliciter dictum sit , suscipiunt dialectici , ut judicent verumne sit an falsum : & si conjunctè sit elatum , & adjuncta sint alia , judicent rectène adjuncta sint , & verane summa sit uniuscujusque rationis : & ad extremum ipsi se compungunt suis acuminibus , & multa quærendo , reperiunt non modò ea , quæ jam non possint ipsi dissolvere , sed etiam quibus antè exorsa , & potius detexta propè retexantur.

159. Hic nos igitur Stoicus iste nihil adjuvat , quoniam quemadmodum inveniam quid dicam , non docet : atque idem etiam impedit , quòd & multa reperit , quæ neget ullo modo posse dissolvi ; & genus sermonis affert non liquidum , non fusum ac profluens , sed exile , aridum , concisum ac minutum : quod si quis probabit , ita probabit , ut oratori tamen aptum non esse fateatur. Hæc enim nostra oratio multitudinis est auribus accommodanda , ad oblectandos animos , ad impellendos , ad ea probanda , quæ non aurificis staterâ , sed

quadam populari trutinâ examinantur.

160. Quare istam artem totam dimittamus, quæ in excogitandis argumentis mutanimum est, in judicandis nimum loquax. Critolaum istum, quem simul cum Diogene venisse commemoras, puto plus huic studio nostro prodesse potuisse: erat enim ab isto Aristotele, a cujus inventis tibi ego videor non longè aberrare. Atque inter hunc Aristotelem, cujus & illum legi librum, in quo exposuit dicendi artes omnium superiorum, & illos, in quibus ipse sua quædam de eadem arte dixit, & hos germanos hujus artis magistros, hoc mihi visum est interesse, quod ille eadem acie mentis, quâ rerum omnium vim naturamque viderat, hæc quoque adspexit, quæ ad dicendi artem, quam ille despiciebat, pertinebant: illi autem, qui hoc solum colendum ducebant, habitarunt in hac una ratione tractanda, non eâdem prudentiâ, quâ ille, sed usu in hoc uno genere, studioque majore.

161. Carneadis verò vis incredibilis illa dicendi, & varietas, perquam esset optanda nobis; qui nullam umquam in illis suis disputationibus rem defendit, quam non probarit; nullam oppugnavit, quam non everterit. Sed hoc majus est quiddam, quàm ab iis, qui hæc tradunt, & docent, postulandum sit.

XXXIX. Ego autem, si quem nunc planè rudem institui ad dicendum velim, his potius tradam assiduis uno opere eamdem incudem diem noctemque tundentibus, qui omnes tenuissimas particulas, atque omnia minima mansa, ut nutrices infantibus pueris, in os inferant. Sin sit is, qui & doctrinâ mihi liberaliter institutus, & aliquo jam imbutus usu, & satis acri ingenio esse videatur; illuc eum rapiam, ubi non seclusa aliqua aquula teneatur, sed unde universum flumen erumpat; qui illi sedes, & tamquam domicilia omnium argumentorum commonstret, & ea breviter illustret, verbisque definiat.

163. Quid enim est, in quo hæreat, qui viderit, omne, quod sumatur in oratione aut ad probandum, aut ad refellendum, aut ex sua sumi vi atque natura, aut assumi foris? Ex sua vi, quum aut res, quæ sit tota, quærat, aut pars ejus, aut vocabulum quod habeat, aut quippiam, rem illam quod attingat: extrinsecus autem, quum ea, quæ sunt foris, neque inhærent in rei natura, colliguntur.

164. Si res tota quæritur, definitione universa vis explicanda est, sic: Si majestas est amplitudo ac dignitas civitatis, is eam minuit, qui exercitum hostibus populi Romani tradidit, non qui eum, qui id fecisset, populi Romani potestati tradidit.

165. Sin pars; partitione, hoc modo: Aut senatui parendum de salute reipublicæ fuit, aut aliud consilium instituendum, aut suâ sponte faciendum: aliud consilium, superbum; suum arrogans: utendum igitur fuit consilio senatûs. Sin ex vocabulo, ut Carbo: Si consul est, qui consulit patriæ, quid aliud fecit Opimius?

166. Sin ab eo, quod rem attingat, plures sunt argumentorum sedes ac loci: nam & conjuncta quæremus, & genera, & partes generibus subjectas, & similitudines, & dissimilitudines, & contraria, & consequentia, & consentanea, & quasi præcurrentia, & repugnantia, & causas rerum vestigabimus, & ea, quæ ex causis orta sunt; & majora, paria, minora quæremus.

XL. Ex conjunctis sic argumenta ducuntur: Si pietati summa tribuenda laus est, debetis moveri, quum Q. Metellum tam piè lugere videatis. Ex genere autem: Si magistratus in populi Romani potestate esse debent, quid Norbanum accusas, cujus tribunatus voluntati paruit civitatis?

168. Ex parte autem ea, quæ est subjecta generi: Si omnes, qui reipublicæ consulunt, cari nobis esse debent, certè in primis imperatores, quorum consiliis, virtute, periculis, retinemus & nostram

salutem & imperii dignitatem. Ex similitudine autem : Si feræ partus suos diligunt ; quâ nos in liberos nostros indulgentiâ esse debemus ?

169. At ex dissimilitudine : Si barbarorum est in diem vivere , nostra consilia sempiternum tempus spectare debent. Atque utroque in genere & similitudinis , & dissimilitudinis , exempla sunt ex aliorum factis , aut dictis , aut eventis , & fictæ narrationes sæpe ponendæ. Jam ex contrario : Si Gracchus nefariè , præclare Opimius.

170. Ex consequentibus : Si & ferro interfectus ille , & tu inimicus ejus cum gladio cruento comprehensus es in illo ipso loco , & nemo præter te ibi visus est , & causa nemini , & tu semper audax ; quid est , quòd de facinore dubitare possimus ? Ex consentaneis , & præcurrentibus , & repugnantibus , ut olim Crassus adolescens : Non si Opimium defendisti , Carbo , idcirco te isti bonum civem putabunt : simulasse te , & aliud quid quæsisse perspicuum est , quòd Tib. Gracchi mortem sæpe in concionibus deplorasti , quòd P. Africani necis socius fuisti , quòd eam legem in tribunatu tulisti , quòd semper a bonis dissensisti.

171. Ex causis autem rerum sic : Avaritiam si tollere vultis , mater ejus est tol-

lenda luxuries. Ex iis autem, quæ sunt orta de causis : Si ærarii copiis & ad belli adjumenta, & ad ornamenta pacis utimur, vestigalibus serviamus.

172. Majora autem, & minora, & paria comparabimus, sic. Ex majore : Si bona existimatio divitiis præstat, & pecunia tantopere expetitur, quantò gloria magis est expetenda ? Ex minore sic :

Hic, parvæ consuetudinis

Causâ, hujus mortem fert tam familiariter :

Quid, si ipse amasset ? quid mihi hic faciet patri ?

Ex pari sic : Est ejusdem, & eripere, & contra rempublicam largiri pecunias.

173. Foris autem assumuntur ea, quæ non suâ vi, sed extraneâ sublevantur, ut hæc : Hoc verum est ; dixit enim Q. Lutatius. Hoc falsum est ; habita enim quæstio est. Hoc sequi necesse est : recito enim tabulas. De quo genere toto paulò antè dixi. Hæc, ut brevissimè dici potuerunt, ita a me dicta sunt.

XLI. Ut enim si aurum cui, quod esset multifariam defossum, commonstrare vellem, satis esse deberet, si signa & notas ostenderem locorum, quibus cognitis ille sibi ipse foderet, & id, quod vellet, parvulo labore, nullo errore inveniret : sic has ego argumentorum novi notas, quæ

illa mihi quærenti demonstrant, ubi sint; reliqua curâ & cogitatione eruuntur.

175. Quod autem argumentorum genus cuique causarum generi maximè conveniat, non est artis exquisitæ præscribere, sed est mediocris ingenii judicare. Neque enim nunc id agimus, ut artem aliquam dicendi explicemus, sed ut doctissimis hominibus usus nostri quasi quædam monita tradamus. His igitur locis in mente & cogitatione defixis, & in omni re ad dicendum posita excitatis, nihil erit, quod oratorem effugere possit, non modò in forensibus disceptationibus, sed omnino in ullo genere dicendi.

176. Si verò assequetur, ut talis videatur, qualem se videri velit, & animos eorum ita afficiat, apud quos aget, ut eos, quocumque velit, vel trahere, vel rapere possit; nihil profectò præterea ad dicendum requiret.

177. Jam illud videmus, nequaquam satis esse, reperire quid dicas, nisi id inventum tractare possis. Tractatio autem varia esse debet, ne aut cognoscat artem qui audiat, aut defatigetur similitudinis satietate. Proponi oportet, quid afferas, & id quare ita sit, ostendere, & ex iisdem illis locis interdum concludere; relinquere aliàs, aliòque transire: sæpe non proponere, ac ratione ipsâ afferendâ, quid proponendum

fuerit, declarare : si cui quid simile dicas , priùs ut simile confirmes ; deinde quod agitur , adjungas : puncta argumentorum plerumque ut occulas , ne quis ea numerare possit , ut re distinguantur , verbis confusa esse videantur.

XLII. Hæc ut & properans , & apud doctos , & semidoctus ipse percurro , ut aliquando ad illa majora veniamus. Nihil est enim in dicendo , Catule , majus , quàm ut faveat oratori is , qui audiet , utque ipse sic moveatur , ut impetu quodam animi , & perturbatione magis , quàm judicio aut consilio , regatur. Plura enim multò homines judicant odio , aut amore , aut cupiditate , aut iracundiâ , aut dolore , aut lætitiâ , aut spe , aut timore , aut errore , aut aliquâ permotione mentis , quàm veritate , aut præscripto , aut juris normâ aliquâ , aut judicii formulâ , aut legibus. Quare , nisi quid vobis aliud placet , ad illa pergamus.

179. Paulùm , inquit Catulus , etiam nunc deesse videtur iis rebus , Antoni , quas exposuisti , quod sit tibi antè explicandum , quàm illuc proficiscare , quò te dicis intendere. Quidnam , inquit ? Qui ordo tibi placeat , inquit Catulus , & quæ dispositio argumentorum , in qua tu mihi semper deus videri soles.

180. Vide quàm sim in isto genere ,

inquit, Catule, deus. Non mehercule mihi, nisi admonito, venisset in mentem: ut possis existimare, me in ea, in quibus nonnumquam aliquid efficere videor, usu solere in dicendo, vel casu potius incur-rere. Ac res quidem ista, quam ego, quia non noram, sic tamquam ignotum hominem præteribam, tantum potest in dicendo, ut ad vincendum nulla plus possit.

181. Sed tamen mihi videris ante tempus a me rationem ordinis, & disponendarum rerum requisisse. Nam si ego omnem vim oratoris in argumentis, & in re ipsa per se comprobanda posuisssem, tempus esset jam de ordine argumentorum, & de collocatione aliquid dicere. Sed quum tria sint a me proposita, de uno dictum; quum de duobus reliquis dixero, tum erit denique de disponenda tota oratione quærendum.

XLIII. Valet igitur multum ad vincendum, probari mores, instituta, & facta, & vitam eorum, qui agent causas, & eorum, pro quibus; & item improbari adversariorum: animosque eorum, apud quos agitur, conciliari quàm maximè ad benevolentiam quum erga oratorem, tum erga illum, pro quo dicet orator. Conciliantur autem animi dignitate hominis, rebus gestis, existimatione vitæ; quæ fa-

ciliùs ornari possunt, si modò sunt, quàm fingi, si nulla sunt. Sed hæc adjuvant in oratore, lenitas vocis, vultus, pudoris significatio, verborum comitas: si quid persequare acriùs, ut invitus, & coactus facere videare. Facilitatis, liberalitatis, mansuetudinis, pietatis, grati animi, non appetentis, non avidi, signa proferri perutile est: eaque omnia, quæ proborum, demissorum, non acrium, non pertinacium, non litigiosorum, non acerborum sunt, valde benevolentiam conciliant, abalienantque ab iis, in quibus hæc non sunt. Itaque eadem sunt in adversarios ex contrario conferenda.

183. Sed genus hoc totum orationis in iis causis excellet, in quibus minùs potest inflammari animus iudicis acri & vehementi quadam incitatione. Non enim semper fortis oratio quæritur, sed sæpe placida, summissa, lenis, quæ maximè commendat reos. Reos autem appello, non eos modò, qui arguuntur, sed omnes, quorum de re disceptatur: sic enim olim loquebantur.

184. Horum igitur exprimere mores oratione, justos, integros, religiosos, timidos, perferentes injuriarum, mirum quiddam valet: & hoc vel in principiis, vel in re narranda, vel in peroranda, tantam habet vim, si est suaviter, & cum sensu

tractatum, ut sæpe plus, quàm causa, valeat. Tantum autem efficitur sensu quodam, ac ratione dicendi, ut quasi mores oratoris effingat oratio. Genere enim quodam sententiarum, & genere verborum, adhibitâ etiam actione leni, facilitatemque significanti, efficitur, ut probi, ut benemorati, ut boni viri esse videantur.

XLIV. Huic autem est illa dispar adjuncta ratio orationis, quæ alio quodam genere mentes judicum permovet, impellitque, ut aut oderint, aut diligant, aut invideant, aut salvum velint, aut metuant, aut sperent, aut cupiant, aut abhorreant, aut lætentur, aut mœreant, aut misereantur, aut punire velint, aut ad eos motus deducantur, si qui finitimi sunt, & propinqui his ac talibus animi perturbationibus.

186. Atque illud optandum est oratori, ut aliquam permotionem animorum suâ sponte ipsi afferant ad causam judices, ad id, quod utilitas oratoris feret, accommodatam. Facilius est enim currentem, ut aiunt, incitare, quàm commovere languentem. Sin id, aut non erit, aut erit obscurius, sicut medico diligenti, priusquam conetur ægro adhibere medicinam, non solum morbus ejus, cui mederi volet, sed etiam consuetudo valentis, & natura corporis cognoscenda est: sic equidem

quum aggredior ancipitem causam, & gravem ad animos judicum pertractandos; omni mente in ea cogitatione curaque versor, ut odoror quàm sagacissimè possim, quid sentiant, quid existiment, quid expectent, quid velint, quò deduci oratione facillimè posse videantur.

187. Si se dant, &, ut antè dixi, suâ sponte, quò impellimus, inclinant, atque propendent; accipio quod datur, & ad id, unde aliquis flatus ostenditur, vela do. Sin est integer, quietusque judex; plus est operis: sunt enim omnia dicendo excitanda, nihil adjuvante naturâ. Sed tantam vim habet illa, quæ rectè a bono poëta dicta est *flexanima*, atque omnium *regina rerum* oratio, ut non modò inclinantem impellere, aut stantem inclinare, sed etiam adversantem & repugnantem, ut imperator bonus ac fortis, capere possit.

XLV. Hæc sunt illa, quæ me ludens Crassus modò flagitabat, quum a me divinitus tractari solere diceret, & in causa M'. Aquilii, Caiique Norbani, nonnullisque aliis, quasi præclarè acta, laudaret; quæ mehercule ego, Crasse, quum a te tractantur in causis, horrere soleo: tanta vis animi, tantus impetus, tantus dolor, oculis, vultu, gestu, digito denique isto tuo significari solet: tantum est flumen gravissimorum optimorumque verborum, tam

integræ sententiæ , tam veræ , tam novæ , tam sine pigmentis , fucoque puerili , ut mihi non solum tu incendere judicem , sed ipse ardere videaris.

189. Neque fieri potest , ut doleat is qui audit , ut oderit , ut invideat , ut pertimescat aliquid , ut ad fletum , misericordiamque deducatur ; nisi omnes ii motus , quos orator adhibere volet judici , in ipso oratore impressi esse , atque iniusti videbuntur. Quòd si fictus aliquis dolor suscipiendus esset , & si in ejusmodi genere orationis nihil esset , nisi falsum , atque imitatione simulatum , major ars aliqua forsitan esset requirenda. Nunc ego , quid tibi , Crasse , quid ceteris accidat , nescio : de me autem causa nulla est , cur apud homines prudentissimos , atque amicissimos mentiar. Non mehercule umquam apud iudices , aut dolorem , aut misericordiam , aut invidiam , aut odium excitare dicendo volui ; quin ipse in commovendis iudiciis , iis ipsis sensibus , ad quos illos adducere vellem , permoverer.

190. Neque enim facile est perficere ; ut irascatur ei , cui tu velis , iudex , si tu ipse id lentè ferre videare : neque ut oderit eum , quem velis , nisi teipsum flagrantem odio antè viderit : neque ad misericordiam adducetur , nisi ei tu signa doloris tui verbis , sententiis , voce , vultu ,

collacrymatione denique ostenderis. Ut enim nulla materies tam facilis ad exardescendum est, quæ, nisi admoto igni, ignem concipere possit; sic nulla mens est tam ad comprehendendam vim oratoris parata, quæ possit incendi, nisi inflammatus ipse ad eam, & ardens accesserit.

XLVI. Ac, ne fortè hoc magnum ac mirabile esse videatur, hominem toties irasci, toties dolere, toties omni animi motu concitari, præsertim in rebus alienis; magna vis est earum sententiarum, atque eorum locorum, quos agas tractesque dicendo, ut nihil opus sit simulatione & fallaciis: ipsa enim natura orationis ejus, quæ suscipitur ad aliorum animos permovendos, oratorem ipsum magis etiam, quàm quemquam eorum, qui audiunt, permovet.

192. Et ne hoc in causis, in judiciis, in amicorum periculis, in concursu hominum, in civitate, in foro accidere miremur, quum agitur non solum ingenii nostri existimatio (nam id esset levius: quamquam, quum professus sis, te id posse facere, quod pauci, ne id quidem negligendum est) sed alia sunt majora multò, fides, officium, diligentia: quibus rebus adducti, etiam quum alienissimos defendimus, tamen eos alienos, si ipsi viri boni volumus haberi, existimare non possumus.

193. Sed, ut dixi, ne hoc in nobis mirum esse videatur, quid potest esse tam fictum, quàm versus, quàm scena, quàm fabulæ? tamen in hoc genere sæpe ipse vidi, quum ex persona mihi ardere oculi hominis histrionis viderentur spondalia illa dicentis,

Segregare abs te ausus, aut sine illo Salamina
ingredi?

Neque paternum adspectum es veritus?

Numquam illum *adspectum* dicebat, quin mihi Telamon iratus furere luctu filii videretur. Ut idem inflexâ ad miserabilem sonum voce,

Quem ætate exactâ indigem

Liberum lacerasti, orbasti, exstinxisti; neque fratris necis,

Neque gnati ejus parvi, qui tibi in tutelam est traditus?

flens ac lugens dicere videbatur. Quæ si ille histrio, quotidie quum ageret, tamen rectè agere sine dolore non poterat, quid? Pacuvium putatis in scribendo leni animo, ac remisso fuisse? Fieri nullo modo potuit. Sæpe enim audiui, poëtam bonum neminem (id quod a Democrito & Platone in scriptis relictum esse dicunt) sine inflam-

matione animorum exsistere posse, & sine quodam afflatu quasi furoris.

XLVII. Quare nolite existimare me ipsum, qui non heroum veteres casus, fictosque luctus vellem imitari atque adumbrare dicendo; neque actor essem alienæ personæ, sed auctor meæ, quum mihi M'. Aquilius in civitate retinendus esset, quæ in illa causa peroranda fecerim, sine magno dolore fecisse.

195. Quem enim ego consulem fuisse, imperatorem ornatum a senatu, ovantem in Capitolium adscendisse meminissem, hunc quum afflictum, debilitatum, mœrentem, in summum discrimen adductum viderem, non prius sum conatus misericordiam aliis commovere, quàm misericordiâ sum ipse captus. Sensi equidem tum magnopere moveri iudices, quum excitavi mœstum ac sordidatum senem, & quum ista feci, quæ tu, Crasse, laudas, non arte, de qua quid loquar nescio, sed motu magno animi ac dolore, ut discinderem tunicam, ut cicatrices ostenderem.

196. Quum C. Marius mœrorem orationis meæ præfens ac sedens multum lacrymis suis adjuvaret: quumque ego illum crebrò appellans, collegam ei suum commendarem, atque ipsum advocatum ad communem imperatorum fortunam defendendam invocarem: non fuit hæc sine
meis

meis lacrymis, non sine doloré magno miseratio, omniumque deorum, & hominum, & civium, & sociorum imploratio: quibus omnibus verbis, quæ a me tum sunt habita, si dolor abfuisset meus, non modò non miserabilis, sed etiam irridenda fuisset oratio mea.

197. Quamobrem hoc vos doceo, Sulpici, bonus ego videlicet atque eruditus magister, ut in dicendo irasci, ut dolere, ut flere possitis: quamquam te quidem quid hoc doceam, qui in accusando sodali, & quæstore meo, tantum incendium non oratione solùm, sed multò etiam magis vi, & dolore, & ardore animi concitaras, ut ego ad id restringendum vix conarer accedere? Habueras enim tum omnia in causa superiora: vim, fugam, lapidationem, crudelitatem tribunitiam, in Cæpionis gravi miserabilique casu, in iudicium vocabas: deinde principem & senatûs, & civitatis, M. Æmilium lapide percussus esse constabat: vi pulsum ex templo L. Cottam, & T. Didium, quum intercedere vellent rogationi, nemo poterat negare.

XLVIII. Accedebat, ut hæc tu adolescens pro republica queri summa cum dignitate existimarere: ego homo censorius vix satis honestè viderer seditiosum civem, & in hominis consularis calamitate crude-

lem, posse defendere. Erant optimi cives judices, bonorum virorum plenum forum, vix ut mihi tenuis quædam venia daretur excusationis, quod tamen eum defenderem, qui mihi quæstor fuisset. Hic ego quid dicam me artem aliquam adhibuisse? quid fecerim, narrabo: si placuerit, vos meam defensionem in aliquo artis loco reponetis.

199. Omnium seditionum genera, vitia, pericula collegi, eamque orationem ex omni reipublicæ nostræ temporum varietate repetivi, conclusique ita, ut dicerem, etsi omnes molestæ semper seditiones fuissent, justas tamen fuisse nonnullas & propè necessarias. Tum illa, quæ modò Crassus commemorabat, egi: neque reges ex hac civitate exigi, neque tribunos plebis creari, neque plebiscitis toties consularem potestatem minui, neque provocationem, patronam illam civitatis, ac vindicem libertatis, populo Romano dari sine nobilium dissensione potuisse: ac, si illæ seditiones saluti huic civitati fuissent, non continuò, si quis motus populi factus esset, id C. Norbano in nefario crimine, atque in fraude capitali esse ponendum. Quòd si umquam populo Romano concessum esset, ut jure concitatus videretur, id quod docebam sæpe esse concessum, nullam illâ causam justiore fuisse. Tum omnem ora-

tionem traduxi, & converti in increpandam Cæpionis fugam, in deplorandum interitum exercitûs: sic & eorum dolorem, qui lugebant suos, oratione refricabam, & animos equitum Romanorum, apud quos tum judices causa agebatur, ad Q. Cæpionis odium, a quo erant ipsi propter judicia abalienati, renovabam, atque revocabam.

XLIX. Quod ubi sensi me in possessione judicii, ac defensionis meæ constitisse, quod & populi benevolentiam mihi conciliaram, cujus jus etiam cum seditionis conjunctione defenderam, & judicum animos totos vel calamitate civitatis, vel luctu, ac desiderio propinquorum, vel odio proprio in Cæpionem ad causam nostram converteram: tunc admiscere huic generi orationis vehementi atque atroci genus illud alterum, de quo antè disputavi, lenitatis & mansuetudinis cœpi; me pro meo sodali, qui mihi in liberum loco more majorum esse deberet, & pro mea omni fama propè, fortunisque decernere: nihil mihi ad existimationem turpius, nihil ad dolorem acerbius accidere posse, quàm si is, qui sæpe alienissimis a me, sed meis tamen civibus, salutem existimarer fuisse, sodali meo auxilium ferre non potuissem.

201. Petebam a judicibus, ut illud ætati meæ, ut honoribus, ut rebus gestis, si

justo, si pio dolore me esse affectum viderent, concederent: præsertim si in aliis causis intellexissent, omnia me semper pro amicorum periculis, nihil umquam pro meipso deprecatum. Sic in illa omni defensione atque causa, quod esse in arte positum videbatur, ut de lege Apuleia dicerem, ut, quid esset minuere majestatem, explicarem, perquam breviter perstrinxi, atque attigi. His duabus partibus orationis, quarum altera concitationem habet, altera commendationem, quæ minimè præceptis artium sunt perpolitæ, omnis est a me illa causa tractata, ut & acerrimus in Cæpionis invidia renovanda, & in meis moribus erga meos necessarios declarandis mansuetissimus viderer. Ita, magis affectis animis judicem, quàm doctis, tua, Sulpici, est a nobis tum accusatio victa.

L. Hic Sulpicius, Verè hercule, inquit, Antoni, ista commemoras: nam ego nihil umquam vidi, quod tam e manibus elaberetur, quàm mihi tum est elapsa illa causa. Quum enim, quemadmodum dixisti, tibi ego non judicium, sed incendium tradidissem, quod tuum principium, dii immortales, fuit? quæ dubitatio? quanta hæsitatio, tractusque verborum? Ut illud initio, quod tibi unum ad ignoscendum homines dabant, tenuisti, te pro homine perneccessario, quæstore tuo, dicere; quam

tibi primùm munisti ad te audiendum viam?

203. Ecce autem, quum te nihil aliud profecisse arbitrarer, nisi ut homines tibi, civem improbum defendenti, ignoscendum propter necessitudinem arbitrarèntur; serpere occultè cœpisti, nihildum aliis suspicantibus, me verò jam pertimescente, ut illam non Norbani seditionem, sed populi Romani iracundiam, neque eam injustam, sed meritam ac debitam fuisse defenderes. Deinde qui locus abs te prætermisus est in Cæpionem? ut tu illa omnia odio, invidiâ, misericordiâ miscuisti? Neque hæc solum in defensione, sed etiam in Scauro, ceterisque meis testibus, quorum testimonia non refellendo, sed ad eundem impetum populi confugiendo, refutasti. Quæ quum abs te modò commemorarentur, equidem nulla præcepta desiderabam: istam enim ipsam demonstrationem defensionum tuarum abs te ipso commemoratam, doctrinam esse non mediocrem puto.

204. Atqui, si ita placet, inquit Antonius, trademus etiam, quæ nos sequi in dicendo, quæque maximè spectare solemus: docuit enim jam nos longa vita ususque rerum maximarum, ut quibus rebus animi hominum moverentur, teneremus.

LI. Equidem primùm considerare soleo, postuletne causa: nam neque parvis

in rebus adhibendæ sunt hæ dicendi faces , neque ita animatis hominibus , ut nihil ad eorum mentes oratione flectendas proficere possimus ; ne aut irrisione , aut odio digni putemur , si aut tragœdias agamus in nugis , aut convellere adoriamur ea , quæ non possunt commoveri.

206. Nam quoniam hæc ferè maximè sunt in judicium animis , aut , quicumque illi erunt , apud quos agemus , oratione molienda , amor , odium , iracundia , invidia , misericordia , spes , lætitia , timor , molestia ; sentimus amorem conciliari , si id videare , quod sit utile ipsis , apud quos agas , defendere ; si aut pro bonis viris , aut certè pro iis , qui illis boni atque utiles sint , laborare : namque hæc res amorem magis conciliat , illa virtutis defensio caritatem ; plusque proficit , si proponitur spes utilitatis futuræ , quàm præteriti beneficii commemoratio.

207. Enitendum est , ut ostendas , in ea re quam defendas , aut dignitatem inesse , aut utilitatem ; eumque , cui concilies hunc amorem , significes nihil ad utilitatem suam retulisse , ac nihil omnino fecisse causâ suâ. Invidetur enim commodis hominum ipsorum ; studiis autem eorum ceteris commodandi favetur.

208. Videndumque hoc loco est , ne quos ob benefacta diligere volemus , eorum

laudem atque gloriam, cui maximè invideri solet, nimis efferre videamur. Atque iisdem his ex locis & odium in alios struere discemus, & a nobis, ac nostris, demovere: eademque hæc genera tractanda sunt in iracundia vel excitanda, vel sedanda, Nam si, quod ipsis, qui audiunt, perniciosum, aut inutile sit, id factum augeas, odium creatur: sin, quod aut in bonos viros, aut in eos, in quos quisque minimè debuerit, aut in rempublicam, tum excitatur, si non tam acerbum odium, tamen aut invidiæ, aut odii non dissimilis offensio. Item timor incutitur aut ex ipsorum periculis, aut ex communibus: interior est ille proprius; sed hic quoque communis ad eandem similitudinem est perducendus.

LII. Par, atque una ratio est spei, lætitiæ, molestiæ. Sed haud sciam, an acerrimus longè sit omnium motus invidiæ; nec minùs virium opus sit in ea comprimenda, quàm in excitanda. Invident autem homines maximè paribus, aut inferioribus, quum se relictos sentiunt, illos autem dolent evolasse: sed etiam superioribus invidetur sæpe vehementer, & eò magis, si intolerantiùs se jactant, & æquabilitatem juris, præstantiâ dignitatis, aut fortunæ suæ transeunt: quæ si inflammanda sunt, maximè dicendum est, non esse vir-

tute parta ; deinde etiam vitiis , atque peccatis : tum si erunt honestiora atque graviora , tamen non esse tanta ulla merita , quanta insolentia hominis , quantumque fastidium.

210. Ad sedandum autem , magno illa labore , magnis periculis esse parta , nec ad suum commodum , sed ad aliorum esse collata ; seseque , si quam gloriam peperisse videatur , tametsi ea non sit iniqua merces periculi , tamen eâ non delectari , totamque abjicere , atque deponere : omninoque perficiendum est (quoniam plerique sunt invidi , maximèque est hoc commune vitium & perpetuum : invidetur autem præstanti florentique fortunæ) ut hæc opinio minuatur , & illa excellens opinione fortuna cum laboribus & miseriis permixta esse videatur.

211. Jam misericordia movetur , si is , qui audit , adduci potest , ut illa , quæ de altero deplorentur , ad suas res revocet , quas aut tulerit acerbis , aut timeat ; aut intuens alium , crebrò ad seipsum revertatur. Ita quum singuli casus humanarum miseriarum graviter accipiuntur , si dicuntur dolenter , tum afflicta & prostrata virtus maximè luctuosa est ; & , ut illa altera pars orationis , quæ probitatis commendatione boni viri debet speciem tueri , lenis , ut sæpe jam dixi , atque summissa ; sic hæc ,

quæ suscipitur ab oratore ad commutandos animos atque omni ratione flectendos, intenta, ac vehemens esse debet.

. LIII. Sed est quædam in his duobus generibus, quorum alterum lene, alterum vehemens esse volumus, difficilis ad distinguendum similitudo. Nam ex illa lenitate, quâ conciliamur iis, qui audiunt, ad hanc vim acerrimam, quâ eosdem excitamus, influat oportet aliquid; & ex hac vi nonnumquam animi aliquid inflandum est illi lenitati: neque est ulla temperatior oratio, quàm illa, in qua asperitas contentionis, oratoris ipsius humanitate conditur; remissio autem lenitatis quadam gravitate & contentione firmatur.

213. In utroque autem genere dicendi, & illo, in quo vis atque contentio quaeritur, & hoc, quod ad vitam & mores accommodatur, & principia tarda sunt, & exitus tamen spissi & producti esse debent. Nam neque assiliendum statim est ad illud genus orationis (abest enim totum a causa; & homines prius ipsum illud, quod proprium sui iudicii est, audire desiderant) nec quum in eam rationem ingressus sis, celeriter discedendum est.

214. Non enim, sicut argumentum, simul atque positum est, arripitur, alterumque, & tertium poscitur; ita misericordiam, aut invidiam, aut iracundiam, simul

atque intuleris, possis commovere. Argumentum enim ratio ipsa confirmat, quæ simul atque emissa est, adhærescit. Illud autem genus orationis non cognitionem judicis, sed magis perturbationem requirit, quam consequi, nisi multâ, & variâ, & copiosâ oratione, & simili contentione actionis, nemo potest. Quare qui aut breviter, aut summissè dicunt, docere judicem possunt, commovere non possunt, in quo sunt omnia.

215. Jam illud perspicuum est, omnium rerum in contrarias partes facultatem ex iisdem suppeditari locis. Sed argumento resistendum est, aut iis, quæ comprobandi ejus causâ sumuntur, reprehendendis, aut demonstrando, id, quod concludere illi velint, non effici ex propositis, nec esse consequens: aut, si ita non refellas, afferendum est in contrariam partem, quod sit aut gravius, aut æquè grave. Illa autem, quæ aut conciliationis causâ leniter, aut per motionis vehementer aguntur, contrariis commotionibus inferenda sunt, ut odio benevolentia, misericordiâ invidia tollatur.

LIV. Suavis autem est, & vehementer sæpe utilis jocus, & facetiæ: quæ, etiam si alia omnia tradi arte possunt, naturæ sunt propria certè, neque ullam artem desiderant; in quibus tu longè aliis, meâ sen-

tentiâ , Cæsar , excellis : quò magis mihi etiam testis esse potes , aut nullam esse artem falis , aut , si qua est , eam nos tu potissimùm docebis.

217. Ego verò , inquit Cæsar , omni de re facetiùs puto posse ab homine non urbano , quàm de ipsis facetiis , disputari. Itaque quum quosdam Græcos inscriptos libros esse vidissem de ridiculis , nonnullam in spem veneram , posse me aliquid ex istis discere : inveni autem ridicula , & falsa multa Græcorum : nam & Siculi in eo genere , & Rhodii , & Byzantii , & præter ceteros , Attici excellunt : sed qui ejus rei rationem quamdam conati sunt , artemque tradere , sic insulsi exstiterunt , ut nihil aliud eorum , nisi ipsa insulsitas , rideatur.

218. Quare mihi quidem nullo videtur modo doctrinâ ista res posse tradi. Etenim quum duo genera sint facetiarum , alterum æquabiliter in omni sermone fusum , alterum peracutum & breve ; illa a veteribus superior , *cavillatio* , hæc altera , *dicacitas* nominata est. Leve nomen habet utraque res ; quippe leve enim est totum hoc , risum movere.

219. Verumtamen , ut dicis , Antoni , multum in causis persæpe lepore , & facetiis profici vidi. Sed quum in illo genere perpetuæ festivitatis ars non desideretur

(natura enim fingit homines , & creat imitatores & narratores facetos , & vultu adjuvante , & voce , & ipso genere sermonis) tum verò in hoc altero dicacitatis , quid habet ars loci , quum antè illud facetè dictum emissum hærere debeat , quàm cogitari potuisse videatur ?

220. Quid enim hic meus frater ab arte adjuvari potuit , quum a Philippo interrogatus , quid latraret , *Furem se videre* respondit ? Quid in omni oratione Crassus , vel apud centumviros contra Scævola , vel contra accusatorem Brutum , quum pro Cn. Planco diceret ? Nam id , quod tu mihi tribuis , Antoni , Crasso est , omnium sententiâ , concedendum. Non enim ferè quisquam reperietur , præter hunc , in utroque genere leporis excellens , & illo , quod in perpetuitate sermonis , & hoc , quod in celeritate , atque dicto est.

221. Nam hæc perpetua contra Scævola Curiana defensio tota redundavit hilaritate quadam & joco ; dicta illa brevia non habuit. Parcebat enim adversarii dignitati , in quo ipse servabat suam ; quod est hominibus facetis & dicacibus difficillimum , habere hominum rationem & temporum , & ea quæ occurrant , quum falsissimè dici possint , tenere. Itaque nonnulli ridiculi homines hoc ipsum non insulsè interpretantur. Dicere enim aiunt Ennium ,

flammam a sapiente faciliùs ore in ardente opprimi, quàm bona dicta teneat: hæc scilicet bona dicta, quæ falsa sint: nam ea dicta appellantur proprio jam nomine.

LV. Sed ut in Scævola continuit ea Crassus, atque illo altero genere, in quo nulli aculei contumeliarum inerant, causam illam disputationemque lusit: sic in Bruto, quem oderat, & quem dignum contumeliâ judicabat, utroque genere pugnavit.

223. Quàm multa de balneis, quas nuper ille vendiderat; quàm multa de amisso patrimonio dixit? atque illa breviter, quum ille diceret, *se sine causa sudare: Minimè, inquit, modò enim existi de balneis.* Innumerable hujuscemodi fuerunt, sed non minùs jucunda illa perpetua. Quum enim Brutus duos lectores excitasset, & alteri de colonia Narbonensi Crassi orationem legendam dedisset, alteri de lege Servilia; & quum contraria inter sese de republica capita contulisset; noster hic facetissimè tres patris Bruti de jure civili libellos tribus legendos dedit.

224. Ex libro primo, FORTE EVENIT, UT IN PRIVERNATI ESSEMUS. *Brute, testificatur pater se tibi Privernatem fundum reliquisse.* Deinde ex libro secundo, IN ALBANO ERAMUS EGO ET MARCUS FILIUS. *Sapiens videlicet homo cum primis*

nostræ civitatis, norat hunc gurgitem; metuebat, ne, quum is nihil haberet, nihil esse ei relictum putaretur. Tum ex libro tertio, in quo finem scribendi fecit (tot enim, ut audiavi Scævola dicere, sunt veri Bruti libri) IN TIBURTI FORTE ASSEDIMUS EGO ET MARCUS FILIUS. Ubi sunt ii fundi, Brute, quos tibi pater publicis commentariis consignatos reliquit? Quodd nisi puberem te, inquit, jam haberet, quartum librum composuisset, & se etiam in balneis lotum cum filio, scriptum reliquisset.

225. Quis est igitur, qui non fateatur, hoc lepore, atque his facetiis non minùs refutatum esse Brutum, quàm illis tragœdiis, quas egit idem, quum casu in eadem causa funere efferretur anus Junia? Prò dii immortales, quæ fuit illa, quanta vis! quàm inexpectata! quàm repentina! quum, conjectis oculis, gestu omni imminenti, summâ gravitate & celeritate verborum: *Brute, quid sedes? quid illam anum patri nuntiare vis tuo? quid illis omnibus, quorum imagines duci vides? quid majoribus tuis? quid L. Bruto, qui hunc populum dominatu regio liberavit? quid te facere? cui rei, cui gloriæ, cui virtuti studere?*

226. *Patrimonione augendo? at id non est nobilitatis: sed fac esse, nihil superest; libidines totum dissipaverunt. An juri civili? est paternum; sed dicet, te, quum ades*

venderes, ne in rutis quidem & casis solum tibi paternum recepisse. An rei militari? qui numquam castra videris. An eloquentiæ? quæ nulla est in te: &, quidquid est vocis ac linguæ, omne in istum turpissimum calumniæ quæstum contulisti. Tu lucem adspicere audes? tu hos intueri? tu in foro, tu in urbe, tu in civium esse conspectu? tu illam mortuam, tu imagines ipsas non perhorrescis? quibus non modò imitandis, sed ne collocandis quidem tibi ullum locum reliquisti.

LVI. Sed hæc tragica, atque divina: faceta autem & urbana, innumerabilia ex una concione meministis: nec enim concio major umquam fuit, nec apud populum gravior oratio, quàm hujus contra collegam in censura nuper, neque lepore & festivitate conditior. Quare tibi, Antoni, utrumque assentior, & multum facetias in dicendo prodesse sæpe, & eas arte nullo modo posse tradi: illud quidem admiror, te nobis in eo genere tribuisse tantum, & non hujus rei quoque palmam, ut ceterarum, Crasso detulisse.

228. Tum Antonius, Ego verò ita fecissem, inquit, nisi interdum in hoc Crasso paulum inviderem: nam esse quamvis facetum atque falsum, non nimis est per seipsum invidendum: sed, quum omnium sis venustissimus & urbanissimus, omnium gravissimum & severissimum & esse, &

videri, quod isti contigit uni, id mihi vix ferendum videbatur.

229. Hic quum arrisisset ipse Crassus, Attamen, inquit Antonius, quum artem esse facetiarum, Juli, negares, aperuisti quiddam, quod præcipiendum videretur. Haberi enim dixisti rationem oportere hominum, rei, temporis, ne quid jocus de gravitate decerperet; quod quidem in primis a Crasso observari solet. Sed hoc præceptum prætermittendum est facetiarum, quum his nihil opus sit: nos autem quomodo utamur, quum opus sit, quærimus; ut in adversarium, & maximè, si ejus stultitia poterit agitari, in testem stultum, cupidum, levem, si facilè homines audituri videbuntur.

230. Omnino probabiliora sunt, quæ lacessiti dicimus, quàm quæ priores: nam & ingenii celeritas major est, quæ apparet in respondendo, & humanitatis est responsio. Videmur enim quieturi fuisse, nisi essemus lacessiti: ut in ista ipsa concione nihil ferè dictum est ab hoc, quod quidem facetiùs dictum videretur, quod non provocatus responderit. Erat autem tanta gravitas in Domitio, tanta auctoritas, ut, quod esset ab eo objectum, lepore magis elevandum, quàm contentione frangendum videretur.

LVII. Tum Sulpicius, Quid igitur? in-

quit, patiemur, Cæsarem, qui quamquam Crasso facetias concedit, tamen multò in eo studio magis ipse elaborat, non explicare nobis totum genus hoc jocandi, quale sit, & unde ducatur; præsertim quum tantam vim & utilitatem salis & urbanitatis esse fateatur? Quid si, inquit Julius, assentior Antonio, dicenti nullam esse artem salis?

232. Hic quum Sulpicius reticuisset, Quasi verò, inquit Crassus, horum ipsorum, de quibus Antonius tamdiu loquitur, ars ulla sit: observatio quædam est, ut ipse dixit, earum rerum, quæ in dicendo valent: quæ si eloquentes facere posset, quis esset non eloquens? Quis enim hæc non vel faciliè, vel certè aliquo modo posset ediscere? Sed ego in his præceptis hanc vim, & hanc utilitatem esse arbitror, non ut ad reperiendum, quid dicamus, arte ducamur, sed ut ea, quæ naturâ, quæ studio, quæ exercitatione consequimur, aut recta esse confidamus, aut prava intelligamus, quum, quò referenda sint, didicerimus. Quare, Cæsar, ego quoque a te hoc peto, ut, si tibi videtur, disputes de hoc toto jocandi genere, quid sentias; ne qua fortè dicendi pars, quoniam ita voluistis, in hoc tali cœtu, atque in tam accurato sermone præterita esse videatur.

233. Ego verò, inquit ille, quoniam

collectam a conviva, Crasse, exigis, non committam, ut, si defugerim, tibi causam aliquam dem recusandi: quamquam soleo sæpe mirari eorum impudentiam, qui agunt in scena gestum, spectante Roscio. Quis enim sese commovere potest, cujus ille vitia non videat? Sic ego nunc, Crasso audiente, primum loquar de facetiis, & *docebo sus*, ut aiunt, oratorem eum, quem quum Catulus nuper audisset, *sanum alios* aiebat *esse oportere*.

234. Tum ille, Jocabatur, inquit, Catulus, præsertim quum ita dicat ipse, ut ambrosiâ alendus esse videatur. Verum te, Cæsar, audiamus, ut ad Antonii reliqua redeamus. Et Antonius, perpauca quidem mihi restant, inquit: sed tamen defessus jam labore, atque itinere disputationis, requiescam in Cæsaris sermone, quasi in aliquo peropportuno diverforio.

LVIII. Atqui, inquit Julius, non nimis liberale hospitium meum dices: nam te in viam, simul ac perpaululum gustaris, extrudam & ejiciam. Ac, ne diutius vos demorer, de omni isto genere quid sentiam, perbrevisiter exponam. De risu quinque sunt, quæ quærantur: unum, quid sit: alterum, unde sit: tertium, sitne oratoris velle risum movere: quartum, quatenus: quintum, quæ sint genera ridiculi. Atque illud primum, quid sit ipse risus, quo pacto

concitetur , ubi sit , quomodo exsistat , atque ita repentè erumpat , ut eum cupientes tenere nequeamus , & quomodo simul latera , os , venas , vultum , oculos occupet , viderit Democritus : neque enim ad hunc sermonem hoc pertinet ; & si pertineret , nescire me tamen id non puderet , quod ne ipsi quidem illi scirent , qui pollicerentur.

236. Locus autem , & regio quasi ridiculi , nam id proximè quæritur , turpitudine , & deformitate quadam continetur. Hæc enim ridentur vel sola , vel maximè , quæ notant & designant turpitudinem aliquam non turpiter. Est autem , ut ad illud tertium veniam , est planè oratoris movere risum ; vel quòd ipsa hilaritas benevolentiam conciliat ei , per quem excitata est : vel quòd admirantur omnes acumen uno sæpe in verbo positum , maximè respondentis , nonnumquam etiam laceissentis : vel quòd frangit adversarium , quòd impedit , quòd elevat , quòd deterret , quòd refutat : vel quòd ipsum oratorem , politum esse hominem significat , quòd eruditum , quòd urbanum ; maximèque quòd tristitiam , ac severitatem mitigat & relaxat , odiosasque res sæpe , quas argumentis dilui non facile est , joco , risuque dissolvit.

237. Quatenus autem sint ridicula trac-

tanda oratori, perquam diligenter videntum est; id quod in quarto loco quærendi posueramus. Nam nec insignis improbitas & scelere juncta, nec rursus miseria insignis agitata ridetur: facinorosos enim majore quadam vi, quàm ridiculi, vulnerari volunt; miseros illudi nolunt, nisi si se fortè jactant. Parcendum est autem maximè caritati hominum, ne temerè in eos dicas, qui diliguntur.

LIX. Hæc igitur adhibenda est primùm in jocando moderatio: itaque ea facillimè luduntur, quæ neque odio magno, nec misericordiâ maximâ digna sunt. Quamobrem materies omnis ridiculorum est in istis vitiis, quæ sunt in vita hominum neque carorum, neque calamitosorum, neque eorum, qui ob facinus ad supplicium rapiendi videntur; eaque bellè agitata ridentur.

439. Est etiam deformitatis, & corporis vitiorum satis bella materies ad jocandum. Sed quærimus idem, quod in ceteris rebus maximè quærendum est, quatenus. In quo non modò illud præcipitur, ne quid insulsè, sed etiam, si quid perridiculè possis: vitandum est oratori utrumque, ne aut scurrilis jocus sit, aut mimicus. Quæ cujuscumque sint, faciliùs jam intelligemus, quum ad ipsa ridiculorum genera venerimus.

240. Duo enim sunt genera facetiarum,

quorum alterum re tractatur, alterum dicto. Re, si quando quid, tamquam aliqua fabella, narratur; ut olim tu, Crasse, in Memmium, *comedisſe eum lacertum Largii*, quum eſſet cum eo Tarracinæ de amricula rixatus. Salsa, attamen a te ipſo ficta, tota narratio. Addidiſti clauſulam, totâ Tarracinâ tum omnibus in parietibus inſcriptas fuiſſe litteras, tria *LLL*, duo *MM*. Quum quæreret id quid eſſet, ſenem tibi quemdam oppidanum dixiſſe, *Lacerat Lacertum Largii Mordax Memmius*.

241. Perſpicitis, hoc genus quàm ſit facetum, quàm elegans, quàm oratorium, ſive habeas verè, quod narrare poſſis, quod tamen eſt mendaciunculis aſpergendum, ſive ſingas. Eſt autem hæc hujus generis virtus, ut ita facta demonſtres, ut mores ejus, de quo narres, ut ſermo, ut vultus omnes exprimantur, ut iis, qui audiunt, tum geri illa fierique videantur.

242. In re eſt item ridiculum, quod ex quadam depravata imitatione ſumi ſolet; ut idem Crasſus, *Per tuam nobilitatem, per veſtram familiam*. Quid aliud fuit, in quo concio rideret, niſi illa vultûs & vocis imitatio? *Per tuas ſtatuas* verò quum dixit, & extento brachio paululum etiam de geſtu addidit, vehementiùs riſimus. Ex hoc genere eſt illa Roſciana imitatio ſenis: *Tibi ego, Antipho, haſ ſero*, inquit: ſenium

est, quum audio. Atque ita est totum hoc ipso genere ridiculum, ut cautissimè tractandum sit. Mimorum est enim ethologorum, si nimia est, imitatio, sicut obscœnitas. Orator furripiat oportet imitationem, ut is, qui audiat, cogitet plura, quàm videat: præstet idem ingenuitatem, & ruborem suum, verborum turpitudine, & rerum obscœnitate vitandâ.

LX. Ergo hæc duo genera sunt ejus ridiculi, quod in re positum est: quæ sunt propria perpetuarum facetiarum, in quibus describuntur hominum mores, & ita effinguntur, ut aut, re narratâ aliquâ, quales sunt, intelligantur; aut imitatione brevi injectâ, in aliquo insigni ad irridendum vitio reperiantur.

244. In dicto autem ridiculum est id, quod verbi, aut sententiæ quodam acumine movetur: sed ut in illo superiore genere vel narrationis, vel imitationis, vitanda est mimorum ethologorum similitudo; sic in hoc scurrilis oratori dicacitas magnopere fugienda est. Quî igitur distinguemus a Crasso, a Catulo, a ceteris familiarem vestrum Granium, aut Vargulam amicum meum? Non mehercule in mentem mihi quidem venit: sunt enim dicaces; Granio quidem nemo dicacior. Hoc, opinor, primùm, ne, quotiescumque potuerit dictum dici, necesse habeamus dicere.

245. Pusillus testis processit. *Licet*, inquit, *rogare*, Philippus? Tum quæsitōr properans, *Modò breviter*. Hic ille; *Non accusabis; perpusillum rogabo*. Ridiculè. Sed sedebat iudex L. Aurifex, brevior etiā, quā ipse testis: omnis est risus in iudicem conversus: visum est totum scurrile ridiculum. Ergo hæc, quæ cadere possunt in quos nolis, quamvis sint bella, sunt tamen ipso genere scurrilia.

246. Ut iste, qui se vult dicacem, & mehercule est, Appius, sed nonnumquam in hoc vitium scurrile delabitur. *Cænabo*, inquit, *apud te*, huic lusco, familiari meo, C. Sextio: *uni enim locum esse video*. Est hoc scurrile, & quòd sine causa lacesivit; & tamen id dixit, quod in omnes luscos conveniret. Ea, quia meditata putantur esse, minùs ridentur. Illud egregium Sextii, & ex tempore: *Manus lava*, inquit, & *cæna*.

247. Temporis igitur ratio, & ipsius dicacitatis moderatio, & temperantia, & raritas dictorum distinguet oratorem a scurra: &, quòd nos cum causa dicimus, non ut ridiculi videamur, sed ut proficiamus aliquid; illi totum diem, & sine causa. Quid enim est Vargula affecutus, quum eum candidatus A. Sempronius cum Marco suo fratre complexus esset; *Puer abige muscas?* Risum quæsit, qui est, meâ sen-

tentiâ , vel tenuissimus ingenii fructus. Tempus igitur dicendi prudentiâ & gravitate moderabimur : quarum utinam artem aliquam haberemus ! sed domina natura est.

LXI. Nunc exponamus genera ipsa summatim , quæ risum maximè moveant. Hæc igitur sit prima partitio ; quod facetè dicatur , id aliàs in re habere , aliàs in verbo facetias ; maximè autem homines delectari , si quando risus conjunctè re verboque moveatur. Sed hoc mementote , quoscunque locos attingam , unde ridicula ducantur , ex iisdem locis ferè etiam graves sententias posse duci : tantùm interest , quòd gravitas honestis in rebus severè , jocus in turpiculis & quasi deformibus ponitur : velut in iisdem verbis & laudare frugi servum possumus , & , si est nequam , jocari. Ridiculum est illud Neronianum vetus in furace servo , *Solum esse , cui domi nihil sit nec obsignatum , nec occlusum* : quod idem in bono servo dici solet ; sed hoc iisdem etiam verbis.

249. Ex iisdem autem locis omnia nascuntur. Nam quod Sp. Carvilio graviter claudicanti ex vulnere ob rempublicam accepto , & ob eam causam verecundanti in publicum prodire , mater dixit , *Quin prodis , mi Spuri ? quotiescumque gradum facies , toties tibi tuarum virtutum veniat in mentem* :

mentem : præclarum & grave est. Quod Calvino Glaucia claudicanti, *Ubi est vetus illud? num claudicas? at hic claudicat*: hoc ridiculum est; & utrumque ex eo, quod in claudicatione animadverti potuit, est ductum. *Quid hoc Nævio ignavius?* severè Scipio. At in malè olentem, *Video me a te circumveniri*, subridiculè Philippus. At utrumque genus continet verbi ad litteram immutati similitudo.

250. Ex ambiguo dicta, vel argutissima putantur, sed non semper in joco, sæpe etiam in gravitate versantur. Africano illi majori, coronam sibi in convivio ad caput accommodanti, quum ea sæpius rumpere-tur, P. Licinius Varus, *Noli mirari*, inquit, *si non convenit: caput enim magnum est*: laudabile & honestum. At ex eodem genere est: *Calvus satis est, quòd dicit parum*. Ne multa: nullum genus est joci, quo non ex eodem severa & gravia sumantur.

251. Atque hoc etiam animadvertendum, non esse omnia ridicula faceta. Quid enim potest esse tam ridiculum, quàm Sannio est? Sed ore, vultu, imitandis moribus, voce, denique ipso corpore ridetur. Salsum hunc possum dicere, atque ita, non ut ejusmodi oratorem esse velim, sed ut mimum.

LXII. Quare primum genus hoc, quod
Tomus II. K

risum vel maximè movet, non est nostrum; morosum, superstitiosum, suspiciosum, gloriosum, stultum: naturæ ridentur ipsæ, quas personas agitare solemus, non sustinere. Alterum genus est imitatione admodum ridiculum, sed nobis tantum licet fur-
tim, si quando, & cursim: aliter enim minimè est liberale. Tertium, oris depravatio, non digna nobis. Quartum, obscœnitas, non solum non foro digna, sed vix convivio liberorum. Detractis igitur tot rebus ex hoc oratorio loco, facetiæ reliquæ sunt, quæ aut in re, ut antè divisi, positæ videntur esse, aut in verbo. Nam quod, quibuscumque verbis dixeris, facetum tamen est, re continetur: quod mutatis verbis salem amittit, in verbis habet leporem omnem.

253. Ambigua sunt in primis acuta, atque in verbo posita, non in re; sed non sæpe magnum risum movent; magisque ut bellè & litteratè dicta laudantur: ut in illum Titium, qui quum studiosè pilâ luderet, & idem signa sacra noctu frangere putaretur, gregalesque eum, quum in campum non venisset, requirerent, excusavit Vespas Terentius, quòd eum *brachium fregisse* diceret. Ut illud Africani, quod est apud Lucilium:

Quid? Decius, Nuculam an confixum vis facere?
inquit.

Ut tuus amicus, Crasse, Granius, *non esse sextantis.*

254. Et, si quæritis, is, qui appellatur dicax, hoc genere maximè excellit: sed risus movent alia majores. Ambiguum per seipsum probatur id quidem, ut antè dixi, vel maximè: ingeniosi enim videtur, vim verbi in aliud, atque ceteri accipiant, posse ducere: sed admirationem magis, quàm risum movet, nisi si quando incidit in aliud genus ridiculi.

LXIII. Quæ genera percurram equidem: sed scitis esse notissimum ridiculi genus, quum aliud exspectamus, aliud dicitur. Hic nobismetipsis noster error risum movet: quòd si admixtum est etiam ambiguum, fit falsius; ut apud Nævium videtur esse misericors ille, qui judicatum duci videns, percunctatur ita,

Quanti addictus? mille nummum.

Si addidisset tantummodo, *Ducas licet*; esset illud genus ridiculi præter exspectationem: sed quia addidit,

Nihil addo, ducas licet:

addito ambiguo, altero genere ridiculi, fuit, ut mihi quidem videtur, falsissimus. Hoc tum est venustissimum, quum in altercatione arripitur ab adversario verbum, & ex eo, ut a Catulo in Philippum, in

eum ipsum aliquid, qui lacesivit, infligitur. Sed quum plura sint ambigui genera, de quibus est doctrina quædam subtilior, attendere & aucupari verba oportebit: in quo, ut ea, quæ sint frigidiora, vitemus (etenim cavendum est, ne arcessitum dictum putetur) permulta tamen acutè dicemus.

256. Alterum genus est, quod habet parvam verbi immutationem, quod in littera positum, Græci vocant *παρονομασίαν*, ut *Nobiliorem*, *mobiliorem* Cato; aut ut idem, quum cuidam dixisset, *Eamus deambulatum*: & ille, *Quid opus fuit DE?* *Immo verò*, inquit, *quid opus fuit te?* aut ejusdem responsio illa, *si tu & adversus, & aversus impudicus es.*

257. Etiam interpretatio nominis habet acumen, quum ad ridiculum convertas, quamobrem ita quis vocetur; ut ego nuper, Nummium divisorem, ut Neoptolemum ad Trojam, sic illum in campo Martio nomen invenisse.

LXIV. Atque hæc omnia verbo continentur. Sæpe etiam versus facetè interponitur, vel ut est, vel paululum immutatus, aut aliqua pars versus, ut Statius Scauro stomachanti; ex quo sunt nonnulli, qui tuam legem de civitate natam, Crasse, dicant:

St, tacete, quid hoc clamoris? quibus nec mater, nec pater.

Tantâ confidentiâ estis? auferte istam enim superbiam.

Nam in Cœlio sanè etiam ad causam utile fuit tuum illud, Antoni, quum ille a se pecuniam profectam diceret testis, & haberet filium delictiorem; abeunte jam illo,

Sentin' senem esse tactum triginta minis?

258. In hoc genus conjiciuntur proverbia: ut illud Scipionis, quum Asellus omnes provincias stipendia merentem se peragrasse gloriaretur, *Agas asellum*, & cetera. Quare ea quoque, quoniam mutatis verbis non possunt retinere eandem venustatem, non in re, sed in verbis posita ducantur.

259. Est etiam in verbo positum non insulsum genus, ex eo, quum ad verbum, non ad sententiam rem accipere videare: ex quo uno genere totus est Tutor, mimus vetus, oppidò ridiculus. Sed ab eo a mimis; tantum genus hujus ridiculi insigni aliquâ, & notâ re notari volo. Est autem ex hoc genere illud, quod tu, Crasse, nuper ei, qui te rogasset, num tibi molestus esset futurus, si ad te bene ante lucem venisset: *Tu verò, inquisti, molestus non eris. Jubebis igitur te, inquit, suscitari?* & tu, *Certè negaram te molestum futurum.*

260. Ex eodem hoc vetus illud est, quod aiunt Maluginensem illum M. Scipionem, quum ex centuria sua renuntiaret Acidinum consulem, præcoque dixisset, *Dic de L. Manlio: Virum bonum*, inquit, *egregiumque civem esse arbitror.* Ridiculè etiam illud L. Porcius Nasica censori Catoni, quum ille, *Ex tui animi sententia tu uxorem habes?* *Non hercule*, inquit, *ex mei animi sententia.* Hæc aut frigida sunt, aut tum salsa, quum aliud est expectatum: naturâ enim nos, ut antè dixi, noster delectat error: ex quo quum quasi decepti sumus expectatione, ridemus.

LXV. In verbis etiam illa sunt, quæ aut ex immutata oratione ducuntur, aut ex unius verbi translatione, aut ex inversione verborum. Ex immutatione, ut olim Rufca quum legem ferret annalem, dissuasor M. Servilius, *Dic mihi*, inquit, *M. Pinarium, si contra te dixerò, mihi malè dicturus es, ut ceteris fecisti? Ut sementem feceris, ita metes*, inquit.

262. Ex translatione autem, ut, quum Scipio ille major Corinthiis statuam pollicentibus eo loco, ubi aliorum essent imperatorum, *turmales* dixit *displicere*. Invertuntur autem verba, ut Crassus apud M. Perpennam iudicem pro Aculeone quum diceret, aderat contra Aculeonem Grati-diano L. Ælius Lamia, deformis, ut nostis;

qui quum interpellaret odiosè: *Audiamus*, inquit, *pulcellum puerum*, Crassus. Quum esset arrisum, *Non potui mihi*, inquit La-
mia, *formam ipse fingere: ingenium potui*. Tum hic, *Audiamus*, inquit, *disertum*. Multò etiam arrisum est vehementiùs.

263. Sunt etiam illa venusta, ut in gra-
vibus sententiis, sic in facetiis. Dixi enim
dudum, materiam aliam esse joci, aliam
severitatis; gravium autem, & jocorum
unam esse rationem. Ornant igitur in pri-
mis orationem verba relata contrariè; quod
idem genus est etiam sæpe facetum: ut
Servius ille Galba, quum judices L. Scri-
bonio tribuno plebis ferret familiares suos,
& dixisset Libo, *Quando tandem, Galba,*
de triclinio tuo exhibis? Quum tu, inquit,
de cubiculo alieno. A quo genere ne illud
quidem plurimùm distat, quod Glaucia
Metello, *Villam in Tiburte habes, cortem in*
Palatio.

LXVI. Ac verborum quidem genera
quæ essent faceta, dixisse me puto. Rerum
plura sunt, eaque magis, ut dixi antè, riden-
tur, in quibus est narratio; res sanè diffici-
lis. Exprimenda enim sunt, & ponenda
ante oculos ea, quæ videantur esse verisi-
milia, & quæ sint, quod ridiculi proprium
est, subturpia: cujus exemplum, ut bre-
vissimum, sit sanè illud, quod antè posui,
Crassi de Memmio. Et ad hoc genus ad-

scribamus etiam narrationes apologorum.

265. Trahitur etiam aliquid ex historia, ut, quum Sex. Titius se Cassandram esse diceret, *Multos*, inquit Antonius, *possum tuos Ajaces Oileos nominare*. Est etiam ex similitudine; quæ aut collationem habet, aut tamquam imaginem. Collationem; ut ille Gallus olim testis in Pisonem, quum innumerabilem Magio præfecto pecuniam dixisset datam, idque Scaurus tenuitate Magii redargueret. *Erras*, inquit, *Scaure*. *Ego enim Magium non conservasse dico, sed, tamquam nudus nuces legeret, in ventrem abstulisse*. Ut illud M. Cicero senex, hujus viri optimi, nostri familiaris, pater, *Nostros homines similes esse Syrorum venalium: ut quisque optimè Græcè sciret, ita esse nequissimum*.

266. Valde autem ridentur etiam imagines, quæ ferè in deformitatem, aut in aliquod vitium corporis ducuntur cum similitudine turpioris: ut meum illud in Helvium Manciam, *Jam ostendam, cujusmodi sis*; quum ille, *Ostende, quæso*: demonstravi digito pictum Gallum in Mariano scuto Cimbrico sub novis distortum, ejectâ linguâ, buccis fluentibus. Rîsus est commotus: nihil tam Manciæ simile visum est. Ut quum Tito Pinario mentum in dicendo intorquenti, *Tum ut diceret, si quid vellet, si nucem fregisset*.

267. Etiam illa, quæ minuendi, aut augendi causâ ad incredibilem admirationem efferuntur: velut tu, Crasse, in concione, ita sibi ipsum magnum videri Memmium, *ut in forum descendens caput ad Fornicem Fabii dmitteret*. Ex quo genere etiam illud est, quod Scipio apud Numantiam, quum stomacharetur cum C. Metello, dixisse dicitur, *Si quintum pareret mater ejus, asinum fuisse parituram*.

268. Arguta etiam significatio est, quum parvâ re, & sæpe verbo res obscura & latens illustratur; ut quum C. Fabricio P. Cornelius, homo, ut existimabatur, avarus & furax, sed egregiè fortis & bonus imperator, gratias ageret, quòd se homo inimicus consulem fecisset, bello præsertim magno & gravi; *Nihil est, quò mihi gratias agas*, inquit, *si malui compilari, quàm venire*. Ut Asello Africanus objicienti lustrum illud infelix, *Noli*, inquit, *mirari: is enim, qui te ex ærariis exemit, lustrum condidit, & taurum immolavit*. Tanta suspicio est, ut religione civitatem obstrinxisse videatur Mummius, quòd Asellum ignominiâ levarit.

LXVII. Urbana etiam dissimulatio est, quum alia dicuntur ac sentias; non illo genere, de quo antè dixi, quum contraria dicas, ut Lamiæ Crassus; sed quum toto genere orationis severè ludas, quum aliter

sentias ac loquare : ut noster Scævola Septimuleio illi Anagnino , cui pro C. Gracchi capite erat aurum repensum , roganti , ut se in Asiam præfectum duceret , *Quid tibi vis* , inquit , *insane ? tanta malorum est multitudo civium , ut tibi ego hoc confirmem , si Romæ manseris , te paucis annis ad maximas pecunias esse venturum.*

270. In hoc genere Fannius in annalibus suis Africanum hunc Æmilianum dicit fuisse , & eum Græco verbo appellat *εἰρωνία* : sed , uti ferunt , qui melius hæc norunt , Socratem opinor in hac ironia dissimulantique longè lepore , & humanitate omnibus præstitisse. Genus est perelegans , & cum gravitate falsum , quumque oratoris dictionibus , tum urbanis sermonibus accommodatum.

271. Et hercule omnia hæc , quæ a me de facetiis disputantur , non maiora forensium actionum , quàm omnium sermonum condimenta sunt. Nam quod apud Catonem est , qui multa retulit , ex quibus a me exempli causâ multa ponuntur , per mihi scitum videtur , C. Publicium solitum dicere , *P. Mummius cuius temporis hominem esse* : sic profectò res se habet , nullum ut sit vitæ tempus , in quo non deceat leporem humanitatemque versari.

272. Sed redeo ad cetera. Est huic finitimum dissimulationi , quum honesto verbo

vitiosa res appellatur : ut quum Africanus censor tribu movebat eum centurionem , qui in Pauli pugna non affuerat , quum ille se custodiæ causâ diceret in castris remansisse , quæreretque cur ab eo notaretur , *Non amo* , inquit , *nimiùm diligentes*.

273. Acutum etiam illud est , quum ex alterius oratione aliud excipias atque ille vult : ut Salinatori Maximus , quum , Tarento amisso , arcem tamen Livius retinisset , multaue ex ea prælia præclara fecisset , quum aliquot post annos Maximus id oppidum recepisset , rogaretque eum Salinator , ut meminisset , operâ suâ se Tarentum recepisse : *Quidni* , inquit , *meminerim ? numquam ego recepissem , nisi tu perdidisses*.

274. Sunt etiam illa subabsurda , sed eo ipso nomine sæpe ridicula , non solum mimis perapposita , sed etiam quodammodo nobis :

Homo fatutus ,

Postquam rem habere cœpit , est mortuus.

Quid est tibi

Ista mulier ? Uxor. Similis medius fidius. &

Quamdiu ad aquas fuit , numquam est mortuus.

LXVIII. Genus hoc levius , & , ut dixi , mimicum ; sed habet nonnumquam aliquid etiam apud nos loci , ut vel non stultus quasi stultè cum sale dicat aliquid : ut tibi ,

K vj

Antoni; Mancian, quum audisset te censo-
rem a M. Duronio de ambitu postulatum,
Aliquando, inquit, *tibi tuum negotium agere*
licebit. Valde hæc ridentur, & hercule
omnia, quæ a prudentibus, quasi per dis-
simulationem non intelligendi, subabsurdè,
falsèque dicuntur. Ex quo genere est etiam,
non videri intelligere quod intelligas: ut
Pontidius, *Qualem existimas, qui in adulte-*
rio deprehenditur? tardum.

276. Ut ego, qui in delectu, Metello,
quum excusationem oculorum a me non
acciperet, & dixisset, *Tu igitur nihil vides?*
Ego verò, inquam, *a porta Esquilina video*
villam tuam. Ut illud Nasicæ, qui quum ad
poëtam Ennium venisset, eique ab ostio
quærenti Ennium, ancilla dixisset, domi
non esse; Nasicæ fensit, illam domini jussu
dixisse, & illum intus esse. Paucis post die-
bus quum ad Nasicam venisset Ennius, &
eum a janua quæreret, exclamat Nasicæ,
se domi non esse. Tum Ennius, *Quid?*
ego non cognosco vocem, inquit, *tuam?* Hic
Nasicæ, *Homo es impudens. Ego quum te*
quærerem, ancillæ tuæ credidi te domi non
esse, tu mihi non credis ipsi?

277. Est bellum illud quoque, ex quo
is, qui dixit, irridetur in eo ipso genere,
quod dixit: ut, quum Q. Opimius con-
sularis, qui adolescentulus malè audisset,
festivo homini Egilio, qui videretur mol-

lior, nec esset, dixisset, *Quid tu, Egilia mea? quando ad me venis cum tua colu & lana? Non pol, inquit, audeo. Nam me ad famosas vetuit mater accedere.*

LXIX. Salsa sunt etiam, quæ habent suspicionem ridiculi absconditam: quo in genere est illud Siculi, cui, quum familiaris quidam quereretur, quò diceret, uxorem suam suspendisse se de ficu, *Amabo te, inquit, da mihi ex ista arbore quos seram surculos.* In eodem genere est, quod Catulus dixit cuidam oratori malo; qui quum in epilogo misericordiam se movisse putaret, postquam assedit, rogavit hunc, videre turne misericordiam movisse: *Ac magnam quidem, inquit; neminem enim puto esse tam durum, cui non oratio tua miseranda visa sit.*

279. Me quidem hercule valde illa movent stomachosa, & quasi submorosa ridicula, non quum a moroso dicuntur: tum enim non sal, sed natura ridetur. In quo, ut mihi videtur, persalsum illud est apud Nævium,

Quid ploras, pater?

Mirum ni cantem: condemnatus sum.

Huic generi quasi contrarium est ridiculi genus patientis ac lentis: ut, quum Cato percussus esset ab eo, qui arcam ferebat, quum ille diceret, *Cave: rogavit, numquid aliud ferret præter arcam?*

280. Etiam stultitiæ falsa reprehensio: ut ille Siculus, cui prætor Scipio patronum causæ dabat hospitem suum, hominem nobilem, sed admodum stultum, *Quæso*, inquit, *prætor, adversario meo da istum patronum; deinde mihi neminem dederis*. Movent illa etiam, quæ conjecturâ explanantur longè aliter, atque sunt; sed acutè, atque concinnè: ut, quum Scaurus accusaret Rutilium ambitûs, quum ipse consul esset factus, ille repulsam tulisset, & in ejus tabulis ostenderet litteras, *A. F. P. R.* idque diceret esse, *Actum fide P. Rutilii*; Rutilius autem, *Antè factum, pòst relatum*; C. Canius, eques Romanus, quum Rufo adesset, exclamat; neutrum illis litteris declarari. *Quid ergo*, inquit Scaurus? *Æmilius fecit, plectitur Rutilius*.

LXX. Ridentur etiam discrepantia. *Quid huic abest, nisi res & virtus?* Bella etiam est familiaris reprehensio, quasi errantis: ut quum objurgavit Albius Granium, quòd, quum ejus tabulis quiddam Albucio probatum videretur, & valde absoluto Scævola gauderet, neque intelligeret contra suas tabulas esse judicatum.

282. Huic similis est etiam admonitio in consilio dando familiaris: ut, quum patrono malo, quum vocem in dicendo obtudisset, suadebat Granius, ut mulsum frigidum biberet, simul ac domum redisset:

Perdam, inquit, *vocem*, *si id fecero*. *Melius est*, inquit, *quàm reum*.

283. Bellum etiam est, quum, quid cuique sit consentaneum, dicitur: ut, quum Scaurus nonnullam haberet invidiam ex eo, quòd Phrygionis Pompeii, locupletis hominis, bona sine testamento possederat; sederetque advocatus reo Bestiæ, quum funus quoddam duceretur, accusator C. Memmius, *Vide*, inquit, *Scaure*, *mortuus rapitur*, *si potes esse possessor*.

284. Sed ex his omnibus nihil magis ridetur, quàm quod est præter expectationem; cujus innumerabilia sunt exempla, vel Appii majoris illius, qui in senatu, quum ageretur de agris publicis, & de lege Thoria, & premeretur Lucilius ab iis, qui a pecore ejus depasci agros publicos dicerent, *Non est*, inquit, *Lucilii pecus illud: erratis* (defendere Lucilium videbatur) *ego liberum puto esse: quâ lubet, pascitur*.

285. Placet etiam mihi illud Scipionis illius, qui Tib. Gracchum perculit. Quum ei M. Flaccus multis probris objectis P. Mucium judicem tulisset, *Ejero*, inquit: *iniquus est*. Quum esset admurmuratum, *Ah*, inquit, *P. C. non ego mihi illum iniquum ejero, verùm omnibus*. Ab hoc verò Crasso nihil facetius: quum læsisset testis Silus Pisonem, quòd se in eum audisse di-

xisset: *Potest fieri*, inquit, *Sile*, *ut is*, *unde te audisse dicis*, *iratus dixerit*. Annuit Silus. *Potest etiam*, *ut tu non rectè intellexeris*. Id quoque toto capite annuit, ut se Crasso daret. *Potest etiam fieri*, inquit, *ut omnino*, *quod te audisse dicis*, *numquam audieris*. Hoc ita præter expectationem accidit, ut testem omnium risus obrueret. Hujus generis est plenus Nævius, & jocus est familiaris;

Sapiens si algebis, tremes.

Et alia permulta.

LXXI. Sæpe etiam facetè concedas ad-
versario idipsum, quod tibi ille detrahit:
ut C. Lælius, quum ei quidam malo genere
natus diceret, indignum esse suis majori-
bus, *At hercule*, inquit, *tu tuis dignus*.
Sæpe etiam sententiosè ridicula dicuntur:
ut M. Cincius, quo die legem de donis &
muneribus tulit, quum C. Cento prodiis-
set, & satis contumeliosè, *Quid fers*, *Cin-
ciole*, quæsisset; *Ut emas*, inquit, *Cai*, *si
uti velis*.

287. Sæpe etiam falsè quæ fieri non
possunt, optantur: ut M. Lepidus, quum
ceteris se in campo exercentibus, in herba
ipse recubisset, *Vellem hoc esset*, inquit,
laborare. Salsum est etiam quærentibus,
& quasi percunctantibus, lentè respon-
dere quod nollent: ut censor Lepidus,
quum M. Antistio Pyrgensi equum ade-

misset, amique quum vociferarentur, & quærent, quid ille patri suo responderet, cur ademptum sibi equum diceret, quum optimus colonus, parcissimus, modestissimus, frugalissimus esset: *Me istorum*, inquit, *nihil credere.*

288. Colliguntur a Græcis alia nonnulla, execrationes, admirationes, minationes. Sed hæc ipsa nimis mihi videor multa in genera descripsisse. Nam illa, quæ verbi ratione & vi continentur, certa ferè ac definita sunt, quæ plerumque, ut antè dixi, laudari magis, quàm rideri solent.

289. Hæc autem, quæ sunt in re & in ipsa sententia, partibus sunt innumerabilia, generibus pauca. Expectationibus enim decipiendis, & naturis aliorum irridendis, ipsorum ridiculè indicandis, & similitudine turpioris, & dissimulatione, & subabsurda dicendo, & stulta reprehendendo, risus moventur. Itaque imbuendus est is, qui jocosè vult dicere, quasi naturâ quadam aptâ ad hæc genera, & moribus, ut ad cujusque modi genus ridiculi vultus etiam accommodetur: qui quidem quò severior est & tristior, ut in te, Crasse, hòc illa, quæ dicuntur, falsiora videri solent.

290. Sed jam tu, Antoni, qui hoc diverforio sermonis mei libenter acquieturum te esse dixisti, tamquam in Pomptinum deverteris, neque amœnum, neque salu-

bre locum, censeo ut satis diu te putes requiesse, & iter reliquum conficere pergas. Ego verò, atque hilarè quidem a te acceptus, inquit, & quum doctior per te, tum etiam audacior factus sum ad jocandum. Non enim vereor, ne quis me in isto genere leviorē jam putet, quoniam quidem tu Fabricios mihi auctores, & Africanos, Maximos, Catones, Lepidos protulisti. Sed habetis ea, quæ voluistis ex me audire, de quibus quidem accuratius dicendum & cogitandum fuit. Nam cetera facilliora sunt, atque ex iis, quæ jam dicta sunt, reliqua nascuntur omnia.

LXXII. Ego enim quum ad causam sum aggressus, atque omnia cogitando, quoad facere potui, persecutus; quum & argumenta causæ, & eos locos, quibus animi iudicium conciliantur, & illos, quibus permoventur, vidi atque cognovi: tum constituo, quid habeat quæque causa boni, quid mali. Nulla enim ferè res potest in dicendi disceptationem, aut controversiam vocari, quæ non habeat utrumque: sed quantum habeat, id refert.

292. Mea autem ratio in dicendo hæc esse solet, ut, boni quod habeat, id amplectar, exornem, exaggerem; ibi commorer, ibi habitem, ibi hæream: a malo autem vitioque causæ ita recedam, non ut id me defugere appareat, sed ut totum

bono illo ornando, & augendo dissimulatum obruatur. Et, si causa est in argumentis, firmissima quæque maximè tueor, sive plura sunt, sive aliquod unum. Sin autem in conciliatione, aut in permotione causa est; ad eam me potissimùm partem, quæ maximè commovere animos hominum potest, conféro.

293. Summa denique hujus generis hæc est, ut, si in refellendo adversario firmior esse oratio, quàm in confirmandis nostris rebus, potest, omnia in illum conferam tela: sin nostra faciliùs probari, quàm illa redargui possunt, abducere animos a contraria defensione, & ad nostram conor traducere.

294. Dno denique illa, quæ facillima videntur, quoniam quæ difficiliora sunt, non possum, mihi pro meo jure sumo: unum, ut molesto aut difficili argumento, aut loco nonnumquam omnino nihil respondeam; quod forsitan aliquis jure irriserit: quis enim est, qui id facere non possit? sed tamen ego de mea nunc, non de aliorum facultate disputo, confiteorque me, si quæ premat res vehementiùs, ita cedere solere, ut non modò non abjecto, sed ne rejecto quidem scuto fugere videar; sed adhibere quamdam in dicendo speciem atque pompam, & pugnæ similem fugam: consistere verò in meo præsidio, sic ut non

fugiendi hostis , sed capiendi loci causâ cessisse videar. Alterum est illud, quod ego oratori maximè cavendum & providendum puto , quodque me sollicitare summè solet : non tam ut prosim causis , elaborare soleo , quàm ut ne quid obsim ; non quin enitendum sit in utroque : sed tamen multò est turpius oratori , nocuisse videri causæ , quàm non profuisse.

LXXIII. Sed quid hoc loco vos inter vos , Catule ? an hæc , ut sunt contemnenda , contemnitis ? Minimè , inquit ille : sed Cæsar de isto ipso quiddam velle dicere videbatur. Me verò lubente , inquit Antonius , dixerit , sive refellendi causâ , sive quærendi.

296. Tum Julius , Ego mehercule , inquit , Antoni , semper is fui , qui de te oratore sic prædicarem , unum te in dicendo mihi videri testissimum ; propriumque hoc esse laudis tuæ , nihil a te umquam esse dictum , quod obesset ei , pro quo diceres. Idque memoriâ teneo , quum mihi sermo cum hoc ipso Crasso , multis audientibus , esset de te institutus , Crassusque plurimis verbis eloquentiam laudaret tuam , dixisse me , cum ceteris tuis laudibus hanc esse vel maximam , quòd non solum quod opus esset , diceres , sed etiam quod non opus esset , non diceres.

297. Tum illum mihi respondere me-

mini; cetera in te summè esse laudanda, illud verò improbi esse hominis, & perfidiosi, dicere quod alienum esset, & noceret ei, pro quo quis diceret: quare non sibi eum disertum, qui id non faceret, videri, sed improbum, qui faceret. Nunc, si tibi videtur, Antoni, demonstrares velim, quare tu hoc ita magnum putes, nihil in causa mali facere, ut nihil tibi in oratore majus esse videatur.

LXXIV. Dicam equidem, Cæsar, inquit, quid intelligam: sed & tu, & vos omnes hoc, inquit, mementote, non me de perfecti oratoris divinitate quadam loqui, sed de exercitationis & consuetudinis meæ mediocritate. Crassi quidem responsum excellentis cujusdam est ingenii ac singularis: cui quiddam portenti simile esse visum est, posse aliquem inveniri oratorem, qui aliquid mali faceret dicendo, obessetque ei, quem defenderet.

299. Facit enim de se conjecturam: cujus tanta vis ingenii est, ut neminem, nisi consultò, putet, quod contra seipsum sit, dicere. Sed ego non de præstanti quadam & eximia, sed propè de vulgari & communi prudentia disputo. Apud Græcos fertur incredibili quadam magnitudine consilii atque ingenii Atheniensis ille fuisse Themistocles: ad quem quidam doctus homo, atque in primis eruditus accessisse dicitur,

eique artem memoriæ, quæ tum primum proferebatur, pollicitum esse se traditurum. Quum ille quæsisset, quidnam illa ars efficere posset, dixisse illum doctorem, ut omnia meminisset; & ei Themistoclem respondisse, gratius sibi illum esse facturum, si se oblivisci quæ vellet, quàm si meminisse, docuisset.

300. Videsne, quæ vis in homine acerrimi ingenii, quàm potens, & quanta mens fuerit? qui ita responderit, ut intelligere possemus, nihil ex illius animo, quod semel esset infusum, umquam effluere potuisse; quum quidem ei fuerit optabilius oblivisci posse potius, quod meminisse nollet, quàm quod semel audisset, vidissetve, meminisse. Sed neque propter hoc Themistoclis responsum, memoriæ nobis opera danda non est; neque illa mea cautio & timiditas in causis, propter præstantem prudentiam Crassi negligenda est. Uterque enim istorum non mihi attulit aliquam, sed suam significavit facultatem.

301. Etenim permulta sunt in causis, in omni parte orationis circumspectiunda, ne quid offendas, ne quò irruas. Sæpe aliquis testis aut non lædit, aut minùs lædit, nisi laceffatur: orat reus, urgent advocati, ut invehamur, ut maledicamus, denique ut interrogemus: non moveor, non obtempero, non satisfacio, neque tamen ullam asse-

quor laudem. Homines enim imperiti facilius quod stultè dixeris, reprehendere, quàm quod sapienter tacueris, laudare possunt.

302. Hic quantum sit mali, si iratum, si non stultum, si non levem testem læseris? habet enim & voluntatem nocendi in iracundia, & vim in ingenio, & pondus in vita: nec, si hoc Crassus non committit, ideo non multi, & sæpe committunt: quo quidem mihi videri turpius nihil solet, quàm quum ex oratoris dicto aliquo, aut responso, aut rogatu, sermo ille sequitur, *Occidit ille, adversariumne? immo verò, aiunt, se, & eum, quem defendit.*

LXXV. Hoc Crassus non putat nisi perfidia accidere posse; ego autem sapissime video in causis aliquid mali facere homines minimè malos. Quid illud, quod suprà dixi, solere me cedere, &, ut planius dicam, fugere ea, quæ valde causam meam premerent? Quum id non faciunt alii, versanturque in hostium castris, ac sua præsidia dimittunt, mediocriterne causis nocent, quum aut adversariorum adjumenta confirmant, aut ea, quæ sanare nequeunt, exulcerant?

304. Quid? quum personarum, quas defendunt, rationem non habent? si, quæ sunt in his invidiosa, non mitigant extenuando, sed laudando & efferendo invidiosiora faciunt; quantum est in eo tan-

dem mali? Quid? si in homines caros, iudicibusque jucundos sine ulla præmuntione orationis acerbius, & contumeliosius invehere, nonne abs te iudices abalienes? Quid, si, quæ vitia, aut incommoda sunt in aliquo iudice uno, aut pluribus, ea tu in adversariis exprobrando non intelligas te in iudices invehi, mediocre peccatum est?

305. Quid, si, quum pro altero dicas, litem tuam facias, aut læsus efferare iracundiâ, causam relinquo, nihilne noceas? In quo ego, non quò libenter malè audiam, sed quia ego causam non libenter relinquo, nimium patiens & lentus existimor; ut, quum teipsum, Sulpici, objurgabam, quòd ministratorem peteres, non adversarium. Ex quo etiam illud assequor, ut, si quis mihi maledicat, petulans, aut planè insanus esse videatur.

306. In ipsis autem argumentis, si quid posueris aut apertè falsum, aut ei, quod dixeris, dicturusve sis, contrarium, aut genere ipso remotum ab usu iudiciorum ac foro, nihilne noceas? Quid multa? omnis cura mea solet in hoc versari semper (dicam enim sæpius) si possim, ut boni aliquid efficiam dicendo: sin id minùs, ut certè ne quid mali.

LXXVI. Itaque nunc illuc redeo, Carule, in quo tu me paulò antè laudabas,
ad

ad ordinem, collocationemque rerum ac locorum. Cujus ratio est duplex: altera, quam affert natura causarum, altera, quæ oratorum judicio & prudentiâ comparatur. Nam ut aliquid ante rem dicamus; deinde, ut rem exponamus; post, ut eam probemus nostris præsiidiis confirmandis, contrariis refutandis; deinde ut concludamus, atque ita peroremus; hoc dicendi genus natura ipsa præscribit.

308. Ut verò statuamus, ea, quæ probandi, docendi, persuadendi causâ dicenda sunt, quemadmodum componamus; id est vel maximè proprium oratoris prudentiæ. Multa enim occurrunt argumenta: multa, quæ in dicendo profutura videantur: sed eorum partim ita levia sunt, ut contemnenda sint: partim, etiam si quid habent adjumenti, sunt nonnumquam ejusmodi, ut insit in iis aliquid vitii; neque tanti sit illud, quod prodesse videatur, ut cum aliquo malo jungatur.

309. Quæ autem sunt utilia atque firma; si ea tamen, ut sæpe fit, valde multa sunt: ea, quæ ex iis aut levissima sunt, aut aliis gravioribus consimilia, secerni arbitror oportere, atque ex oratione removeri. Equidem quum colligo argumenta causarum, non tam ea numerare soleo, quàm expendere.

LXXVII. Et quoniam (quod sæpe jam
Tomus II. L

dixi) tribus rebus omnes ad nostram sententiam perducimus, aut docendo, aut conciliando, aut permovendo; una ex tribus his rebus res præ nobis est ferenda, ut nihil aliud, nisi docere velle videamur: reliquæ duæ, sicuti sanguis in corporibus, sic illæ in perpetuis orationibus fusæ esse debebunt. Nam & principia, & ceteræ partes orationis, de quibus paulò post pauca dicemus, habere hanc vim magnopere debent, ut ad eorum mentes, apud quos agetur, movendas permanere possint.

311. Sed his partibus orationis, quæ etsi nihil docent argumentando, persuadendo tamen, & commovendo proficiunt plurimum, quamquam maximè proprius est locus & in exordiendo & in perorando; degredi tamen ab eo quod proposueris, atque agas, permovendorum animorum causâ, sæpe utile est.

312. Itaque vel narratione expositâ sæpe datur ad commovendos animos degrediendi locus; vel argumentis nostris confirmatis, vel contrariis refutatis, vel utroque loco, vel omnibus, si habet eam causâ dignitatem atque copiam, rectè id fieri potest: eæque causæ sunt ad augendum & ad ornandum gravissimæ atque plenissimæ, quæ plurimos exitus dant ad ejusmodi degressionem, ut his locis uti liceat, quibus

animorum impetus eorum, qui audiunt, aut impellantur, aut reflectantur.

313. Atque etiam in illo reprehendo eos, qui, quæ minimè firma sunt, ea primæ collocant. In quo illos quoque errare arbitror, qui, si quando (id quod mihi numquam placuit) plures adhibent patronos, ut in quoque eorum minimùm putant esse, ita eum primum volunt dicere. Res enim hoc postulat, ut eorum expectatio- ni, qui audiunt, quàm celerrimè occurratur: cui si initio satisfactum non sit, multò plus sit in reliqua causa laborandum. Malè enim se res habet, quæ non statim, ut dici cœpta est, melior fieri videtur.

314. Ergo ut in oratore optimus quisque, sic & in oratione firmissimum quodque sit primum: dum illud tamen in utroque teneatur, ut ea, quæ excellent, ferventur etiam ad perorandum: si quæ erunt mediocria (nam vitiosis nusquam esse oportet locum) in mediam turbam, atque in gregem conjiciantur.

315. Hisce omnibus rebus consideratis, tum denique id, quod primum est dicendum, postremum soleo cogitare, quo utar exordio: nam si quando id primum invenire volui, nullum mihi occurrit, nisi aut exile, aut nugatorium, aut vulgare atque commune.

LXXVIII. Principia autem dicendi sem-

per quum accurata , & acuta , & instructa sententiis , apta verbis , tum verò causarum propria esse debent. Prima est enim quasi cognitio & commendatio orationis in principio , quæ continuò eum , qui audit , permulcere atque allicere debet. In quo admirari soleo non equidem istos , qui nullam huic rei operam dederunt : sed hominem in primis disertum , atque eruditum , Philippum , qui ita solet ad dicendum surgere , ut , quod primum verbum habiturus sit , nesciat ; & ait idem , quum brachium concalefecerit , tum se solere pugnare ; neque attendit , eos ipsos , unde hoc simile ducat , illas primas hastas ita jactare leniter , ut & venustati vel maximè serviant , & reliquis viribus suis consulant.

317. Neque est dubium , quin exordium dicendi vehemens & pugnax non sæpe esse debeat : sed si in ipso illo gladiatorio vitæ certamine , quo ferro decernitur , tamen ante congressum multa fiunt , quæ non ad vulnus , sed ad speciem valere videantur : quantò hoc magis in oratione expectandum , in qua non vis potius , quàm delectatio postulatur ? Nihil est denique in natura rerum omnium , quod se universum profundat , & quod totum repente evolet. Sic omnia , quæ fiunt , quæque aguntur acerrimè , lenioribus principiis natura ipsa prætexuit.

318. Hæc autem in dicendo non extrinsecus aliunde quærenda, sed ex ipsis visceribus causæ sumenda sunt. Idcirco totâ causâ pertentatâ atque perspectâ, locis omnibus inventis atque instructis, considerandum est, quo principio sit utendum. Sic & facîle reperietur.

319. Sumentur enim ex iis rebus, quæ erunt uberrimæ vel in argumentis, vel in iis partibus, ad quas dixi degredi sæpe oportere. Ita & momenti aliquid afferent, quum erunt pene ex intima defensione deprompta, & apparebit ea non modò non esse communia, nec in alias causas posse transferri, sed penitus ex ea causa, quæ tum agatur, effloruisse.

LXXIX. Omne autem principium aut rei totius, quæ agetur, significationem habere debet, aut aditum ad causam & munitionem, aut quoddam ornamentum & dignitatem. Sed oportet ut ædibus ac templis vestibula & aditus, sic causis principia proportionem rerum præponere. Itaque in parvis atque in frequentibus causis ab ipsa re est exordiri sæpe commodius.

321. Sed quum erit utendum principio (quod plerumque erit) aut ex reo, aut ex adversario, aut ex re, aut ex eis, apud quos agitur, sententias duci licebit. Ex reo (reos appello, quorum res est) quæ significant virum bonum, quæ liberalem, quæ

calamitosum , quæ misericordiâ dignum , quæ valeant contra falsam criminationem. Ex adversario , iisdem ex locis ferè contraria.

322. Ex re , si crudelis , si infanda , si præter opinionem , si immeritò , si misera , si ingrata , si indigna , si nova , si quæ restitui sanarique non possit. Ex iis autem , apud quos agetur , ut benevolos , beneque existimantes efficiamus : quod agendo efficitur melius , quàm rogando. Est id quidem in totam orationem confundendum , nec minimè in extremam : sed tamen multa principia ex eo genere gignuntur.

323. Nam & attentum monent Græci ut principio faciamus judicem , & docilem ; quæ sunt utilia : sed non principii magis propria , quàm reliquarum partium : faciliora etiam in principiis , quòd & attentum maximè sunt , quum omnia expectant , & dociles magis initiis esse possunt. Illustriora enim sunt , quæ in principiis , quàm quæ in mediis causis dicuntur , aut arguendo , aut refellendo.

324. Maxima autem copia principiorum ad judicem aut alliciendum , aut incitandum , ex iis locis trahitur , qui ad motus animorum conficiendos inerunt in causa : quos tamen totos in principio explicari non oportebit , sed tantum impelli primò judicem leviter , ut jam inclinato reliqua incumbat oratio.

LXXX. Connexum autem ita sit principium consequenti orationi, ut non tamquam citharœdi proœmium affictum aliquod, sed cohærens cum omni corpore membrum esse videatur. Nam nonnulli, quum illud meditati ediderunt, sic ad reliqua transeunt, ut audientiam sibi fieri nolle videantur. Atque ejusmodi illa prolusio debet esse, non ut Samnitum, qui vibrant hastas ante pugnam, quibus in pugnando nihil utuntur; sed ut ipsis sententiis, quibus proluserunt, vel pugnare possint.

326. Narrare verò rem quòd breviter jubent, si brevitatis appellanda est, quum verbum nullum redundat, brevis est L. Crassi oratio: sin tum est brevitatis, quum tantum verborum est, quantum necesse est, aliquando id opus est: sed sæpe obest vel maximè in narrando, non solum quòd obscuritatem affert, sed etiam quòd eam virtutem, quæ narrationis est maxima, ut jucunda, & ad persuadendum accommodata sit, tollit.

327. Ut illa, *Nam is postquam excessit ex ephebis*; quàm longa est narratio? mores adolescentis ipsius, & servilis percunctatio, mors Chrysidis, vultus & forma; & lamentatio sororis, reliqua pervariè jucundèque narrantur. Quòd si hanc brevitatem quæsisset.

Effertur, imus, ad sepulcrum venimus,
In ignem posita est.

ferè decem versiculis totum conficere potuisset: quamquam hoc ipsum, *Effertur*, *imus*, concisum est ita, ut non brevitati servitum sit, sed magis venustati.

328. Quòd si nihil fuisset, nisi, *in ignem posita est*; tamen res tota cognosci facìle potuisset. Sed & festivitatem habet narratio distincta personis & interpuncta sermonibus: & est probabilius, quod gestum esse dicas, quum, quemadmodum actum sit, exponas: & multò apertius ad intelligendum est, si sic consistitur aliquando, ac non istà brevitate percurritur.

329. Apertam enim narrationem tam esse oportet, quàm cetera: sed hoc magis in hac elaborandum est, quòd & difficilius est, non esse obscurum in re narranda, quàm aut in principio, aut in argumento, aut in purgando, aut in perorando: & majore periculo hæc pars orationis obscura est, quàm ceteræ: vel quia, si quo alio in loco est dictum quid obscurius, tantum id perit, quod ita dictum est; narratio obscura totam obcæcat orationem: vel quòd alia possis, semel si obscurius dixeris, dicere alio loco planius; narrationis unus est in causa locus. Erit autem perspicua narratio, si verbis usitatis, si ordine

temporum conservato, si non interruptè narrabitur.

LXXXI. Sed quando utendum sit, aut non sit narratione, id est consilii. Neque enim si nota res est, nec dubium quid gestum sit, narrari oportet; nec si adversarius narravit, nisi si refellemus: ac, si quando erit narrandum, ne illa, quæ suspicionem & crimen efficient, contraque nos erunt, acriter persequamur; & quidquid poterit, detrahamus: ne illud, quod Crassus, si quando fiat, perfidiâ, non stultitiâ fieri putat, ut causæ noceamus, accidat. Nam ad summam totius causæ pertinet, cautè, an contrâ, demonstrata res sit; quòd omnis orationis reliquæ fons est narratio.

331. Sequitur, ut causa ponatur: in quo videndum est, quid in controversiam veniat. Tum suggerenda sunt firmamenta causæ conjunctè, & infirmandis contrariis, & tuis confirmandis: namque una in causis ratio quædam est ejus orationis, quæ ad probandam argumentationem valet: ea autem & confirmationem, & reprehensionem quærit: sed quia neque reprehendi quæ contrâ dicuntur, possunt, nisi tua confirmes; neque hæc confirmari, nisi illa reprehendas; idcirco hæc & naturâ, & utilitate, & tractatione conjuncta sunt.

332. Omnia autem concludenda ple-

rumque rebus augendis, vel inflammando iudice, vel mitigando: omniaque quum superioribus orationis locis, tum maximè extremo, ad mentes iudicum quàm maximè permovendas, & ad utilitatem nostram vocandas, conferenda sunt.

333. Neque sanè jam causa videtur esse, cur secernamus ea præcepta, quæ de suasionibus tradenda sunt, aut laudationibus: sunt enim pleraque communia: sed tamen suadere aliquid, aut dissuadere, gravissimæ mihi videtur esse personæ. Nam & sapientis est, consilium explicare suum de maximis rebus; & honesti, & disertis, ut mente providere, auctoritate probare, oratione persuadere possit.

LXXXII. Atque hæc in senatu minore apparatu agenda sunt. Sapiens enim est consilium; multisque aliis dicendi relinquendus locus. Vitanda etiam ingenii ostentationis suspicio.

334. Concio capit omnem vim orationis, & gravitatem varietatemque desiderat. Ergo in suadendo nihil est optabilius, quàm dignitas: nam qui utilitatem putat, non quid maximè velit suafor, sed quid interdum magis sequatur, videt. Nemo est enim, præsertim in tam clara civitate, quin putet experendam maximè dignitatem: sed vincit utilitas plerumque, quum subest ille timor, eâ neglectâ, ne dignitatem quidem posse retineri.

335. Controversia autem inter hominum sententias, aut in illo est, utrum sit utilius: aut etiam quum id convenit, certatur, utrum honestati potius, an utilitati consulendum sit. Quæ quia pugnare sæpe inter se videntur, qui utilitatem defendit, enumerabit commoda pacis, opum, potentiae, pecuniae, vectigalium, praesidii, militum, utilitates ceterarum rerum, quarum fructum utilitate metimur, itemque incommoda contrariorum. Qui ad dignitatem impellit, majorum exempla, quæ erunt vel cum periculo gloriosa, colliget: posteritatis immortalem memoriam augebit: utilitatem ex laude nasci defendet, semperque eam cum dignitate esse conjunctam.

336. Sed quid fieri possit aut non possit, quidque etiam sit necesse aut non sit, in utraque re maximè est quærendum. Inciditur enim omnis jam deliberatio, si intelligitur non posse fieri, aut si necessitas affertur: & qui id docuit, non videntibus aliis, is plurimùm vidit.

337. Ad consilium autem de republica dandum, caput est, nosse rempublicam: ad dicendum verò probabiliter, nosse mores civitatis; qui quia crebrò mutantur, genus quoque orationis est sæpe mutandum. Et, quamquam una ferè vis est eloquentiae, tamen, quia summa dignitas est po-

puli, gravissima causa reipublicæ, maximus motus multitudinis; genus quoque dicendi grandius quoddam, & illustrius esse adhibendum videtur: maximaque pars orationis admovenda est ad animorum motus nonnumquam aut cohortatione, aut commemoratione aliquâ, aut in spem, aut in metum, aut ad cupiditatem, aut ad gloriam concitandos; sæpe etiam a temeritate, iracundia, spe, injuria, invidia, crudelitate revocandos.

LXXXIII. Fit autem, ut, quia maxima quasi oratori scena videatur concio, naturâ ipsâ ad ornatus dicendi genus excitetur. Habet enim multitudo vim quamdam talem, ut quemadmodum tibicen sine tibiis canere, sic orator, sine multitudine audiente, eloquens esse non possit.

339. Et quum sint populares multi variique lapsus, vitanda est acclamatio adversa populi, quæ aut orationis peccato aliquo excitatur, si asperè, si arroganter, si turpiter, si fordidè, si quoquo animi vitio dictum esse aliquid videatur; aut hominum offensione, vel invidiâ, quæ aut justa est, aut ex criminatione atque fama; aut res si displicet; aut si est in aliquo motu suæ cupiditatis, aut metûs multitudo: hisque quatuor causis totidem medicinæ opponuntur: tum objurgatio, si est auctoritas: tum admonitio, quasi lenior objurgatio.

tum promissio, si audierint, probaturos: tum deprecatio, quod est infimum, sed nonnumquam utile.

340. Nullo autem loco plus facetiæ profunt, & celeritas, & breve aliquod dictum nec sine dignitate, & cum lepore. Nihil enim tam facile, quàm multitudo, a tristitia, & sæpe ab acerbitate, commodè, ac breviter, & acutè, & hilarè dicto deducitur.

LXXXIV. Exposui ferè, ut potui, vobis, in utroque genere causarum quæ sequi solem, quæ fugere, quæ spectare, quæque omnino in causis ratione versari. Nec illud tertium laudationum genus est difficile, quod ego initio quasi a præceptis nostris secreveram: sed & quia multa sunt orationum genera, & graviora, & majoris copiae, de quibus nemo ferè præciperet, & quòd nos laudationibus non ita multum uti solemus, totum hunc segregabam locum. Ipsi enim Græci magis legendi, & delectationis, aut hominis alicujus ornandi, quàm utilitatis hujus forensis causâ, laudationes scriptitaverunt: quorum sunt libri, quibus Themistocles, Aristides, Agesilaüs, Epaminondas, Philippus, Alexander, aliique laudantur. Nostræ laudationes, quibus in foro utimur, aut testimonii brevitatem habent nudam atque inornatam, aut scribuntur ad funebrem con-

cionem, quæ ad orationis laudem minimè accommodata est. Sed tamen, quoniam est utendum aliquando, nonnumquam etiam scribendum, velut Q. Tuberoni Africanum avunculum laudanti scripsit C. Lælius, vel ut nosmetipsi, ornandi causâ, Græcorum more, si quos velimus, laudare possimus; sit a nobis quoque tractatus is locus.

342. Perspicuum est igitur, alia esse in homine optanda, alia laudanda. Genus, forma, vires, opes, divitiæ, ceteraque quæ fortuna det, aut extrinsecus, aut corpori, non habent in se veram laudem; quæ deberi virtuti uni putatur; sed tamen quòd ipsa virtus in earum rerum usu ac moderatione maximè cernitur, tractanda etiam in laudationibus hæc sunt naturæ & fortunæ bona: in quibus est summa laus, non extulisse se in potestate, non fuisse insolentem in pecunia, non se prætulisse aliis propter abundantiam fortunæ; ut opes & copię non superbix videantur ac libidini, sed bonitati ac moderationi facultatem & materiam dedisse.

343. Virtus autem, quæ est per se ipsa laudabilis, & sine qua nihil laudari potest, tamen habet plures partes, quarum alia est aliâ ad laudationem aptior. Sunt enim aliæ virtutes, quæ videntur in moribus hominum, & quadam comitate ac beneficentia

positæ: aliæ, quæ in ingenii aliqua facultate, aut animi magnitudine ac robore. Nam clementia, iustitia, benignitas, fides, fortitudo in periculis communibus, jucunda est auditu in laudationibus.

344. Omnes enim hæ virtutes non tam ipsis, qui eas habent, quàm generi hominum, fructuosæ putantur. Sapientia & magnitudo animi, quâ omnes res humanæ, tenues & pro nihilo putantur; & in excogitando vis quædam ingenii, & ipsa eloquentia, admirationis habet non minùs, jucunditatis minùs. Ipsos enim magis videntur, quos laudamus, quàm illos, apud quos laudamus, ornare ac tueri: sed tamen in laudando jungeñda sunt etiam hæc genera virtutum. Ferunt enim aures hominum, quum illa, quæ jucunda & grata, tum etiam illa, quæ mirabilia sunt in virtute, laudari.

LXXXV. Et quoniam singularum virtutum sunt certa quædam officia ac munera, & sua cuique virtuti laus propria debetur, erit explicandum in laude iustitiæ, quid cum fide, quid cum æquabilitate, quid cum ejusmodi aliquo officio is, qui laudabitur, fecerit. Itemque in ceteris res gestæ ad cuiusque virtutis genus, & vim, & nomen accommodabuntur.

346. Gratissima autem laus eorum factorum habetur, quæ suscepta videntur a

viris fortibus sine emolumento ac præmio : quæ verò etiam cum labore & periculo ipsorum , hæc habent uberrimam copiam ad laudandum , quòd & dici ornatissimè possunt , & audiri facillimè. Ea enim denique virtus esse videtur præstantis viri , quæ est fructuosa aliis , ipsi autem laboriosa , aut periculosa , aut certè gratuita. Magna etiam illa laus & admirabilis videri solet , tulisse casus sapienter adversos , non fractum esse fortunâ , retinuisse in rebus asperis dignitatem.

347. Neque tamen illa non ornant , habiti honores , decreta virtutis præmia , res gestæ , judiciis hominum comprobata : in quibus etiam felicitatem ipsam deorum immortalium iudicio tribui , laudationis est. Sumendæ autem res erunt aut magnitudine præstabiles , aut novitate primæ , aut genere ipso singulares. Neque enim parvæ , neque usitatae , neque vulgares , admiratione , aut omnino laude dignæ videri solent.

348. Est etiam cum ceteris præstantibus viris comparatio in laudatione præclara. De quo genere libitum est mihi paulò plura , quàm ostenderam , dicere , non tam propter usum forensem , qui est a me in omni hoc sermone tractatus , quàm ut hoc videretis , si laudationes essent in oratoris officio , quod nemo negat , oratori virtutum

omnium cognitionem, sine qua laudatio effici non possit, esse necessariam.

349. Jam vituperandi præcepta contrariis ex vitiis sumenda esse perspicuum est: simul est illud ante oculos, nec bonum virum propriè & copiosè laudari, sine virtutum, nec improbum notari ac vituperari, sine vitiorum cognitione, satis insignitè atque asperè posse. Atque his locis & laudandi, & vituperandi sæpe nobis est utendum in omni genere causarum.

350. Habetis, de inveniendis rebus, disponendisque quid sentiam. Adjungam etiam de memoria, ut labore Crassum levem, neque ei quidquam aliud, de quo differat, relinquam, nisi ea, quibus hæc exornentur.

LXXXVI. Perge verò, inquit Crassus. Libenter enim te cognitum jam artificem, aliquandoque evolutum illis integumentis dissimulationis tuæ, nudatumque perspicio: & quòd mihi nihil, aut quòd non multum relinquis, percommodè facis, estque mihi gratum. Jam istuc quantum tibi ego reliquerim, inquit Antonius, erit in tua potestate. Si enim verè agere volueris, omnia tibi relinquo: sin dissimulare, tu quemadmodum his satisfacias, videris. Sed, ut ad rem redeam, non sum tanto ego, inquit, ingenio, quanto Themistocles fuit, ut oblivionis artem, quàm me-

moriam, malim: gratiamque habeo Simonidi illi Ceo, quem primum ferunt artem memoriae protulisse.

352. Dicunt enim, quum cœnaret Crannon in Thessalia Simonides apud Scopam, fortunatum hominem & nobilem, cecinissetque id carmen, quod in eum scripsisset, in quo multa ornandi causâ poetarum more in Castorem scripta & Pollucem fuissent, nimis illum sordidè Simonidi dixisse, se dimidium ejus ei, quod pactus esset, pro illo carmine, daturum: reliquum a suis Tyndaridis, quos æquè laudasset, peteret, si ei videretur.

353. Paulò pòst esse ferunt nuntiatum Simonidi, ut prodiret: juvenes stare ad januam duos quosdam, qui eum magnopere evocarent: surrexisse illum, prodisse, vidisse neminem: hoc interim spatio conclave illud, ubi epularetur Scopas, concidisse: eâ ruinâ ipsum oppressum cum suis interiisse: quos quum humare vellent sui, neque possent obtritotos internoscere ullo modo; Simonides dicitur ex eo quòd meminisset, quo eorum loco quisque cubuisset, demonstrator uniuscujusque sepeliendi fuisse. Hac tum re admonitus invenisse fertur, ordinem esse maximè, qui memoriae lumen afferret.

354. Itaque iis, qui hanc partem ingenii exercerent, locos esse capiendos, &

ea, quæ memoriâ tenere vellent, effingenda animo, atque in his locis collocanda: sic fore, ut ordinem rerum locorum ordo conservaret; res autem ipsas rerum effigies notaret: atque ut locis pro cera, simulacris pro litteris uteremur.

LXXXVII. Qui sit autem oratori memoriæ fructus, quanta utilitas, quanta vis, quid me attinet dicere? tenere quæ didiceris in accipienda causa, quæ ipse cogitaris? omnes fixas esse in animo sententias? omnem descriptum verborum apparatus? ita audire vel eum, unde discas, vel eum, cui respondendum sit, ut illi non infundere in aures tuas orationem, sed in animo videantur inscribere? Itaque soli, qui memoriâ vigent, sciunt, quid, & quatenus, & quomodo dicturi sint, quid respondeant, quid supersit: iidemque multa ex aliis causis aliquando a se acta, multa ab aliis audita meminerunt.

356. Quare confiteor equidem, hujus boni naturam esse principem, sicut earum rerum, de quibus antè locutus sum, omnium: sed hæc ars tota dicendi, sive artis imago quædam est & similitudo, habet hanc vim, non ut totum aliquid, cujus in ingenijs nostris pars nulla sit, pariat & procreet, verum ut ea, quæ sunt orta jam in nobis & procreata, educet atque confirmet.

357. Verumtamen neque tam acri memoriâ ferè quisquam est, ut non dispositis, notatisque rebus, ordinem verborum aut sententiarum complectatur: neque verò tam hebeti, ut nihil hac consuetudine & exercitatione adjuvetur. Vidit enim hoc prudenter sive Simonides, sive alius quis invenit, ea maximè animis affigi nostris, quæ essent a sensu tradita atque impressa; acerrimum autem ex omnibus nostris sensibus esse sensum videndi: quare facillimè animo teneri posse ea, quæ perciperentur auribus, aut cogitatione, si etiam oculorum commendatione animis traderentur; ut res cæcas, & ab adspèctûs iudicio remotas, conformatio quædam & imago & figura ita notaret, ut ea, quæ cogitando complecti non possemus, intuendo quasi teneremus.

358. His autem formis atque corporibus, sicut omnibus, quæ sub adspèctum veniunt, sedes opus est: etenim corpus intelligi sine loco non potest. Quare ne in re nota & pervulgata multus & insolens sim, locis est utendum multis, illustribus, explicatis, modicis intervallis: imaginibus autem agentibus, acribus, insignitis, quæ occurrere, celeriterque percutere animum possint. Quam facultatem & exercitatio dabit, ex qua consuetudo gignitur, & similitum verborum conversa & immutata ca-

sibus, aut traducta ex parte ad genus notatio, & unius verbi imagine totius sententiæ informatio, pictoris cujusdam summi ratione & modo, formarum varietate locos distinguentis.

LXXXVIII. Sed verborum memoria, quæ minus est nobis necessaria, majore imaginum varietate distinguitur: multa enim sunt verba, quæ, quasi articuli, connectunt membra orationis, quæ formari similitudine nullâ possunt: eorum fingendæ nobis sunt imagines, quibus semper utamur. Rerum memoria propria est oratoris: eam singulis personis bene positis notare possumus, ut sententias imaginibus, ordinem locis comprehendamus.

360. Neque verum est, quod ab inerbis dicitur, opprimi memoriam imaginum pondere, & obscurari etiam id, quod per se natura tenere potuisset. Vidi enim ego summos homines, & divinâ propè memoriâ, Athenis Charmadam; in Asia, quem vivere hodie aiunt, Scepsium Metrodorum; quorum uterque tamquam literis in cera, sic se aiebat imaginibus in iis locis, quos haberet, quæ meminisse vellet, perscribere. Quare hac exercitatione non eruenda memoria est, si est nulla naturalis; sed certè, si latet, evocanda est.

361. Habetis sermonem bene longum

hominis utinam non impudentis, illud quidem certè, non nimis verecundi; qui quidem quum te, Catule, tum etiam L. Crasso audiente, de dicendi ratione tam multa dixerim: nam istorum ætas minùs me fortasse movere debuit. Sed mihi ignoscetis profectò, si modò, quæ causa me ad hanc insolitam mihi loquacitatem impulerit, acceperitis.

LXXXIX. Nos verò, inquit Catulus (etenim pro me hoc, & pro meo fratre respondeo) non modò tibi ignoscimus, sed te diligimus, magnamque tibi habemus gratiam: & quum humanitatem & facilitatem agnoscimus tuam, tum admiramur istam scientiam & copiam. Equidem etiam hoc me assecutum puto, quòd magno sum levatus errore, & illà admiratione liberatus, quòd multis cum aliis semper admirari solebam, unde esset illa tanta tua in causis divinitas: nec enim te ista attigisse arbitrabar, quæ diligentissimè cognosse, & undique collegisse, usuque doctum partim correxisse video, partim comprobasse.

363. Neque eò minùs eloquentiam tuam, & multò magis virtutem & diligentiam admiror: & simul gaudeo, iudicium animi mei comprobari, quòd semper statui, neminem sapientiæ laudem & eloquentiæ sine summo studio, & labore, & doctri-

na, consequi posse. Sed tamen quidnam est id, quod dixisti, fore ut tibi ignoscere-
mus, si cognossemus, quæ te causa in hunc
sermonem impulisset? quæ est enim alia
causa, nisi quod nobis, & horum adoles-
centium studio, qui te attentissimè audie-
runt, morem gerere voluisti?

364. Tum ille, Adimerè, inquit, om-
nem recusationem Crasso volui, quem ego
paulò sciebam, vel pudentiùs, vel invi-
tiùs (nolo enim dicere de tam suavi homi-
ne, fastidiosius) ad hoc genus sermonis
accedere. Quid enim poterit dicere? con-
sularem se esse hominem & censorium?
eadem nostra causa est. An ætatem afferet?
quadriennio minor est. An se nescire? quæ
ego serò, quæ cursim arripui, quæ subci-
sivis operis, ut aiunt, iste a puero, sum-
mo studio, summis doctoribus. Nihil di-
cam de ingenio, cui par nemo fuit. Ete-
nim me dicentem qui audierit, nemo um-
quam tam sui despiciens fuit, quin spera-
ret aut melius, aut eodem modo se posse
dicere: Crasso dicente, nemo tam arro-
gans, qui similiter se umquam dicturum
esse confideret. Quamobrem, ne frustra hi
tales viri venerint, te aliquando, Crasse,
audiamus.

XC. Tum ille, Ut ita ista esse conce-
dam, inquit, Antoni, quæ sunt longè se-
cus, quid mihi tu tandem hodie, aut cui-

quam homini, quod dici possit, reliquisti? Dicam enim verè, amicissimi homines, quod sentio: sæpe ego doctos homines, quid dico sæpe? immo nonnumquam: sæpe enim qui potui, qui puer in forum venerim, neque inde umquam diutius, quàm quaestor, abfuerim? sed tamen audiui, ut heri dicebam, & Athenis quum essem, doctissimos viros, & in Asia istum ipsum Scepsium Metrodorum, quum de his ipsis rebus disputaret. Neque verò mihi quisquam copiosius umquam visus est, neque subtilius in hoc genere dicendi, quàm iste hodie, esse versatus. Quod si esset aliter, & aliquid intelligerem ab Antonio prætermisum; non essem tam inurbanus, ac pene inhumanus, uti eo gravarer, quod vos cupere sentirem.

366. Tum Sulpicius, An ergo, inquit, oblitus es, Crasse, Antonium ita partitum esse tecum, ut ipse instrumentum oratoris exponeret, tibi ejus distinctionem atque ornatum relinqueret? Hic ille, Primum, quis Antonio permisit, inquit, ut & partes faceret, &, utram vellet, prior ipse fumeret? deinde, si ego rectè intellexi, quum valde libenter audirem, mihi conjunctè est visus de utraque re dicere. Ille verò, inquit Cotta, ornamenta orationis non attigit, neque eam laudem, ex qua eloquentia nomen ipsum invenit. Verba igitur,

tur, inquit Crassus, mihi reliquit Antonius, rem ipse sumpsit.

367. Tum Cæsar, Si, quod difficilius est, id tibi reliquit; est nobis, inquit, causa, cur te audire cupiamus: sin, quod facilius, tibi causa non est, cur recuses. Et Catulus, Quid, quòd dixisti, inquit, Crasse, si hic hodie apud te maneremus, te morem nobis esse gesturum, nihilne ad fidem tuam putas pertinere? Tum Cotta ridens, Possem tibi, inquit, Crasse, concedere: sed vide, ne quid Catulus attulerit religionis: opus hoc censorium est: id autem committere, vide quàm sit homini turpe censorio. Agite verò, ille inquit, ut vultis. Sed nunc quidem, quoniam id temporis est, surgendum censeo, & requiescendum: post meridiem, si ita vobis est commodum, loquemur aliquid, nisi fortè in crastinum differre mavultis. Omnes se vel statim, vel, si ipse post meridiem mallet, quamprimum tamen audire velle dixerunt.



LIBER TERTIUS.

IN tertio libro partes Elocutionis Crasso deferuntur : hic enim in iis , quæ ad ornatum orationis pertinent , magis elaboravit. Priùs igitur de universo genere dicendi pauca loquitur : deinde ad eas quatuor partes , quibus Elocutio continetur , purè , dilucidè , ornatè , & aptè dicendi , sese revocat. Has singulas partes percurrit ; præcipuè vero in ornatu orationis immoratur. Docet quæ verba eligenda sint ; qui tropi adhibendi ; quos numeros & pedes oratio postulet. Tum ad extremum de actione differit ; docetque quomodo & vox , & gestus , & vultus ad orationem accommodari debeat. Atque hi quidem de Oratore libri ita venusti , ita elegantes sunt , ut ab illis non solum præcepta , sed exempla eloquentiæ petenda sint. PEARCIUS.

LIBER TERTIUS.

¶ I. ANSTITUENTI mihi, Quinte frater, eum sermonem referre, & mandare huic tertio libro, quem post Antonii disputationem Crassus habuisset, acerba sanè recordatio veterem animi curam, molestiamque renovavit. Nam illud immortalitate dignum ingenium, illa humanitas, illa virtus L. Crassi, morte extincta subitâ est, vix diebus decem post eum diem, qui hoc & superiore libro continetur.

2. Ut enim Romam rediit extremo scenicorum ludorum die, vehementer commotus eâ oratione, quæ ferebatur habitâ esse in concione a Philippo; quem dixisse constabat, *videndum sibi aliud esse consilium; illo senatu se rempublicam gerere non posse*: manè idibus Septembris & ille & senatus frequens, vocatu Drusi, in curiam venit. Ibi quum Drusus multa de Philippo questus esset, retulit ad senatum de illo ipso, quòd consul in eum ordinem tam graviter in concione esset investus.

3. Hic, ut sæpe inter homines sapientissimos constare vidi, quamquam hoc Crasso, quum aliquid accuratius dixisset, semper ferè contigisset, ut nunquam dixisse melius putaretur, tamen omnium con-

sensu sic esse tum judicatum, ceteros a Crasso semper omnes, illo autem die etiam ipsum a se se superatum. Deploravit enim casum atque orbitatem senatûs; cujus ordinis a consule, qui quasi parens bonus, aut tutor fidelis esse deberet, tamquam ab aliquo nefario prædone diriperetur patrimonium dignitatis: neque verò esse mirandum, si, quum suis consiliis rempublicam profligasset, consilium senatûs a republica repudiaret.

4. Hic quum homini & vehementi, & diserto, & in primis forti ad resistendum, Philippo, quasi quasdam verborum faces admovisset, non tulit ille, & graviter exarsit, pignoribusque ablatis Crassum instituit coërcere. Quo quidem ipso in loco multa a Crasso divinitus dicta efferebantur, quum sibi illum consulem esse negaret, cui senator ipse non esset. *An tu, quum omnem auctoritatem universi ordinis pro pignore putaris, eamque in conspectu populi Romani concideris; me his pignoribus existimas posse terreri? Non tibi illa sunt cædenda, si Crassum vis coërcere: hæc tibi est excidenda lingua; quâ vel evulsâ, spiritu ipso libidinem tuam libertas mea refutabit.*

II. Per multa tum vehementissimâ contentione animi, ingenii, virium, ab eo dicta esse constabat; sententiamque eam, quam senatus frequens secutus est, ornatiss-

simis & gravissimis verbis , Ut populo Romano satisfaceret , numquam senatûs neque consilium reipublicæ neque fidem defuisse , ab eo dictam ; & eundem (id quod in auctoritatibus perscriptis exstat) scribendo affuisse.

6. Illa tamquam cycnea fuit divini hominis vox & oratio , quam quasi expectantes , post ejus interitum veniebamus in curiam , ut vestigium illud ipsum , in quo ille postremum institisset , contueremur. Namque tum latus ei dicenti condoluisse , sudoremque multum consecutum esse audiebamur : ex quo quum cohorrisset , cum feбри domum rediit , dieque septimo lateris dolore consumptus est.

7. O fallacem hominum spem , fragilemque fortunam , & inanes nostras contentiones ! quæ in medio spatio sæpe franguntur & corruunt , aut antè in ipso cursu obruuntur , quàm portum conspiceretur. Nam , quamdiu Crassi fuit , ambitionis labore , vita districta , tamdiu privatis magis officiis , & ingenii laude floruit , quàm fructu amplitudinis , aut reipublicæ dignitate. Qui autem ei annus primus ab honorum perfunctione aditum , omnium concessu , ad summam auctoritatem dabat , is ejus omnem spem , atque omnia vitæ consilia , morte pervertit.

8. Fuit hoc luctuosum suis , acerbum

patriæ, grave bonis omnibus: sed ii tamen rempublicam casus secuti sunt, ut mihi non erepta L. Crasso a diis immortalibus vita, sed donata mors esse videatur. Non vidit flagrantem bello Italiam, non ardentem invidiâ senatum, non sceleris nefarii principes civitatis reos, non luctum filiæ, non exilium generi, non acerbissimam C. Marii fugam, non illam post reditum ejus cædem omnium crudelissimam, non denique in omni genere deformatam eam civitatem, in qua ipse florentissima multum omnibus gloriâ præstitisset.

III. Sed quoniam attigi cogitatione vim, varietatemque fortunæ, non vagabitur oratio mea longiùs, atque eis ferè ipsis definietur viris, qui hoc sermone, quem referre cœpimus, continentur. Quis enim non jure beatam L. Crassi mortem illam, quæ est a multis sæpe defleta, dixerit, quum horum ipsorum sit, qui tum cum illo postremum ferè collocuti sunt, eventum recordatus? Tenemus enim memoriâ, Q. Catulum, virum omni laude præstantem, quum sibi non incolumem fortunam, sed exilium & fugam deprecaretur, esse coactum, ut vitâ se ipse privaret.

10. Jam M. Antonii in his ipsis rostris, in quibus ille rempublicam constantissimè consul defenderat, quæque censor imperatoris manubiis ornarat, positum caput

illud fuit, a quo erant multorum civium capita servata. Neque verò longè ab eo C. Julii caput, hospitis Etrusci scelere proditum, cum L. Julii fratris capite jacuit: ut ille, qui hæc non vidit, & vixisse cum republica pariter, & cum illa simul extinctus esse videatur. Neque enim propinquum suum, maximi animi virum, P. Crassum, suapte interfectum manu, neque collegæ sui, pontificis maximi, sanguine simulacrum Vestæ respersum esse vidit: cui mœrori (quâ mente ille in patriam fuit) etiam C. Carbonis, inimicissimi hominis, eodem illo die mors nefaria fuisset.

11. Non vidit eorum ipsorum, qui tum adolescentes Crasso se dicarant, horribiles miserisque casus. Ex quibus C. Cotta, quem ille florentem reliquerat, paucis diebus post mortem Crassi depulsus per invidiam tribunatu, non multis ab eo tempore mensibus ejectus est e civitate. Sulpicius autem, qui in eadem invidiæ flamma fuisset, quibuscum privatus conjunctissimè vixerat, hos in tribunatu spoliare instituit omni dignitate: cui quidem ad summam gloriam eloquentiæ florescenti, ferro erepta vita est, & pœna temeritatis non sine magno reipublicæ malo constituta.

12. Ego verò te, Crasse, quum vitæ flore, tum mortis opportunitate, divino consilio & ortum & extinctum esse arbi-

tror. Nam tibi aut pro virtute animi; constantiaque tua civilis ferri subeunda fuit crudelitas, aut, si qua te fortuna ab atrocitate mortis vindicasset, eadem esse te funerum patriæ spectatorem coëgisset: neque solùm tibi improborum dominatus, sed etiam propter admixtam civium cædem, bonorum victoria mœrori fuisset.

IV. Mihi quidem, Quinte frater, & eorum casus, de quibus antè dixi, & ea, quæ nosmetipsi ob amorem in rempublicam incredibilem & singularem pertulimus, ac sensimus, cogitanti sententia sæpe tua vera ac sapiens videri solet, qui propter tot, tantos, tamque præcipites casus clarissimorum hominum, atque optimorum virorum, me semper ab omni contentione ac dimicatione revocasti.

14. Sed quoniam hæc jam neque integra nobis esse possunt, & summi labores nostri, magnâ compensati gloriâ, mitigantur, pergamus ad ea solatia, quæ non modò sedatis molestiis jucunda, sed etiam hærentibus, salutaria nobis esse possunt; sermonemque L. Crassi reliquum, ac pene postremum memoriæ prodamus: atque ei, etsi nequaquam parem illius ingenio, at pro nostro tamen studio meritam gratiam, debitamque referamus.

15. Neque enim quisquam nostrum, quum libros Platonis mirabiliter scriptos

legit, in quibus omnibus ferè Socrates exprimitur, non, quamquam illa scripta sunt divinitus, tamen majus quiddam de illo, de quo scripta sunt, suspicatur. Quod item nos postulamus non a te quidem, qui nobis omnia summa tribuis, sed a ceteris, qui hæc in manus sument, ut majus quiddam de L. Crasso, quàm quantùm a nobis exprimeretur, suspicentur.

16. Nos enim, qui ipsi sermoni non interfuissemus, & quibus C. Cotta tantummodo locos, ac sententias hujus disputationis tradidisset, quo in genere orationis utrumque oratorem cognoveramus, id ipsum sumus in eorum sermone adumbrare conati. Quodd si quis erit, qui ductus opinione vulgi, aut Antonium jejuniorem, aut Crassum pleniorẽ fuisse putet, quàm quomodo a nobis uterque inductus est: is erit ex iis, qui aut illos non audierit, aut judicare non possit. Nam fuit uterque (ut exposui antea) quum studio, atque ingenio, & doctrinâ præstans omnibus, tum in suo genere perfectus; ut neque in Antonio deesset hic ornatus orationis, neque in Crasso redundaret.

V. Ut igitur ante meridiem discesserunt, paululumque requierunt, in primis hoc a se Cotta animadversum esse dicebat, omne illud tempus meridianum Crassum in acerrima atque attentissima cogita-

nione posuisse; seseque, qui vultum ejus, quum ei dicendum esset, obtutumque oculorum in cogitando probè nosset, atque in maximis causis sæpe vidisset, tum dedita operâ, quiescentibus aliis, in eam exhedram venisse, in qua Crassus lectulo posito recubisset; quumque eum in cogitatione defixum esse sensisset, statim recessisse, atque in eo silentio duas horas ferè esse consumptas. Deinde, quum omnes, inclinato jam in pomeridianum tempus die, venissent ad Crassum, Quid est, Crasse, inquit Julius, imusne sessum? etsi admonitum venimus te, non flagitatum.

18. Tum Crassus, an me tam impudentem esse existimatis, ut vobis hoc præsertim munus putem diutius posse debere? Quinam igitur, inquit ille, locus? an in media silva placet? est enim is maximè & opacus & frigidus. Sanè, inquit Crassus: etenim est in eo loco sedes huic nostro non inopportuna sermoni. Quum placuisset idem ceteris, in silvam venit, & ibi magna cum audiendi expectatione considitur.

19. Tum Crassus, Quum auctoritas, atque amicitia vestra, tum Antonii facilitas eripuit, inquit, mihi in optima mea causa libertatem recusandi: quamquam in partienda disputatione nostra, quum sibi de his, quæ dici ab oratore oporteret, su-

meret; mihi autem relinqueret, ut explicarem quemadmodum illa ornari oporteret; ea divisit, quæ sejuncta esse non possunt. Nam quum omnis ex re, atque verbis constet oratio; neque verba sedem habere possunt, si rem subtraxeris, neque res lumen, si verba semoveris.

20. Ac mihi quidem veteres illi, majus quiddam animo complexi, multò plus etiam vidisse videntur, quàm quantum nostrorum ingeniorum acies intueri potest: qui omnia hæc, quæ suprâ & subter, unum esse, & unâ vi, atque unâ consensione naturæ constricta esse dixerunt. Nullum est enim genus rerum, quod aut avulsum a ceteris per seipsum constare, aut, quo cetera si careant, vim suam atque æternitatem conservare possint.

VI. Sed si hæc major esse ratio videtur, quàm ut hominum possit sensu aut cogitatione comprehendere, est etiam illa Platonis vera, & tibi, Catule, certè non inaudita vox, Omnem doctrinam harum ingenuarum & humanarum artium uno quodam societatis vinculo contineri: ubi enim perspecta vis est rationis ejus, quâ causæ rerum atque exitus cognoscuntur, mirus quidam omnium quasi consensus doctrinarum, concentusque reperitur.

22. Sed si hoc quoque videtur esse altius, quàm ut id nos humi strati suspicere

Mvj

possimus, illud certè tamen, quod amplexi sumus, quod profitemur, quod suscepimus, nosse & tenere debemus. Una est enim, quod & ego hesternâ die dixi, & aliquot locis antemeridiano sermone significavit Antonius, eloquentia, quascumque in oras disputationis, regionesve delata est.

23. Nam sive de cœli natura loquitur; sive de terræ, sive de divina vi, sive de humana; sive ex inferiore loco, sive ex æquo, sive ex superiore; sive ut impellat homines, sive ut doceat, sive ut deterreat, sive ut concitet, sive ut reflectat, sive ut incendat, sive ut leniat; sive ad paucos, sive ad multos, sive inter alienos, sive cum suis, sive secum, rivis est diducta oratio, non fontibus: & quocumque ingreditur, eodem est instructu ornatuque comitata.

24. Sed quoniam oppressi jam sumus opinionibus non modò vulgi, verùm etiam hominum leviter eruditorum, qui, quæ complecti tota nequeunt, hæc faciliùs divulgata & quasi discerpta contrectant; & qui, tamquam ab animo corpus, sic a sententiis verba sejungunt, quorum sine interitu fieri neutrum potest; non suscipiam oratione meâ plus quàm mihi imponitur: tantùm significabo brevi, neque verborum ornatum inveniri posse non partitis expressisque sententiis, neque esse ullam senten-

tiam illustrem sine luce verborum. Sed prius quàm illa conor attingere, quibus orationem ornari atque illuminari putem, proponam breviter, quid sentiam de universo genere dicendi.

VII. Naturà nulla est (ut mihi videtur) quæ non habeat in suo genere res complures dissimiles inter se, quæ tamen consimili laude dignentur. Nam & auribus multa percipimus, quæ, etsi nos vocibus delectant, tamen ita sunt varia sæpe, ut id, quod proximum audias, jucundissimum esse videatur: & oculis colliguntur pene innumerabiles voluptates, quæ nos ita capiunt, ut unum sensum dissimili genere delectent: & reliquos sensus voluptates oblectant dispares, ut sit difficile iudicium excellentis maximè suavitatis.

26. At hoc idem, quod est in naturis rerum, transferri potest etiam ad artes. Una fingendi est ars, in qua præstantes fuerunt Myro, Polycletus, Lysippus, qui omnes inter se dissimiles fuerunt; sed ita tamen, ut neminem sui velis esse dissimilem. Una est ars ratioque picturæ, dissimillimique tamen inter se Zeuxis, Aglaophon, Apelles: neque eorum quisquam est, cui quidquam in arte sua deesse videatur. Et, si hoc in his quasi mutis artibus est mirandum, & tamen verum; quantò admirabilius in oratione atque in lingua? quæ quum in iisdem

sententiis verbisque versetur, summas habet dissimilitudines; non sic, ut alii vituperandi sint, sed ut ii, quos constet esse laudandos, in dispari tamen genere laudentur.

27. Atque id primum in poëtis cerni licet, quibus est proxima cognatio cum oratoribus, quàm sint inter sese Ennius, Pacuvius, Acciusque dissimiles; quàm apud Græcos, Æschylus, Sophocles, Euripides, quamquam omnibus par pene laus in dissimili scribendi genere tribuatur.

28. Adspicite nunc eos homines, atque intuemini, quorum de facultate quærimus, quid intersit inter oratorum studia atque naturas. Suavitatem Isocrates, subtilitatem Lysias, acumen Hyperides, sonitum Æschines, vim Demosthenes habuit. Quis eorum non egregius? tamen quis cuiusquam nisi sui similis? Gravitatem Africanus, lenitatem Lælius, asperitatem Galba, profluens quiddam habuit Carbo & canorum. Quis horum non princeps temporibus illis fuit? & suo tamen quisque in genere princeps.

VIII. Sed quid ego vetera conquiram, quum mihi liceat uti præsentibus exemplis atque vivis? Quid jucundius auribus nostris umquam accidit hujus oratione Catuli? quæ est pura sic, ut Latine loqui pene solus videatur: sic autem gravis, ut in singulari

dignitate omnis tamen adsit humanitas ac lepos. Quid multa? istum audiens equidem sic judicare soleo, quidquid aut addideris, aut mutaveris, aut detraxeris, vitiosius & deterius futurum.

30. Quid noster hic Cæsar? nonne novam quamdam rationem attulit orationis, & dicendi genus induxit propè singulare? Quis umquam res, præter hunc, trágicas pene comicè, tristes remisè, severas hilarè, forenses scenicà propè venustate tractavit; atque ita, ut neque jocus magnitudine rerum excluderetûr, nec gravitas facetiis minueretur?

31. Ecce præsentés duo propè æquales Sulpicius & Cotta: quid tam inter se dissimile? quid tam in suo genere præstans? Limatus alter & subtilis, rem explicans propriis aptisque verbis, hæret in causa semper; &, quid judici probandum sit, quum acutissimè vidit, omissis ceteris argumentis, in eo mentem orationemque defigit. Sulpicius autem fortissimò quodam animi impetu, plenissimâ & maximâ voce, summâ contentione corporis, & dignitate motûs, verborum quoque eâ gravitate & copiâ est, ut unus ad dicendum instructissimus a natura esse videatur.

IX. Ad nosmetipsos jam revertor (quoniam sic fuimus semper comparati, ut hominum sermonibus quasi in aliquod con-

tentionis iudicium vocaremur) quid tam dissimile, quàm ego in dicendo, & Antonius? quum ille is sit orator, ut nihil eo possit esse præstantius; ego autem, quamquam memet mei pœnitet, cum hoc maximè tamen in comparatione conjungar.

32. Videtisne, genus hoc quod sit Antonii? forte, vehemens, commotum in agendo, præmunitum, & ex omni parte causæ septum, acre, acutum, enucleatum, in unaquaque re commorans, honestè cedens, acriter insequens, terrens, supplicans, summâ orationis varietate, nullâ nostrarum aurium satietate.

33. Nos autem, quicumque in dicendo sumus (quoniam esse aliquo in numero vobis videmur) certè tamen ab hujus multum genere distamus; quod quale sit, non est meum dicere, propterea quòd minimè quisque sibi notus est, & difficillimè de se quisque sentit: sed tamen dissimilitudo intelligi potest, & ex motûs mei mediocritate, & ex eo, quòd, quibus vestigiis primum institi, in iis ferè soleo perorare; & quòd aliquantò me major in verbis, & in sententiis eligendis, quàm eum, labor & cura torquet, verentem, ne, si paulò obsoletior fuerit oratio, non digna expectatione & silentio fuisset videatur.

34. Quòd si in nobis, qui adsumus, tantæ dissimilitudines, tam certæ res cujus-

que propriæ, & in ea varietate ferè melius a deteriore, facultate magis, quàm genere distinguitur; atque omne laudatur, quod in suo genere perfectum est: quid censetis, si omnes, qui ubique sunt, aut fuerunt oratores, amplecti voluerimus? nonne fore, ut, quot oratores, totidem pene reperiantur genera dicendi? Ex qua mea disputatione forsitan occurrat illud, si pene innumerabiles sint quasi formæ figuræque dicendi, specie dispares, genere laudabiles; non posse ea, quæ inter se discrepant, iisdem præceptis, atque in una institutione formari.

35. Quod non est ita: diligentissimèque hoc est eis, qui instituunt aliquos, atque erudiunt, videndum, quò sua quemque natura maximè ferre videatur. Etenim videmus, ex eodem quasi ludo summorum in suo cuiusque genere artificum & magistrorum exisse discipulos dissimiles inter se, attamen laudandos, quum ad cuiusque naturam institutio doctoris accommodaretur.

36. Cujus est vel maximè insigne illud exemplum (ut ceteras artes omittamus) quod dicebat Isocrates, doctor singularis, *se calcaribus in Ephoro, contrà autem in Theopompo frenis uti solere*. Alterum enim exultantem verborum audaciâ reprimebat, alterum cunctantem, & quasi verecundantem incitabat. Neque eos similes

effecit inter se, sed tantum alteri affinxit, de altero limavit, ut id conformaret in utroque, quod utriusque natura pateretur.

X. Hæc eò mihi prædicenda fuerunt, ut, si non omnia, quæ proponerentur a me, ad omnium vestrum studium, & ad genus id, quod quisque vestrum in dicendo probaret, adhærescerent, id a me genus exprimi sentiretis, quod maximè mihi ipsi probaretur. Ergo hæc & agenda sunt ab oratore, quæ explicavit Antonius, & dicenda quodam modo. Quinam igitur dicendi est modus melior (nam de actione post videro) quàm ut Latine, ut plane, ut ornatè, ut ad id, quodcumque agetur, aptè, congruenterque dicamus.

38. Atque eorum quidem, quæ duo prima dixi, rationem non arbitror expectari a me, puri, dilucidique sermonis. Neque enim conamur docere eum dicere, qui loqui nesciat: nec sperare, qui Latine non possit, hunc ornatè esse dicturum: neque verò, qui non dicat, quod intelligamus, hunc posse, quod admiremur, dicere. Linquamus igitur hæc, quæ cognitionem habent facilem, usum necessarium: nam alterum traditur litteris, doctrinæque puerili; alterum adhibetur ob eam causam, ut intelligatur, quid quisque dicat: quod videmus ita esse necessarium, ut tamen eò minus nihil esse possit.

39. Sed omnis loquendi elegantia, quamquam expolitur scientiâ litterarum, tamen augetur legendis oratoribus & poëtis: sunt enim illi veteres, qui ornare nondum poterant ea, quæ dicebant, omnes propè præclarè locuti; quorum sermone assuefacti qui erunt, ne cupientes quidem poterunt loqui, nisi Latinè. Neque tamen erit utendum verbis iis, quibus jam consuetudo nostra non utitur, nisi quando ornandi causâ, parcè, quod ostendam: sed usitatis ita poterit uti, lectissimis ut utatur, is, qui in veteribus erit scriptis studiosè & multum volutatus.

XI. Atque, ut Latinè loquamur, non solum videndum est, ut & verba effera-
mus ea, quæ nemo jure reprehendat; & ea sic & casibus, & temporibus, & genere, & numero conservemus, ut ne quid perturbatum, ac discrepans, aut præposle-
rum sit; sed etiam lingua, & spiritus, & vocis sonus est ipse moderandus.

41. Nolo exprimi litteras putidiùs, nolo obscurari negligentius: nolo verba exiliter exanimata exire, nolo inflata & quasi anhelata graviùs: nam de voce nondum ea dico, quæ sunt actionis; sed hoc, quod mihi cum sermone quasi conjunctum videtur. Sunt enim certa vitia, quæ nemo est, quin effugere cupiat; mollis vox, ut muliebris, aut quasi extra modum absona atque absurda.

42. Est autem vitium, quod nonnulli de industria conſectantur: ruſtica vox & agreſtis quosdam delectat, quò magis antiquitatem, ſi ita ſonet, eorum ſermo retinere videatur; ut tuus, Catule, ſodalis, L. Cotta, gaudere mihi videtur gravitate linguæ, ſonoque vocis agreſti, & illud quod loquitur, priſcum viſum iri putat, ſi planè fuerit ruſticanum. Me autem tuus ſonus, & ſuavitas iſta delectat; omitto verborum, quamquam eſt caput; verùm id affert ratio, docent litteræ, confirmat conſuetudo & legendi, & loquendi. Sed hanc dico ſuavitatem, quæ exit ex ore: quæ quidem, ut apud Græcos, Atticorum, ſic in Latino ſermone, huius eſt urbis maximè propria.

43. Athenis jam diu doctrina ipſorum Athenienſium interiit, domicilium tantùm in illa urbe remanet ſtudiorum, quibus vacant cives, peregrini fruuntur, capti quodammodo nomine urbis & auctoritate: tamen eruditiffimos homines Asiaticos quivis Athenienſis indoctus, non verbis, ſed ſono vocis, nec tam bene, quàm ſuaviter loquendo, facilè ſuperabit. Noſtri minùs ſtudent litteris, quàm Latini: tamen ex iſtis, quos noſtis, urbanis, in quibus minimùm eſt litterarum, nemo eſt quin litteratiſſimum togatorum omnium, Q. Valerium Soranum, lenitate vocis, atque

ipso oris pressu & sono facile vincat.

XII. Quare quum sit quædam certa vox Romani generis urbisque propria, in qua nihil offendi, nihil displicere, nihil animadverti possit, nihil sonare aut olere peregrinum, hanc sequamur: neque solum rusticam asperitatem, sed etiam peregrinam insolentiam fugere discamus.

45. Equidem quum audio socrum meam Læliam (facilius enim mulieres incorruptam antiquitatem conservant, quodd multorum sermonis expertes ea tenent semper, quæ prima didicerunt) sed eam sic audio, ut Plautum mihi, aut Nævium videar audire: sono ipso vocis ita recto & simplici est, ut nihil ostentationis, aut imitationis afferre videatur: ex quo sic locutum esse ejus patrem judico, sic majores; non asperè, ut ille, quem dixi, non vastè, non rusticè, non hiulcè, sed pressè, & æquabiliter, & leniter. Quare Cotta noster, cujus tu illa lata, Sulpici, nonnumquam imitaris, ut *iota* litteram tollas, & *e* plenissimum dicas, non mihi oratores antiquos, sed mesores videtur imitari.

46. Hic quum arrisisset ipse Sulpicius, Sic agam vobiscum, inquit Crassus, ut, quoniam me loqui voluistis, aliquid de vestris vitiis audiat. Utinam quidem! inquit ille: id enim ipsum volumus, idque si feceris, multa (ut arbitror) hic hodie vitia ponemus.

47. At enim non sine meo periculo; Crassus inquit, possum, Sulpici, te reprehendere, quoniam Antonius mihi te simillimum dixit sibi videri. Tum ille, Tum quod monuit idem, ut ea, quæ in quoque maxima essent, imitaremur; ex quo vereor, ne nihil sim tui, nisi suppletionem pedis imitatus, & pauca quædam verba, & aliquem, si fortè, motum. Ergo ista, inquit Crassus, quæ habes a me, non reprehendo, ne meipsum irrideam: sunt autem ea multò & plura, & majora, quàm dicis. Quæ autem sunt aut tua planè, aut imitatione ex aliquo expressa, de iis te, si quis me fortè locus admonuerit, commonebo.

XIII. Prætereamus igitur præcepta Latine loquendi, quæ puerilis doctrina tradit, & subtilior cognitio ac ratio litterarum alit, aut consuetudo sermonis quotidiani ac domestici; libri confirmant, & lectio veterum oratorum, & poëtarum. Neque verò in illo altero diutius commoremur, ut disputemus, quibus rebus assequi possimus, ut ea, quæ dicamus, intelligentur.

49. Latine scilicet dicendo, verbis usitatis, ac propriè demonstrantibus ea, quæ significari ac declarari volemus, sine ambiguo verbo, aut sermone, non nimis longâ continuatione verborum, non valde

productis iis, quæ similitudinis causâ ex aliis rebus transferuntur, non discerptis sententiis, non præposteris temporibus, non confusis personis, non perturbato ordine. Quid multa? tam facilis est tota res, ut mihi permirum sæpe videatur, quum difficilius intelligatur, quid patronus velit dicere, quàm si ipse ille, qui patronum adhibet, de re sua diceret.

50. Isti enim, qui ad nos causas deferunt, ita nos plerumque ipsi docent, ut non desideres planius dici. Easdem res autem simul ac Fufius, aut vester æqualis Pomponius, agere cœpit, non æquè, quid dicant, nisi admodum attendi, intelligo; ita confusa est oratio, ita perturbata, nihil ut sit primum, nihil ut secundum: tantaque insolentia ac turba verborum, ut oratio, quæ lumen adhibere rebus debet, ea obscuritatem & tenebras afferat, atque ut quodammodo ipsi sibi in dicendo obstrepere videantur. Verum, si placet, quoniam hæc satis spero, vobis quidem certè maioribus, molesta & putida videri, ad reliqua aliquantò odiosiora pergamus.

XIV. Atqui vides, inquit Antonius, quum alias res agamus, quàm te inviti audiamus, qui adduci possumus (de me enim conjicio) relictis ut rebus omnibus te sectemur, te audiamus: ita de horridis rebus nitida, de jejunis plena, de pervulgatis nova quædam est oratio tua.

52. Faciles enim, inquit, Antoni, partes eæ fuerunt duæ, quas modò percurri, vel potiùs pene præterii, Latinè loquendi, planèque dicendi: reliquæ sunt magnæ, implicatæ, variæ, graves, quibus omnis admiratio ingenii, omnis laus eloquentiæ continetur. Nemo enim umquam est oratorem, quòd Latinè loqueretur, admiratus: si est aliter, irrident; neque eum oratorem tantummodo, sed hominem non putant. Nemo extulit eum verbis, qui ita dixisset, ut, qui adestent, intelligerent quid diceret; sed contempsit eum, qui minùs id facere potuisset.

53. In quo igitur homines exhorrescunt? quem stupefacti dicentem intuentur? in quo exclamant? quem deum, ut ita dicam, inter homines putant? qui distinctè, qui explicatè, qui abundanter, qui illuminatè & rebus, & verbis dicunt, & in ipsa oratione quasi quemdam numerum versumque conficiunt; id est, quod dico, ornatè. Qui idem ita moderantur, ut personarum dignitates ferunt, ii sunt in eo genere laudandi laudis, quod ego aptum & congruens nomino.

54. Qui ita dicerent, eos negavit adhuc se vidisse Antonius, & iis hoc nomen dixit eloquentiæ solis esse tribuendum. Quare omnes istos, me auctore, deridete atque contemnite, qui se horum, qui nunc ita appellantur,

appellantur, rhetorum præceptis omnem oratorum vim complexos esse arbitrantur; neque adhuc quam personam teneant, aut quid profiteantur, intelligere potuerunt. Verùm enim oratori, quæ sunt in hominum vita (quandoquidem in ea versatur orator, atque ea est ei subjecta materies) omnia quæsita, audita, lecta, disputata, tractata, agitata esse debent.

55. Est enim eloquentia una quædam de summis virtutibus; quamquam sunt omnes virtutes æquales & pares, sed tamen est species alia magis aliâ formosa & illustris: sicut hæc vis, quæ scientiam complexa rerum, sensa mentis, & consilia, sic verbis explicat, ut eos, qui audiunt, quocumque incubuerit, possit impellere; quæ quò major est vis, hoc est magis probitate jungenda, summâque prudentiâ: quarum virtutum expertibus si dicendi copiam tradiderimus, non eos quidem oratores effecerimus, sed furentibus quædam arma dederimus.

XV. Hanc, inquam, cogitandi pronuntiandique rationem, vimque dicendi, veteres Græci sapientiam nominabant. Hinc illi Lycurgi, hinc Pittaci, hinc Solones; atque ab hac similitudine Coruncanii nostri, Fabricii, Catones, Scipiones fuerunt, non tam fortasse docti, sed impetu mentis simili & voluntate. Eâdem

autem alii prudentiâ, sed consilio ad vitæ studia dispari, quietem atque otium secuti, ut Pythagoras, Democritus, Anaxagoras, a regendis civitatibus totos se ad cognitionem rerum transtulerunt: quæ vita propter tranquillitatem, & propter ipsius scientiæ suavitatem, quâ nihil est hominibus jucundius, plures, quàm utile fuit rebus publicis, delectavit.

57. Itaque, ut ei studio se excellentissimis ingeniis homines dediderunt, ex ea summa facultate vacui ac liberi temporis, multò plura, quàm erat necesse, doctissimi homines, otio nimio, & ingeniis uberrimis affluentes, curanda sibi esse, ac quærenda, & investiganda duxerunt. Nam vetus quidem illa doctrina eadem videtur & rectè faciendi, & bene dicendi magistra; neque disjuncti doctores, sed iidem erant vivendi præceptores, atque dicendi: ut ille apud Homerum Phoenix, qui se a Peleo patre Achilli juveni comitem esse datum dicit ad bellum, ut illum efficeret *oratore verborum, actoremque rerum.*

58. Sed ut homines labore assiduo & quotidiano assueti, quum tempestatis causâ opere prohibentur, ad pilam se, aut ad tesseras conferunt, aut etiam novum sibi ipsi aliquem excogitant in otio ludum: sic illi a negotiis publicis, tamquam ab opere, aut temporibus exclusi, aut voluntate suâ

feriati, totos se alii ad poëtas, alii ad geometras, alii ad musicos contulerunt, alii etiam, ut dialectici, novum sibi ipsi studium ludumque pepererunt, atque in iis artibus, quæ repertæ sunt, ut puero- rum mentes ad humanitatem fingerentur atque virtutem, omne tempus atque ætates suas consumpserunt.

XVI. Sed quòd erant quidam, iique multi, qui aut in republica propter ancipitem, quæ non potest esse sejuncta, faciendi, dicendique sapientiam, florerent, ut Themistocles, ut Pericles, ut Theramenes; aut, qui minùs ipsi in republica versarentur, sed hujus tamen ejusdem sapientiæ doctores essent, ut Gorgias, Thrasymachus, Isocrates: inventi sunt, qui quum ipsi doctrinâ & ingeniis abundarent, a re autem civili, & a negotiis, animi quodam judicio, abhorrerent, hanc dicendi exercitationem exagitarent, atque contemnerent: quorum princeps Socrates fuit, is, qui omnium eruditorum testimonio, totiusque judicio Græciæ, quum prudentiâ, & acumine, & venustate, & subtilitate, tum verò eloquentiâ, varietate, copiâ, quam se cumque in partem dedisset, omnium fuit facilè princeps.

60. Hic iis, qui hæc, quæ nos nunc quærimus, tractarent, agerent, docerent, quum nomine appellarentur uno, quòd

omnis rerum optimarum cognitio, atque in iis exercitatio, *philosophia* nominaretur, hoc commune nomen eripuit, sapienterque sentiendi, & ornatè dicendi scientiam, re cohærentes, disputationibus suis separavit: cujus ingenium, variosque sermones immortalitati scriptis suis Plato tradidit, quum ipse litteram Socrates nullam reliquisset.

61. Hinc discidium illud exstitit quasi linguæ atque cordis, absurdum fanè, & inutile, & reprehendendum, ut alii nos sapere, alii dicere docerent. Nam, quum essent plures orti ferè a Socrate, quòd ex illius variis, & diversis, & in omnem partem diffusis disputationibus alius aliud apprehenderat, profeminatæ sunt quasi familiæ dissentientes inter se, & multum disjunctæ & dispares, quum tamen omnes se philosophi Socraticos & dici vellent, & esse arbitrarentur.

XVII. Ac primò ab ipso Platone Aristoteles & Xenocrates; quorum alter Peripateticorum, alter Academiae nomen obtinuit: deinde ab Antisthene, qui patientiam & duritiam in Socratico sermone maximè adamarat, Cynici primùm, deinde Stoici: tum ab Aristippo, quem illæ magis voluptariæ disputationes delectarant, Cyrenaica philosophia manavit, quam ille, & ejus posterì simpliciter defenderant; ii,

qui nunc voluptate omnia metiuntur, dum verecundiùs id agunt, nec dignitati satisfaciunt, quam non aspernantur, nec voluptatem tuentur, quam amplexari volunt.

63. Fuerunt etiam alia genera philosophorum, ferè qui se omnes Socraticos esse dicebant; Eretricorum, Herilliorum, Megaricorum, Pyrrhoneorum: sed ea horum vi & disputationibus sunt jamdiu fracta & extincta. Ex illis autem, quæ remanent, ea philosophia, quæ suscepit patrociniùm voluptatis, etsi cui vera videatur, procul abest tamen ab eo viro, quem quærimus, & quem auctorem publici consilii & regendæ civitatis ducem, & sententiæ, atque eloquentiæ principem, in senatu, in populo, in causis publicis esse volumus. Nec ulla tamen ei philosophiæ fiet injuria a nobis: non enim repelletur inde, quò aggredi cupiet; sed in hortulis quiescet suis, ubi vult; ubi etiam recubans molliter & delicatè, nos avocat a rostris, a judiciis, a curia, fortasse sapienter, hac præsertim republicâ.

64. Verùm ego non quæro nunc, quæ sit philosophia verissima, sed quæ oratori conjuncta maximè. Quare istos sine ulla contumelia dimittamus: sunt enim & boni viri, &, quoniam sibi ita videntur, beati:

tantumque eos admoneamus, ut illud, etiam si est verissimum, tacitum tamen, tamquam mysterium, teneant, quod negant versari in republica esse sapientis: nam, si hoc nobis, atque optimo cuique persuaserint, non poterunt ipsi esse, id quod maximè cupiunt, otiosi.

XVIII. Stoicos autem, quos minimè improbo, dimitto tamen, nec eos iratos vereor, quoniam omnino irasci nesciunt: atque hanc iis habeo gratiam, quod soli ex omnibus eloquentiam, virtutem, ac sapientiam esse dixerunt: sed utrumque est in his, quod ab hoc, quem instruimus, oratore valde abhorreat, vel quod omnes, qui sapientes non sint, servos, latrones, hostes, insanos esse dicunt; neque tamen quemquam esse sapientem: valde autem est absurdum, ei concionem, aut senatum, aut ullum cœtum hominum committere, cui nemo illorum, qui adsint, sanus, nemo civis, nemo liber esse videatur.

66. Accedit, quod orationis etiam genus habent fortasse subtile, & certè acutum; sed, ut in oratore, exile, inusitatum, abhorrens ab auribus vulgi, obscurum, inane, jejunum, ac tandem ejusmodi, quo uti ad vulgus nullo modo possit. Alia enim & bona, & mala videntur Stoicis, & ceteris civibus, vel potius gentibus: alia vis honoris, ignominiae, præ-

mii, supplicii: verè, an secus, nihil ad hoc tempus: sed ea si sequamur, nullam umquam rem dicendo expedire possimus.

67. Reliqui sunt Peripatetici, & Academici; quamquam Academicorum nomen est unum, sententiæ duæ. Nam Speusippus Platonis sororis filius, & Xenocrates, qui Platonem audierat, & qui Xenocratem, Polemo & Crantor, nihil ab Aristotele, qui unà audierat Platonem, magno pere diffensit: copiâ fortasse & varietate dicendi pares non fuerunt. Arcesilas primum, qui Polemonem audierat, ex variis Platonis libris, sermonibusque Socraticis hoc maximè arripuit, nihil esse certi, quod aut sensibus, aut animo percipi possit: quem ferunt eximio quodam usum lepore dicendi, aspernatum esse omne animi sensûsque iudicium, primumque instituisse (quamquam id fuit Socraticum maximè) non, quid ipse sentiret, ostendere; sed contra id, quod quisque se sentire dixisset, disputare.

68. Hinc hæc recentior Academia emanavit, in qua exstitit divinâ quadam celeritate ingenii dicendique copiâ Carneades: cujus etsi multos auditores cognovi Athenis, tamen auctores certissimos laudare possum, & focerum meum Scævolam, qui eum Romæ audivit adolescens, & Q. Metellum L. filium, familiarem

meum, clarissimum virum, qui illum a se adolescente Athenis, jam affectum senectute, multos dies auditum esse dicebat.

XIX. Hæc autem, ut ex Apennino fluminum, sic ex communi sapientium jugo sunt doctrinarum facta divortia, ut philosophi, tamquam in superum mare Ionium defluerent, Græcum quoddam & portuosum; oratores autem in inferum hoc, Tuscum & barbarum, scopulosum atque infestum, laberentur, in quo etiam ipse Ulysses errasset.

70. Quare si hac eloquentiâ, atque hoc oratore contenti sumus, qui sciat aut negare oportere, quod arguare, aut, si id non possis, tum ostendere, quod is fecerit, qui insimuletur, aut rectè factum, aut alterius culpâ aut injuriâ, aut ex lege, aut non contra legem, aut imprudentiâ, aut necessariò; aut non eo nomine usurpandum, quo arguatur; aut non ita agi, ut debuerit ac licuerit: &, si satis esse putatis, ea, quæ isti scriptores artis docent, discere, quæ multò tamen ornatiùs, quàm ab illis dicuntur, & uberius explicavit Antonius; sed, si his contenti estis, atque iis etiam, quæ dici voluistis a me: ex ingenti quodam oratorem, immensoque campo in exiguum sanè gyrum compellitis.

71. Sin veterem illum Periclem , aut hunc etiam , qui familiarior nobis propter scriptorum multitudinem est , Demosthenem , sequi vultis ; & , si illam præclaram & eximiam speciem oratoris perfecti , & pulchritudinem adamastis ; aut vobis hæc Carneadia , aut illa Aristotelia vis comprehendenda est.

72. Namque , ut antè dixi , veteres illi usque ad Socratem , omnem omnium rerum , quæ ad mores hominum , quæ ad vitam , quæ ad virtutem , quæ ad rempublicam pertinebant , cognitionem & scientiam cum dicendi ratione jungebant : postea dissociati , ut exposui , a Socrate disertis a doctis , & deinceps a Socraticis item omnibus , philosophi eloquentiam despexerunt , oratores sapientiam : neque quidquam ex alterius parte tetigerunt , nisi quod illi ab his , aut ab illis hi mutuarentur ; ex quo promiscuè haurirent , si manere in pristina communione voluissent.

73. Sed , ut pontifices veteres , propter sacrificiorum multitudinem , tres viros epulones esse voluerunt , quum essent ipsi a Numa , ut etiam illud ludorum epulare sacrificium facerent , instituti : sic Socratici a se causarum actores , & a communi philosophiæ nomine separaverunt , quum veteres dicendi & intelligendi mirificam societatem esse voluissent.

XX. Quæ quum ita sint, paululum equidem de me deprecabor, & petam a vobis, ut ea, quæ dicam, non de metipso, sed de oratore dicere putetis. Ego enim sum is, qui, quum summo studio patris in pueritia doctus essem, & in forum ingenii tantum, quantum ipse sentio, non tantum quantum forsitan vobis videar, detulissem, non possim dicere, me hæc, quæ nunc complector, perinde, ut dicam discenda esse, didicisse: quippe qui omnium maturrimè ad publicas causas accesserim, annosque natus unum & viginti nobilissimum hominem & eloquentissimum in iudicium vocarim; cui disciplina fuerit forum; magister, usus & leges, & instituta populi Romani mosque majorum.

75. Paulum sitiens istarum artium, de quibus loquor, gustavi, quæstor in Asia quum essem, æqualem ferè meum ex Academia rhetorem nactus, Metrodorum illum, de cuius memoria commemoravit Antonius; & inde decedens, Athenis; ubi ego diutius essem moratus, nisi Atheniensibus, quòd mysteria non referrent, ad quæ biduo seriùs veneram, succensussem. Quare hoc, quòd complector tantam scientiam vimque doctrinæ, non modò non pro me, sed contra me est potius (non enim, quid ego, sed quid orator possit,

disputo) atque hos omnes, qui artes rhetoricas exponunt, perridiculos. Scribunt enim de litium genere, & de principiis, & de narrationibus.

76. Illa vis autem eloquentiæ tanta est, ut omnium rerum, virtutum, officiorum, omnisque naturæ, quæ mores hominum, quæ animos, quæ vitam continet, originem, vim mutationesque teneat; eadem mores, leges, jura describat, rempublicam regat; omniaque ad quamcumque rem pertineant, ornatè, copiosèque dicat.

77. In quo genere nos quidem versamur tantum, quantum possumus, quantum ingenio, quantum mediocri doctrinâ, quantum usu valemus: neque tamen istis, qui in una philosophia quasi tabernaculum vitæ suæ collocarunt, multum sanè in disputatione concedimus.

XXI. Quid enim meus familiaris C. Velleius afferre potest, quamobrem voluptas sit sumtum bonum, quod ego non copiosius possim vel tutari, si velim, vel refellere ex illis locis, quos exposuit Antonius, hac dicendi exercitatione, in qua Velleius est rudis, unusquisque nostrum versatus? Quid est, quod aut Sext. Pompeius, aut duo Balbi, aut meus amicus, qui cum Panætio vixit, M. Vigellius, de virtute, homines Stoici, possint dicere, qua in disputatione ego his debeam, aut vestrum quisquam concedere? Nvj

79. Non est enim philosophia similis arithmetiarum reliquarum. Nam quid faciat in geometria, qui non didicerit? quid in musicis? aut taceat oportebit, aut ne sanus quidem judicetur. Hæc verò, quæ sunt in philosophia, ingeniis eruuntur ad id, quod in quoque verisimile est, eliciendum, acutis atque acribus, eaque exercitâtâ oratione poliuntur. Hic, hic noster vulgaris orator, si minùs erit doctus, attamen in dicendo exercitatus, hac ipsâ exercitatione communi, istos quidem nostros verberabit, neque se ab iis contemni ac despici sinet.

80. Sin aliquis exstiterit aliquando, qui Aristotelio more de omnibus rebus in utramque partem sententiam possit dicere, & in omni causa duas contrarias orationes, præceptis illius cognitâ, explicare, aut hoc Arcesilæ modo, & Carneadis, contra omne, quod propositum sit, differat; quique ad eam rationem adjungat hunc rhetoricum usum, moremque exercitationemque dicendi; is sit verus, is perfectus, is solus orator. Nam neque sine forensibus nervis satis vehemens & gravis, nec sine varietate doctrinæ satis politus & sapiens esse orator potest.

81. Quare Coracem istum vestrum patiamur nos quidem pullos suos excludere in nido, qui evolent, clamatores odiosi & molesti; Pamphilumque nescio quem

sinamus in infulis tantam rem, tamquam pueriles delicias aliquas depingere: nosque ipsi hac tam exiguâ disputatione hesterni & hodierni diei totum oratoris munus explicemus; dummodo illa res tanta sit, ut omnibus philosophorum libris, quos nemo rhetorum istorum umquam attigit, comprehensa esse videatur.

XXII. Tum Catulus, Haudquaquam hercle, inquit, Crasse, mirandum est, esse in te tantam dicendi vel vim, vel suavitatem, vel copiam; quem quidem antea naturâ rebar ita dicere, ut mihi non solum orator summus, sed etiam sapientissimus homo viderere: nunc intelligo illa te semper etiam potiora duxisse, quæ ad sapientiam spectarent, atque ex his hanc dicendi copiam fluxisse. Sed tamen, quum omnes gradus ætatis recorder tuæ, quumque vitam tuam, ac studia considero; neque, quo tempore ista didiceris, video; nec magnopere te istis studiis, hominibus, libris, intelligo deditum; neque tamen possum statuere, utrùm magis mirer, te illa, quæ mihi persuades maxima esse adjumenta, potuisse in tuis tantis occupationibus perdiscere; an, si non potueris, posse isto modo dicere.

83. Hic Crassus, Hoc tibi, inquit, Catule, primùm persuadeas velim, me non multò secus facere, quum de oratore dis-

putem, ac facerem, si esset mihi de histrione dicendum. Negarem enim posse eum satisfacere in gestu, nisi palæstram, nisi saltare didicisset: neque, ea quum dicerem, me esse histrionem necesse esset, sed fortasse non stultum alieni artificii existimatorem.

84. Similiter nunc de oratore, vestro impulsu, loquor, summo scilicet. Semper enim, quacumque de arte aut facultate quæritur, de absoluta & perfecta quæri solet. Quare si jam me vultis esse oratorem, si etiam sat bonum, si bonum denique, non repugnabo (quid enim nunc sim ineptus? ita me existimari scio) quod si ita est, summus tamen certè non sum: neque enim apud homines res est ulla difficilius, neque major, neque quæ plura adjumenta doctrinæ desideret.

85. Attamen, quoniam de oratore nobis disputandum est, de summo oratore dicam necesse est. Vis enim & natura rei, nisi perfecta ante oculos ponitur, qualis & quanta sit, intelligi non potest. Me autem, Catule, fateor, neque hodie in istis libris, & cum istis hominibus vivere; nec verò, id quod tu rectè commeministi, ullum umquam habuisse sepositum tempus ad discendum, ac tantum tribuisse doctrinæ temporis, quantum mihi puerilis ætas, forenses feriæ concesserint.

XXIII. At, si quæris, Catule, de doctrina ista quid ego sentiam; non tantum ingenioso homini, & ei, qui forum, qui curiam, qui causas, qui rempublicam spectet, opus esse arbitror temporis, quantum sibi ii sumpserunt, quos discennes vita defecit. Omnes enim artes aliter ab iis tractantur, qui eas ad usum transferunt; aliter ab iis, qui ipsarum artium tractatu delectati, nihil in vita sunt aliud acturi. Magister hic Samnitium summâ jam senectute est, & quotidie commentatur: nihil enim curat aliud. At Q. Velocius puer addidicerat: sed quod erat aptus ad illud, totumque cognorat, fuit, ut est apud Lucilium,

quamvis bonus ipse

Samnis in ludo ac rudibus, cuivis satis asper:

sed plus operæ foro tribuebat, amicis, re familiari.

87. Valerius quotidie cantabat: erat enim scenicus, quid faceret aliud? At Numerius Furius, noster familiaris, quum est commodum, cantat: est enim paterfamilias, est eques Romanus: puer didicit, quod discendum fuit. Eadem ratio est harum artium maximarum. Dies & noctes virum summâ virtute & prudentiâ videbamus, Philosopho quum operam daret,

Q. Tuberonem : at ejus avunculum vix intelligeres id agere , quum ageret tamen , Africanum. Ista discuntur facîle , si & tantum fumus , quantum opus sit , & habeas qui docere fideliter possit , & scias etiam ipse discere.

88. Sed si totâ vitâ nihil velis aliud agere , ipsa tractatio & quæstio quotidie ex se gignit aliquid , quod cum desidiosa delectatione vestiges : ita fit , ut agitatione rerum sit infinita cognitio. Facilis usus doctrinam confirmet , mediocris opera tribuatur , memoria studiumque permaneat. Libet autem semper discere , ut si velim ego talis optimè ludere , aut pilæ studio tenear , etiam fortasse si assequi non possim : at alii , quia præclare faciunt , vehementius , quàm causa postulat , delectantur ; ut Titius pilâ , Brulla talis.

89. Quare nihil est , quòd quisquam magnitudinem artium ex eo , quòd senes discunt , pertimescat. Namque aut senes ad eas accesserunt ; aut usque ad senectutem in studiis detinentur ; aut sunt tardissimi. Res quidem se meâ sententiâ sic habet , ut , nisi quod quisque citò potuerit , numquam omnino possit perdiscere.

XXIV. Jam , jam , inquit Catulus , intelligo , Crasse , quid dicas , & hercule assentior : satis video tibi homini ad per-

discendum acerrimo, ad ea cognoscenda, quæ dicis, fuisse temporis. Pergisne, inquit Crassus, me, quæ dicam, de me, non de re putare dicere? Sed jam, si placet, ad instituta redeamus. Mihi verò, Catulus inquit, placet.

91. Tum Crassus, Quorsum igitur hæc spectat, inquit, tam longa, & tam altè repetita oratio? hæ duæ partes, quæ mihi supersunt, illustrandæ orationis, ac totius eloquentiæ cumulandæ, quarum altera dici postulat ornatè, altera aptè, hanc habent vim, ut sit quàm maximè jucunda, quàm maximè in sensus eorum, qui audiunt, influat, & quàm plurimis sit rebus instructa.

92. Instrumentum autem hoc forense, litigiosum, acre, tractum ex vulgi opinionibus, exiguum sanè atque mendicum est: illud rursus ipsum, quod tradunt isti, qui profitentur se dicendi magistros, non multum est majus, quàm illud vulgare ac forense. Apparatu nobis opus est, & rebus exquisitis undique, & collectis, accessitis, comportatis, ut tibi, Cæsar, faciendum est ad annum; ut ego in ædilitate laboravi, quòd quotidianis & vernaculis rebus satisfacere me posse huic populo non putabam.

93. Verborum eligendorum, & collocandorum, & concludendorum facilis est

vel ratio, vel sine ratione, ipsa exercitatio. Rerum est silva magna, quam quum Græci jam non tenerent, ob eamque causam juvenus nostra dedisceret pene discendo, etiam Latini, si diis placet, hoc biennio magistri dicendi exstiterunt: quos ego censor edicto meo sustuleram, non quò (ut nescio quos dicere aiebant) acui ingenia adolescentium nollem, sed contrà irgenia obtundi nolui, corroborari impudentiam.

94. Nam apud Græcos, cuicuiusmodi essent, videbam tamen esse, præter hanc exercitationem linguæ, doctrinam aliquam, & humanitatem dignam scientiâ: hos verò novos magistros nihil intelligebam posse docere, nisi ut auderent; quod etiam cum bonis rebus conjunctum, per seipsum est magnopere fugiendum. Hoc quum unum traderetur, & quum impudentiæ ludus esset; putavi esse censoris, ne longius id serperet, providere.

95. Quamquam non hæc ita statuo atque decerno, ut desperem, Latinè ea, de quibus disputavimus, tradi ac perpoliri: patitur enim & lingua nostra, & natura rerum, veterem illam excellentemque prudentiam Græcorum, ad nostrum usum, moremque transferri: sed hominibus opus est eruditis, qui adhuc in hoc quidem genere nostri nulli fuerunt: sin quando

exstiterint ; etiam Græcis erunt antepo-
nendi.

XXV. Ornatur igitur oratio genere pri-
mum , & quasi colore quodam , & succo
suo. Nam ut gravis , ut suavis , ut erudita
sit , ut liberalis , ut admirabilis , ut polita ,
ut sensus , ut dolores habeat , quantum opus
sit , non est singulorum articulorum : in
toto spectantur hæc corpore. Ut porro
consperfa sit quasi verborum sententiarum-
que floribus , id non debet esse fufum æqua-
biliter per omnem orationem , sed ita dis-
tinctum , ut sint quasi in ornatu disposita
quædam insignia & lumina.

97. Genus igitur dicendi est eligendum ,
quod maximè teneat eos , qui audiant , &
quod non solum delectet , sed etiam sine
satietate delectet. Non enim a me jam ex-
spectari puto , ut moneam , ut caveatis ,
ne exilis , ne inculta sit vestra oratio , ne
vulgaris , ne obsoleta : aliud quiddam ma-
jus , & ingenia me hortantur vestra , &
ætates.

98. Difficile enim dictu est , quænam
causa sit , cur ea , quæ maximè sensus nos-
tros impellunt voluptate , & specie primâ
acerrimè commovent , ab iis celerrimè fas-
tidio quodam & satietate abalienemur.
Quanto colorum pulchritudine & varietate
floridiora sunt in picturis novis pleraque ,
quàm in veteribus ? quæ tamen , etiamsi

primo adspectu nos ceperunt, diutius non delectant; quum iidem nos in antiquis tabulis illo ipso horrido, obsoletoque teneamur. Quantò molliores sunt, & delicatiores in cantu flexiones, & falsæ vocolæ, quàm certæ & severæ? quibus tamen non modò austeri, sed, si sæpius fiunt, multitudo ipsa reclamât.

99. Licet hoc videre in reliquis sensibus: unguentis minùs diu nos delectari, summâ & acerrimâ suavitate conditis, quàm his moderatis; &, magis laudari quod terram, quàm quod crocum olere videatur: in ipso tactu esse modum & molitudinis & lævitatîs. Quin etiam gustatus, qui est sensus ex omnibus maximè voluptarius, quique dulcitudine præter ceteros sensus commovetur, quàm citò id, quod valde dulce est, aspernatur ac respuit? quis potionem uti, aut cibo dulci diutius potest? quum utroque in genere ea, quæ leviter sensum voluptate moveant, facillimè fugiant satietatem.

100. Sic omnibus in rebus, voluptatibus maximis fastidium finitimum est: quò hoc minùs in oratione miremur; in qua vel ex poëtis, vel ex oratoribus possumus judicare, concinnam, distinctam, ornatam, festivam, sine intermissione, sine reprehensione, sine varietate, quamvis claris sit coloribus picta vel poësis vel oratio,

non posse in delectatione esse diuturna. Atque eò citiùs in oratoris, aut in poëtæ cincinnis ac fuco offenditur, quòd sensus in nimia voluptate naturâ, non mente fatiantur; in scriptis & in dictis non aurium solùm, sed animi iudicio etiam magis, infucata vitia noscuntur.

XXVI. Quare, *benè*, & *præclarè*; quamvis nobis sæpe dicatur; *bellè* & *festivè*, nimiùm sæpe nolo. Quamquam illa ipsa exclamatio, *Non potest meliùs*, sit velim crebra: sed habeat tamen illa in dicendo admiratio, ac summa laus umbram aliquam & recessum, quò magis id, quod erit illuminatum, exstare, atque eminere videatur.

102. Numquam agit hunc versum Roscius eo gestu, quo potest,

Nam sapiens virtuti honorem præmium, haud prædam petit:

sed abjicit prorsus, ut in proximos,

Ecquid video? ferro septus possidet sedes sacras?

incidat, adspiciat, admiretur, stupe scat.

Quid ille alter?

Quid petam præsidî?

quàm leniter? quàm remissè? quàm non actuosè? instat enim,

O pater, ô patria, ô Priami domus!

in quo tanta commoveri actio non posset,

si esset consumpta superiore motu, & exhausta. Neque id actores prius viderunt, quàm ipsi poëtæ, quàm denique illi etiam, qui fecerunt modos, a quibus utrisque summittitur aliquid, deinde augeatur, extenuatur, inflatur, variatur, distinguitur.

103. Ita sit nobis igitur ornatus & suavis orator (nec tamen potest aliter esse) ut suavitatem habeat austeram & solidam, non dulcem atque decoctam: nam ipsa ad ornandum præcepta quæ dantur, ejusmodi sunt, ut ea quamvis vitiosissimus orator explicare possit. Quare, ut antè dixi, primum silva rerum, ac sententiarum comparanda est, qua de parte dixit Antonius. Hæc formanda filo ipso & genere orationis, illuminanda verbis, varianda sententiis.

104. Summa autem laus eloquentiæ est, amplificare rem ornando, quod valet non solum ad augendum aliquid & tollendum altiùs, dicendo, sed etiam ad extenuandum atque abjiciendum.

XXVII. Id desideratur omnibus iis in locis, quos ad fidem orationis faciendam adhiberi dixit Antonius, vel quum explanamus aliquid, vel quum conciliamus animos, vel quum concitamus. Sed in hoc, quod postremum dixi, amplificatio potest plurimum, eaque una laus oratoris est, &

propria maximè. Etiam major est illa exercitatio, quam extremo sermone instruxit Antonius (primò rejiciebat) laudandi & vituperandi. Nihil est enim ad exaggerandam & amplificandam orationem accommodatius, quàm utrumque horum cumulatissimè facere posse.

106. Consequentur etiam illi loci, qui quamquam proprii causarum, & inhærentes in earum nervis esse debent, tamen, quia de universa re tractari solent, *communes* a veteribus nominati sunt: quorum partim habent vitiorum & peccatorum acrem quamdam cum amplificatione incusationem, aut querelam, contra quam dici nihil solet, nec potest; ut in depeculatore, in proditore, in parricidam; quibus uti, confirmatis criminibus, oportet; aliter enim jejuni sunt atque inanes.

107. Alii autem habent deprecationem, aut miserationem: alii verò ancipites disputationes, in quibus de universo genere in utramque partem disseri copiosè licet: quæ exercitatio nunc propria duarum philosophiarum, de quibus antè dixi, putatur; apud antiquos erat eorum, a quibus omnis de rebus forensibus dicendi ratio & copia petebatur. De virtute enim, de officio, de æquo & bono, de dignitate, utilitate, honore, ignominia, præmio, pœna, similibusque de rebus, in utramque

partem dicendi animos & vim & artem habere debemus.

108. Sed, quoniam de nostra possessione depulsi, in parvo, & eo litigioso, prædiolo relictī sumus, & aliorum patroni, nostra tenere, tuerique non potuimus; ab iis (quod indignissimum est) qui in nostrum patrimonium irruperunt, quod opus est nobis mutuemur.

XXVIII. Dicunt igitur nunc quidem illi, qui ex particula parva urbis, ac loci, nomen habent, & Peripatetici philosophi, aut Academici nominantur; olim autem, propter eximiam rerum maximarum scientiam, a Græcis politici philosophi appellati, universarum rerum publicarum nomine vocabantur; omnem civilem orationem in horum alterutro genere versari, aut definitâ controversiâ certis temporibus ac reis, hoc modo, Placeatne a Carthaginiensibus captivos nostros, redditis suis, recuperari; aut infinitè de universo genere quærentis, Quid omnino de captivo statuendum ac sentiendum sit. Atque horum superius illud genus, causam, aut controversiam appellant, eamque tribus, lite, aut deliberatione, aut laudatione definiunt: hæc autem altera quæstio infinita, & quasi proposita, consultatio nominatur. Atque hætenus loquuntur.

110. Etiam hac instituendo divisione utuntur,

utuntur, sed ita, non ut jure aut judicio, ut denique recuperare amissam possessionem, sed ut ex jure civili, furculo defringendo, usurpare videantur. Nam illud alterum genus, quod est temporibus, locis, reis definitum, obtinent, atque id ipsum laciniâ. Nunc enim apud Philonem, quem in Academia maximè vigere audio, etiam harum jam causarum cognitio, exercitatioque celebratur. Alterum verò tantummodo in prima arte tradenda nominant, & oratoris esse dicunt: sed neque vim, neque naturam ejus, nec partes, nec genera proponunt; ut præteriri omnino fuerit satius, quàm attentatum deferi: nunc enim inopiâ reticere intelliguntur, tum judicio viderentur.

XXIX. Omnis igitur res eandem habet naturam ambigendi, de qua quæri & disceptari potest, sive in infinitis consultationibus disceptatur, sive in iis causis, quæ in civitate, & in forensi disceptatione versantur; neque est ulla, quæ non aut ad cognoscendi, aut ad agendi vim rationemque referatur.

112. Nam aut ipsa cognitio rei, scientiaque perquiritur, ut, Virtus suamne propter dignitatem, an propter fructus aliquos expetatur: aut agendi consilium exquiritur, ut, Sitne sapienti capeffenda respublica.

113. *Cognitionis autem tres modi, conjectura, definitio, &, ut ita dicam, consecutio. Nam, quid in re sit, conjecturâ quæritur, ut illud, Sitne in humano genere sapientia. Quam autem vim quæque res habeat, definitio explicat, ut, si quæritur, quid sit sapientia. Consecutio autem tractatur, quum, quid quamque rem sequatur, inquiritur, ut illud, Sitne aliquando mentiri boni viri.*

114. *Redeunt rursus ad conjecturam, eamque in quatuor genera dispertiunt. Nam aut quid sit, quæritur, hoc modo; Naturane sit jus inter homines, an opinionibus: aut, quæ sit origo cujusque rei; ut, quod sit initium legum, aut rerum publicarum: aut causa & ratio; ut, si quæritur, cur doctissimi homines de maximis rebus dissentiant: aut de immutatione; ut, si disputetur, num interire virtus in homine, aut num in vitium possit converti.*

115. *Definitionis autem sunt disceptiones, aut, quum quæritur quid in communi mente quasi impressum sit; aut, si disseratur, idne sit jus, quod maximæ parti sit utile: aut, quum quid cujusque sit proprium, exquiritur; ut ornatè dicere, propriumne sit oratoris, an id etiam aliquis præterea possit: aut, quum res distribuitur in partes; ut, si quæritur, quot sint ge-*

nera rerum expetendarum ; aut , sintne tria , corporis , animi , externarumque rerum : aut , quum quæ forma , & quasi naturalis nota cujusque sit , describitur ; ut , si quærat^{ur} avari species , feditiosi , gloriosi.

116. Consecutionis autem duo prima quæstionum genera ponuntur. Nam aut simplex est disceptatio , ut , si differatur , Expetendane sit gloria : aut ex comparatione , Laus , an divitiæ magis expetendæ sint. Simplicium autem sunt tres modi : de expetendis fugiendisve rebus , ut , Expetendine honores sint , num fugienda paupertas : de æquo aut iniquo , Æquumne sit ulcisci injurias etiam propinquorum : de honesto aut turpi , ut hoc , Sitne honestum , gloriæ causâ mortem obire.

117. Comparationis autem duo sunt modi : unus , quum , idemne sit , an aliquid intersit , quæritur : ut *metuere* , & *vereri* : ut *rex* , & *tyrannus* : ut *assentator* , & *amicus* : alter , quum , quid præstet aliud alii , quæritur : ut illud , Optimine cujusque sapientes , an populari laude ducantur. Atque eæ quidem disceptationes , quæ ad cognitionem referuntur , sic ferè a doctissimis hominibus describuntur.

XXX. Quæ verò referuntur ad agendum , aut in officii disceptatione versantur , quo in genere , quid rectum faciendumque

sit, quæritur; cui loco omnis virtutum, & vitiorum est silva subiecta: aut in animorum aliqua permotione aut gignenda, aut sedanda, tollendave tractantur. Huic generi subiectæ sunt cohortationes, consolationes, miserationes, omnisque ad omnem animi motum & impulsio, &, si ita res feret, mitigatio.

119. Explicatis igitur his generibus ac modis disceptationum omnium, nihil sanè ad rem pertinet, si qua in re discrepavit ab Antonii divisione nostra partitio: eadem enim sunt membra in utriusque disputatione, sed paulò secus a me, atque ab illo, partita ac distributa. Nunc ad reliqua progrediar, meque ad meum munus penfumque revocabo. Nam ex illis locis, quos exposuit Antonius, omnia sunt ad quæque genera quæstionum argumenta sumenda: sed aliis generibus alii loci magis erunt apti; de quo non tam quia longum est, quàm quia perspicuum, dici nihil est necesse.

120. Ornatissimæ sunt igitur orationes eæ, quæ latissimè vagantur, & a privata ac singulari controversia se ad universi generis vim explicandam conferunt & convertunt, ut ii, qui audiant, naturâ, & genere, & universâ re cognitâ, de singulis reis, & criminibus, & litibus statuere possint.

121. Hanc ad consuetudinem exercitationis vos, adolescentes, est cohortatus Antonius, atque a minutis angustisque concertationibus ad omnem vim, varietatemque vos differendi traducendos putavit. Quare non est paucorum libellorum hoc munus, ut ii, qui scripserunt de dicendi ratione, arbitrati sunt, neque Tusculani, atque hujus ambulationis antemeridianæ; aut nostræ pomeridianæ sessionis. Non enim solum acuenda nobis, neque procudenda lingua est; sed onerandum, complendumque pectus maximarum rerum & plurimarum suavitate, copiâ, varietate.

XXXI. Nostra est enim (si modò nos oratores sumus, si in civium disceptationibus, si in periculis, si in deliberationibus publicis adhibendi auctores & principes sumus) nostra est, inquam, omnis ista prudentiæ, doctrinæque possessio, in quam homines, quasi caducam atque vacuum, abundantes otio, nobis occupatis, involaverunt; atque etiam aut irridentes oratorem, ut ille in Gorgia Socrates, cavillantur, aut aliquid de oratoris arte paucis præcipiunt libellis, eosque *rhetoricos* inscribunt; quasi non illa sint propria rhetorum, quæ ab iisdem de justitia, de officio, de civitatibus instituendis & regendis, de omni vivendi, denique etiam de naturæ ratione dicuntur.

123. Quæ quoniam jam aliunde non possumus, sumenda sunt nobis ab iis ipsis, a quibus expilati sumus, dummodo illa ad hanc civilem scientiam, quò pertinent, & quam intuentur, transferamus; neque (ut antè dixi) omnem teramus in his discendis rebus ætatem, sed quum fontes viderimus, quos nisi qui celeriter cognorit, numquam cognoscet omnino, tum, quotiescumque opus erit, ex iis tantum, quantum res petet, hauriamus.

124. Nam neque tam est acris acies in naturis hominum & ingeniis, ut res tantas quisquam, nisi monstratas, possit videre; neque tanta tamen in rebus obscuritas, ut eas non penitus acri vir ingenio cernat, si modò adspexerit. In hoc igitur tanto tam immensoque campo, quum liceat oratori vagari liberè, atque, ubicumque constiterit, consistere in suo, facile suppeditat omnis apparatus, ornatusque dicendi.

125. Rerum enim copia verborum copiam gignit: & si est honestas in rebus ipsis, de quibus dicitur, exsistit ex rei natura quidam splendor in verbis. Sit modò is, qui dicet, aut scribet, institutus liberaliter educatione doctrinæque puerili, & flagret studio, & a natura adjuvetur, & in universorum generum infinitis disceptationibus exercitatus; ornatissimos scriptores oratoresque ad cognoscendum imitan-

dumque delegerit ; næ ille haud sanè , quemadmodum verba struat & illuminet , a magistris istis requireret : ita facìle in rerum abundantia ad orationis ornamenta sine duce , naturâ ipsâ , si modò est exercitata , labetur.

XXXII. Hìc Catulus , Dii immortales , inquit , quantam rerum varietatem , quantam vim , quantam copiam , Crasse , complexus es , quantisque ex angustis oratorem educere ausus es , & in majorum suorum regno collocare ! Namque illos veteres doctores , auctoresque dicendi nullum genus disputationis a se alienum putasse accepimus , semperque esse in omni orationis ratione versatos.

127. Ex quibus Eleus Hippias , quum Olympiam venisset , maximâ illâ quinquennali celebritate ludorum , gloriatus est , cunctâ pene audiente Græciâ , nihil esse ulla in arte rerum omnium , quod ipse nesciret : nec solùm has artes , quibus liberales doctrinæ atque ingenuæ continerentur , geometriam , musicam , litterarum cognitionem , & poëtarum , atque illa , quæ de naturis rerum , quæ de hominum moribus , quæ de rebus publicis dicerentur : sed annulum , quem haberet , pallium , quo amictus , soccos , quibus indutus esset , se suâ manu confecisse.

128. Scilicet nimis hic quidem est pro-

gressus ; sed ex eo ipso est conjectura facilis , quantùm sibi illi ipsi oratores de præclarissimis artibus appetierint , qui ne sordidiores quidem repudiarint. Quid de Prodieo Ceo ? quid de Thrasymacho Chalcedonio , de Protagora Abderita loquar ? quorum unusquisque plurimùm temporibus illis , etiam de natura rerum , & differuit & scripsit.

129. Ipse ille Leontinus Gorgias , quo patrono (ut Plato voluit) philosopho fucubuit orator ; qui aut non est victus umquam a Socrate , neque sermo ille Platonis verus est ; aut , si est victus , eloquentior videlicet fuit & disertior Socrates , & , ut tu appellas , copiosior & melior orator : sed hic in illo ipso Platonis libro , de omni re , quæcumque in disceptationem quæstionemque vocaretur , se copiosissimè dicturum esse profitetur ; isque princeps ex omnibus ausus est in conventu poscere , qua de re quisque vellet audire : cui tantus honos habitus est a Græcia , soli ut ex omnibus Delphis non inaurata statua , sed aurea statueretur.

130. Atque ii , quos nominavi , multi-que præterea summi dicendi doctores uno tempore fuerunt : ex quibus intelligi potest , ita se rem habere , ut tu , Crasse , dicis ; oratorisque nomen apud antiquos in Græcia , maiore quadam vel copiâ , vel gloriâ floruisse.

131. Quò quidem magis dubito , tibine plus laudis , an Græcis vituperationis esse tribuendum statuam : quum tu , in alia lingua ac moribus natus , occupatissima in civitate , vel privatorum negotiis pene omnibus , vel orbis terræ procuratione , ac summi imperii gubernatione districtus , tantam vim rerum cognitionemque comprehenderis , eamque omnem cum ejus , qui consilio & oratione in civitate valeat , scientia atque exercitatione fociaris ; illi nati in litteris , ardentisque his studiis , otio verò diffuentes , non modò nihil acquisierint , sed ne relictum quidem , & traditum , & suum conservaverint.

XXXIII. Tum Crassus , Non in hac , inquit , una , Catule , re , sed in aliis etiam compluribus , distributione partium ac separatione ; magnitudines sunt artium diminutæ. An tu existimas , quum esset Hippocrates ille Cous , fuisse tum alios medicos , qui morbis , alios qui vulneribus , alios qui oculis mederentur ? num geometriam Euclide aut Archimede , num musicam Damone aut Aristoxeno , num ipsas litteras Aristophane aut Callimacho tractante , tam discerptas fuisse , ut nemo genus universum complecteretur , atque ut alius aliam sibi partem , in qua elaboraret , seponeret ?

133. Equidem sæpe hoc audiui de patre

& de focero meo, nostros quoque homines, qui excellere sapientiæ gloriâ vellent, omnia, quæ quidem tum hæc civitas nosset, solitos esse complecti. Meminerant illi Sex. Ælium, M'. verò Manilium nos etiam vidimus transverso ambulanti foro; quod erat insigne, eum, qui id faceret, facere civibus omnibus consilii sui copiam: ad quos olim & ita ambulantes, & in solio sedentes domi, sic adibatur, non solum ut de jure civili ad eos, verum etiam de filia collocanda, de fundo emendo, de agro colendo, de omni denique aut officio aut negotio referretur.

134. Hæc fuit P. Crassi illius veteris, hæc T. Coruncanii, hæc proavi generi mei, Scipionis, prudentissimi hominis, sapientia, qui omnes pontifices maximi fuerunt, ut ad eos de omnibus divinis atque humanis rebus referretur: iidemque & in senatu, & apud populum, & in causis amicorum, & domi & militiæ consilium suum fidemque præstabant.

135. Quid enim M. Catoni, præter hanc politissimam doctrinam transmarinam atque adventitiam, defuit? num, quia jus civile didicerat, causas non dicebat? aut quia poterat dicere, juris scientiam negligebat? utroque in genere & laboravit, & præstitit: num propter hanc ex privatorum negotiis collectam

gratiam tardior in republica capeffenda fuit? nemo apud populum fortior, nemo melior fenator; idem facilè optimus imperator: denique nihil in hac civitate temporibus illis fciri discive potuit, quod ille non quum investigarit & fcierit, tum etiam conscripferit.

136. Nunc contrà plerique ad honores adipiscendos, & ad rempublicam gerendam nudi veniunt atque inermes; nullâ cognitione rerum, nullâ scientiâ ornatî. Sin aliquis excellit unus e multis, effert se, si unum aliquid affert, ut bellicam virtutem, aut usum aliquem militarem; quæ sanè nunc quidem obsoleverunt; aut juris scientiam, ne ejus quidem universi; nam pontificium, quod est conjunctum, nemo discit; aut eloquentiam, quam in clamore & in verborum cursu positam putant: omnium verò bonarum artium, denique virtutum ipsarum societatem cognationemque non norunt.

XXXIV. Sed, ut ad Græcos referam orationem (quibus carere in hoc quidem sermonis genere non possumus: nam ut virtutis a nostris, sic doctrinæ sunt ab illis exempla repetenda) septem fuisse dicuntur uno tempore, qui sapientes & haberentur & vocarentur. Hi omnes, præter Milesium Thalen, civitatibus suis præfuerunt. Quis doctior iisdem illis temporibus,

aut cujus eloquentia litteris instructior fuisse traditur, quàm Pisistrati? qui primus Homeri libros, confusos antea, sic disposuisse dicitur, ut nunc habemus. Non fuit ille quidem civibus suis utilis, sed ita eloquentiâ floruit, ut litteris doctrinâque præstaret.

138. Quid Pericles? de cujus dicendi copia sic accepimus, ut, quum contra voluntatem Atheniensium loqueretur pro salute patriæ severiùs, tamen id ipsum, quod ille contra populares homines diceret, popolare omnibus & jucundum videretur: cujus in labris veteres comici, etiam quum illi maledicerent (quod tum Athenis fieri licebat) leporem habitasse dixerunt; tantamque in eo vim fuisse, ut in eorum mentibus, qui audissent, quasi aculeos quosdam relinqueret. At hunc non clamator aliquis ad clepsydram latrare docuerat, sed, ut accepimus, Clazomenius ille Anaxagoras, vir summus in maximarum rerum scientia. Itaque hic doctrinâ, consilio, eloquentiâ excellens, quadraginta annos præfuit Athenis & urbanis eodem tempore, & bellicis rebus.

139. Quid Critias? quid Alcibiades? civitatibus suis quidem non boni, sed certè docti atque eloquentes, nonne Socraticis erant disputationibus eruditi? Quis Dionem Syracusium doctrinis omnibus expo-

livit ? non Plato ? atque eum idem ille non linguæ solùm, verùm etiam animi ac virtutis magister, ad liberandam patriam impulit, instruxit, armavit. Aliisne igitur artibus hunc Dionem instituit Plato ; aliis Isocrates clarissimum virum Timotheum, Cononis, præstantissimi imperatoris, filium, summum ipsum imperatorem, hominemque doctissimum ? aut aliis Pythagoreus ille Lysis Thebanum Epaminondam, haud scio an summum virum unum omnis Græciæ ? aut Xenophon Agesilaum ? aut Philolaum Archytas Tarentinus ? aut ipse Pythagoras totam illam veterem Italiæ Græciam, quæ quondam magna vocitata est ? Equidem non arbitror.

XXXV. Sic enim video, unam quamdam omnium rerum, quæ essent homine erudito dignæ, atque eo, qui in republica vellet excellere, fuisse doctrinam : quam qui accepissent, si iidem ingenio ad pronuntiandum valuissent, & se ad dicendum quoque, non repugnante naturâ, dedissent, eloquentiâ præstitisse.

141. Itaque ipse Aristoteles, quum florere Isocratem nobilitate discipulorum videret, quòd ipse suas disputationes a causis forensibus & civilibus ad inanem sermonis elegantiam transtulisset, mutavit repente totam formam propè disciplinæ suæ, versumque quemdam Philoctetæ paulò

secus dixit. Ille enim *turpe* sibi ait *esse tacere*, *quum barbaros*; hic autem, *quum Iso-
cratem pateretur dicere*. Itaque ornavit &
illustravit doctrinam illam omnem; rerum-
que cognitionem cum orationis exercita-
tione conjunxit. Neque verò hoc fugit sa-
pientissimum regem, Philippum, qui hunc
Alexandro filio doctorem accierit, a quo
eodem ille & agendi acciperet præcepta,
& loquendi.

142. Nunc sive qui volet, eum philo-
sophum, qui copiam nobis rerum, oratio-
nisque tradat, per me appellet oratorem
licet; sive hunc oratorem, quem ego dico
sapientiam junctam habere eloquentiæ,
philosophum appellare malit, non impe-
diam: dummodo hoc constet, neque in-
fantiam ejus, qui rem norit, sed eam ex-
plicare dicendo non queat; neque inscien-
tiam illius, cui res non suppetat, verbâ
non desint, esse laudandam: quorum si
alterum sit optandum, malim equidem in-
disertam prudentiam, quàm stultitiam lo-
quacem.

143. Sin quærimus, quid unum excellat
ex omnibus, docto oratori palma danda
est: quem si patiuntur eundem esse phi-
losophum, sublata controversia est: sin eos
disjurgent; hæc erunt inferiores, quòd in
oratore perfecto inest illorum omnis scien-
tia, in philosophorum autem cognitione

non continuò inest eloquentia, quæ quamvis contemnatur ab eis, necesse est tamen aliquem cumulum illorum artibus afferre videatur. Hæc quum Crassus dixisset, parumper & ipse conticuit, & ceteris silentium fuit.

XXXVI. Tum Cotta, Equidem, inquit, Crasse, non possum queri, quòd mihi videre aliud quiddam, & non id, quod susceperis, disputasse: plus enim aliquantò attulisti, quàm tibi esset tributum a nobis ac denuntiaturum. Sed certè & hæ partes fuerunt tuæ, de illustranda oratione: ut diceres, & eras ipse jam ingressus, atque in quatuor partes omnem orationis laudem descripseras: quumque de duabus primis nobis quidem satis, sed, ut ipse dicebas, celeriter, exiguéque dixisses, duas tibi reliquas feceras; quemadmodum primum ornatè, deinde etiam aptè diceremus.

145. Quò quum ingressus esses, repente te quasi quidam æstus ingenii tui procul a terra abripuit, atque in altum a conspectu pene omnium abstraxit: omnem enim rerum scientiam complexus, non tu quidem eam nobis tradidisti (neque enim fuit tam exigui temporis) sed, apud hos quid profeceris, nescio; me quidem in Academiam totum compulisti: in qua velim sit illud, quod sæpe posuisti, ut non necesse sit con-

sumere ætatem, atque ut possit is illa omnia cernere, qui tantummodo adspexerit: sed, etiam si est aliquantò spissius, aut si ego sum tardior, profectò numquam conquiescam, neque defatigabor antè, quàm illorum ancipites vias rationesque & pro omnibus, & contra omnia disputandi, percepero.

146. Tum Cæsar, Unum, inquit, me ex tuo sermone maximè, Crassè, commovit, quòd eum negasti, qui non citò quid didicisset, umquam omnino posse perdiscere: ut mihi non sit difficile periclitari, & aut statim percipere ista, quæ tu verbis ad cælum extulisti; aut, si non potuerim, tempus non perdere, quum tamen his nostris possim esse contentus.

147. Hic Sulpicius, Ego verò, inquit, Crassè, neque Aristotelem istum, neque Carneadem, nec philosophorum quemquam desidero; vel me licet existimes desperare posse ista perdiscere, vel, id quod facio, contemnere: mihi rerum forensium, & communium vulgaris hæc cognitio satis magna est ad eam, quam specto, eloquentiam; ex qua ipsa tamen permulta nescio: quæ tum denique, quum causa aliqua, quæ a me dicenda est, desiderat, quæro. Quamobrem, nisi fortè es jam defessus, &, si tibi non graves sumus, refer ad illa te, quæ ad ipsius orationis laudem

splendoremque pertinent : quæ ego ex te audire volui , non ut desperarem me eloquentiam consequi posse , sed ut aliquid addiscerem.

XXXVII. Tum Crassus , Pervulgatas res requiris, inquit, & tibi non incognitas, Sulpici : quis enim de isto genere non docuit , non instituit , non etiam scriptum reliquit ? Sed geram morem , & ea duntaxat , quæ mihi nota sunt , breviter exponam tibi : censebo tamen ad eos , qui auctores & inventores sunt harum sanè minutarum rerum , revertendum.

149. Omnis igitur oratio conficitur ex verbis ; quorum primùm nobis ratio simpliciter videnda est , deinde conjunctè : nam est quidam ornatus orationis , qui ex singulis verbis est ; alius , qui ex continuatis , conjunctisque constat. Ergo utemur verbis aut iis , propria quæ sunt , & certa quasi vocabula rerum , pene unà nata cum rebus ipsis ; aut iis , quæ transferuntur , & quasi alieno in loco collocantur ; aut iis quæ novamus , & facimus ipsi.

150. In propriis est igitur verbis illa laus oratoris , ut abjecta atque obsoleta fugiat ; lectis atque illustribus utatur , in quibus plenum quiddam & sonans inesse videatur. Sed in hoc verborum genere priorum delectus est quidam habendus , atque is

aurium quodam judicio ponderandus; in quo consuetudo etiam bene loquendi valet plurimum.

151. Etiam hoc, quod vulgò de oratoribus ab imperitis dici solet, *Bonis is verbis*, aut, *aliquis non bonis utitur*, non arte aliquâ perpenditur, sed quodam quasi naturali sensu judicatur: in quo non magna laus est vitare vitium (quamquam id est magnum) verumtamen hoc quasi solum quoddam atque fundamentum est, verborum usus & copia bonorum. Sed, quid ipse ædificet orator, & in quo adjungat artem, id esse a nobis quærendum atque explicandum videtur.

XXXVIII. Tria sunt igitur in verbo simplici, quæ orator afferat ad illustrandam atque exornandam orationem, aut inusitatum verbum, aut novatum, aut translatum.

153. Inusitata sunt prisca ferè ac vetusta, & ab usu quotidiani sermonis jamdiu intermissa, quæ sunt poëtarum licentiæ liberiora, quàm nostræ: sed tamen rarò habet etiam in oratione poëticum aliquod verbum dignitatem. Neque enim illud suserim dicere, ut Coelius, *Quâ tempestate Pænus in Italiam venit*: nec *prolem*, aut *sobolem*, aut *effari*, aut *nuncupari*: aut, ut tu soles, Catule, *non rebar*, aut *opinabar*: aut alia multa, quibus loco posi-

tis, grandior atque antiquior oratio sæpe videri solet.

154. Novantur autem verba, quæ ab eo, qui dicit, ipso gignuntur, ac fiunt: vel conjungendis verbis, ut hæc,

Tum pavor sapientiam mihi omnem exanimato expectorat.

Num non vis hujus me versutiloquas malitias?

Videtur enim & *versutiloquas*, & *expectorat*, ex conjunctione facta esse verba, non nata. Vel sæpe sine conjunctione verba novantur, ut, *ille senius*; ut, *Dii genitales*; ut, *baccarum ubertate incurvescere*.

155. Tertius ille modus transferendi verbi latè patet, quem necessitas genuit inopiâ coacta, & angustiis; pòst autem delectatio, jucunditasque celebravit: nam ut vestis frigoris depellendi causâ reperta primò, pòst adhiberi cœpta est ad ornatum etiam corporis & dignitatem; sic verbi translatio instituta est inopiæ causâ, frequentata delectationis. Nam *gemmares vites*, *luxuriam esse in herbis*, *lætas segetes*, etiam rustici dicunt. Quod enim declarari vix verbo proprio potest, id translato quum est dictum, illustrat id, quod intelligi volumus, ejus rei, quam alieno verbo posuimus, similitudo.

156. Ergo hæ translationes quasi mu-

tuationes sunt, quum, quod non habeas, aliunde sumas. Illæ paulò audaciores, quæ non inopiam indicant, sed orationi splendoris aliquid arcessunt: quarum ego, quid vobis aut inveniendi rationem, aut genera ponam?

XXXIX. Similitudinis, est ad verbum unum contracta brevitās, quod verbum in alieno loco, tamquam in suo, positum, si agnoscitur, delectat: si simile nihil habet, repudiatur. Sed ea transferri oportet, quæ aut clariorem faciunt rem, ut illa omnia:

Inhorrescit mare,
Tenebræ conduplicantur, noctisque & nimbūm
occæcat nigror,
Flamma inter nubes coruscat, cœlum tonitru con-
tremat,
Grando mixta imbri largifluo subita præcipitans
cadit,
Undique omnes venti erumpunt, sævi existunt
turbines,
Fervit æstu pelagus.

Omnia ferè, quò essent clariora, translatis per similitudinem verbis dicta sunt.

158. Aut quò significetur magis res tota, sive facti alicujus, sive consilii; ut ille, qui occultantem consultò, ne id, quod age-

retur, intelligi posset, duobus translatis verbis similitudine ipsâ indicat :

Quandoquidem iste circumvestit dictis, sepit sedulò.

Nonnumquam etiam brevitâ translatione conficitur, ut illud, *Si telum manu fugit*. Imprudentia teli emissi brevius propriis verbis exponi non potuit, quàm est uno significata translato. Atque hoc in genere persæpe mihi admirandum videtur, quid sit, quòd omnes translatis & alienis magis delectantur verbis, quàm propriis & suis.

XL. Nam si res suum nomen & proprium vocabulum non habet, ut *pes* in navi, ut *nexum*, quod per libram agitur, ut in uxore *divortium*; necessitas cogit, quod non habeas, aliunde sumere : sed in suorum verborum maxima copia, tamen homines aliena multò magis, si sunt ratione translata, delectant.

160. Id accidere credo, vel quòd ingenii specimen est quoddam, transilire ante pedes posita, & alia longè repetita sumere : vel quòd is, qui audit, aliò ducitur cogitatione, neque tamen aberrat; quæ maxima est delectatio : vel quòd singulis verbis res, ac totum simile conficitur : vel quòd omnis translatio, quæ quidem sumpta ratione est, ad sensus ipsos admovetur, maximè oculorum, qui est sensus acerrimus.

161. Nam & odor urbanitatis, & mollitudo humanitatis, & murmur maris, & dulcedo orationis, sunt ducta a ceteris sensibus. Illa verò oculorum multò acriora, quæ ponunt pene in conspectu animi, quæ cernere & videre non possumus. Nihil est enim in rerum natura, cujus nos non in aliis rebus possimus uti vocabulo & nomine. Unde enim simile duci potest (potest autem ex omnibus) indidem verbum unum, quod similitudinem continet, translatum, lumen affert orationi.

162. Quo in genere primùm fugienda est dissimilitudo:

Cœli ingentes fornices.

Quamvis sphæram in scenam (ut dicitur) attulerit Ennius, tamen in sphæra fornicis similitudo non potest inesse.

Vive, Ulysses, dum licet,

Oculis postremum lumen radiatum rape.

Non dixit, *cape*; non, *pete*: haberet enim moram sperantis diutius esse sese victurum; sed *rape*. Hoc verbum est ad id aptatum, quod antè dixerat, *dum licet*.

XLI. Deinde videndum est, ne longè simile sit ductum. *Syrtim patrimonii*, *sco-pulum* libentius dixerim; *Charybdim bonorum*, *voraginem* potius. Facilius enim ad

ea , quæ visa , quàm ad illa , quæ audita sunt , mentis oculi feruntur. Et , quoniam hæc vel summa laus est in verbis transferendis , ut sensum feriat id , quod translatum sit , fugienda est omnis turpitudine earum rerum , ad quas eorum animos , qui audiunt , trahet similitudo.

164. Nolo dici morte *Africani castratam* esse rempublicam. Nolo *stercus curiæ* dici *Glauciam* : quamvis sit simile , tamen est in utroque deformis cogitatio similitudinis. Nolo esse aut majus , quàm res postulet , *tempestas comissionis* : aut minus , *comissatio tempestatis*. Nolo esse verbum angustius id , quod translatum sit , quàm fuisset illud proprium ac suum ;

Quidnam est , obsecro ? quid te adiri abnutas ?

Melius esset , *vetas , prohibes , absterres* : quoniam ille dixerat ,

Illico istic ,

Ne contagio mea bonis , umbrave obsit.

165. Atque etiam , si vereare ne paulò durior translatio esse videatur , mollienda est , præposito sæpe verbo : ut , si olim M. Catone mortuo , *pupillum* senatum quis relictum diceret , paulò durius ; sin , *ut ita dicam , pupillum* , aliquantò mitius. Etenim verecunda debet esse translatio , ut deducta esse in alienum locum , non irruisse ; atque

ut precario, non vi, venisse videatur.

166. Modus autem nullus est florentior in singulis verbis, nec qui plus luminis afferat orationi. Nam illud, quod ex hoc genere profluit, non est in uno verbo translato, sed ex pluribus continuatis connectitur, ut aliud dicatur, aliud intelligendum sit:

Neque me patiar iterum

Ad unum scopulum & telum classem Achivum
offendere.

Atque illud,

Erras, erras: nam exultantem te, & praesidentem tibi

Repriment validae legum habenae, atque imperii
insistent iugo.

Sumptâ re simili, verba ejus rei propria deinceps in rem aliam, ut dixi, transferuntur.

XLII. Est hoc magnum ornamentum orationis, in quo obscuritas fugienda est. Etenim ex hoc genere fiunt ea, quae dicuntur aenigmata. Non est autem in verbo modus hic, sed in oratione, id est, in continuatione verborum. Ne illa quidem transductio atque immutatio in verbo quamdam fabricationem habet, sed in oratione, Africa terribili tremit horrida terra tumultu.

Pro

Pro Afris est sumpta Africa. Neque factum verbum est, ut,

Mare saxifragis undis :

neque translatum, ut, *Mollitur mare* : sed ornandi causâ proprium proprio commutatum,

Desine, Roma, tuos hostes....

&, Testes sunt campi magni....

Gravis est modus in ornatu orationis, & sæpe sumendus : ex quo genere hæc sunt, *Martem belli esse communem* ; *Cererem pro frugibus* ; *Liberum appellare pro vino* ; *Neptunum pro mari* ; *curiam pro senatu* ; *campum pro comitiis* ; *togam pro pace* ; *arma ac tela pro bello*.

168. Quo item in genere & virtutes, & vitia pro ipsis, in quibus illa sunt, appellantur : *Luxuries* quam in domum irruit ; &, Quod *avaritia* penetravit ; aut *Fides* valuit, *Justitia* confecit. Videtis profectò genus hoc totum, quum inflexo commutatoque verbo res eadem enuntiatur ornatius : cui sunt finitima illa minùs ornata, sed tamen non ignoranda, quum intelligi volumus aliquid, aut ex parte totum, ut, pro ædificiis quum *parietes*, aut *testa* dicimus : aut ex toto partem, ut,

Tomus II.

P

quum unam turmam, *equitatum populi Romani* dicimus: aut ex uno plures,

At Romanus homo, tamenetsi res bene gesta est,
Corde suo trepidat:

aut quum ex pluribus intelligitur unum,

Nos sumus Romani, qui fuimus antè Rudini:

aut quocumque modo non ut dictum est,
in eo genere intelligitur, sed ut sensum est.

XLIII. Abutimur sæpe etiam verbo non tam eleganter, quàm in transferendo; sed etiam si licentiùs, tamen interdum non impudenter: ut quum *grandem orationem* pro magna, *minutum animum* pro parvo dicimus. Verùm illa videtisne esse non verbi, sed orationis, quæ ex pluribus, ut exposui, translationibus connexa sunt? Hæc autem, quæ aut immutata esse dixi, aut aliter intelligenda, ac dicerentur, sunt translata quodam modo.

170. Ita fit, ut omnis singulorum verborum virtus atque laus tribus exsistat ex rebus, si aut vetustum verbum sit, quod tamen consuetudo ferre possit: aut factum vel conjunctione, vel novitate, in quo item est auribus consuetudinique parcendum: aut translatum, quod maximè tamquam stellis quibusdam notat, & illuminat orationem.

171. Sequitur continuatio verborum, quæ duas res maximè, collocationem primum, deinde modum quemdam formamque desiderat. Collocationis est componere & struere verba sic, ut neve asper eorum concursus, neve hiulus sit, sed quodam modo coagmentatus & lævis. In quo lepidè foci mei personâ lusit is, qui elegantissimè id facere potuit, Lucilius,

Quàm lepidè lexeis compostæ ! ut tesserulæ omnes
Endo pavimento, atque emblemate vermiculato.

Quæ quum dixisset in Albucium illudens,
ne a me quidem abstinuit,

Crassum habeo generum, ne rhetoricotero' tu sis.

Quid ergo ? iste Crassus, quoniam ejus abuteris nomine, quid efficit ? idem illud scilicet, ut ille voluit, & ego vellem, melius aliquantò, quàm Albucius : verum in me quidem lusit ille, ut solet.

172. Sed est tamen hæc collocatio conservanda verborum, de qua loquor, quæ junctam orationem efficit, quæ cohærentem, quæ lævem, quæ æquabiliter fluentem. Id assequemini, si verba extrema cum consequentibus primis ita jungetis, ut ne asperè concurrant, neve vastius diducantur.

XLIV. Hanc diligentiam subsequitur
P ij

modus etiam & forma verborum, quod jam vereor ne huic Catulo videatur esse puerile. Versus enim veteres illi in hac soluta oratione propemodum, hoc est, numeros quosdam, nobis esse adhibendos putaverunt: interpirationis enim, non defatigationis nostræ, neque librariorum notis, sed verborum & sententiarum modo, interpunctas clausulas in orationibus esse voluerunt; idque princeps Isocrates instituisse fertur, ut inconditam antiquorum dicendi consuetudinem, delectationis, atque aurium causâ (quemadmodum scribit discipulus ejus Naucrates) numeris adstringeret.

174. Namque hæc duo, musici, qui erant quondam iidem poëtæ, machinati ad voluptatem sunt, versum atque cantum; ut & verborum numero, & vocum modo, delectatione vincerent aurium satietatem. Hæc igitur duo, vocis dico moderationem, & verborum conclusionem, quoad orationis severitas pati possit, a poëtica ad eloquentiam traducenda duxerunt.

175. In quo illud est vel maximum, quod versus in oratione si efficitur conjunctione verborum, vitium est; & tamen eam conjunctionem, sicuti versum, numerosè cadere, & quadrare, & perfici volumus: neque est ex multis res una, quæ magis oratorem ab imperito dicendi igua-

roque distinguat, quàm quòd ille rudis inconditè fundit, quantum potest, & id, quod dicit, spiritu, non arte, determinat; orator autem sic illigat sententiam verbis, ut eam numero quodam complectatur, & adstricto, & soluto. Nam quum vinxit modis & formâ, relaxat & liberat immutatione ordinis, ut verba neque alligata sint quasi certâ aliquâ lege versûs, neque ita soluta, ut vagentur.

XLV. Quonam igitur modo tantum munus insitemus, ut arbitremur nos hanc vim numerosè dicendi consequi posse? Non est res tam difficilis, quàm necessaria: nihil est enim tam tenerum, neque tam flexibile, neque quod tam faciliè sequatur, quocumque ducas, quàm oratio.

177. Ex hac versus, ex eadem dispares numeri conficiuntur: ex hac hæc etiam soluta variis modis, multorumque generum oratio. Non enim sunt alia sermonis, alia contentionis verba: neque ex alio genere ad usum quotidianum, alio ad scenam pompamque sumuntur: sed ea nos quum jacentia sustulimus e medio, sicut mollissimam ceram, ad nostrum arbitrium formamus & fingimus. Itaque tum graves sumus, tum subtiles, tum medium quiddam tenemus: sic institutam nostram sententiam sequitur orationis genus; idque ad omnem rationem, & aurium voluptatem,

& animorum motum , mutatur & vertitur.

178. Sed ut in plerisque rebus incredibiliter hoc natura est ipsa fabricata , sic in oratione ; ut ea , quæ maximam utilitatem in se continerent , eadem haberent plurimum vel dignitatis , vel sæpe etiam venustatis. Incolumitatis ac salutis omnium causâ videmus hunc statum esse hujus totius mundi , atque naturæ , rotundum ut cælum , terraque ut media sit , eaque suâ vi nutuque teneatur ; sol ut circumferatur , ut accedat ad brumale signum , & inde sensim adscendat in diversam partem ; ut luna accessu & recessu suo solis lumen accipiat ; ut eadem spatia quinque stellæ dispari motu cursuque conficiant.

179. Hæc tantam habent vim , ut paulum immutata cohærere non possint : tantam pulchritudinem , ut nulla species ne excogitari quidem possit ornatior. Referte nunc animum ad hominum , vel etiam ceterarum animantium formam & figuram : nullam partem corporis sine aliqua necessitate afflictam , totamque formam quasi perfectam reperietis arte , non easu.

XLVI. Quid in arboribus , in quibus non truncus , non rami , non folia sunt denique , nisi ad suam retinendam conservandamque naturam ? nusquam tamen est

ulla pars, nisi venusta. Linquamus naturam, artesque videamus. Quid tam in navigio necessarium, quàm latera, quàm cavernæ, quàm prora, quàm puppis, quàm antennæ, quàm vela, quàm mali? quæ tamen hanc habent in specie venustatem, ut non solum salutis, sed etiam voluptatis causâ, inventa esse videantur. Columnæ, & templa, & porticus sustinent: tamen habent non plus utilitatis, quàm dignitatis. Capitoli fastigium illud, & ceterarum ædium, non venustas, sed necessitas ipsa fabricata est. Nam quum esset habitatio, quemadmodum ex utraque tecti parte aqua delaberetur; utilitatem templi, fastigii dignitas consecuta est: ut, etiam si in cœlo Capitolium statueretur, ubi imber esse non posset, nullam sine fastigio dignitatem habiturum fuisse videatur.

181. Hoc in omnibus item partibus orationis evenit, ut utilitatem ac propè necessitatem suavitas quædam, & lepos consequatur. Clausulas enim, atque interpuncta verborum, animæ interclusio, atque angustia spiritûs attulerunt. Id inventum ita suave, ut, si cui sit infinitus spiritus datus, tamen eum perpetuare verba nolimus: id enim auribus nostris gratum est inventum, quod hominum lateribus non tolerabile solum, sed etiam facile esse posset.

XLVII. Longissima est igitur complexio

P iv

verborum, quæ volvi uno spiritu potest. Sed hic naturæ modus est, artis alius. Nam quum sint numeri plures, iambum, & trochæum frequentem segregat ab oratore Aristoteles, Catule, vester; qui naturâ tamen incurrunt ipsi in orationem, sermoneque nostrum: sed sunt insignes percussiones eorum numerorum, & minuti pedes. Quare primùm ad heroum nos dactyli, & anapæsti, & spondei pedem invitat; in quo impunè progredi licet duo duntaxat pedes, aut paulò plus, ne planè in versum, aut similitudinem versûs incidamus. Aliæ sunt geminæ, quibus hi tres heroi pedes in principia continuandorum verborum satis decorè cadunt.

183. Probatur autem ab eodem illo maximè pæon; qui est duplex. Nam aut a longa oritur, quam tres breves consequuntur, ut hæc verba, *desinite, incipite, comprimite*: aut a brevibus deinceps tribus, extremâ productâ, atque longâ, sicut illa sunt, *domuerant, sonipedes*. Atque illi philosopho ordiri placet a superiore pæone, posteriore finire. Est autem pæon hic posterior non syllabarum numero, sed aurium mensurâ, quod est acrius iudicium & certius, par ferè Cretico, qui est ex longa, & brevi, & longa; ut,

Quid petam præsidî, aut exsequar? quôve nunc?

A quo numero exorsus est Fannius, *Si, Quirites, minas illius*. Hunc ille clausulis aptiorem putat, quas vult longâ plerumque syllabâ terminari.

XLVIII. Neque verò hæc tam acrem curam diligentiamque desiderant, quàm est illa poetarum; quos necessitas cogit, & ipsi numeri ac modi, sic verba versu includere, ut nihil sit, ne spiritu quidem minimo, brevius, aut longius, quàm necesse est. Liberior est oratio, & planè, ut dicitur, sic & est verè soluta; non ut fugiat tamen, aut erret, sed ut sine vinculis sibi ipsa moderetur. Namque ego illud assentior Theophrasto, qui putat orationem, quæ quidem sit polita atque facta quodammodo, non adstrictè, sed remissius numerosam esse oportere.

185. Etenim, sicut ille suspicatur, ex illis modis, quibus hic usitatus versus efficitur, post anapæstus, procerior quidam numerus, effloruit: inde ille licentior & divitior fluxit dithyrambus, cujus membra, & pedes, ut ait idem, sunt in omni locupleti oratione diffusa. Et, si numerosum est id in omnibus sonis atque vocibus, quod habet quasdam impressiones, & quod metiri possumus intervallis æqualibus; rectè genus hoc numerorum, dummodò ne continuum sit, in orationis laude ponetur. Nam si rudis & impolita putanda est illa

sine intervallis loquacitas perennis & profluens, quid est aliud causæ, cur repudietur, nisi quod hominum aures vocem naturâ modulantur ipsâ? quod fieri, nisi inest numerus in voce, non potest.

186. Numerus autem in continuatione nullus est: distinctio, & æqualium, & sæpe variorum intervallorum percussio, numerum conficit; quem in cadentibus guttis, quod intervallis distinguuntur, notare possumus; in amni præcipitante non possumus. Quod si continuatio verborum hæc soluta multò est aprior atque jucundior, si est articulis membrisque distincta, quàm si continuata ac producta; membra illa modificata esse debebunt: quæ si in extremo breviora sunt, infringitur ille quasi verborum ambitus: sic enim has orationis conversiones Græci nominant. Quare aut paria esse debent posteriora superioribus, extrema primis, aut, quod etiam est melius & jucundius, longiora.

XLIX. Atque hæc quidem ab iis philosophis, quos tu maximè diligis, Catule, dicta sunt: quod eò sæpiùs testificor, ut auctoribus laudandis ineptiarum crimen effugiam.

188. Quarum tandem, inquit Catulus? aut quid disputatione istâ afferri potest elegantius, aut omnino dici subtilius? At enim vereor, inquit Crassus, ne hæc aut

difficiliora istis ad persequendum esse videantur, aut, quia non traduntur in vulgari ista disciplina, nos ea majora, ac difficiliora videri velle videamur. Tum Catulus, Erras, inquit, Crasse, si aut me, aut horum quemquam putas a te hæc opera quotidiana, & pervagata expectare: ista, quæ dicis, dici volumus: neque tam dici, quàm isto dici modo: neque tibi hoc pro me solum, sed pro his omnibus sine ulla dubitatione respondeo.

189. Ego verò, inquit Antonius, inveni tandem, quem negaram in eo, quem scripsi, libello, me invenisse, eloquentem: sed eò te ne laudandi quidem causâ interpellavi, ne quid de hoc tam exiguo sermonis tui tempore verbo uno meo diminueretur.

190. Hanc igitur, Crassus inquit, ad legem quum exercitatione, tum stilo, qui & alia, & hoc maximè, ornat ac limat, formanda vobis oratio est. Neque tamen hoc tanti laboris est, quanti videtur: nec sunt hæc rhythmicorum, ac musicorum acerrimâ normâ dirigenda: & efficiendum est illud modò vobis, ne fluat oratio, ne vagetur, ne insistat interiùs, ne excurrat longiùs: ut membris distinguatur, ut conversiones habeat absolutas. Neque semper utendum est perpetuitate, & quasi conversione verborum; sed sæpe carpenda

membris minutioribus oratio est : quæ tamen ipsa membra sunt numeris vincienda.

191. Neque vos pæon , aut herous ille conturbet : ipsi occurrent orationi : ipsi , inquam , se offerent , & respondebunt non vocati : consuetudo modò illa sit scribendi atque dicendi , ut sententiæ verbis finiantur , eorumque verborum junctio nascatur a proceris numeris ac liberis , maximè heroo , & pæone priore , aut Cretico ; sed variè distinctèque considat. Notatur enim maximè similitudo in conquiescendo : & , si primi , & postremi illi pedes sunt hac ratione servati , medii possunt latere , modò ne circuitus ipse verborum sit aut brevior , quàm aures expectent ; aut longior , quàm vires atque anima patiatur.

L. Clausulas autem diligentius etiam servandas esse arbitror , quàm superiora , quòd in his maximè perfectio , atque absolutio judicatur : nam versùs æquè prima , & media , & extrema pars attenditur , qui debilitatur , in quacumque sit parte titubatum ; in oratione autem prima pauci cernunt , postrema plerique : quæ , quoniam apparent & intelliguntur , varianda sunt , ne aut animorum judiciis repudientur , aut aurium satietate.

193. Duo enim , aut tres sunt ferè extremi servandi & notandi pedes (si modò

non breviora & præcisa erunt superiora) quos aut chorios, aut heroes, aut alter-nos esse oportebit, aut in pæone illo poste-riore, quem Aristoteles probat, aut ei pari Cretico. Horum vicissitudines efficient, ut neque ii fatientur, qui audient, fastidio simi-litudinis, nec nos id, quod faciemus, operâ deditâ facere videamur.

194. Quòd si Antipater ille Sidonius, quem tu probè, Catule, meministi, soli-tus est versus hexametros, aliosque variis modis atque numeris fundere ex tempore, tantùmque hominis ingeniosi ac memoris valuit exercitatio, ut, quum se mente ac voluntate conjecisset in versum, verba se-querentur; quantò id facilius in oratione, exercitatione & consuetudine adhibitâ, consequemur?

195. Illud autem ne quis admiretur, quonam modo hæc vulgus imperitorum in audiendo notet: quum in omni genere, tum in hoc ipso magna quædam est vis in-credibilisque naturæ. Omnes enim tacito quodam sensu, sine ulla arte aut ratione, quæ sint in artibus ac rationibus recta ac prava, dijudicant: idque quum faciunt in picturis, & in signis, & in alijs operi-bus, ad quorum intelligentiam a natura mi-nus habent instrumenti; tum multò osten-dunt magis in verborum, numerorum, vo-cumque iudicio; quòd ea sunt in commu-

nibus infixa sensibus, neque earum rerum quemquam funditus natura voluit esse expertem.

196. Itaque non solum verbis arte positis moventur omnes, verum etiam numeris ac vocibus. Quotus enim quisque est, qui teneat artem numerorum ac modorum? At in his si paulum modò offensum est, ut aut contractione brevius fieret, aut productione longius, theatra tota reclamant. Quid? hoc non idem fit in vocibus, ut a multitudine & populo, non modò catervæ atque conventus, sed etiam ipsi sibi singuli discrepantes ejiciantur?

LI. Mirabile est, quum plurimum in faciendo intersit inter doctum & rudem, quàm non multum differat in judicando. Ars enim quum a natura profecta sit, nisi naturam moveat ac delectet, nihil sanè egisse videatur. Nihil est autem tam cognatum mentibus nostris, quàm numeri atque voces; quibus & excitamur, & incendimur, & lenimur, & languescimus, & ad hilaritatem, & ad tristitiam sæpe deducimur: quorum illa summa vis carminibus est aptior, & cantibus, non neglecta, ut mihi videtur, a Numa, rege doctissimo, majoribusque nostris, ut epularum solennium fides ac tibiæ, Saliorumque versus indicant; maximè autem a Græcia veteri celebrata: quibus utinam, similibus-

que de rebus disputari, quàm de puerilibus his verborum translationibus, maluissetis!

198. Verùm, ut in versu vulgus, si est peccatum, videt; sic, si quid in nostra oratione claudicat, sentit: sed poëtæ non ignoscit, nobis concedit: tacitè tamen omnes non esse illud, quod diximus, aptum perfectumque cernunt. Itaque illi veteres, sicut hodie etiam nonnullos videmus, quum circuitum, & quasi orbem verborum conficere non possent (nam id quidem nuper vel posse, vel audere cœpimus) terna, aut bina, aut nonnulli singula etiam verba dicebant: qui in illa infantia naturali illud, quod aures hominum flagitabant, tenebant tamen; ut & illa essent paria, quæ dicerent, & æqualibus interpirationibus uterentur.

LII. Exposui ferè, ut potui, quæ maximè ad ornatum orationis pertinere arbitrabar: dixi enim de singulorum laude verborum; dixi de conjunctione eorum; dixi de numero atque forma. Sed si habitum orationis etiam, & quasi colorem aliquem requiritis, est & plena quædam, sed tamen teres: & tenuis, non sine nervis ac viribus: & ea, quæ particeps utriusque generis quadam mediocritate laudatur. His tribus figuris insidere quidam venustatis, non fucò illitus, sed sanguine diffusus debet color.

200. Tum denique nobis hic orator ita conformandus est & verbis & sententiis, ut, quemadmodum qui utuntur armis aut palæstrâ, non solum sibi vitandi, aut feriendi rationem esse habendam putant, sed etiam, ut cum venustate moveantur: sic verbis quidem ad aptam compositionem & decentiam, sententiis verò ad gravitatem orationis utatur, ut ii, qui in armorum tractatione versantur.

201. Formantur autem & verba & sententiæ pene innumerabiles; quod satis scio notum esse vobis: sed inter conformationem verborum & sententiarum hoc interest, quod verborum tollitur, si verba mutaris; sententiarum permanet, quibuscumque verbis uti velis. Quod quidem vos etsi facitis, tamen admonendos puto, ne quid esse aliud oratoris putetis, quod quidem sit egregium atque mirabile, nisi in singulis verbis illa tria tenere, ut translatis utamur frequenter, interdumque facitis, rarò autem etiam pervetustis: in perpetua autem oratione, quum & conjunctionis lenitatem, & numerorum, quam dixi, rationem tenuerimus, tum est quasi luminibus distinguenda, & frequentanda omnis oratio, sententiarum atque verborum.

LIII. Nam & commoratio unâ in re permultum movet, & illustris explanatio, rerumque, quasi gerantur, sub adspectum

pene subjectio, quæ & in exponenda re plurimum valet, & ad illustrandum id, quod exponitur, & ad amplificandum; ut iis, qui audient illud, quod augebimus, quantum efficere oratio poterit, tantum esse videatur: & huic contraria sæpe præcisio est; & plus ad intelligendum, quam dixeris, significatio; & distinctè concisa brevitās; & extenuatio; & huic adjuncta illusio, a præceptis Cæsaris non abhorrens.

203. Et ab re digressio, in qua quum fuerit delectatio, tum reditus ad rem aptus & concinnus esse debet; propositioque quid sis dicturus; & ab eo, quod est dictum, sejunctio; & reditus ad propositum, & iteratio; & rationis apta conclusio; tum augendi, minuendive causâ, veritatis superlatio, atque trajectio; & rogatio, atque huic finitima quasi percunctatio; expositioque sententiæ suæ; tum illa, quæ maximè quasi irrepit in hominum mentes, alia dicentis ac significantis dissimulatio, quæ est perjucunda, quum in oratione, non contentione, sed sermone tractatur.

204. Deinde dubitatio, tum distributio, tum correctio vel antè, vel postquam dixeris, vel quum aliquid a te ipso rejicias: præmunitio est etiam ad id, quod aggrediare, & trajectio in alium; communicatio, quæ est quasi cum iis ipsis, apud quos dicas, deliberatio; morum ac vitæ imita-

tio, vel in personis, vel sine illis, magnum quoddam ornamentum orationis, & aptum ad animos conciliandos vel maximè, sæpe autem etiam ad commovendos.

205. Personarum ficta inductio, vel gravissimum lumen augendi; descriptio, erroris inductio, ad hilaritatem impulsio, antè occupatio; tum duo illa, quæ in maximè movent, similitudo, & exemplum; digestio, interpellatio, contentio, reticentia, commendatio; vox quædam libera, atque etiam effrenatio, augendi causâ; iracundia, objurgatio, promissio, deprecatio, obsecratio; declinatio brevis a proposito, non ut superior illa digressio; purgatio, conciliatio, læsio, optatio, atque execratio. His ferè luminibus illustrant orationem sententiæ.

LIV. Orationis autem ipsius, tamquam armorum, est vel ad usum comminatio, & quasi petitio, vel ad venustatem ipsa tractatio. Nam & geminatio verborum habet interdum vim, leporem aliàs; & paulum immutatum verbum, atque deflexum; & ejusdem verbi crebra tum a primo repetitio, tum in extremum conversio, & in eadem verba impetus, & concursio, & adjunctio, & progressio; & ejusdem verbi crebrius positi quædam distinctio, & revocatio verbi; & illa, quæ similiter desinunt, aut quæ cadunt similiter, aut quæ

paribus paria referuntur, aut quæ sunt inter se similia.

207. Est etiam gradatio quædam, & conversio, & verborum concinna transgressio, & contrarium, & dissolutum, & declinatio, & reprehensio, & exclamatio, & imminutio, & quod in multis casibus ponitur, & quod de singulis rebus propositis ductum refertur ad singula, & ad propositum subjecta ratio, & item in distributis supposita ratio, & permissio, & rursum alia dubitatio, & improvisum quiddam, & dinumeratio, & alia correctio, & dissipatio, & quod continuatum, & interruptum, & imago, & sibi ipsi responsio, & immutatio, & disjunctio, & ordo, & relatio, & digressio, & circumscriptio. Hæc enim sunt ferè, atque horum similia, vel plura etiam esse possunt, quæ sententiis orationem, verborumque conformationibus illuminent.

LV. Quæ quidem te, Crasse, video, inquit Cotta, quod nota esse nobis putes, sine definitionibus, & sine exemplis effudisse. Ego verò, inquit Crassus, ne illa quidem, quæ suprà dixi, nova vobis esse arbitrabar, sed voluntati vestrùm omnium parui.

209. His autem de rebus sol me ille admonuit, ut brevior essem, qui ipse jam præcipitans, me quoque hæc præcipitem

pene evolvere coëgit. Sed tamen hujus generis demonstratio est, & doctrina ipsa, vulgaris; usus autem, gravissimus, & in hoc toto dicendi studio difficillimus.

210. Quamobrem, quoniam de ornatu omni orationis, si non sunt omnes patefacti, at certè commonstrati loci; nunc, quid aptum sit, hoc est, quid maximè deceat in oratione, videamus. Quamquam id quidem perspicuum est, non omni causæ, nec auditori, neque personæ, neque tempori congruere orationis unum genus.

211. Nam & causæ capitis alium quemdam verborum sonum requirunt, alium rerum privatarum atque parvarum: & aliud dicendi genus deliberationes, aliud laudationes, aliud judicia, aliud sermones, aliud consolatio, aliud objurgatio, aliud disputatio, aliud historia desiderat. Refert etiam, qui audiant, senatus, an populus, an judices: frequentes, an pauci, an singuli: & quales ipsi quoque oratores, quâ sint ætate, honore, auctoritate, debet videri: tempus pacis, an belli: festinationis, an otii.

212. Itaque hoc loco nihil sanè est, quod præcipi posse videatur, nisi ut figuram orationis plenioris, & tenuioris, & item illius mediocris, ad id, quod agimus, accommodatam deligamus. Ornamentis iisdem

uti ferè licebit, aliàs contentiùs, aliàs summissiùs: omnique in re posse, quod deceat, facere, artis & naturæ est; scire, quid, quandoque deceat, prudentiæ.

LVI. Sed hæc ipsa omnia perinde sunt, ut aguntur. Actio, inquam, in dicendo una dominatur: sine hac summus orator esse in numero nullo potest; mediocris, hac instructus; summos sæpe superare. Huic primas dedisse Demosthenes dicitur, quum rogaretur, quid in dicendo esset primum; huic secundas, huic tertias. Quò mihi meliùs etiam illud ab Æschine dictum videri solet, qui quum propter ignominiam judicii cessisset Athenis, & se Rhodum contulisset, rogatus a Rhodiis, legisse fertur orationem illam egregiam, quam in Ctesiphontem contra Demosthenem dixerat: quâ perlectâ, petatum est ab eo postridie, ut legeret illam etiam, quæ erat contrà a Demosthene pro Ctesiphonte edita: quam quum suavissimâ & maximâ voce legisset, admirantibus omnibus, Quantò, inquit, magis admiraremini, si audissetis ipsum! Ex quo satis significavit, quantum esset in actione, qui orationem eandem, aliam fore putaret, actore mutato.

214. Quid fuit in Graccho, quem tu, Catule, meliùs meministi, quod me puero tantopere ferretur? Quò me miser conse-

ram ? quòd vertam ? in Capitoliumne ? at fratris sanguine redundat. An domum ? matremne ut miseram , lamentantemque videam , & abjectam ? Quæ sic ab illo acta esse constabat , oculis , voce , gestu , inimici ut lacrymas tenere non possent. Hæc edico pluribus , quòd genus hoc totum oratores , qui sunt veritatis ipsius actores , reliquerunt ; imitatores autem veritatis histiones occupaverunt.

LVII. Ac sine dubio in omni re vincit imitationem veritas : sed , ea si satis in actione efficeret ipsa per sese , arte profectò non egeremus : verùm quia animi permotio , quæ maximè aut declaranda aut imitanda est actione , perturbata sæpe ita est , ut obscuretur , ac pene obruatur , discutienda sunt ea , quæ obscurant , & ea , quæ sunt eminentia & prompta , sumenda.

216. Omnis enim motus animi suum quemdam a natura habet vultum , & sonum , & gestum : totumque corpus hominis , & ejus omnis vultus , omnesque voces , ut nervi in fidibus , ita sonant , ut a motu animi quoque sunt pulsæ. Nam voces , ut chordæ sunt intentæ , quæ ad quemque tactum respondeant , acuta , gravis ; cita , tarda ; magna , parva : quas tamen inter omnes est suo quæque in genere mediocris. Atque etiam illa sunt ab his de-

lapſa plura genera, lene, aſperum; contractum, diſſuſum; continenti ſpiritu, intermiſſo; fractum, ſciſſum; flexo ſono attenuatum, inflatum. Nullum eſt enim horum ſimilium generum, quod non arte ac moderatione tractetur. Hi ſunt aſtori, ut pictori, expoſiti ad variandum colores.

LVIII. Aliud enim vocis genus iracundia ſibi ſumat: acutum; incitatum, crebro incidens;

Impius hortatur me frater, ut meos malis miſer
Manderem natos:

& ea, quæ tu dudum, Antoni, protuliſti,
Segregare abs te auſus? &
Ecquis hoc animadvertit? Vincite....

& Atreus ferè totus. Aliud miſeratio, ac
mœror; flexibile, plenum, interruptum,
flebili voce;

Quò nunc me vertam? quod iter incipiam ingredi?
Domum paternamne? ane ad Pelix filias?

& illa,
O pater, ô patria, ô Priami domus!

& quæ ſequuntur,
Hæc omnia vidi inflammari,
Priamo vi vitam evitari.

218. Aliud metus; demiffum, & hæſi-
tans, & abjectum;

Multi' modis sum circumventus , morbo , exsilio ,
atque inopiâ :

Tum pavor sapientiam mihi omnem exanimato ex-
peſtorat :

Alter terribilem minitatur vitæ cruciatum & necem :
Quæ nemo eſt tam firmo ingenio , & tantâ confi-
dentiâ ,

Quin refugiat timido ſanguen , atque exalbescat
metu.

Aliud vis ; contentum , vehemens , immi-
nens quadam incitatione gravitatis ;

Iterum Thyestes Atreum attractum advenit :

Iterum jam aggreditur me , & quietum exſuſcitât.
Major mihi moles , majus miſcendum'eſt malum ,
Quî illius acerbum cor contundam & comprimam.

* 219. Aliud voluptas ; effuſum , lene ,
tenerum , hilaratum , ac remiſſum ;

Sed mihi quum tetulit coronam ob collocandas
nuptias ,

Tibi ferebat : quum ſimulabat ſeſe alteri dare ,
Tum ad te ludibunda doctè , & delicatè detulit.

Aliud moleſtia ; ſine commiſeratione gra-
ve quiddam , & uno preſſu ac ſono ob-
ductum ;

Quâ tempeſtate Paris Helenam innuptis junxit
nuptiis ,

Ego

Ego tum gravida , expletis jam ferè ad pariendum mensibus :

Per idem tempus Polydorum Hecuba partu postremo parit.

LIX. Omnes autem hos motus subsequi debet gestus , non hic verba exprimens scenicus , sed universam rem & sententiam , non demonstratione , sed significatione declarans , laterum inflexione hac forti ac virili , non ab scena & histrionibus , sed ab armis , aut etiam a palæstra. Manus autem minùs arguta , digitis subsequens verba , non exprimens : brachium proceriùs projectum , quasi quoddam telum orationis : suppositio pedis in contentionibus aut incipiendis , aut finiendis.

221. Sed in ore sunt omnia : in eo autem ipso dominatus est omnis oculorum : quò meliùs nostri illi senes , qui personatum ne Roscium quidem magnopere laudabant. Animi est enim omnis actio , & imago animi vultus est , indices oculi. Nam hæc est una pars corporis , quæ , quot animi motus sunt , tot significationes & commutationes possit efficere : neque verò est quisquam , qui , eadem contuens , efficiat. Theophrastus quidem Tauriscum quemdam dixit actorem aversum solitum esse dicere , qui in agendo , contuens aliquid , pronuntiaret.

Tomus II.

Q

222. Quare oculorum est magna moderatio : nam oris non est nimium mutanda species , ne aut ad ineptias , aut ad pravitatem aliquam deferamur. Oculi sunt, quorum tum intentione , tum remissione , tum conjectu , tum hilaritate , motus animorum significemus aptè cum genere ipso orationis. Est enim actio quasi sermo corporis : quò magis menti congruens esse debet. Oculos autem natura nobis , ut equo & leoni setas , caudam , aures , ad motus animorum declarandos dedit.

223. Quare in hac nostra actione secundum vocem vultus valet : is autem oculis gubernatur. Atque in iis omnibus , quæ sunt actionis , inest quædam vis a natura data : quare etiam hac imperiti , hac vulgus , hac denique barbari maximè commoventur. Verba enim neminem movent , nisi eum , qui ejusdem linguæ societate conjunctus est ; sententiæque sæpe acutæ , non acutorum hominum sensus prætervolant. Actio , quæ præ se motum animi fert , omnes movet : iisdem enim omnium animi motibus concitantur , & eos iisdem notis & in aliis agnoscunt , & in se ipsi indicant.

LX. Ad actionis autem usum atque laudem , maximam sine dubio partem vox obtinet : quæ primum est optanda nobis ;

deinde, quæcumque erit, ea tuenda: de quo illud jam nihil ad hoc præcipiendi genus, quemadmodum voci serviatur; equidem magnopere censeo serviendum. Sed illud videtur ab hujus nostri sermonis officio non abhorrire, quòd, ut dixi paulò antè, plurimis in rebus quod maximè est utile, id nescio quo pacto etiam decet maximè. Nam ad vocem in dicendo obtinendam nihil est utilius, quàm crebra mutatio: nihil perniciosius, quàm effusa sine intermissione contentio.

225. Quid? ad aures nostras & actionis suavitatem, quid est vicissitudine, & varietate, & commutatione aptius? Itaque idem Gracchus (quod potes audire, Catule, ex Licino, cliente tuo, litterato homine, quem servum sibi ille habuit ad manum) cum eburneola solitus est habere fistula, qui staret occultè post ipsum, quum concionaretur, peritum hominem, qui inflaret celeriter eum sonum, quo illum aut remissum excitaret, aut a contentione revocaret. Audivi mehercule, inquit Catulus, & sæpe sum admiratus hominis quum diligentiam, tum etiam doctrinam & scientiam.

226. Ego verò, inquit Crassus, ac doleo quidem illos viros in eam fraudem in republica esse delapsos: quamquam ea tela textitur, & ea incitatur in civitate ratio vi-

vendi, ac posteritati ostenditur, ut eorum civium, quos nostri patres non tulerunt, jam similes habere cupiamus. Mitte, obsecro, inquit, Crasse, Julius, sermonem istum, & te ad Gracchi fistulam refer; cujus ego nondum planè rationem intelligo.

LXI. In omni voce, inquit Crassus, est quiddam medium, sed suum cuique voci: hinc gradatim adscendere vocem utile & suave est: nam a principio clamare, agreste quiddam est: & illud idem ad firmandam est vocem salutare. Deinde est quiddam contentionis extremum, quod tamen interius est, quàm acutissimus clamor, quò te fistula progredi non sinet; & tamen ab ipsa contentione revocabit. Est item contrà quiddam in remissione gravissimum, quòque tamquam sonorum gradibus descenditur. Hæc varietas, & hic per omnes sonos vocis cursus, & se tuebitur, & actioni afferet suavitatem. Sed fistulatorem domi relinquetis; sensum hujus consuetudinis vobiscum ad forum deferetis.

228. Edidi quæ potui, non ut volui, sed ut me temporis angustiae coëgerunt. Scitum est enim, causam conferre in tempus, quum afferre plura, si cupias, non queas. Tu verò, inquit Catulus, collegisti omnia, quantum ego possum judicare, ita divinitus, ut non a Græcis didi-

cisse, sed eos ipsos hæc docere posse videre. Me quidem istius sermonis participem factum esse gaudeo; ac vellem, ut meus gener, sodalis tuus, Hortensius affuisset: quem quidem ego confido omnibus istis laudibus, quas tu oratione complexus es, excellentem fore.

229. Et Crassus, Forè dicis? inquit: ego verò esse jam judico, & tum judicavi, quum, me consule, in senatu causam defendit Africæ; nuperque etiam magis, quum pro Bithyniæ rege dixit. Quamobrem rectè vides, Catule: nihil enim isti adolescenti, neque a natura, neque a doctrina deesse sentio.

230. Quò magis est tibi, Cotta, & tibi, Sulpici, vigilandum ac laborandum. Non enim ille mediocris orator vestræ quasi succrescit ætati; sed & ingenio peracri, & studio flagranti, & doctrinâ eximiâ, & memoriâ singulari: cui quamquam faveo, tamen illum ætati suæ præstare cupio; vobis verò illum tantò minorem præcurrere vix honestum est. Sed jam surgamus, inquit, nosque curemus, & aliquando ab hac contentione disputationis animos nostros, curamque laxemus.



M. T. CICERONIS

DE

CLARIS ORATORIBUS.

PERFECTI Oratoris, quam effingit in Libris de Oratore speciem, eam omnes omnium ætatum Oratores percensendo, si quâ possit invenire, quærit in hoc de Claris Romanis Oratoribus Libro. Post præfationem, quæ de Hortensii morte conqueritur, & hujus sermonis occasionem demonstrat, qui hoc libro refertur, initium fit disse-
rendi a Græcis; atque a Solone inde qui in dicendo valuerunt, breviter commemorantur. Deinde producuntur habitâ temporum ratione Romani a L. Bruto usque ad Ciceronem, atque id magna cum venustate, multis quum

jocis, tum etiam digressionibus admixtis jucundis, ut sunt de Urbanitatis sono 171. de populo rectè de Oratore judicante 183. de Attico dicendi genere 284. ERNESTUS.

Librum de Claris Oratoribus anno urbis 707. Ciceronis 61. vivo adhuc Catone, scriptum esse affirmat Corradus, quamvis proœmium anno sequenti additum fuerit.





BRUTUS,

SIVE

DE CLARIS ORATORIBUS.

QUUM e Cilicia decedens Rhodum venissem, & ed mihi de Q. Hortensii morte esset allatum, opinione omnium maiorem animo cepi dolorem: nam & amico amisso, quum consuetudine jucundâ, tum multorum officiorum conjunctione me privatum videbam, & interitu talis auguris dignitatem nostri collegii deminutam dolebam: qua in cogitatione, & cooptatum me ab eo in collegium recordabar, in quo juratus iudicium dignitatis meae fecerat, & inauguratum ab eodem; ex quo, augurum institutis, in parentis eum loco colere debebam.

2. Augebat etiam molestiam, quod magnâ sapientium civium, bonorumque penuriâ, vir egregius, conjunctissimusque

mecum consiliorum omnium societate , alienissimo reipublicæ tempore exstinctus , & auctoritatis , & prudentiæ suæ triste nobis desiderium reliquerat ; dolebamque , quòd non , ut plerique putabant , adversarium , aut obtrectatorem laudum mearum , sed socium potius , & consortem gloriosi laboris amiseram.

3. Etenim , si in leviorum artium studio memoriæ proditum est , poëtas nobiles poëtarum æqualium morte doluisse ; quo tandem animo ejus interitum ferre debui , cum quo certare erat gloriosius , quàm omnino adversarium non habere ? quum præsertim non modò numquam sit aut illius a me cursus impeditus , aut ab illo meus , sed contrà semper alter ab altero adjutus & communicando , & monendo , & favendo.

4. Sed , quoniam perpetuâ quadam felicitate usus ille , cessit e vita , suo magis , quàm suorum civium tempore ; & tum occidit , quum lugere facilius rempublicam posset , si viveret , quàm juvare ; vixitque tamdiu , quàm licuit in civitate bene beatèque vivere ; nostro incommodo , detrimentoque , si est ita necesse , doleamus : illius verò mortis opportunitatem benevolentia potius quàm misericordia prosequamur , ut , quotiescumque de clarissimo & beatissimo viro cogitemus , illum

potius , quàm nosmetipsos , diligere videamur.

5. Nam , si id dolemus , quòd eo jam frui nobis non licet ; nostrum est id malum ; quod modicè feramus , ne id non ad amicitiam , sed ad domesticam utilitatem referre videamur : sin , tamquam illi ipsi acerbitatis aliquid acciderit , angimur ; summam ejus felicitatem non satis grato animo interpretamur.

II. Etenim si viveret Q. Hortensius , cetera fortasse desideraret unà cum reliquis bonis & fortibus civibus ; hunc autem & præter ceteros , aut cum paucis sustineret dolorem , quum forum populi Romani , quod fuisset quasi theatrum illius ingenii , voce eruditâ , & Romanis , Græcisque auribus dignâ , spoliatum atque orbatum videret.

7. Equidem angor animo , non consilii , non ingenii , non auctoritatis armis egere rempublicam , quæ didiceram tractare , quibusque me assuefeceram , quæque erant propria quum præstantis in republica viri , tum bene moratæ & bene constitutæ civitatis. Quòd si fuit in republica tempus ullum , quum extorquere arma posset e manibus iratorum civium , boni civis auctoritas & oratio ; tum profectò fuit , quum patrociniū pacis exclusum est aut errore hominum , aut timore.

8. Ita nobismetipsis accidit, ut, quamquam essent multò magis alia lugenda, tamen hoc doleremus, quòd, quo tempore ætas nostra perfuncta rebus amplissimis, tamquam in portum confugere deberet, non inertiae, neque desidia, sed otii moderati atque honesti; quumque ipsa oratio jam nostra canesceret, haberetque suam quamdam maturitatem, & quasi senectutem; tum arma sunt ea sumpta, quibus illi ipsi, qui didicerant eis uti gloriose, quemadmodum salutariter uterentur, non reperiabant.

9. Itaque si mihi videntur fortunatè beatèque vixisse, quum in ceteris civitatibus, tum maximè in nostra, quibus quum auctoritate, rerumque gestarum gloriâ, tum etiam sapientiæ laude perfrui licuit: quorum memoria & recordatio in maximis nostris gravissimisque curis jucunda sanè fuit, quum in eam nuper ex sermone quodam incidissemus.

III. Nam quum inambularem in xyſto, & essem otiosus domi, M. ac me Brutus, ut consueverat, cum T. Pomponio venerat, homines quum inter se conjuncti, tum mihi ita cari, itaque conjuncti, ut eorum adspectu omnis, quæ me angebat de republica, cura confederit. Quos postquam salutavi, Quid vos, inquam, Brute & Attice, nunc? quid tandem novi?

Q vj

Nihil fanè, inquit Brutus, quod quidem aut tu audire velis, aut ego pro certo dicere audeam.

11. Tum Atticus, Eo, inquit, ad te animo venimus, ut de republica esset silentium, & aliquid audiremus potius ex te, quàm te afficeremus ullâ molestiâ. Vos verò, inquam, Attice, & præsentem me curâ levatis, & absenti magna solatia dedistis: nam vestris primùm litteris recreatus, me ad pristina studia revocavi. Tum ille, Legi, inquit, perlubenter epistolam, quam ad te Brutus misit ex Asia, quâ mihi visus est & monere te prudenter & consolari amicissimè.

12. Rectè, inquam, est visus: nam me istis scito litteris, ex diuturna perturbatione totius valetudinis tamquam ad adspiciendam lucem esse revocatum. Atque ut post Cannensem illam calamitatem primùm Marcelli ad Nolam prælio, populus se Romanus erexit, posteaque prosperæ res deinceps multæ consecutæ sunt; sic post rerum nostrarum & communium gravissimos casus, nihil ante epistolam Bruti mihi accidit, quod vellem, aut quod aliqua ex parte sollicitudines allevaret meas.

13. Tum Brutus, Volui id quidem efficere certè, & capio magnum fructum, si quidem, quod volui, tanta in re consecutus sum. Sed scire cupio, quæ te Attici

litteræ delectaverint. Istæ verò, inquam, Brute, non modò delectationem mihi, sed etiam, ut spero, salutem attulerunt. Salutem? inquit ille: quodnam tandem genus istuc tam præclarum litterarum fuit? An mihi potuit, inquam, esse aut gratior ulla salutatio, aut ad hoc tempus aptior, quàm illius libri, quo me hic affatus, quasi jacentem excitavit?

14. Tum ille, Nempe eum dicis, inquit, quo iste omnem rerum memoriam breviter, &, ut mihi quidem visum est, perdiligenter complexus est? Istum ipsum, inquam, Brute, dico librum mihi saluti fuisse.

IV. Tum Atticus, Optatissimum mihi quidem est quod dicis: sed quid tandem habuit liber iste, quod tibi aut novum, aut tanto usui posset esse? Ille verò & nova, inquam, mihi quidem multa, & eam utilitatem, quam requirebam, ut, explicatis ordinibus temporum, uno in conspectu omnia viderem; quæ quum studiosè tractare cœpissem, ipsa mihi tractatio litterarum salutaris fuit, admonuitque, Pomponi, ut a te ipso fumerem aliquid ad me reficiendum, teque remunerandum, si non pari, at grato tamen munere: quamquam illud Hesiodium laudatur a doctis, quod eâdem mensurâ reddere jubet, quâ acceperis, aut etiam cumulatiore, si possis.

16. Ego autem voluntatem tibi profectū emetiar : sed rem ipsam nondum posse videre ; idque ut ignoscas , a te peto. Nec enim ex novis , ut agricolæ solent , fructibus est , unde tibi reddam quod accepi : sic omnis foetus repressus , exustusque siti flos veteris ubertatis exaruit : nec ex conditis , qui jacent in tenebris , & ad quos omnis nobis aditus , qui pene solis patuit , obstructus est. Seremus igitur aliquid tamquam in inculto & derelicto solo ; quod ita diligenter colemus , ut impendiis etiam augere possimus largitatem tui muneris ; modò idem noster animus efficere possit , quod ager , qui quum multos annos quievit , uberiores efferre fruges solet.

17. Tum ille , Ego verò & exspectabo ea , quæ polliceris , neque exigam , nisi tuo commodo , & erunt mihi pergrata , si solveris. Mihi quoque , inquit Brutus , & exspectanda sunt ea , quæ Attico polliceris , etsi fortasse ego a te hujus voluntarius procurator petam , quod ipse , cui debes , se incommodo exacturum negat.

V. At verò , inquam , tibi ego , Brute , non solvam , nisi prius a te caverò , amplius eo nomine neminem , cujus petitio sit , petiturum. Non mehercule , inquit , tibi repromittere istuc quidem ausim : nam hunc qui negat , video flagitatorem , non illum quidem tibi molestum , sed assi-

duum tamen & acrem fore. Tum Pomponius, Ego verò, inquit, Brutum nihil mentiri puto. Videor enim jam te ausurus esse appellare; quoniam longo intervallo modò primùm animadverti paulò te hilariorem. Itaque, quoniam hic, quod mihi deberetur, se exacturum professus est; quod huic debes, ego a te peto.

19. Quidnam id? inquam. Ut scribas, inquit, aliquid: jampridem enim conticuerunt tuæ litteræ. Nam ut illos de republica libros edidisti, nihil a te sanè postea accepimus; eisquæ nosmetipsi ad veterum annalium memoriam comprehendendam impulsī atque incensi sumus. Sed illa quum poteris; atque ut possis rogo.

20. Nunc verò, inquit, si es animo vacuo, expone nobis quod quærimus. Quidnam est id? inquam. Quod mihi nuper in Tusculano inchoasti de oratoribus, quando esse cœpissent, qui etiam, & quales fuissent: quem ego sermonem quum ad Brutum tuum, vel nostrum potius, detulissem, magnopere hic audire se velle dixit. Itaque hunc elegimus diem, quum te sciremus esse vacuum. Quare, si tibi est commodum, ede illa, quæ cœperas, & Bruto, & mihi.

21. Ego verò, inquam, si potuero, faciam vobis satis. Poteris, inquit: relaxa modò paulum animum, aut sanè (si potes)

libera. Nempe igitur hinc tum, Pomponi, ductus est sermo, quòd erat a me mentio facta, causam Dejotari, fidelissimi atque optimi regis, ornatissimè & copiosissimè a Bruto me audisse defensam.

VI. Scio, inquit, ab isto initio tractum esse sermonem, teque Bruti dolentem vicem, quasi deflevisse iudiciorum vastitatem, & fori. Feci, inquam, istuc quidem, & sæpe facio. Nam mihi, Brute, in te intuenti crebrò in mentem venit vereri, ecquodnam curriculum aliquando sit habitura tua & natura admirabilis, & exquisita doctrina, & singularis industria. Quum enim in maximis causis versatus esses, & quum tibi ætas nostra jam cederet, fascisque summitteret, subitò in civitate quum alia ceciderunt, tum etiam ea ipsa, de qua disputare ordimur, eloquentia obmutuit.

23. Tum ille, Ceterarum rerum causâ, inquit, istuc & doleo, & dolendum puto; dicendi autem me non tam fructus, & gloria, quàm studium ipsum, exercitatioque delectat: quod mihi nulla res eripiet, te præsertim tam studioso. Etenim dicere bene nemo potest, nisi qui prudenter intelligit. Quare qui eloquentiæ veræ dat operam, dat prudentiæ, quâ ne maximis quidem in bellis æquo animo carere quisquam potest.

24. Præclarè, inquam, Brute, dicis, eoque magis istâ dicendi laude delector, quòd cetera, quæ sunt quondam habitæ in civitate pulcherrima, nemo est tam humilis, qui se non aut posse adipisci, aut adeptum putet: eloquentem neminem video factum esse victoriâ. Sed quòd facilius sermo explicetur, sedentes, si videtur, agamus. Quum idem placuisset illis, tum in pratulo propter Platonis statuam confedimus.

25. Hic ego, Laudare igitur eloquentiam, & quanta vis sit ejus, expromere, quantamque iis, qui sint eam consecuti, dignitatem afferat, neque propositum nobis est hoc loco, neque necessarium. Hoc verò sine ulla dubitatione confirmaverim, sive illa arte pariatur aliquâ, sive exercitatione quadam, sive naturâ; rem unam esse omnium difficillimam: quibus enim ex quinque rebus constare dicitur, earum unaquæque est ars ipsa magna per sese. Quare quinque artium concursus maximarum quantam vim, quantamque difficultatem habeat, existimari potest.

VII. Testis est Græcia, quæ quum eloquentiæ studio sit incensa, jamdiuque excellat in ea, præstetque ceteris, tamen omnes artes vetustiores habet, & multò antè non inventas solùm, sed etiam perfectas, quàm hæc est a Græcis elaborata

dicendi vis atque copia. In quam quum intueor, maximè mihi occurrunt, Attice, & quasi lucent Athenæ tuæ: qua in urbe primùm se orator extulit, primùmque etiam monumentis & litteris oratio est cœpta mandari.

27. Tamen ante Periclem, cujus scripta quædam feruntur, & Thucydidem,* qui non nascentibus Athenis, sed jam adultis fuerunt, littera nulla est, quæ quidem ornatum aliquem habeat, & oratoris esse videatur. Quamquam opinio est & eum, qui multis annis ante hos fuerit, Pisistratum, & paulò seniore etiam Solonem, posteaque Clifthenem multùm, ut temporibus illis, valuisse dicendo.

28. Post hanc ætatem aliquot annis, ut ex Atticis monumentis potest perspicui, Themistocles fuit; quem constat quum prudentiâ, tum etiam eloquentiâ præstittisse: post Pericles, qui quum floreret omni genere virtutis, hac tamen fuit laude clarissimus. Cleonem etiam temporibus illis, turbulentum illum quidem civem, sed tamen eloquentem constat fuisse.

29. Huic ætati suppare Alcibiades, Critias, Theramenes: quibus temporibus quod dicendi genus viguerit, ex Thucydidi scriptis, qui ipse tum fuit, intelligi maximè potest. Grandes erant verbis, crebri sententiis, compressione rerum bre-

ves, & ob eam ipsam causam interdum subobscuri.

VIII. Sed ut intellectum est, quantam vim haberet accurata, & facta quodam modo oratio; tum etiam magistri dicendi multi subito exstiterunt: tum Leontinus Gorgias, Thrasymachus Chalcedonius, Protagoras Abderites, Prodicus Ceus, Hippias Eleus in honore magno fuit; alii-que multi temporibus eisdem docere se profitebantur, arrogantibus sanè verbis, quemadmodum causa inferior, ita enim loquebantur, dicendo fieri superior posset.

31. Iis opposuit sese Socrates, qui subtilitate quadam disputandi refellere eorum instituta solebat verbis. Hujus ex uberrimis sermonibus exstiterunt doctissimi viri; primumque tum philosophia, non illa de natura, quæ fuerat antiquior, sed hæc, in qua de bonis rebus & malis, deque hominum vita & moribus disputatur, inventa dicitur: quod quoniam genus ab hoc, quod proposuimus, abhorret, philosophos aliud in tempus rejiciamus; ad oratores, a quibus digressi sumus, revertamur.

32. Exstitit igitur jam senibus illis, quos paulò antè diximus, Isocrates, cujus domus cunctæ Græciæ quasi ludus quidam patuit, atque officina dicendi, magnus orator, & perfectus magister, quamquam so-

rensi luce caruit , intraque parietes aluit eam gloriā , quam nemo , meo quidem iudicio , est postea consecutus. Is & ipse scripsit multa præclarè , & docuit alios ; & quum cetera melius , quàm superiores , tum primus intellexit , etiam in soluta oratione , dum versum effugeres , modum tamen & numerum quemdam oportere servari.

33. Ante hunc enim verborum quasi structura , & quædam ad numerum conclusio , nulla erat ; aut , si quando erat , non apparebat eam deditâ operâ esse quæsitam ; quæ forsitan laus sit : verumtamen naturâ magis tum , casuque nonnumquam , quàm aut ratione aliquâ aut observatione fiebat.

34. Ipsa enim natura circumscriptione quadam verborum comprehendit , concluditque sententiam : quæ quum aptis conficta verbis est , cadit etiam plerumque numerosè. Nam & aures ipsæ quid plenum , quid inane sit , judicant , & spiritu , quasi necessitate aliquâ , verborum comprehensio terminatur : in quo non modò defici , sed etiam laborare turpe est.

IX. Tum fuit Lysias , ipse quidem in causis forensibus non versatus , sed egregiè subtilis scriptor atque elegans , quem jam propè audeas oratorem perfectum dicere : nam planè quidem perfectum ,

& cui nihil admodum desit, Demos-
thenem facillè dixeris. Nihil acutè inve-
niri potuit in eis causis, quas scripsit, nihil,
ut ita dicam, subdolè, nihil versutè,
quod ille non viderit; nihil subtiliter dici,
nihil pressè, nihil enucleatè, quo fieri
possit aliquid limatius; nihil contrà grande,
nihil incitatum, nihil ornatum vel verbo-
rum gravitate, vel sententiarum, quo quid-
quam esset elatius.

36. Huic Hyperides proximus, &
Æschines fuit, & Lycurgus, & Dinar-
chus, & is, cujus nulla exstant scripta,
Demades, aliique plures. Hæc enim ætas
effudit hanc copiam; &, ut opinio mea
fert, succus ille & sanguis incorruptus
usque ad hanc ætatem oratorum fuit, in
qua naturalis inesset, non fucatus nitor.

37. Phalereus enim successit eis seni-
bus adolescens, eruditissimus ille quidem
horum omnium, sed non tam armis insti-
tutus, quàm palæstrâ: itaque delectabat
magis Athenienses, quàm inflammabat:
processerat enim in solem & pulverem,
non ut e militari tabernaculo, sed ut e
Theophrasti, doctissimi hominis, umbra-
culis.

38. Hic primus inflexit orationem, &
eam mollem, teneramque reddidit; &
suavis, sicut fuit, videri maluit, quàm
gravis, sed suavitate eâ, quâ perfunderet

animos, non quâ perfringeret; & tantum ut memoriam concinnitatis suæ, non (quemadmodum de Pericle scripsit Eupolis) cum delectatione aculeos etiam relinqueret in animis eorum, a quibus esset auditus.

X. Videsne igitur, ut in ea ipsa urbe, in qua & nata & alta sit eloquentia, quàm ea serò prodierit in lucem? siquidem ante Solonis ætatem, & Pisistrati, de nullo, ut diserto, memoriæ proditum est. At hi quidem, ut populi Romani ætas est, senes: ut Atheniensium secula numerantur, adolescentes debent videri. Nam etsi Servio Tullio regnante viguerunt, tamen multò diutius Athenæ jam erant, quàm est Roma ad hodiernum diem: nec tamen dubito, quin habuerit vim magnam semper oratio.

40. Neque enim jam Troicis temporibus tantum laudis in dicendo Ulyssi tribuisset Homerus, & Nestori (quorum alterum vim habere voluit, alterum suavitatem) nisi jam tum esset honos eloquentiæ; neque ipse poëta hic tam idem ornatus in dicendo, ac planè orator fuisset: cujus etsi incerta sunt tempora, tamen annis multis fuit ante Romulum: siquidem non infra superiorem Lycurgum fuit, a quo est disciplina Lacedæmoniorum adstricta legibus.

41. Sed studium ejus generis majorque vis agnoscitur in Pisistrato. Denique hunc proximo seculo Themistocles infecutus est; ut apud nos, perantiquus; ut apud Athenienses, non ita sanè vetus. Fuit enim regnante jam Græciâ, nostrâ autem civitate non ita pridem dominatu regio liberatâ.

42. Nam bellum Volscorum illud gravissimum, cui Coriolanus exsul interfuit, eodem ferè tempore, quo Persarum bellum, fuit, similisque fortuna clarorum virorum: siquidem uterque, quum civis egregius fuisset, populi ingrati pulsus injuriâ, se ad hostes contulit, conatumque iracundiæ suæ morte sedavit: nam etsi aliter est apud te, Attice, de Coriolano, concede tamen; ut huic generi mortis potius assentiar.

XI. At ille ridens, Tuo verò, inquit, arbitrato; quoniam quidem concessum est rhetoribus ementiri in historiis, ut aliquid dicere possint argutiùs: ut enim tu nunc de Coriolano, sic Clitarchus, sic Stratoctes de Themistocle finxit. Nam, quem Thucydides, qui & Atheniensis erat, & summo loco natus, summusque vir, & paulò ætate posterior, tantum mortuum scripsit, & in Attica clam humatum; addidit, fuisse suspicionem veneno sibi conscivisse mortem: hunc isti aiunt, quum tau-

rum immolavisset, excepisse sanguinem paterâ, & eo poto, mortuum concidisse. Hanc enim mortem rhetoricè, & tragicè ornare potuerunt: illa mors vulgaris nullam præbebat materiem ad ornatum. Quare, quoniam tibi ita quadrat, omnia fuisse in Themistocle paria & Coriolano, pateram quoque a me sumas licet: præbebo etiam hostiam, ut Coriolanus sit planè alter Themistocles.

44. Sit sanè, inquam, ut lubet, de isto: & ego cautiùs posthac historiam attingam, te audiente; quem rerum Romanarum auctorem laudare possum religiosissimum. Sed tum ferè Pericles, Xantippi filius, de quo antè dixi, primus adhibuit doctrinam: quæ quamquam tum nulla erat dicendi, tamen ab Anaxagora physico eruditus, exercitationem mentis a reconditis abstrusisque rebus ad causas forenses popularesque traduxerat. Hujus suavitate maximè hilaratæ sunt Athenæ: hujus ubertatem & copiam admiratæ, ejusdem vim dicendi terroremque timuerunt.

XII. Hæc igitur ætas prima Athenis oratorem propè perfectum tulit. Nec enim in constituentibus rempublicam, nec in bella gerentibus, nec in impeditis, ac regum dominatione devinctis, nasci cupiditas dicendi solet. Pacis est comes, otii que socia, & jam bene constitutæ civitatis quasi alumna quædam, eloquentia. 46.

46. Itaque ait Aristoteles, quum, sublati in Sicilia tyrannis, res privatae longo intervallo judiciis repeterentur, tum primum, quod esset acuta illa gens & controversa naturâ, artem & praecepta Siculos, Coracem & Tisiam, conscripsisse: nam antea neminem solitum viâ, nec arte, sed accuratè tamen, & de scripto plerosque dicere; scriptasque fuisse, & paratas a Protagora rerum illustrium disputationes, quæ nunc communes appellantur loci.

47. Quod idem fecisse Gorgiam, quum singularum rerum laudes, vituperationesque conscripsisset; quod judicaret hoc oratoris esse maximè proprium, rem augere posse laudando, vituperandoque rursus affligere: huic Antiphontem Rhamnusium similia quædam habuisse conscripta, quo neminem umquam melius ullam oravisse capitis causam, quum se ipse defenderet, se audiente, locuples auctor scripsit Thucydides.

48. Nam Lysiam primò profiteri solitum artem esse dicendi; deinde, quod Theodorus esset in arte subtilior, in orationibus autem jejunior, orationes eum scribere aliis cœpisse, artem removisse: similiter Isocratem primò artem dicendi esse negavisse, scribere autem aliis solitum orationes, quibus in judiciis uterentur:

sed, quum ex eo (quia quasi committeret contra legem, quò quis iudicio circumveniretur) sæpe ipse in iudicium vocaretur; orationes aliis destitisse scribere, totumque se ad artes componendas transulisse.

XIII. Et Græciæ quidem oratorum parvus, atque fontes vides, ad nostrorum animalium rationem, veteres; ad ipsorum, sanè recentes. Nam antequam delectata est Atheniensium civitas hac laude dicendi, multa jam memorabilia & in domesticis & in bellicis rebus effecerat. Hoc autem studium non erat commune Græciæ, sed proprium Athenarum.

50. Quis enim aut Argivum oratorem, aut Corinthium, aut Thebanum scit fuisse temporibus illis? nisi quid de Epaminonda, docto homine, suspicari libet. Lacedæmonium verò usque ad hoc tempus adivi fuisse neminem. Menelaum ipsum, dulcem illum quidem tradit Homerus, sed pauca dicentem. Brevitas autem, laus est interdum in aliqua parte dicendi, in universa eloquentia laudem non habet.

51. At verò extra Græciam magna dicendi studia fuerunt; maximique huic laudi habiti honores, illustre oratorum nomen reddiderunt. Nam ut semel e Piræeo eloquentia evecta est, omnes peragravit insulas, atque ita peregrinata totâ Asiâ est,

ut se externis oblineret moribus, omnemque illam salubritatem Atticæ dictionis, & quasi sanitatem perderet, ac loqui pene dedisceret. Hinc Asiatici oratores non contemnendi quidem nec celeritate, nec copiâ, sed parùm pressi, & nimis redundantes: Rhodii saniores, & Atticorum similiore. Sed de Græcis hæcenus: etenim hæc ipsa forsitan fuerint non necessaria.

52. Tum Brutus, Ista verò, inquit, quàm necessaria fuerint, non facilè dixerim; jucunda certè mihi fuerunt, neque solum non longa, sed etiam breviora, quàm vellem. Optimè, inquam: sed veniamus ad nostros, de quibus difficile est plus intelligere, quàm quantum ex monumentis suspicari licet.

XIV. Quis enim putet aut celeritatem ingenii L. Bruto illi, nobilitatis vestræ principi, defuisse? qui de matre suavianda ex oraculo Apollinis tam acutè, argutèque conjecerit; qui summam prudentiam simulatione stultitiæ texerit; qui potentissimum regem, clarissimi regis filium, expulerit, civitatemque perpetuo dominatu liberatam magistratibus annuis, legibus, judiciisque devinxerit; qui collegæ suo imperium abrogaverit, ut e civitate regalis nominis memoriam tolleret: quod certè effici non potuisset, nisi esset oratione persuasum.

54. Videmus item paucis annis post reges exactos, quum plebes prope ripam Anicenis ad tertium milliarium confedisset, eumque montem, qui Sacer appellatus est, occupavisset, M. Valerium dictatorem dicendo sedavisse discordias, eique ob eam rem honores amplissimos habitos, & eum primum ob eam ipsam causam Maximum esse appellatum. Ne L. Valerium quidem Potitum arbitror non aliquid potuisse dicendo, qui post decemviralem invidiam, plebem in patres incitatam, legibus & concionibus suis mitigaverit.

55. Possumus Appium Claudium suspicari disertum, quia senatum jam inclinatum, a Pyrrhi pace revocaverit. Possumus C. Fabricium, quia sit ad Pyrrhum de captivis recuperandis missus orator: T. Coruncanium, quod ex pontificum commentariis longè plurimum ingenio valuisse videatur: M'. Curium, quod is tribunus plebis, interrege Appio Cæco, deserto homine, comitia contra leges habente, quum de plebe consulem non accipiebat, patres antè auctores fieri coëgerit; quod fuerit permagnum, nondum lege Mæniâ latâ.

56. Licet aliquid etiam de M. Popilii ingenio suspicari, qui quum consul esset, eodemque tempore sacrificium publicum cum læna faceret, quod erat flamen Car-

mentalis, plebis contra patres concitatione & seditione nuntiatâ, ut erat lænâ amictus, ita venit in concionem, seditionemque quum auctoritate, tum oratione sedavit. Sed eos oratores habitos esse, aut omnino tum ullum eloquentiæ præmium fuisse, nihil fanè mihi legisse videor: tantummodò conjecturâ ducor ad suspicandum.

57. Dicitur etiam C. Flaminius, is, qui tribunus plebis legem de agro Gallico & Piceno viritim dividendo tulerit, qui consul apud Thrasimenum sit interfectus, ad populum valuisse dicendo. Q. etiam Maximus Verrucosus, orator habitus est temporibus illis; & Q. Metellus, is, qui bello Punico secundo cum L. Veturio Philone consul fuit.

XV. Quem verò exstet, & de quo sit memoriæ proditum, eloquentem fuisse, & ita esse habitum, primus est M. Cornelius Cethegus, cujus eloquentiæ est auctor, & idoneus quidem, meâ sententiâ, Q. Ennius, præsertim quum & ipse eum audiverit, & scribat de mortuo; ex quo nulla suspicio est, amicitiae causâ esse mentitum. Est igitur sic apud illum in nono, ut opinor, annali:

Additur orator Corneliu' suaviloquenti
Ore Cethegus Marcu', Tuditano collega,
Marci filius.

Et oratorem appellat, & suaviloquentiam tribuit; quæ nunc quidem non tam est in plerisque: latrant enim jam quidam oratores, non loquuntur: sed est ea laus eloquentiæ certè maxima.

Is dictus oliis popularibus olim,
Qui tum vivebant homines, atque ævum agitabant,
Flos delibatus populi.

59. Probè verò: ut enim hominis decus, ingenium, sic ingenii ipsius lumen est eloquentia, quâ virum excellentem præclare tum illi homines florem populi esse dixerunt;

Suadæque medulla.

Πειθὼ quam vocant Græci, cujus effector est orator, hanc *Suadam* appellavit Ennius. Ejus autem Cethegum medullam fuisse vult, ut, quam deam in Periclis labris scripsit Eupolis sessitavisse, hujus hic medullam nostrum oratorem fuisse dixerit.

60. At hic Cethegus consul cum P. Tuditano fuit bello Punico secundo, quæstorque his consulibus M. Cato, modò planè annis CXL. ante me consulem; & id ipsum nisi unius esset Ennii testimonio cognitum, hunc vetustas, ut alios fortasse multos, oblivione obruisset. Illius autem ætatis qui sermo fuerit, ex Nævianis scriptis intelligi

potest. His enim consulibus, ut in veteribus commentariis scriptum est, Nævius est mortuus: quamquam Varro noster, diligentissimus investigator antiquitatis, putat in hoc erratum, vitamque Nævii producit longius. Nam Plautus P. Claudio, L. Porcio, viginti annis post illos, quos antè dixi, consules mortuus est, Catone cenfore. Hunc igitur Cethegum consecutus est ætate Cato, qui annis ix post eum fuit consul: eum nos ut perveterem habemus, qui L. Marcio, M'. Manilio consulibus mortuus est, annis LXXXIII. ipsis ante me consulem.

XVI. Nec verò habeo quemquam antiquiorem, cujus quidem scripta proferenda putem, nisi quem Appii Cæci oratio hæc ipsa de Pyrrho, & nonnullæ mortuorum laudationes fortè delectant. Ex hercules hæc quidem exstant. Ipsæ enim familiæ suæ quasi ornamenta, ac monumenta servabant, & ad usum, si quis ejusdem generis occidisset, & ad memoriam laudum domesticarum, & ad illustrandam nobilitatem suam; quamquam his laudationibus historia rerum nostrarum est facta mendosior.

62. Multa enim scripta sunt in eis, quæ facta non sunt; falsi triumphi, plures consulatus, genera etiam falsa, & a plebe transitiones, quum homines humiliores in

alienum ejusdem nominis infunderentur genus ; ut , si ego me a M. Tullio esse dicerem , qui patricius cum Servio Sulpicio consul , anno x. post exactos reges , fuit.

63. Catonis autem orationes non minùs multæ ferè sunt , quàm Attici Lysiæ ; cujus arbitror plurimas esse. Est enim Atticus , quoniam certè Athenis est & natus & mortuus , & functus omni civium munere : quamquam Timæus eum , quasi Liciniâ & Muciâ lege repetit Syracusas ; & quodammodo est nonnulla in iis etiam inter ipsos similitudo. Acuti sunt , elegantes , faceti , breves. Sed ille Græcus ab omni laude felicior.

64. Habet enim certos sui studiosos , qui non tam habitus corporis optimos , quàm gracilitates consecuntur ; quos , valetudo modò bona sit , tenuitas ipsa delectat : quamquam in Lysia sunt sæpe etiam lacerti , sic ut eo fieri nihil possit valentius : verùm est certè genere toto strigosior : sed habet tamen suos laudatores , qui hac ipsâ ejus subtilitate admodum gaudeant.

XVII. Catonem verò quis nostrorum oratorum , qui quidem nunc sunt , legit ? aut quis novit omnino ? At quem virum ? dii boni ! mitto civem , aut senatorem , aut imperatorem : oratorem enim hoc loco

quærimus. Quis illo gravior in laudando? acerbior in vituperando? in sententiis argutior? in docendo, edifferendoque subtilior? Refertæ sunt orationes amplius centum quinquaginta (quas quidem adhuc invenerim & legerim) & verbis, & rebus illustribus: licet ex his eligant ea, quæ notatione & laude digna sint; omnes oratoriæ virtutes in eis reperientur.

66. Jam verò Origines ejus quem florem, aut quod lumen eloquentiæ non habent? Amatores huic defunt, sicuti multis jam antè seculis & Philisto Syracusio, & ipsi Thucydidi. Nam ut horum concisis sententiis, interdum etiam non satis apertis, quum brevitate, tum nimio acumine, officit Theopompus elatione, atque altitudine orationis suæ; quod idem Lysiæ Demosthenes: sic Catonis luminibus obstruxit hæc posteriorum quasi exaggerata altiùs oratio.

67. Sed in nostris inscitia est, quòd ii ipsi, qui in Græcis antiquitate delectantur, eâque subtilitate, quam Atticam appellant, hanc in Catone non noverunt quidem. Hyperidæ volunt esse & Lysiæ. Laudo. Sed cur nolunt Catonis? Attico genere dicendi se gaudere dicunt.

68. Sapienter id quidem: atque utinam imitarentur, nec ossa solum, sed etiam sanguinem! Gratum est tamen, quod vo-

lunt. Cur igitur Lysias & Hyperides amatur, quum penitus ignoretur Cato? Anti-
quior est hujus fermo, & quædam horri-
diora verba. Ita enim tum loquebantur.
Id muta, quod tum ille non potuit, &
adde numeros, ut aptior sit oratio: ipsa
verba compone, & quasi coagmenta,
quod ne Græci quidem veteres factitave-
runt: jam neminem antepones Catoni.
Ornari orationem Græci putant, si ver-
borum immutationibus utantur, quos ap-
pellant *τρέπεις*, & sententiarum orationis-
que formis, quæ vocant *σχήματα*. Non ve-
risimile est, quàm sit in utroque genere &
creber & distinctus Cato.

XVIII. Nec verò ignoro, nondum esse
fatis politum hunc oratorem, & quæren-
dum esse aliquid perfectius: quippe quum
ita sit ad nostrorum temporum rationem
vetus, ut nullius scriptum exstet dignum
quidem lectione, quod sit antiquius: sed
majore honore in omnibus artibus, quàm
in hac una dicendi, versatur antiquitas.

70. Quis enim eorum, qui hæc minora
animadvertunt, non intelligit, Canachi
signa rigidiora esse, quàm ut imitentur ve-
ritatem? Calamidis dura illa quidem, sed
tamen molliora, quàm Canachi. Nondum
Myronis satis ad veritatem adducta; jam
tamen quæ non dubites pulchra dicere.
Pulchriora etiam Polycleti, & jam planè

perfecta, ut mihi quidem videri solent. Similis in pictura ratio est, in qua Zeuxim, & Polygnotum, & Timantem, & eorum, qui non sunt usi plus quam quatuor coloribus, formas & lineamenta laudamus. At in Aëtione, Nicomacho, Protogene, Apelle, jam perfecta sunt omnia: & nescio an reliquis in rebus omnibus idem eveniat. Nihil est enim simul & inventum, & perfectum.

71. Nec dubitari debet, quin fuerint ante Homerum poëtæ: quod ex eis carminibus intelligi potest, quæ apud illum, & in Phæacum, & in procorum epulis canuntur. Quid? nostri veteres versus ubi sunt?

Quos olim Fauni, vatesque canebant,
Quum neque Musarum scopulos quisquam superarat,
Nec dicti studiosus erat:
Ante hunc. . . .

ait ipse de se; nec mentitur in gloriando: sic enim sese res habet. Nam & Odyssea Latina est, sic, tamquam opus aliquod Dædali, & Livianæ fabulæ, non satis dignæ quæ iterum legantur.

72. Atque hic Livius, qui primus fabulam, C. Clodio Cæci filio & M. Tuditano consulibus, docuit, anno ipso antequam natus est Ennius; post Romam autem conditam quartodecimo & quingentesimo, ut

hic ait, quem nos sequimur : est enim inter scriptores de numero annorum controversia. Accius autem a Q. Maximo quintum consule captum Tarento scripsit Livium annis xxx, postquam eum fabulam docuisse & Atticus scribit, & nos in antiquis commentariis invenimus.

73. Docuisse autem fabulam annis post xi. C. Cornelio, Q. Minucio consulibus, ludis Juventatis, quos Salinator Senensi proelio voverat. In quo tantus error Accii fuit, ut, his consulibus, xl. annos natus Ennius fuerit : cui si æqualis fuerit Livius, minor fuit aliquantò is qui primus fabulam dedit, quàm ii, qui multas docuerant ante hos consules, & Plautus, & Nævius.

XIX. Hæc si minùs apta videntur huic sermoni, Brute, Attico assigna, qui me inflammavit studio illustrium hominum ætates & tempora persequendi. Ego verò, inquit Brutus, & delector istâ quasi notatione temporum, & ad id, quod instituisti, oratorum genera distinguere ætatibus, istam diligentiam esse accommodatam puto.

75. Rectè, inquam, Brute, intelligis. Atque utinam existerent illa carmina, quæ multis seculis ante suam ætatem in epulis esse cantitata a singulis convivis de clarorum virorum laudibus, in Originibus scriptum reliquit Cato ! Tamen illius,

quem in vatibus & Faunis enumerat Ennius, bellum Punicum, quasi Myronis opus, delectat.

76. Sit Ennius sanè, ut est certè, perfectior: qui si illum, ut simulat, contemneret, non, omnia bella persequens, primum illud Punicum acerrimum bellum reliquisset. Sed ipse dicit, cur id faciat: *Scriptere*, inquit, *alii rem versibu'*: & luculentè quidem scripserunt, etiamsi minùs, quàm tu, politè. Nec verò tibi aliter videri debet; qui a Nævio vel sumpsisti multa, si fateris: vel, si negas, furripuisti.

77. Cum hoc Catone grandiores nati fuerunt C. Flaminius, C. Varro, Q. Maximus, Q. Metellus, P. Lentulus, P. Crassus, qui cum superiore Africano consul fuit. Ipsum Scipionem accepimus non infantem fuisse: filius quidem ejus, is, qui hunc minorem Scipionem a Paulo adoptavit, si corpore valuisset, in primis habitus esset disertus. Indicant quum oratiunculæ, tum historia quædam Græca, scripta dulcissimè.

XX. Numeroque eodem fuit Sex. Ælius, juris quidem civilis omnium peritissimus, sed etiam ad dicendum paratus. De minoribus autem, C. Sulpicius Galius, qui maximè omnium nobilium Græcis litteris studuit, isque & oratorum in numero est habitus, & fuit reliquis rebus ornatus at-

que elegans. Jam enim erat unctior quædam, splendidiorque consuetudo loquendi. Nam, hoc prætore ludos Apollini faciente, quum Thyestem fabulam docuisset, Q. Marcio, Cn. Servilio consulibus, mortem obiit Ennius.

79. Erat iisdem temporibus Tib. Gracchus, P. filius, qui bis consul & censor fuit, cujus est oratio Græca apud Rhodios: quem civem quum gravem, tum etiam eloquentem constat fuisse. P. etiam Scipionem Nasicam, qui est *Corculum* appellatus, qui item bis consul & censor fuit, habitum eloquentem aiunt, illius, qui sacra acceperit, filium. Dicunt etiam L. Lentulum, qui cum C. Figulo consul fuit; Q. Nobiliorem, M. filium, jam patrio instituto deditum studio litterarum, qui etiam Q. Ennium, qui cum patre ejus in Ætolia militaverat, civitate donavit, quum triumvir coloniam deduxisset; & T. Annum Lusum, hujus Q. Fulvii collegam, non indifertum dicunt fuisse.

80. Atque etiam L. Paulus Africani pater, personam principis civis facile dicendo tuebatur: at verò etiam tum Catone vivo, qui annos quinque & octoginta natus excessit e vita, quum quidem eo ipso anno contra Ser. Galbam ad populum summâ contentione dixisset: quam etiam orationem scriptam reliquit.

XXI. Sed vivo Catone minores nati multi uno tempore oratores floruerunt. Nam & A. Albinus, is, qui Græcè scripsit historiam, qui consul cum L. Lucullo fuit, & litteratus & disertus fuit: & tenuit cum hoc locum quemdam etiam Ser. Fulvius, & unà Ser. Fabius Pictor, & juris, & litterarum, & antiquitatis bene peritus: Quintusque Fabius Labeo fuit oratus iisdem ferè laudibus. Nam Q. Metellus, is, cujus quatuor filii consulares fuerunt, in primis est habitus eloquens, qui pro L. Cotta dixit, accusante Africano; cujus & aliæ sunt orationes, & contra Tib. Gracchum exposita est in C. Fannii annalibus.

82. Tum ipse L. Cotta veterator habitus, sed C. Lælius, & P. Africanus in primis eloquentes: quorum exstant orationes, ex quibus existimari de ingeniis oratorum potest. Sed inter hos ætate paulum his antecedens sine controversia Ser. Galba eloquentiâ præstitit: & nimirum is princeps ex Latinis, illa oratorum propria, & quasi legitima opera tractavit, ut egrederetur a proposito ornandi causâ, ut delectaret animos, ut permoveret, ut augeret rem, ut miserationibus, ut communibus locis uteretur. Sed nescio quomodo hujus, quem constat eloquentiâ præstitisse, exiliores orationes sunt, & redolentes ma-

gis antiquitatem , quàm aut Lælii , aut Scipionis , aut etiam ipsius Catonis : itaque exaruerunt , vix jam ut appareant.

83. De ipsius Lælii & Scipionis ingenio , quamquam ea est jam opinio , ut plurimum tribuatur ambobus ; dicendi tamen laus est in Lælio illustrior. At oratio Lælii de collegiis , non melior , quàm de multis quam voles , Scipionis : non quò illà Lælii quidquam sit dulcius , aut quod de religione dici possit augustius ; sed multò tamen vetustior , & horridior ille , quàm Scipio : & quum sint in dicendo variæ voluntates , delectari mihi magis antiquitate videtur , & lubenter verbis etiam uti paulò magis priscis Lælius.

84. Sed est mos hominum , ut nolint eundem pluribus rebus excellere. Nam ut ex bellica laude adspirare ad Africanum nemo potest , in qua ipsa egregium Viriati bello reperimus fuisse Lælium : sic ingenii , litterarum , eloquentiæ , sapientiæ denique , etsi utrique primas , priores tamen libenter deferunt Lælio. Nec mihi ceterorum judicio solum videtur , sed etiam ipso- rum inter ipsos concessu ita tributum fuisse. Erat omnino tum mos , ut in reliquis rebus melior , sic in hoc ipso humanior , ut faciles essent in suum cuique tribuendo.

XXII. *Memoriâ teneo , Smyrnæ me ex P. Rutilio Rufo audisse , quum diceret*

adolescuntulo se accidisse, ut ex senatus-consulto P. Scipio & D. Brutus, ut opinor, consules de re atroci, magna-que quærent. Nam quum in silva Sila facta cædes esset, notique homines interfecti; insimulareturque familia, partim etiam liberi societatis ejus, quæ picarias de P. Cornelio, L. Mummiō censoribus redemisset, decrevisse senatum, ut de ea re cognoscerent & statuerent consules.

86. Causam pro publicanis accuratè, ut semper solitus esset, eleganterque dixisse Lælium. Quum consules, re auditâ, *amplius* de consilii sententia pronuntiavissent; paucis interpositis diebus iterum Lælium multò diligentius, meliusque dixisse, iterumque eodem modo a consulibus rem esse prolatam. Tum Lælium, quum eum focii domum reduxissent, egissentque gratias, &, ne defatigaretur, oravissent, locutum esse ita, se, quæ fecisset, honoris eorum causâ, studiosè, accuratèque fecisse; sed se arbitrari, causam illam a Ser. Galba, quòd is in dicendo fortior acriorque esset, gravius & vehementius posse defendi. Itaque auctoritate C. Lælii publicanos causam detulisse ad Galbam.

87. Illum autem, quòd ei viro succedendum esset, verècundè & dubitanter recepisse: unum, quasi comperendinatum, medium diem fuisse, quem totum Galbam

in considerata causa , componendaque posuisse ; & , quum cognitionis dies esset , & ipse Rutilius rogatu sociorum domum ad Galbam manè venisset , ut eum admone-
ret , & ad dicendi tempus adduceret ; usque illum , quoad ei nuntiatum esset consules descendisse , omnibus exclusis commentatum in quadam testudine cum servis litteratis fuisse ; quorum aliud alii dictare eodem tempore solitus esset : interim quum esset ei nuntiatum tempus esse , exisse in aedes eo colore , & iis oculis , ut egisse causam , non commentatum putares.

88. Addebat etiam , idque ad rem pertinere putabat , scriptores illos malè multatos exisse cum Galba : ex quo significabat , illum non in agendo solum , sed etiam in meditando vehementem atque incensum fuisse. Quid multa ? magnâ expectatione , plurimis audientibus , coram ipso Lælio sic illam causam tantâ vi , tantâque gravitate dixisse Galbam , ut nulla ferè pars orationis silentio præteriretur. Itaque multis querelis , multâque miseratione adhibitâ , socios , omnibus approbantibus , illâ die quæstione liberatos esse.

XXIII. Ex hac Rutiliana narratione suspicari licet , quum duæ summæ sint in oratore laudes , una subtiliter disputandi , ad docendum ; altera graviter agendi , ad animos audientium permovendos ; multoque

plus proficiat is qui inflammet judicem, quàm ille qui doceat: elegantiam in Lælio, vim in Galba fuisse. Quæ quidem vis tum maximè cognita est, quum, Lusitanis a Ser. Galba prætore contra interpositam, ut existimabatur, fidem, interfectis, L. Libone tribuno plebis populum incitante, & rogationem in Galbam privilegii similem ferente, summâ senectute, ut antè dixi, M. Cato legem suadens in Galbam multa dixit: quam orationem in Origines suas retulit, paucis antequam mortuus est, an diebus, an mensibus?

90. Tum igitur recusans Galba pro sese, & populi Romani fidem implorans, quum suos pueros, tum C. Galli etiam filium flens commendabat; cujus orbitas & fletus mirè miserabilis fuit propter recentem memoriam clarissimi patris; isque se tum eripuit flammâ, propter pueros misericordiâ populi commotâ, sicut idem scriptum reliquit Cato. Atque etiam ipsum Libonem non infantem video fuisse, ut ex orationibus ejus intelligi potest. Quum hæc dixissem, & paulum interquiescissem, Quid igitur, inquit, est causæ, Brutus, si tanta virtus in oratore Galba fuit, cur ea nulla in orationibus ejus appareat? quod mirari non possum in eis, qui nihil omnino scripti reliquerunt.

XXIV. Nec enim est eadem, inquam,

Brute, causa non scribendi, & non tam bene scribendi, quàm dixerint. Nam videmus alios oratores inertia nihil scripsisse, ne domesticus etiam labor accederet ad forensem: pleræque enim scribuntur orationes habitæ jam, non ut habeantur.

92. Alios non laborare, ut meliores fiant; nulla enim res tantum ad dicendum proficit, quantum scriptio: memoriam autem in posterum ingenii sui non desiderant, quum se putant satis magnam adeptos esse dicendi gloriam, eamque etiam majorem visum iri, si in existimantium arbitrium sua scripta non venerint: alios, quod melius putent dicere se posse, quàm scribere; quod peringeniosis hominibus, neque satis doctis, plerumque contingit, ut ipsi Galbæ.

93. Quem fortasse vis non ingenii solum, sed etiam animi, & naturalis quidam dolor dicentem incendebat, efficiebatque, ut & incitata, & gravis, & vehemens esset oratio; dein quum otiosus stilum prehenderat, motusque omnis animi, tamquam ventus, hominem defecerat, flaccescebat oratio: quod iis, qui limatius dicendi consueverunt genus, accidere non solet, propterea quod prudentia numquam deficit oratorem, quâ ille utens eodem modo possit & dicere & scribere: ardor animi non semper adest, isque quum con-

fedit, omnis illa vis & quasi flamma oratoris exstinguitur. Hanc igitur ob causam videtur Lælii mens spirare etiam in scriptis, Galbæ autem vis occidisse.

XXV. Fuerunt etiam in oratorum numero mediocrium L. & Sp. Mummii, fratres, quorum exstant amborum orationes. Simplex quidem L. & antiquus: Sp. autem nihil ille quidem ornatior, sed tamen adstrictior: fuit enim doctus ex disciplina Stoicorum. Multæ sunt Sp. Albini orationes. Sunt etiam L. & C. Aureliorum Orestarum, quos aliquo video in numero oratorum fuisse.

95. P. etiam Popilius quum civis egregius, tum non indifertus fuit. C. verò, filius ejus, disertus. Caiusque Tuditanus quum omni vitâ, atque victu excultus, atque expolitus, tum ejus elegans est habitum etiam orationis genus. Eodemque in genere est habitus is, qui injuriâ acceptâ fregit Tib. Gracchum patientiâ, civis in rebus optimis constantissimus, M. Octavius. At verò M. Æmilius Lepidus, qui est Porcina dictus, iisdem temporibus ferè, quibus Galba, sed paulò minor natu; & summus orator est habitus, & fuit, ut apparet ex orationibus, scriptor sanè bonus.

96. Hoc in oratore Latino primùm mihi videtur & lenitas apparuisse illa Græcorum, & verborum comprehensio, etiam

artifex, ut ita dicam, stilius. Hunc studiosè duo adolescentes ingeniosissimi, & propè æquales, C. Carbo, & Tib. Gracchus audire soliti sunt: de quibus jam dicendi locus erit, quum de senioribus pauca dixerò. Q. enim Pompeius non contemptus orator temporibus illis fuit, qui summos honores, homo per se cognitus, sine ulla commendatione majorum est adeptus.

97. Tum L. Cassius multum potuit, non eloquentiâ, sed dicendo tamen; homo non liberalitate, ut alii, sed ipsâ tristiciâ & severitate popularis: cujus quidem legi tabellariæ M. Antius Briso, tribunus plebis, diu restitit, M. Lepido consule adjuvante. Eaque res P. Africano vituperationi fuit, quòd ejus auctoritate de sententia deductus Briso putabatur. Tum duo Cæpiones multum clientes consilio & linguâ, plus auctoritate tamen & gratiâ sublevabant. Sed Pompeii sunt scripta nec nimis extenuata (quamquam veterum est similis) & plena prudentiæ.

XXVI. P. Crassum valde probatum oratorem iisdem ferè temporibus accepimus, qui & ingenio valuit, & studio, & habuit quasdam etiam domesticas disciplinas. Nam & cum summo illo oratore Servio Galba, cujus C. filio filiam suam collocaverat, affinitate sese devinxerat: &, quum esset P.

Mucii filius, fratremque haberet P. Scævola, domi jus civile cognoverat. In eo industriam constat summam fuisse, maximamque gratiam, quum & consuleretur plurimum, & diceret. Horum ætatibus adjuncti duo C. Fannii, C. & M. filii fuerunt: quorum Caii filius, qui consul cum Domitio fuit, unam orationem de sociis, & nomine Latino, contra Gracchum reliquit, sanè & bonam, & nobilem.

99. Tum Atticus, Quid ergo? estne ista Fannii? nam varia opinio pueris nobis erat. Alii a C. Persio, litterato homine, scriptam esse aiebant, illo, quem significat valde doctum esse Lucilius: alii multos nobiles, quod quisque potuisset, in illam orationem contulisse.

100. Tum ego, Audivi equidem ista, inquam, de majoribus natu, sed numquam sum adductus, ut crederem; eamque suspicionem propter hanc causam credo fuisse, quòd Fannius in mediocribus oratoribus habitus esset; oratio autem vel optima esset illo quidem tempore orationum omnium. Sed nec ejusmodi est, ut a pluribus confusa videatur: unus enim sonus est totius orationis, & idem stilus: nec de Persio reticisset Gracchus; quum & Fannius de Menelao Maratheno, & de ceteris objecisset, præsertim quum Fannius numquam sit habitus elinguis. Nam & causas defen-

sitavit, & tribunatus ejus, arbitrio & auctoritate P. Africani gestus, non obscurus fuit.

101. Alter autem C. Fannius, M. filius, C. Lælii gener, & moribus, & ipso genere dicendi durior. Is focii instituto (quem, quia cooptatus in augurum collegium non erat, non admodum diligebat, præsertim quum ille Q. Scævola sibi minorem natu generum prætulisset: cui tamen Lælius se excusans, non genero minori dixit se illud, sed majori filiae detulisse) is tamen instituto Lælii Panætium audiverat. Ejus omnis in dicendo facultas ex historia ipsius non ineleganter scripta perspicui potest; quæ neque nimis est infans, neque perfectè diserta.

102. Mucius autem augur, quod pro se opus erat, ipse dicebat, ut de pecuniis repetundis contra T. Albucium: is oratorum in numero non fuit; juris civilis intelligentiâ, atque omni prudentiæ genere præstitit. L. Cœlius Antipater, scriptor, quemadmodum videtis, fuit, ut temporibus illis, luculentus, juris valde peritus, multorum etiam, ut L. Crassi, magister.

XXVII. Utinam in Tib. Graccho, Caioque Carbone talis mens ad rempublicam bene gerendam fuisset, quale ingenium ad bene dicendum fuit! profectò nemo his viris
gloriâ

gloriâ præstitisset. Sed eorum alter propter turbulentissimum tribunatum, ad quem ex invidia foederis Numantini bonis iratus accesserat, ab ipsa republica est interfec-
tus: alter propter perpetuam in populari ratione levitatem, morte voluntariâ se a severitate judicum vindicavit. Sed fuit uterque summus orator, atque hoc memoriâ patrum teste dicimus.

104. Nam & Carbonis, & Gracchi habemus orationes, nondum satis splendoris verbis, sed acutas, prudentiâque plenissimas. Fuit Gracchus diligentia Corneliae matris a puero doctus, & Græcis litteris eruditus: nam semper habuit exquisitos & Græcia magistros, in eis jam adolescens Diophanem Mitylenæum, Græciæ, temporibus illis, disertissimum: sed & breve tempus ingenii augendi & declarandi fuit.

105. Carbo, quoad vita suppeditavit, est in multis judiciis, causisque cognitus. Hunc qui audierant prudentes homines, in quibus familiaris noster L. Gellius, qui se illi contubernalem in consulatu fuisse narrabat, canorum oratorem, & volubilem, & satis acrem, atque eundem & vehementem, & valde dulcem, & perfacetum fuisse dicebat: addebat, industrium etiam & diligentem, & in exercitationibus commentationibusque multum operæ solitum esse ponere.

106. Hic optimus, illis temporibus, est patronus habitus, eoque forum tenente plura fieri judicia cœperunt. Nam & quæstiones perpetuæ hoc adolescente constitutæ sunt, quæ antea nullæ fuerunt (L. enim Piso, tribunus plebis legem primus de pecuniis repetundis, Censorino & Manilio consulibus, tulit: ipse etiam Piso & causas egit, & multarum legum aut auctor, aut dissuasor fuit; isque & orationes reliquit, quæ jam evanuerunt, & annales, sanè exiliter scriptos) & judicia populi, quibus aderat Carbo, jam magis patronum desiderabant, tabellâ datâ; quam legem L. Cassius, Lepido & Mancino consulibus, tulit.

- XXVIII. Vester etiam D. Brutus, M. filius, ut ex familiari ejus L. Accio poëta sum audire solitus, & dicere non incultè solebat, & erat quum litteris Latinis, tum etiam Græcis, ut temporibus illis, eruditus. Quod tribuebat idem Accius etiam Q. Maximo, L. Pauli nepoti. Et verò antè Maximum illum Scipionem, quo duce privato Tib. Gracchus occisus esset, quum omnibus in rebus vehementem, tum acrem aiebat in dicendo fuisse.

- 108. Tum etiam P. Lentulus ille princeps, ad rempublicam duntaxat quod opus esset, fatis habuisse eloquentiæ dicitur. Iisdemque temporibus L. Furius Philus per-

bene Latinè loqui putabatur, litteratiusque quàm ceteri. P. Scævola valde prudenter & acutè, paulò etiam copiosius. Nec mul-
tò minùs prudenter M. Manilius. Appii Claudii volubilis, sed paulò fervidior erat oratio. In aliquo numero etiam M. Fulvius Flaccus, & C. Cato Africani sororis filius, mediocres oratores; etsi Flacci scripta sunt, sed ut studiosi litterarum. Flacci autem æmulus P. Decius fuit, non infans ille quidem, sed ut vitâ, sic oratione etiam turbulentus.

109. M. Drusus, C. filius, qui in tribunatu C. Gracchum, collegam, iterum tribunum, fregit, vir & oratione gravis, & auctoritate; eique proximè adjunctus C. Drusus frater fuit. Tuus etiam gentilis, Brute, M. Pennus facilè agitavit in tribunatu C. Gracchum, paulùm ætate antecessens. Fuit enim M. Lepido, & L. Oreste consulibus, quæstor Gracchus, tribunus Pennus, illius M. filius, qui cum Q. Ælio consul fuit: sed omnia is summa sperans, ædilicius est mortuus. Nam de T. Flaminio, quem ipse vidi, nihil accepi, nisi Latinè diligenter locutum.

XXIX. Iis adjuncti sunt C. Curio, M. Scaurus, P. Rutilius, C. Gracchus. De Scauro & Rutilio breviter licet dicere, quorum neuter summi oratoris habuit laudem, & uterque in multis causis versatus.

S ij

Erat in quibusdam laudandis viris, etiamsi maximi ingenii non essent, probabilis tamen industria; quamquam iis quidem non omnino ingenium, sed oratorium ingenium defuit. Neque enim refert videre, quid dicendum sit, nisi id queas solutè & suaviter dicere: ne id quidem satis est, nisi id, quod dicitur, sit voce, vultu, motuque conditius.

111. Quid dicam opus esse doctrinâ? sine qua etiam si quid bene dicitur adjuvante naturâ, tamen id, quia fortuito fit, semper paratum esse non potest. In Scauri oratione, sapientis hominis, & recti, gravitas summa, & naturalis quædam inerat auctoritas, non ut causam, sed ut testimonium dicere putares, quum pro reo diceret.

112. Hoc dicendi genus ad patrocinia mediocriter aptum videbatur; ad senatoriam verò sententiam, cujus erat ille princeps, vel maximè: significabat enim non prudentiam solùm, sed, quod maximè rem continebat, fidem: habebat hoc a natura ipsa, quod a doctrina non facile posset: quamquam hujus quoque ipsius rei, quemadmodum scis, præcepta sunt. Hujus & orationes sunt, & tres ad L. Fufidium libri scripti de vita ipsius acta, sanè utiles, quos nemo legit. At Cyri vitam & disciplinam legunt, præclaram illam qui-

dem, sed neque tam rebus nostris aptam, nec tamen Scauri laudibus anteponendam. Ipse etiam Fufidius in aliquo patronorum numero fuit.

XXX. Rutilius autem in quodam tristi & severo genere dicendi versatus est, & uterque naturâ vehemens & acer. Itaque quum unâ consulatum petivissent, non ille solum, qui repulsam tulerat, accusavit ambitûs designatum competitorem, sed Scaurus etiam absolutus Rutilium in iudicium vocavit: multâque operâ, multâque industriâ Rutilius fuit, quæ erat propterea gratior, quòd idem magnum munus de jure respondendi sustinebat.

114. Sunt ejus orationes jejunæ: multa præclara de jure: doctus vir, & Græcis litteris eruditus, Panætii auditor, propè perfectus in Stoicis, quorum peracutum, & artis plenum orationis genus, scis tamen esse exile, nec satis populari assensionis accommodatum. Itaque illa, quæ propria est hujus disciplinæ, philosophorum de se ipsorum opinio, firma in hoc viro & stabilis inventa est.

115. Qui quum innocentissimus in iudicium vocatus esset (quo iudicio convulsam penitus scimus esse rempublicam) quum essent eo tempore eloquentissimi viri L. Crassus, & M. Antonius consulares, eorum adhibere neutrum voluit: dixit ipse pro

fese ; & pauca C. Cotta , quòd sororis erat filius , & is quidem tamen , ut orator , quamquam erat admodum adolefcens. Sed Q. Mucius enucleatè ille quidem , & politè , ut solebat ; nequaquam autem eâ vi atque copiâ , quam genus illud judicii , & magnitudo causæ postulabat.

116. Habemus igitur in Stoicis oratoribus Rutilium , Scaurum in antiquis : utrumque tamen laudemus , quoniam per illos ne hæc quidem in civitate genera hac oratoriâ laude caruerunt. Volo enim , ut in scena , sic etiam in foro , non eos modò laudari , qui celeri motu & difficili utantur , sed eos etiam , quos statarios appellant , quorum sit illa simplex in agendo veritas , non molesta.

XXXI. Et quoniam Stoicorum est facta mentio , Q. Ælius Tubero fuit illo tempore , L. Pauli nepos , nullo in oratorum numero , sed vitâ severus & congruens cum ea disciplina , quam colebat ; paulò etiam durior ; qui quidem in triumviratu judicaverit contra P. Africani , avunculi sui , testimonium , vacationem augures , quò minus judiciis operam darent , non habere ; sed ut vitâ , sic oratione durus , incultus , horridus : itaque honoribus majorum respondere non potuit. Fuit autem constans civis , & fortis , & in primis Graccho molestus , quod indicat Gracchi in eum

oratio : sunt etiam in Gracchum , Tuberonis. Is fuit mediocris in dicendo , doctissimus in disputando.

118. Tum Brutus , Quàm hoc idem in nostris contingere intelligo , quod in Græcis ! ut omnes ferè Stoici prudentissimi in differendo sint , & id arte faciant , sintque architecti pene verborum ; iidem traducti a disputando ad dicendum , inopes reperiantur. Unum excipio Catonem , in quo , perfectissimo Stoico , summam eloquentiam non desiderem ; quam exiguam in Fannio , ne in Rutilio quidem magnam , in Tuberone nullam video fuisse.

119. Et ego , Non , inquam , Brute , sine causa , propterea quòd istorum in dialecticis omnis cura consumitur ; vagum illud orationis , & fufum , & multiplex non adhibetur genus. Tuus autem avunculus , quemadmodum scis , habet a Stoicis id , quod ab illis petendum fuit ; sed dicere didicit a dicendi magistris , eorumque more se exercuit. Quòd si omnia a philosophis essent petenda ; Peripateticorum institutis commodiùs fingeretur oratio.

120. Quò magis tuum , Brute , iudicium probo , qui eorum , id est ex vetere Academia philosophorum , sectam secutus es , quorum in doctrina atque præceptis differendi ratio conjungitur cum suavitate dicendi & copia : quamquam ea ipsa Pe-

ripateticorum Academicorumque consuetudo in ratione dicendi talis est, ut nec perficere oratorem possit ipsa per sese, nec sine ea orator esse perfectus. Nam, ut Stoicorum adstrictior est oratio, aliquantóque contractior, quàm aures populi requirunt; sic illorum liberior & latior, quàm patitur consuetudo judiciorum, & fori.

121. Quis enim uberior in dicendo Platone? Jovem aiunt philosophi, si Græcè loquatur, sic loqui. Quis Aristotele nervosior? Theophrasto dulcior? Lectitavisse Platonem studiosè, audivisse etiam Demosthenes dicitur; idque apparet ex genere, & granditate verborum: dicit etiam in quadam epistola hoc ipse de sese. Sed & hujus oratio in philosophiam translata pugnacior, ut ita dicam, videtur, & illorum in judicia pacatior.

XXXII. Nunc reliquorum oratorum ætates, si placet, & gradus persequamur. Nobis verò, inquit Atticus, & vehementer quidem, ut pro Bruto etiam respondeam. Curio fuit igitur ejusdem ætatis ferè, sanè illustris orator, cujus de ingenio ex orationibus ejus existimari potest: sunt enim & aliæ, & pro Ser. Fulvio, de incestu, nobilis oratio: nobis quidem pueris, hæc omnium optima putabatur, quæ vix jam compareret in hac turba novorum voluminum.

123. Præclarè, inquit Brutus, teneo qui istam turbam voluminum effecerit. Et ego, inquam, intelligo, Brute, quem dicas: certè enim & boni aliquid attulimus juventuti, magnificentius, quàm fuerat, genus dicendi, & ornatus; & nocuimus fortasse, quòd veteres orationes post nostras, non a me quidem (meis enim illas antepono) sed a plerisque legi sunt desitæ. Enumera, inquit, me in plerisque: quamquam video mihi multa legenda jam te auctore, quæ antea contemnebam.

124. Atqui hæc, inquam, de incestu laudata oratio puerilis est locis multis: de amore, de tormentis, de rumore, loci sanè inanes; verumtamen nondum tritis nostrorum hominum auribus; nec eruditæ civitate, tolerabiles. Scripsit etiam alia nonnulla, & multa dixit, & illustria, & in numero patronorum fuit; ut eum mirer, quum & vita suppeditavisset, & splendor ei non defuisset, consulem non fuisse.

XXXIII. Sed ecce in manibus vir, & præstantissimo ingenio, & flagranti studio, & doctus a puero, C. Gracchus. Noli enim putare, quemquam, Brute, pleniorẽ & uberiorẽ ad dicendum fuisse. Et ille, Sic prorsus, inquit, existimo; atque istum de superioribus, pene solum lego. Immo planè, inquam, Brute, legas censeo. Damnum enim illius imma-

turo interitu res Romanæ, Latinæque litteræ fecerunt.

126. Utinam non tam fratri pietatem, quàm patriæ, præstare voluisset ! quàm ille facilè tali ingenio, diutius si vixisset, vel paternam esset vel avitam gloriam consecutus ! eloquentiâ quidem nescio an habuisset parem neminem. Grandis est verbis, sapiens sententiis, genere toto gravis : manus extrema non accessit operibus ejus : præclarè inchoata multa, perfectâ non planè. Legendus, inquam, est hic orator, Brute, si quisquam alius, juventuti : non enim solùm acuerè, sed etiam alere ingenium potest.

127. Huic successit ætati C. Galba, Servii illius eloquentissimi viri filius, P. Crassi eloquentis, & jurisperiti gener. Laudabant hunc patres nostri, favebant etiam propter patris memoriam, sed cecidit in cursu. Nam rogatione Mamiliâ, Jugurthinæ conjurationis invidiâ, quum pro sese ipse dixisset, oppressus est. Exstat ejus peroratio, qui epilogus dicitur ; qui tanto in honore, pueris nobis, erat, ut eum etiam edisceremus. Hic, qui in collegio sacerdotum esset, primus post Romam conditam judicio publico est condemnatus.

XXXIV. P. Scipio, qui est in consulatu mortuus, non multùm ille quidem, nec sæpe dicebat ; sed & Latine loquendo,

cuivis erat par, & omnes sale facetiisque superabat. Ejus collega L. Bestia, bonis initiis orsus tribunatus (nam P. Popilium vi C. Gracchi expulsus suâ rogatione restituit) vir & acer & non indifertus, tristes exitus habuit consulatus. Nam invidiosâ lege Mamiliâ C. Galbam Sacerdotem, & quatuor consulares, L. Bestiam, C. Catonem, Sp. Albinum, civemque præstantissimum L. Opimium, Gracchi interfectorem, a populo absolutum, quum is contra populi studium steteret, Gracchani iudices sustulerunt.

129. Hujus dissimilis in tribunatu, reliquaque omni vita, civis improbus C. Licinius Nerva non indifertus fuit. C. Fimbria temporibus iisdem ferè, sed longius ætate provectus, habitus est sanè, ut ita dicam, luculentus patronus, asper, maledicus, genere toto paulò fervidior atque commotior; diligentiam tamen, & virtute animi atque vitâ, bonus auctor in senatu. Idem tolerabilis patronus, nec rudis in jure civili, & quum virtute, tum etiam ipso orationis genere liber; cujus orationes pueri legebamus, quas jam reperire vix possumus.

130. Atque etiam ingenio, & sermone eleganti, valetudine incommodâ, C. Sestius Calvinus fuit; qui etsi, quum remiserant dolores pedum, non deerat in causis,

tamen id non sæpe faciebat. Itaque consilio ejus, quum volebant, homines utebantur; patrocínio, quum licebat. Iisdem temporibus M. Brutus, in quo magnum fuit, Brute, dedecus generi vestro; qui quum tanto nomine esset, patremque optimum virum habuisset, & juris peritissimum, accusationem factitaverit, ut Athenis Lycurgus: is magistratus non petivit, sed fuit accusator vehemens & molestus; ut facile cerneret naturale quoddam stirpis bonum degeneravisse vitio depravatæ voluntatis.

131. At eodem tempore accusator de plebe L. Cæsulenus fuit, quem ego audiui jam senem, quum ab L. Sabellio multam lege Aquiliâ de injuria petivisset. Non fecissem hominis pene infimi mentionem, nisi judicarem, qui suspiciosius aut criminosis diceret, audivisse me neminem.

XXXV. Doctus etiam Græcis T. Albutius, vel potius, pene Græcus. Loquor, ut opinor: sed licet ex orationibus judicare. Fuit autem Athenis adolescens: perfectus Epicureus evaserat, minimè aptum ad dicendum genus.

132. Jam Q. Catulus, non antiquo illo more, sed hoc nostro (nisi quid fieri potest perfectius) eruditus: multæ litteræ; summa non vitæ solum atque naturæ, sed orationis etiam comitas; incorrupta quæ-

dam Latini sermonis integritas : quæ perspicui quum ex orationibus ejus potest, tum facillimè ex eo libro, quem de consûlatu & de rebus gestis suis conscriptum molli & Xenophonteo genere sermonis, misit ad A. Furium, poëtam, familiarem suum : qui liber nihilò notior est, quàm illi tres, de quibus antè dixi, Scauri libri.

133. Tum Brutus, Mihi quidem, inquit, nec iste notus est, nec illi : sed hæc mea culpa est : numquam enim in manus inciderunt. Nunc autem & a te sumam, & conquiram ista posthac curiosius. Fuit igitur in Catulo sermo Latinus ; quæ laus dicendi non mediocris ab oratoribus plerisque neglecta est. Nam de sono vocis, & suavitate appellandarum litterarum, quoniam filium cognovisti, noli expectare quid dicam : quamquam filius quidem non fuit in oratorum numero, sed non deerat ei tamen in sententia dicenda quum prudentia, tum elegans quoddam & eruditum orationis genus.

134. Nec habitus est tamen pater ipse Catulus princeps in numero patronorum : sed erat talis, ut, quum quosdam audires, qui tum erant præstantes, videretur esse inferior ; quum autem ipsum audires sine comparatione, non modò contentus esses, sed melius non quæreres.

135. Q. Metellus Numidicus, & ejus

collega M. Silanus, dicebant de republica quod esset illis viris, & consulari dignitati satis. M. Aurelius Scaurus non sæpe dicebat, sed politè: Latine verò in primis est eleganter locutus. Quæ laus eadem in A. Albino bene loquendi fuit. Nam flamen Albinus etiam in numero est habitus disertorum. Q. etiam Cæpio, vir acer & fortis, cui fortuna belli, crimini; invidia populi, calamitati fuit.

XXXVI. Tum etiam C. & L. Memmii fuerunt, oratores mediocres, accusatores acres atque acerbi: itaque in iudicium capitis multos vocaverunt, pro reis non sæpe dixerunt. Sp. Thorius satis valuit in populari genere dicendi, is, qui agrum publicum, vitiosâ & inutili lege, vestigali levavit. M. Marcellus Æterni pater, non ille quidem in patronis, sed & in promptis tamen, & non inexercitatis ad dicendum, fuit, ut filius ejus, P. Lentulus.

137. L. etiam Cotta, prætorius, in mediocrium oratorum numero, dicendi non ita multum laude processerat; sed de industria, quum verbis, tum etiam ipso sono quasi subrustico persequebatur atque imitabatur antiquitatem. Atque ego & in hoc ipso Cotta & in aliis pluribus intelligo, me non ita disertos homines & retulisse in oratorum numerum, & relaturum. Est enim propositum colligere eos, qui hoc munere

in civitate functi sint, ut tenerent oratorum locum : quorum quidem quæ fuerit adscensio, & quàm in omnibus rebus difficilis optimi perfectio atque absolutio, ex eo, quod dicam, existimari potest.

138. Quàm multi enim jam oratores commemorati sunt, & quàm diu in eorum enumeratione versamur, quum tamen spissè, atque vix, ut dudum ad Demosthenem & Hyperidem, sic nunc ad Antonium Crassumque pervenimus? Nam ego sic existimo, hos oratores fuisse maximos, & in his primum cum Græcorum gloria Latinè dicendi copiam æquatam.

XXXVII. Omnia veniebant Antonio in mentem; eaque suo quæque loco, ubi plurimum proficere & valere possent: ut ab imperatore equites, pedites, levis armatura; sic ab illo in maximè opportunis orationis partibus collocabantur. Erat memoria summa, nulla meditationis suspicio: imparatus semper aggredi ad dicendum videbatur; sed ita erat paratus, ut iudices, illo dicente, nonnumquam viderentur non satis parati ad cavendum fuisse.

140. Verba ipsa, non illa quidem elegantissimo sermone; itaque diligenter loquendi laude caruit: neque tamen est admodum inquinatè locutus: sed illà, quæ propriè laus oratoris est in verbis. Nam ipsum Latinè loqui, est illud quidem, ut

paulò antè dixi , in magna laude ponendum ; sed non tam suâ sponte , quàm quòd est a plerisque neglectum : non enim tam præclarum est scire Latinè , quàm turpe nescire ; neque tam id mihi oratoris boni , quàm civis Romani proprium videtur. Sed tamen Antonius in verbis & eligendis (neque id ipsum tam leporis causâ , quàm ponderis) & collocandis , & comprehensione devinciendis , nihil non ad rationem , & tamquam ad artem dirigebat ; verùm multò magis hoc idem in sententiarum ornamentis & conformationibus. Quo genere quia præstat omnibus Demosthenes , idcirco a doctis oratorum est princeps judicatus. *Σχήματα* enim quæ vocant Græci , ea maximè ornant oratorem ; eaque non tam in verbis pingendis habent pondus , quàm in illuminandis sententiis.

XXXVIII. Sed quum hæc magna in Antonio , tum actio singularis : quæ si partienda est in gestum atque vocem ; gestus erat non verba exprimens , sed cum sententiis congruens : manus , humeri , latera , suppositio pedis , status , incessus , omnisque motus cum verbis , sententiisque consentiens ; vox permanens , verùm subrauca naturâ : sed hoc vitium huic uni in bonum vertebat.

142. Habebat enim flebile quiddam in

conquestionibus, aptumque quum ad fidem faciendam, tum ad misericordiam commovendam; ut verum videretur in hoc illud, quod Demosthenem ferunt ei, qui quæsi- visset quid primum esset in dicendo, ac- tionem; quid secundum, idem; & idem tertium, respondisse. Nulla res magis pe- netrat in animos, eosque fingit, format, flectit; talesque oratores videri facit, qua- les ipsi se videri volunt.

143. Huic alii parem esse dicebant, alii anteponebant L. Crassum. Illud quidem certè omnes ita judicabant, neminem esse, qui, horum alterutro patrono, cujusquam ingenium requireret. Equidem, quam- quam Antonio tantum tribuo, quantum supra dixi, tamen Crasso nihil statuo fieri potuisse perfectius. Erat summa gravitas, erat cum gravitate junctus facetiarum, & urbanitatis oratorius, non scurrilis, lepos: Latine loquendi accurata, & sine molestia diligens elegantia: in differendo mira ex- plicatio: quum de jure civili, quum de æquo & bono disputaretur, argumentorum & similitudinum copia.

XXXIX. Nam, ut Antonius con- jecturâ movendâ, aut sedandâ suspicione, aut excitandâ, incredibilem vim habe- bat; sic in interpretando, in definiendo, in explicanda æquitate, nihil erat Crasso copiosius; idque quum sæpe aliàs, tum

apud centumviros in M'. Curii causa cognitum est.

145. Ita enim multa tum contra scriptum pro æquo & bono dixit, ut hominem acutissimum, Q. Scævola, & in jure, in quo illa causa versabatur, paratissimum, obrueret argumentorum exemplorumque copiâ: atque ita tum ab his patronis æqualibus, etiam consularibus, causa illa dicta est, quum uterque ex contraria parte jus civile defenderet, ut eloquentium jurisperitissimus Crassus, jurisperitorum eloquentissimus Scævola putaretur: qui quidem quum peracutus esset ad excogitandum, quid in jure, aut in æquo verum aut esset, aut non esset, tum verbis erat ad rem cum summa brevitate mirabiliter aptus.

146. Quare sit nobis orator in hoc interpretandi, explanandique, & differendi genere mirabilis, sic ut simile nihil videamus; in augendo, in ornando, in refellendo magis existimator metuendus, quàm admirandus orator. Verùm ad Crassum revertamur.

XL. Tum Brutus, Etsi satis, inquit, mihi videbar habere cognitum Scævola ex iis rebus, quas audiebam sæpe ex C. Rutilio, quo utebatur propter familiaritatem Scævolaë nostri, tamen ista mihi ejus dicendi tanta laus nota non erat. Itaque cepi voluptatem, tam ornatum virum,

tamque excellens ingenium fuisse in nostra republica.

148. Hic ego, Noli, inquam, Brute, existimare, his duobus quidquam fuisse in nostra civitate præstantius: nam, ut paulò antè dixi, consultorum alterum disertissimum, disertorum alterum consultissimum fuisse; sic in reliquis rebus ita dissimiles erant inter sese, statuere ut tamen non posses, utrius te malles similiorem. Crassus erat elegantium parcissimus; Scævola parcorum elegantissimus. Crassus in summa comitate habebat etiam severitatis fatis; Scævola multa in severitate non deerat tamen comitas.

149. Licet omnia hoc modo: sed vereor, ne fingi videantur hæc, ut dicantur a me quodam modo; res se tamen sic habet. Quum omnis virtus sit, ut vestra, Brute, vetus Academia dixit, mediocritas; uterque horum medium quiddam volebat sequi: sed ita cadebat, ut alter ex alterius laude partem, uterque autem suam totam haberet.

150. Tum Brutus, quum ex tua oratione mihi videor, inquit, bene Crassum & Scævolam cognovisse, tum de te, & de Ser. Sulpicio cogitans, esse quamdam vobis cum illis similitudinem judico. Quonam, inquam, istuc modo? Quia mihi & tu videris, inquit, tantum juris civilis scire

voluisse , quantum satis esset oratori ; & Servius eloquentiæ tantum assumpsisse , ut jus civile faciliè posset tueri : ætatesque vestræ , ut illorum , nihil , aut non ferè multum differunt.

XLI. Et ego , de me , inquam , dicere nihil est necesse : de Servio autem & tu probè dicis , & ego dicam quod sentio. Non enim faciliè quem dixerim plus studii , quàm illum , & ad dicendum , & ad omnes bonarum rerum disciplinas adhibuisse : nam & in iisdem exercitationibus , ineunte ætate , fuimus ; & postea unà Rhodum ille etiam profectus est , quò melior esset & doctior ; & , inde ut rediit , videtur mihi in secunda arte primus esse maluisse , quàm in prima secundus. Atque haud scio , an par principibus esse potuisset : sed fortasse maluit , id quod est adeptus , longè omnium , non ejusdem modò ætatis , sed eorum etiam , qui fuissent , in jure civili esse princeps.

152. Hic Brutus , Ain' tu ? inquit : etiamne Q. Scævola Servium nostrum anteponis ? Sic enim , inquam , Brute , existimo , juris civilis magnum usum & apud Scævola , & apud multos fuisse ; artem , in hoc uno : quod numquam effecisset ipsius juris scientiâ , nisi eam præterea didicisset artem , quæ doceret rem universam tribuere in partes , latentem explicare definiendo , obscu-

ram explanare interpretando ; ambigua primum videre , deinde distinguere , postremò habere regulam , quâ vera & falsa judicarentur , & quæ quibus positæ essent , quæque non essent consequentia. Hic enim attulit hanc artem omnium artium maximam , quasi lucem , ad ea , quæ confuse ab aliis aut respondebantur , aut agebantur.

XLII. Dialecticam mihi videris dicere , inquit. Rectè , inquam , intelligis. Sed adjunxit etiam & litterarum scientiam , & loquendi elegantiam , quæ ex scriptis ejus , quorum similia nulla sunt , facillimè perspicitur potest.

154. Quumque discendi causâ duobus peritissimis operam dedisset , L. Lucilio Balbo , C. Aquilio Gallo , Galli , hominis acuti & exercitati , promptam , & paratam in agendo , & in respondendo celeritatem subtilitate , diligentiaque superavit ; Balbi , docti & eruditi hominis , in utraque re consideratam tarditatem vicit , expediendis , conficiendisque rebus : sic & habet quod uterque eorum habuit , & explevit quod utrique defuit.

155. Itaque , ut Crassus mihi videtur sapientius fecisse , quàm Scævola (hic enim causas studiosè recipiebat , in quibus a Crasso superabatur ; ille se consuli volebat , ne qua in re inferior esset , quàm Scæ-

vola) sic Servius sapientissimè. Quum enim duæ civiles artes ac forenſes plurimum & laudis haberent & gratiæ, perfecit, ut alterâ præſtaret omnibus; ex altera tantum affumeret, quantum eſſet, & ad tuendum jus civile, & ad obtinendam conſularem dignitatem, ſatis.

156. Tum Brutus, Ita proſus, inquit, & antea putabam. Audivi enim nuper eum ſtudioſè & frequenter Sami, quum ex eo jus noſtrum pontificium, qua ex parte cum jure civili conjunctum eſſet, vellem cognoscere; & nunc meum judicium multò magis confirmo teſtimonio & judicio tuo: ſimul illud gaudeo, quòd & æqualitas veſtra, & pares honorum gradus, & artium, ſtudioſorumque quaſi finitima vicinitas, tantum abeſt ab obtreſtatione invidiaque, quæ ſolet lacerare pleroſque, uti ea non modò non exulcerare veſtram gratiam, ſed etiam conciliare videatur: quali enim te erga illum perſpicio, tali illum in te voluntate, judicioque cognovi.

157. Itaque doleo & illius conſilio, & tuâ voce populum Romanum carere tam diu: quod quum per ſe dolendum eſt, tum multò magis conſideranti, ad quos iſta non tranſlata ſint, ſed nescio quo pacto devenierint. Hic Atticus, Dixeram, inquit, a principio, de republica ut ſileremus; itaque faciamus: nam ſi iſto modo volumus

singulas res desiderare, non modò querendi, sed ne lugendi quidem finem repemus.

XLIII. Pergamus ergo, inquam, ad reliqua, & institutum ordinem persequamur. Paratus igitur veniebat Crassus, exspectabatur, audiebatur: a principio statim (quod erat apud eum semper accuratum) exspectatione dignus videbatur: non multa jactatio corporis, non inclinatio vocis, nulla inambulatio, non crebra suppositio pedis: vehemens, & interdum irata, & plena justì doloris oratio: multæ, & cum gravitate facetiæ: quodque difficile est, idem & perornatus & perbrevis.

159. Jam in altercando invenit parem neminem: versatus est in omni ferè genere causarum: maturè in locum principum oratorum venit. Accusavit C. Carbonem, eloquentissimum hominem, admodum adolescentem: summam ingenii non laudem modò, sed etiam admirationem est consecutus.

160. Defendit postea Liciniam virginem, quum annos xxvii. natus esset: in ea ipsa causa fuit eloquentissimus, orationisque ejus scriptas quasdam partes reliquit. Voluit adolescens in colonia Narbonensi causæ popularis aliquid attingere, eamque coloniam, ut fecit, ipse deducere: exstat in eam legem senior, ut ita di-

cam, quàm illa ætas ferebat, oratio. Multæ deinde causæ; sed ita tacitus tribunatus, ut, nisi in eo magistratu cœnavisset apud præconem Granium, idque nobis narravisset Lucilius, tribunum plebis nesciremus fuisse.

161. Ita prorsus, inquit Brutus: sed ne de Scævola quidē tribunatu quidquam audivisse videor, & eum collegam Crassi credo fuisse. Omnibus quidem aliis, inquam, in magistratibus, sed tribunus anno post fuit, eoque in rostris sedente suasit Serviliam legem Crassus. Nam censuram sine Scævola gessit: eum enim magistratum nemo umquam Scævolarum petivit. Sed hæc Crassi quum edita oratio est, quam te sæpe legisse certò scio, quatuor & triginta tum habebat annos, totidemque annis mihi ætate præstabat. His enim consulibus eam legem suasit, quibus nati sumus, quum ipse esset Q. Cæpione consule natus & C. Lælio, triennio ipso minor, quàm Antonius. Quod idcirco posui, ut dicendi Latine prima maturitas in qua ætate exstitisset, posset notari; & intelligeretur jam ad summum pene esse perductam, ut eò nihil fermè quisquam addere posset, nisi qui a philosophia, a jure civili, ab historia fuisset instructior.

XLIV. Erit, inquit M. Brutus, aut jam est iste, quem exspectas. Nescio, inquam.

quam. Sed est etiam L. Crassi in consulari, pro Q. Cæpione, defensione junctâ non brevis, ut laudatio; ut oratio autem, brevis: postrema censoris oratio, quâ anno duodequingagesimo usus est. In his omnibus inest quidam sine ullo fuce veritatis color: quin etiam comprehensio, & ambitus ille verborum (si sic periodum appellari placet) erat apud illum contractus, & brevis; & in membra quædam, quæ *κῶλα* Græci vocant, dispertiebat orationem lubentiùs.

163. Hoc loco Brutus, Quandoquidem tu istos oratores, inquit, tantopere laudas, vellem aliquid Antonio, præter illum de ratione dicendi sanè exilem libellum, plura Crasso libuisset scribere: quum enim omnibus memoriâ sui, tum etiam disciplinam dicendi, nobis reliquissent. Nam Scævola dicendi elegantiam satis ex iis orationibus, quas reliquit, habemus cognitam.

164. Et ego, Mihi quidem a pueritiâ quasi magistra fuit, inquam, illa in legem Cæpionis oratio: in qua & auctoritas ornatur senatûs, quo pro ordine illa dicuntur; & invidia concitatur in judicem, & in accusatorum factionem, contra quorum potentiam populariter tum dicendum fuit. Multa in illa oratione graviter, multa leniter, multa asperè, multa facerè dicta sunt: plura etiam dicta quàm scripta,

quod ex quibusdam capitibus expositis, nec explicatis, intelligi potest. Ipsa illa censoria contra Cn. Domitium collegam non est oratio, sed quasi capita rerum, & orationis commentarium paulò plenius: nulla est enim altercatio clamoribus umquam habita majoribus. Et verò fuit in hoc & popularis dictio excellens: Antonii genus dicendi multò aptius judiciis, quàm concionibus.

XLV. Hoc loco ipsum Domitium non relinquo: nam etsi non fuit in oratorum numero, tamen pono satis in eo fuisse orationis atque ingenii, quò & magistratûs personam, & consularem dignitatem tueretur: quod idem de C. Cœlio dixerim, industriam in eo summam fuisse, summasque virtutes, eloquentiæ tantum, quod esset in rebus privatis, amicis ejus, in republica, ipsius dignitati satis

166. Eodem tempore M. Herennius in mediocribus oratoribus, Latinè & diligenter loquentibus, numeratus est; qui tamen summâ nobilitate hominem, cognatione, sodalitate, collegio, summâ etiam eloquentiâ, L. Philippum, in consulatûs petitione superavit. Eodem tempore C. Clodius, etsi propter summam nobilitatem, & singularem potentiam magnus erat, tamen etiam eloquentiæ quamdam mediocritatem afferebat.

167. Ejusdem ferè temporis fuit eques Romanus C. Titius, qui, meo judicio, eò pervenisse videtur, quò potuit ferè Latinus orator sine Græcis litteris, & sine multo usu pervenire. Hujus orationes tantum argutarum, tantum exemplorum, tantum urbanitatis habent, ut pene Attico stilo scriptæ esse videantur. Easdem argutias in tragoedias satis quidem ille acutè, sed parum tragicè transtulit. Quem studebat imitari L. Afranius poëta, homo perargutus, in fabulis quidem etiam, ut scitis, disertus.

168. Fuit etiam Q. Rubrius Varro, qui a senatu hostis cum C. Mario judicatus est, acer & vehemens accusator. In eo genere sanè probabilis, doctus autem Græcis litteris, propinquus noster, factus ad dicendum, M. Gratidius, M. Antonii perfamiliaris, cujus præfectus quum esset in Cilicia, est interfectus; qui accusavit C. Fimbriam, M. Marii Gratidiani pater.

XLVI. Atque etiam, apud socios & Latinos, oratores habiti sunt Q. Vectius Vectianus, e Marsis, quem ipse cognovi, prudens vir, & in dicendo brevis: Q. & D. Valerii Sorani, vicini & familiares mei, non tam in dicendo admirabiles, quàm docti & Græcis litteris, & Latinis: C. Rusticellus Bononiensis, is quidem & exercitatus, & naturâ volubilis. Omnium autem

eloquentissimus extra hanc urbem T. Be-
tucius Barrus Asculanus, cujus sunt ali-
quot orationes Asculi habitæ : illa Romæ
contra Cæpionem, nobilis sanè, cui ora-
tioni Cæpionis ore respondit Ælius; qui
scriptitavit orationes multis, orator ipse
numquam fuit. Apud majores nostros vi-
deo disertissimum habitum ex Latio L. Pa-
pirium Fregellanum, Tib. Gracchi, P.
filii, ferè ætate : ejus etiam oratio est pro
Fregellanis, coloniisque Latinis, habita in
senatu.

170. Tum Brutus, Quid tu igitur, in-
quit, tribuis istis externis quasi oratori-
bus? Quid censes, inquam, nisi idem,
quod urbanis, præter unum, quod non
est eorum urbanitate quadam quasi colo-
rata oratio?

171. Et Brutus, Qui est, inquit, iste
tandem urbanitatis color? Nescio, inquam.
Tantum esse quemdam scio. Id tu, Brute,
jam intelliges, quum in Galliam veneris.
Audies tu quidem etiam verba quædam
non trita Romæ: sed hæc mutari, dedis-
cique possunt. Illud est majus, quod in vo-
cibus nostrorum oratorum recinit quid-
dam, & resonat urbanius; nec hoc in ora-
toribus modò apparet, sed etiam in ceteris.

172. Ego memini T. Tincam Placen-
tinum, hominem facetissimum, cum fa-
miliari nostro Q. Granio præcone dicaci-

tate certare. Eon', inquit Brutus, de quo multa Lucilius? Isto ipso: sed Tincam non minùs multa ridiculè dicentem Granius obruebat nescio quo sapore vernaculo: ut ego jam non mirer, illud Theophrasto accidisse, quod dicitur, quum percunctaretur ex anicula quadam, quanti aliquid venderet; & respondisset illa, atque addidisset, *Hospes, non pote minoris*; tulisse eum molestè, se non effugere hospitis speciem, quum ætatem ageret Athenis, optimèque loqueretur. Omnino sic, ut opinor, in nostris est quidam urbanorum, sicut ille Atticorum, sonus. Sed domum redeamus, id est, ad nostros revertamur.

XLVII. Duobus igitur summis, Crasso & Antonio, L. Philippus proximus accedebat, sed longo intervallo, tamen proximus. Itaque eum, etsi nemo intercedebat, qui se illi anteferreret, neque secundum tamen, neque tertium dixerim. Nec enim in quadrigis eum secundum numeraverim, aut tertium, qui vix e carceribus exierit, quum palmam jam primus acceperit; nec in oratoribus, qui tantum absit a primo, vix ut in eodem curriculo esse videatur: sed tamen erant ea in Philippo, quæ, qui sine comparatione illorum spectaret, satis magna diceret: summa libertas in oratione, multæ facetiæ, satis creber in rependiendis, solutus in explicandis sententiis:

erat etiam in primis, ut temporibus illis, Græcis doctrinis institutus; in altercando cum aliquo aculeo, & maledicto facetus.

174. Horum ætati propè conjunctus L. Gellius, non tam vendibilis orator, quàm ut nescires quid ei deesset: nec enim erat indoctus, nec tardus ad excogitandum, nec Romanarum rerum immemor, & verbis solutus satis; sed in magnos oratores inciderat ejus ætas: multam tamen operam amicis, & utilem præbuit; atque ita diu vixit, ut multarum ætatum oratoribus implicaretur, multum etiam in causis verfaretur.

175. Iisdem ferè temporibus D. Brutus, is, qui consul cum Mamerco fuit, homo & Græcis doctus litteris, & Latinis. Dicebat etiam L. Scipio non imperitè: Cnæusque Pompeius, Sexti filius, aliquem numerum obtinebat: nam Sextus, frater ejus, præstantissimum ingenium contulerat ad summam juris civilis, & ad perfectam geometriæ, & rerum Stoicarum scientiam. Item in jure, & ante hos M. Brutus, & paulò post eum C. Bilienus, homo per se magnus, propè simili ratione summus evaserat; qui consul factus esset, nisi in Marianos consulatus, & in eas petitionis angustias incidisset.

176. Cn. autem Octavii eloquentia, quæ fuerat ante consulatum ignorata, in consu-

latu multis concionibus est vehementer probata. Sed ab eis, qui tantum in dicentium numero, non in oratorum fuerunt, jam ad oratores revertamur. Censeo, inquit Atticus. Eloquentes enim videbare, non sedulos velle conquirere.

XLVIII. Festivitate igitur, & facetiis, inquam, C. Julius, L. filius, & superioribus, & æqualibus suis omnibus præstitit, oratorque fuit minimè ille quidem vehemens, sed nemo umquam urbanitate, nemo lepore, nemo suavitate conditior. Sunt ejus aliquot orationes, ex quibus, sicut ex ejusdem tragœdiis, lenitas ejus sine nervis perspicui potest.

178. Ejus æqualis P. Cethegus, cui de republica satis suppeditabat oratio: totam enim tenebat eam, penitusque cognorat: itaque in senatu consularium auctoritatem assequabatur: sed in causis publicis nihil, in privatis satis veterator videbatur. Erat in privatis causis Q. Lucretius Vespillo & acutus & jurisperitus. Nam Aphilia concionibus aptior, quàm judiciis. Prudens etiam T. Annius Velina, & in ejus generis causis orator sanè tolerabilis.

179. In eodem genere causarum multum erat T. Juventius, nimis ille quidem lentus in dicendo, & pene frigidus; sed & callidus, & in capiendo adversario versutus, & præterea nec indoctus, & magna

cum juris civilis intelligentia. Cujus auditor P. Orbis, meus ferè æqualis, in dicendo non nimis exercitatus, in jure autem civili non inferior, quàm magister fuit. Nam T. Aufidius, qui vixit ad summam senectutem, volebat esse similis horum, eratque & bonus vir & innocens, sed dicebat parum. Nec fanè plus frater ejus M. Virgilius, qui tribunus plebis L. Sullæ imperatori diem dixit. Ejus collega P. Magius, in dicendo paulò tamen copiosior.

180. Sed omnium oratorum, sive rabularum, qui & planè indocti, aut inurbani, aut rustici etiam fuerunt, quos quidem ego cognoverim, solutissimum in dicendo, & acutissimum judico nostri ordinis Q. Sertorium, equestris C. Gorgonium. Fuit etiam facilis & expeditus ad dicendum, & vitæ splendore multo, & ingenio fanè probabili, T. Junius, L. filius, tribunicius, quo accusante P. Sextius, prætor designatus, damnatus est ambitûs: is processisset honoribus longiùs, nisi semper infirmâ, atque etiam agrâ valetudine fuisset.

XLIX. Atque ego præclare intelligo, me in eorum commemoratione versari, qui nec habiti sint oratores, neque fuerint, præteritique a me aliquot ex veteribus, commemoratione, aut laude dignos; sed hoc quidem ignorance: quid enim est superioris ætatis, quod scribi possit de

iis, de quibus nulla monumenta loquuntur, nec aliorum, nec ipsorum? De iis autem; quos ipsi vidimus, neminem ferè prætermittimus eorum, quos aliquando dicentes vidimus.

182. Volo enim sciri, in tanta & tam vetere republica, maximis præmiis eloquentiæ propositis, omnes cupisse dicere, non plurimos ausos esse, potuisse paucos. Ego tamen ita de unoquoque dicam, ut intelligi possit, quem existimem clamatorem, quem oratorem fuisse. Iisdem ferè temporibus, ætate inferiores paulò, quàm Julius, sed æquales propemodum fuerunt C. Cotta, P. Sulpicius, Q. Varius, Cn. Pomponius, C. Curio, L. Fufius, M. Drusus, P. Antistius; nec ullâ ætate uberior oratorum foetus fuit. Ex his Cotta & Sulpicius, quum meo iudicio, tum omnium, facilè primas tulerunt.

183. Hic Atticus, Quomodo istuc dicis, inquit, quum tuo iudicio, tum opinionum? semperne in oratore probando, aut improbando, vulgi iudicium cum intelligentium iudicio congruit? an alii probantur a multitudine, alii autem ab iis, qui intelligunt?

184. Rectè requiris, inquam, Attice: sed audies ex me fortasse, quod non omnes probent. An tu, inquit, id laboras, si huic modò Bruto probaturus es? Planè, in-

quam, Attice, disputationem hanc de oratore probando, aut improbando, multò malim tibi, & Bruto placere: eloquentiam autem meam populo probari velim. Etenim necesse est, qui ita dicat, ut a multitudine probetur, eundem doctis probari: nam, quid in dicendo rectum sit, aut pravum, ego judicabo, si modò is sum, qui id possim, aut sciam judicare; qualis verò sit orator, ex eo, quod is dicendo efficiet, poterit intelligi.

185. Tria sunt enim, ut quidem ego sentio, quæ sint efficienda dicendo: ut doceatur is, apud quem dicetur, ut delectetur, ut moveatur vehementius. Quibus virtutibus oratoris horum quidque efficiatur, aut quibus vitiis orator aut non assequatur hæc, aut etiam in his labatur, & cadat, artifex aliquis judicabit: efficiatur autem ab oratore, necne, ut ii, qui audiunt, ita afficiantur, ut orator velit; vulgi assensu, & populari approbatione judicari solet. Itaque numquam de bono oratore, aut non bono, doctis hominibus cum populo dissensio fuit.

L. An censes, dum illi viguerunt, quos antè dixi, non eosdem gradus oratorum vulgi judicio, & doctorum fuisse? De populo si quem ita rogavisses, *Quis est in hac civitate eloquentissimus?* In Antonio & Crasso aut dubitaret, aut hunc alius, illum

alius diceret. Nemone Philippum, tam suavem oratorem, tam gravem, tam facerem, his anteferet, quem nosmetipsi, qui hæc arte aliquâ volumus expendere, proximum illis fuisse diximus? nemo profecto. Id enim ipsum est summi oratoris, summum oratorem populo videri.

187. Quare tibicen Antigenidas dixerit discipulo sanè frigenti ad populum, *Mihi cane*, & *Musis*: ego huic Bruto dicenti, ut solet, apud multitudinem, *Mihi cane*, & *populo*, *mi Brute*, dixerim: ut, qui audient, quid efficiatur; ego, etiam cur id efficiatur, intelligam. Credit iis, quæ dicuntur, qui audit oratorem; vera putat, assentitur, probat, fidem facit oratio.

188. Tu artifex, quid quæris amplius? Delectatur audiens multitudo, & ducitur oratione, & quasi voluptate quadam perfunditur. Quid habes quod disputes? Gaudet, dolet, ridet, plorat, favet; odit; contemnit, invidet; ad misericordiam inducitur, ad pudendum, ad pigendum; irascitur, miratur, sperat, timet: hæc perinde accidunt, ut eorum, qui adsunt, mentes verbis, & sententiis, & actione tractantur. Quid est, quod expectetur docti alicujus sententia? Quod enim probat multitudo, hoc idem doctis probandum est. Denique hoc specimen est popularis judicii, in quo numquam fuit populo cum doctis intelligentibusque dissensio.

189. Quum multi essent oratores in vario genere dicendi, quis unquam ex his excellere judicatus est vulgi judicio, qui non idem a doctis probaretur? Quando autem dubium fuisset apud patres nostros, eligendi cui patroni daretur optio, quin aut Antonium optaret, aut Crassum? Aderant multi alii; tamen utrum de his potius, dubitasset aliquis: quin alterum, nemo. Quid adolescentibus nobis, quum esset Cotta, & Hortensius, num quis, cui quidem eligendi potestas esset, quemquam his anteponebat?

LI. Tum Brutus, Quid tu, inquit, quæris alios? de te ipso nonne, quid optarent rei, quid ipse Hortensius judicaret, videbamus? qui quum partiretur tecum causas, sæpè enim interfui, perorandi locum, ubi plurimum pollet oratio, semper tibi relinquebat. Faciebat ille quidem, inquam; & mihi, benevolentiam, credo, ductus, tribuebat omnia. Sed ego, quæ de me populi sit opinio, nescio: de reliquis hoc affirmo, qui vulgi opinione disertissimi habiti sint, eosdem intelligentium quoque judicio fuisse probatissimos.

191. Nec enim posset idem Demosthenes dicere, quod dixisse Antimachum, Clarium poetam, ferunt, qui, quum, convocatis auditoribus, legeret eis ma-

gnum illud, quod novissis, volumen suum, & eum legentem omnes, præter Platonem, reliquissent, *Legam*, inquit, *nihilò minùs : Plato enim mihi unus instar est omnium millium*. Et rectè. Poëma enim reconditum, paucorum approbatione; oratio popularis ad sensum vulgi debet moveri. At, si eundem hunc Platonem unum auditorem haberet Demosthenes, quum esset relictus a ceteris, verbum facere non posset.

192. Quid? tu, Brute, posses, si te, ut Curionem quondam, concio reliquisset? Ego verò, inquit ille, ut me tibi indicem, in eis etiam causis, in quibus omnis res nobis cum iudicibus est, non cum populo, tamen si a corona relictus sim, non queam dicere. Ita se, inquam, res habet: ut, si tibiæ inflatæ non referant sonum, abjiciendas eas sibi tibicen putet; sic oratori populi aures tamquam tibiæ sunt: eæ si inflatum non recipiunt, aut si auditor omnino tamquam equus non facit, agitandi finis faciendus est.

LII. Hoc tamen interest, quòd vulgus interdum non probandum oratorem probat, sed probat sine comparatione, quum a mediocri, aut etiam a malo delectatur: eo est contentus; esse melius non sentit; illud, quod est, qualecumque est, probat: tenet enim aures vel mediocris orator, sit

modò aliquid in eo : nec res ulla plus apud animos hominum , quàm ordo & ornatus orationis valet.

194. Quare quis ex populo , quum Q. Scævola pro M. Coponio dicentem audiret in ea causa , de qua antè dixi , quidquam politius , aut elegantius , aut omnino melius aut exspectaret , aut posse fieri putaret ? Quum is hoc probare vellet , M'. Curium , quum ita heres institutus esset , si pupillus antè mortuus esset quàm in suam tutelam venisset , pupillo non nato heredem esse non posse : quid ille non dixit de testamentorum jure ? de antiquis formulis ? quid , quemadmodum scribi oportuisset , si etiam filio non nato heres institueretur ?

195. Quàm captiosum esse populo , quod scriptum esset , negligi , & opinione quæri voluntates ; & interpretatione differtorum , scripta simplicium hominum pervertere ? Quàm ille multa de auctoritate patris sui , qui semper jus illud esse defenderat ? quàm omnino multa de conservando jure civili ? quæ quidem omnia quum peritè , & scienter , tum & breviter , & pressè , & satis ornatè , & pereleganter diceret , quis esset in populo , qui aut exspectaret , aut fieri posse quidquam melius putaret ?

LIII. At verò , ut contrà Crassus ab adolescente delicato , qui in littore ambu-

kins scalmum reperisset, ob eamque rem ædificare navem concupivisset, exorsus est; similiter Scævola ex uno scalmio captio- nis, centumvirale judicium hereditatis effe- cisse; hoc in illo initio consecutus, mul- tis ejusdem generis sententiis delectavit, animosque omnium, qui aderant, in hila- ritate a severitate traduxit: quod est unum ex tribus, quæ dixi ab oratore effici debere. Deinde hoc voluisse eum, qui testamentum fecisset, hoc sensitse, quo- quo modo filius non esset, qui in suam tutelam veniret, sive non natus, sive antè mortuus, Curius heres ut esset: ita scri- bere plerosque, & id valere, & valuisse semper. Hæc, & multa ejusmodi dicens, fidem faciebat: quod est ex tribus orato- ris officiis alterum.

197. Deinde æquum bonum testamen- torum sententias, voluntatesque tutatus est: quanta esset in verbis captio, quum in ceteris rebus, tum in testamentis, si negligerentur voluntates: quantam sibi po- tentiam Scævola assumeret, si nemo au- deret testamentum facere postea, nisi de illius sententia. Hæc quum graviter, tum ab exemplis copiosè, tum variè, tum etiam ridiculè, & facetè explicans, eam admirationem, assensionemque commovit, dixisse ut contrà nemo videretur.

198. Hoc erat oratoris officium partitio-

ne tertium, genere maximum. Hic ille de populo iudex, qui separatim alterum admiratus esset, idem, audito altero, iudicium suum contemneret: at verò intelligens & doctus, audiens Scævola, sentiret esse quoddam uberius dicendi genus & ornatius. Ab utroque autem, causâ peroratâ, si quæreretur uter præstaret orator, numquam profectò sapientis iudicium a iudicio vulgi discreparet.

LIV. Quî præstat igitur intelligens imperito? magnâ re & difficili: si quidem magnum est scire, quibus rebus efficiatur, amittaturve dicendo illud quidquid est, quod aut effici dicendo oportet, aut amitti non oportet. Præstat etiam illo doctus auditor indocto, quòd sæpe, quum oratores duo, aut plures populi iudicio probantur, quòd dicendi genus optimum sit, intelligit: nam illud, quod populo non probatur, ne intelligenti quidem auditori probari potest. Ut enim ex nervorum sono in fidibus, quàm scienter ei pulsi sint, intelligi solet; sic ex animorum motu cernitur, quid tractandis his perficiat orator.

200. Itaque intelligens dicendi existimatur, non assidens, & attentè audiens, sed uno adspectu, & præteriens, de oratore sæpe iudicat. Videt oscitantem iudicem, loquentem cum altero, nonnumquam etiam circumstantem, mittentem ad.

horas; quæsitorem, ut dimittat, rogantem: intelligit, oratorem in ea causa non adesse, qui possit animis judicum admoveere orationem, tamquam fidibus manum. Idem si præteriens adspexerit erectos intuitentes judices, ut aut doceri de re, idque etiam vultu probare videantur; aut, ut avem cantu aliquo, sic illos viderit oratione, quasi suspensos, teneri; aut, id quod maximè opus est, misericordiâ, odio, motu animi aliquo perturbatos esse vehementius: ea si præteriens, ut dixi, adspexerit, si nihil audierit, tamen oratorem versari in illo judicio, & opus oratorium fieri, aut perfectum jam esse, profectò intelliget.

LV. Quum hæc differuissem, uterque assensus est, & ego tamquam de integro ordiens, Quando igitur, inquam, a Cotta & Sulpicio hæc omnis fluxit oratio, quum hos maximè judicio illorum hominum, & illius ætatis dixissem probatos, revertar ad eos ipsos: tum reliquos, ut institui, deinceps persequar. Quoniam ergo oratorum bonorum (hos enim quærimus) duo genera sunt, unum attenuatè, pressèque; alterum sublatè, amplèque dicentium: etsi id melius est, quod splendidius & magnificentius, tamen in bonis omnia, quæ summa sunt, jure laudantur.

202. Sed cavenda est presso illi oratori

inopia & jejunitas; amplo autem, inflatum & corruptum orationis genus. Inveniebat igitur acutè Cotta, dicebat purè ac solutè: & ut ad infirmitatem laterum persciant contentionem omnem remiserat, sic ad virium imbecillitatem dicendi accommodabat genus. Nihil erat in ejus oratione nisi sincerum, nihil nisi siccum, atque sanum; illudque maximum, quòd, quum contentione orationis flectere animos judicum vix posset, nec omnino eo genere diceret, tractando tamen impellebat, ut idem facerent a se commoti, quod a Sulpicio concitati.

203. Fuit enim Sulpicius vel maximè omnium, quos quidem ego audiverim, grandis, &, ut ita dicam, tragicus orator: vox quum magna, tum suavis & splendida: gestus & motus corporis ita venustus, ut tamen ad forum, non ad scenam institutus videretur: incitata & volubilis, nec ea redundans tamen, nec circumfluens oratio. Crassum hic volebat imitari, Cotta malebat Antonium: sed ab hoc vis aberat Antonii, Crassi ab illo lepos.

LVI. O magnam, inquit, artem! Brutus: si quidem istis, quum summi essent oratores, duæ res maximæ, altera alteri defuit. Atque in his oratoribus illud animadvertendum est, posse esse summos, qui inter se sint dissimiles. Nihil enim tam

dissimile, quàm Cotta Sulpicio; & uterque æqualibus suis plurimùm præstitit. Quare hoc doctoris intelligentis est, videre, quò ferat natura sua quemque; & eâ duce utentem sic instituere, ut Isocratem in acerrimo ingenio Theopompi, & lenissimo Ephori dixisse traditum est, alteri se calcaria adhibere, alteri frenos.

205. Sulpicii orationes, quæ feruntur, eas post mortem ejus scripsisse P. Canutius putatur, æqualis meus, homo extra nostrum ordinem, meo judicio, disertissimus. Ipsius Sulpicii nulla oratio est: sæpeque ex eo audiui, quum se scribere neque consuesse, neque posse diceret. Cottæ pro se lege Variâ quæ inscribitur, eam L. Ælius scripsit Cottæ rogatu. Fuit is omnino vir egregius, & eques Romanus cum primis honestus, idemque eruditissimus & Græcis litteris & Latinis; antiquitatisque nostræ & in inventis rebus, & in actis, scriptorumque veterum litteratè peritus; quam scientiam Varro noster acceptam ab illo, auctamque per sese, vir ingenio præstans, omnique doctrinâ, pluribus & illustrioribus litteris explicavit.

206. Sed idem Ælius, Stoicus esse voluit; orator autem nec studuit umquam, nec fuit: scribebat tamen orationes, quas alii dicerent; ut Q. Metello filio, ut Q. Cæpioni, ut Q. Pompeio Rufo: quamquam is

etiam ipse scripsit eas, quibus pro se est usus, sed non sine Ælio. His enim scriptis etiam ipse interfui, quum essem apud Ælium adolescens, eumque audire perstudiosè solem. Cottam autem miror summum*ipsum oratorem, minimèque ineptum, Ælianas leves oratiunculas voluisse existimari suas.

LVII. His duobus ejusdem ætatis annumerabatur nemo tertius; sed mihi placebat Pomponius maximè, vel dicam, minimè displicebat. Locus erat omnino in maximis causis, præter eos, de quibus suprà dixi; nemini; propterea quòd Antonius, qui maximè expetebatur, facilis in causis recipiendis erat; fastidiosior Crassus, sed tamen recipiebat: horum qui neutrum habebat, confugiebat ad Philippum ferè, aut ad Cæsarem: Cotta & Sulpicius expetebantur. Ita ab iis sex patronis causæ illustres agebantur: neque tam multa, quàm nostrâ ætate, judicia fiebant; neque hoc, quod nunc fit, ut causæ singulæ defenderentur a pluribus, quo nihil est vitiosius.

208. Respondemus iis, quos non audivimus: in quo primùm sæpe aliter est dictum, aliter ad nos relatum: deinde magni interest coràm videre me, quemadmodum adversarius de quaque re asseveret; maximè autem, quemadmodum quæque res audiatur. Sed nihil vitiosius, quàm, quum

unum corpus debeat esse defensionis, nasci de integro causam, quum sit ab altero perorata.

209. Omnium enim causarum unum est naturale principium, una peroratio: reliquæ partes, quasi membra suo quæque loco locata, suam & vim, & dignitatem tenent. Quum autem difficile sit in longa oratione non aliquando aliquid ita dicere, ut sibi ipse non conveniat; quantò difficilius cavere, ne quid dicas quod non conveniat ejus orationi, qui ante te dixerit? Sed quia & labor multò major est, totam causam, quàm partem dicere, & quia plures ineuntur gratiæ, si uno tempore dicas pro pluribus, idcirco hanc consuetudinem lubenter adscivimus.

LVIII. Erant tamen, quibus videretur illius ætatis tertius Curio, quia splendidioribus fortasse verbis utebatur; & quia Latine non pessimè loquebatur, usu, credo, aliquo domestico: nam litterarum admodum nihil sciebat. Sed magni interest, quos quisque audiat quotidie domi, quibuscum loquatur a puero, quemadmodum patres, pædagogi, matres etiam loquantur.

211. Legimus epistolas Cornelie, matris Gracchorum: apparet filios non tam in gremio educatos, quàm in sermone matris. Auditus est nobis Lælie Caii filie

sæpe sermo : ergo illam patris elegantiam tinctam vidimus ; & filias ejus Mucias ambas , quarum sermo mihi fuit notus ; & neptes Licinias , quas nos quidem ambas , hanc verò Scipionis etiam tu , Brute , credo , aliquando audisti loquentem. Ego verò , ac lubenter quidem , inquit Brutus ; & eò lubentiùs , quòd L. Crassi erat filia.

212. Quid Crassum , inquam , illum censes istius Liciniæ filium , Crassi testamento qui fuit adoptatus ? Summo iste quidem dicitur ingenio fuisse , inquit. Et verò hic Scipio , collega meus , mihi sanè bene loqui videtur , & dicere. Rectè , inquam , judicas , Brute. Etenim istius genus est ex ipsius sapientiæ stirpe generatum. Nam & de duobus avis jam diximus , Scipione & Crasso ; & de tribus proavis , Q. Metello , cujus quatuor filii ; P. Scipione , qui ex dominatu Tib. Gracchi privatus in libertatem rempublicam vindicavit ; Q. Scævola augure , qui peritissimus juris , idemque percomis est habitus. Jam duorum abavorum quàm est illustre nomen , P. Scipionis , qui bis consul fuit , qui est *Corculum* dictus ; alterius omnium sapientissimi , C. Lælii ? O generosam , inquit , stirpem ! & tamquam in unam arborem plura genera ; sic in istam domum multorum insitam atque illuminatam sapientiam !

LIX. Similiter igitur suspicor (ut conferamus parva magnis) Curionis, etsi pupillus relictus est, patrio fuisse instituto, puro sermone assuefactam domum; & eò magis hoc judico, quòd neminem ex iis quidem, qui aliquo in numero fuerunt, cognovi in omni genere honestarum artium tam indoctum, tam rudem.

214. Nullum ille poëtam noverat, nullum legerat oratorem, nullam memoriam antiquitatis collegerat; non publicum jus, non privatum & civile cognoverat: quamquam id quidem fuit etiam in aliis, & magnis quidem oratoribus, quos parum his instructos artibus vidimus, ut Sulpicium, ut Antonium. Sed ii tamen unum illud habebant, dicendi opus elaboratum; idque quum constaret ex quinque notissimis partibus, nemo in aliqua parte earum omnino nihil poterat: in quacumque enim una planè claudicaret, orator esse non posset.

215. Sed tamen alius in alia excellebat magis: reperiēbat, quid dici opus esset, & quo modo præparari, & quo loco locari; memoriâque ea comprehendebat Antonius: excellebat autem actione; erantque ei quædam ex his paria cum Crasso, quædam etiam superiora. At Crassi magis enitebat oratio. Nec verò Sulpicio, neque Cottæ dicere possumus, neque cuiquam bono oratori, rem ullam ex illis

quinque partibus planè, atque omnino defuisse. Itaque in Curione hoc verissimè judicari potest, nullâ re unâ magis oratorem commendari, quàm verborum splendore & copiâ: nam quum tardus in cogitando, tum in instruendo dissipatus fuit.

LX. Reliqua duo sunt, agere, & meminisse: in utroque cachinnos irridentium commovebat. Motus erat is, quem & C. Julius in perpetuum notavit, quum ex eo, in utramque partem toto corpore vacillante, quæsivit, *quis loqueretur e lintre*: & Cn. Sicinius, homo impurus, sed admodum ridiculus; neque aliud in eo oratoris simile quidquam.

217. Is quum tribunus plebis Curionem & Octavium consules produxisset, Curioque multa dixisset, sedente Cn. Octavio collegâ, qui devinctus erat fasciis, & multis medicamentis, propter dolorem artuum, delibutus, *Numquam*, inquit, *Octavi, collegæ tuo gratiam referes, qui nisi se suo more jactavisset, hodie te istic muscæ comedissent*. Memoriâ autem ita fuit nullâ, ut aliquoties, tria quum proposuisset, aut quartum adderet, aut tertium quæreret: qui in judicio privato vel maximo, quum ego pro Titinia Cottæ peroravissem, ille contra me pro Ser. Nævio diceret, subito totam causam oblitus est, idque veneficiis & cantionibus Titiniæ factum esse dicebat.

218. Magna hæc immemoris ingenii signa; sed nihil turpius, quàm quòd etiam in scriptis obliuisceretur, quid paulò antè posuisset; ut in eo libro, ubi se exeuntem e senatu, & cum Pansa nostro, & cum Curione filio colloquentem facit, quum senatum Cæsar consul habuisset, omnisque ille sermo ductus e percunctatione filii, quid in senatu esset actum. In quo multis verbis quum inueheretur in Cæsarem Curio, disputatioque esset inter eos, ut est consuetudo dialogorum, quum sermo esset institutus senatu misso, quem senatum Cæsar consul habuisset, reprehendit eas res, quas idem Cæsar anno post, & deinceps reliquis annis administravisset in Gallia.

LXI. Tum Brutus admirans, Tantamne fuisse oblivionem, inquit, in scripto præfertim, ut ne legens quidem umquam senserit, quantum flagitii commisisset! Quid autem, inquam, Brute, stultius, quàm, si ea vituperare volebat, quæ vituperavit, non eo tempore instituere sermonem, quum illarum rerum jam tempora præterissent? Sed ita totus errat, ut in eodem sermone dicat, in senatum se, Cæsare consule, non accedere, sed id dicat ipso consule exiens e senatu. Jam qui hac parte animi, quæ custos est ceterarum ingenii partium, tam debilis esset, ut ne in scripto quidem meminisset, quid paulò antè po-

fuiſſet, huic minimè mirum eſt ex tempore dicenti ſolitam effluere mentem.

220. Itaque quum ei nec officium de- eſſet, & flagraret ſtudio dicendi, perpau- cæ ad eum cauſæ deferebantur. Orator autem, vivis ejus æqualibus, proximus optimis numerabatur, propter verborum bonitatem, ut antè dixi, & expeditam ac profluentem quodam modo celeritatem. Itaque ejus orationes adſpiciendas tamen cenſeo: ſunt illæ quidem languidiore; ve- rumtamen poſſunt augere, & quaſi alere id bonum, quod in illo mediocriter fuiſſe concedimus; quod habet tantam vim, ut ſolum ſine aliis in Curione ſpeciem ora- toris alicujus effecerit. Sed ad inſtituta re- deamus.

LXII. In eodem igitur numero ejuſdem ætatis C. Carbo fuit, illius eloquentiſſimi viri filius, non ſatis acutus orator; ſed ta- men orator numeratus eſt. Erat in verbis gravitas, & facilè dicebat, & auctorita- tem naturalem quamdam habebat oratio. Acutior Q. Varius rebus inveniendis, nec minùs verbis expeditus: fortis verò actor, & vehemens, & verbis nec inops nec ab- jectus, & quem planè oratorem dicere au- deres. Cn. Pomponius lateribus pugnans, incitans animos, acer, acerbus, criminofus.

222. Multum ab iis aberat L. Fuſius; tamen ex accuſatione M'. Aquilii diligentia

fructum ceperat. Nam M. Drusum, tuum magnum avunculum, gravem oratorem, ita duntaxat quum de republica diceret; L. autem Lucillum etiam acutum; patremque tuum, Brute, juris quoque & publici, & privati sanè peritum; M. Lucillum, M. Octavium, Cnæi filium, qui tantum auctoritate dicendoque valuit, ut legem Semproniam frumentariam, populi frequentis suffragiis abrogaverit; Cn. Octavium, M. filium; M. Catonem patrem; Q. etiam Catulum filium abducamus ex acie, id est, a iudiciis, & in præsidiis reipublicæ, cui facile satisfacere possint, collocemus.

223. Eòdem Q. Cæpionem referrem, nisi nimis equestri ordini deditus, a senatu dissedisset. Cn. Carbonem, M. Marium, & ex eodem genere complures minimè dignos elegantis conventûs auribus, aptissimos cognovi turbulentis concionibus: quo in genere (ut in iis perturbem ætatum ordinem) nuper L. Quintius fuit; aptior autem etiam Palicanus auribus imperitorum.

224. Et, quoniam hujus generis facta mentio est, seditiosorum omnium post Gracchos, L. Apuleius Saturninus eloquentissimus visus est: magis specie tamen & motu, atque ipso amictu capiebat homines, quàm aut dicendi copiâ, aut me-

diocritate prudentiæ. Longè autem post natos homines improbissimus C. Servilius Glaucia, sed peracutus & callidus, cum primisque ridiculus. Is, ex summis & fortunæ & vitæ sordibus in prætura, consul factus esset, si rationem ejus haberi licere judicatum esset: nam & plebem tenebat, & equestrem ordinem beneficio legis devinxerat. Is prætor eodem die, quo Saturninus tribunus plebis, Mario & Flacco consulibus, publicè est interfectus; homo simillimus Atheniensis Hyperboli, cujus improbitatem veteres Atticorum comœdiæ notaverunt.

225. Quos Sex. Titius consecutus, homo loquax sanè & satis acutus, sed tam solutus & mollis in gestu, ut saltatio quædam nasceretur, cui saltationi Titius nomen esset: ita cavendum est, ne quid in agendo dicendove facias, cujus imitatio rideatur.

LXIII. Sed ad paulò superiorem ætatem reiecti sumus: nunc ad eam, de qua aliquantum sumus locuti, revertamur. Conjunctus igitur Sulpicii ætati P. Antistius fuit, rabula sanè probabilis, qui multos quum tacuisset annos, neque contemni solum, sed irrideri etiam solitus esset, in tribunatu primùm contra C. Julii illam consulatûs petitionem extraordinariam, veram causam agens, est probatus; & eò magis, quòd eandem causam quum ageret

ejus collega ille ipse Sulpicius, hic plura & acutiora dicebat. Itaque post tribunatum primò multæ ad eum causæ, deinde omnes, maximæ quæcumque erant, deferebantur.

227. Rem videbat acutè, componebat diligenter, memoriâ valebat: verbis non ille quidem ornatis utebatur, sed tamen non abjectis. Expedita autem erat, & perfacilè currens oratio. Et erat ejus quidem tamquam habitus non inurbanus; actio paulum quum vitio vocis, tum etiam ineptiis claudicabat. Hic temporibus floruit iis, quibus inter profectiorem reditumque L. Sullæ sine jure fuit & sine ulla dignitate respublica. Hòc etiam autem magis probabatur, quòd erat ab oratoribus quædam in foro solitudo. Sulpicius occiderat, Cotta aberat, & Curio: vivebat e reliquis patronis ejus ætatis nemo præter Carbonem & Pomponium; quorum utrumque facilè superabat.

LXIV. Inferioris autem ætatis erat proximus L. Sisenna, doctus vir, & studiis optimis deditus, bene Latinè loquens, gnarus reipublicæ, non sine facetiis: sed neque laboris multi, nec satis versatus in causis; interjectusque inter duas ætates, Hortensii & Sulpicii, nec majorem consequi poterat, & minori necesse erat cedere. Hujus omnis facultas ex historia ipsius perspicui potest: quæ quum facilè

omnes vincat superiores, tum indicat tamen, quantum absit a summo, quamque genus hoc scriptionis nondum sit satis Latinis litteris illustratum. Nam Q. Hortensii admodum adolescentis ingenium, ut Phidiae signum, simul adspectum & probatum est.

229. Is L. Craffo, Q. Scævolâ consulibus, primum in foro dixit, & apud hos ipsos quidem consules, & quum eorum, qui affuerunt, tum ipsorum consulum, qui omnes intelligentiâ anteibant, judicio discessit probatus: undeviginti annos natus erat eo tempore. Est autem L. Paulo, C. Marcello consulibus mortuus; ex quo videmus eum in patronorum numero annos quatuor & quadraginta fuisse. Hoc de oratore paulò post plura dicemus: hoc autem loco volumus ætatem ejus in disparem oratorum ætatem includere; quamquam id quidem omnibus usu venire necesse fuit, quibus paulò longior vita contigit, ut & cum multò majoribus natu, quam essent ipsi, & cum aliquanto minoribus compararentur: ut Accius iisdem ædilibus ait se & Pacuvium docuisse fabulam, quum ille octoginta, ipse triginta annos natus esset.

230. Sic Hortensius non cum suis æqualibus solum, sed & mea cum ætate, & cum tua, Brute, & cum aliquanto supe-

riore conjungitur. Siquidem & Crasso vivo dicere solebat; & magis jam etiam vige-
bat cum Antonio, & cum Philippo jam
sene, pro Cn. Pompeii bonis dicente. In
illa causa adolescens quum esset, princeps
fuit; & in eorum, quos in Sulpicii ætate
posui, numerum facile pervenerat; & suos
inter æquales M. Pisonem, M. Crassum,
Cn. Lentulum, P. Lentulum Suram longè
præstitit; & me adolescentem nactus octo
annis minorem, quàm erat ipse, multos
annos in studio ejusdem laudis exercuit; &
tecum simul, sicut ego pro multis, sic
ille pro Appio Claudio dixit, paulò ante
mortem.

LXV. Vides igitur, ut ad te oratorem,
Brute, pervenerimus, tam multis inter
nostrum, tuumque initium dicendi inter-
positis oratoribus? ex quibus, quoniam
in hoc sermone nostro statui neminem
eorum, qui viverent, nominare, ne vos
curiosius eliceretis ex me, quid de quoque
judicarem; eos, qui jam sunt mortui, no-
minabo. Tum Brutus, Non est, inquit,
ista causa, quam dicis, quamobrem de iis,
qui vivunt, nihil velis dicere. Quænam
igitur, inquam, est? Vereri te, inquit,
arbitror, ne per nos hic sermo tuus ema-
net, & ii tibi succenseant, quos præterie-
ris. Quid? vos, inquam, tacere non po-
teritis? Nos quidem, inquit, facillimè;

sed tamen te arbitror malle ipsum tacere, quàm taciturnitatem nostram experiri.

232. Tum ego; Verè; inquam, tibi, Brute, dicam: non me existimavi in hoc sermone usque ad hanc ætatem esse venturum; sed ita traxit ordo ætatum orationem, ut jam ad minores etiam pervenerim. Interpone igitur, inquit, si quos videtur: deinde redeamus ad te, & ad Hortensium. Immo verò, inquam, ad Hortensium: de me alii dicent, si qui volent. Minimè verò, inquit: nam etsi me facilè omni tuo sermone tenuisti, tamen is mihi longior videtur, quòd propero audire de te: nec verò tam de virtutibus dicendi tuis, quæ quàm omnibus, tum certè mihi notissimæ sunt, quàm quòd gradus tuos, & quasi processus dicendi studeo cognoscere. Geretur, inquam, tibi mos; quoniam me non ingenii prædicatorem esse vis, sed laboris mei. Verùm interponam, ut placet, alios, & a M. Crasso, qui fuit æqualis Hortensii, exordiar.

LXVI. Is igitur mediocriter a doctrina instructus, angustius etiam a natura, labore & industriâ, & quòd adhibebat ad obtinendas causas curam etiam & gratiam, in principibus patronis aliquot annos fuit. In hujus oratione sermo Latinus erat, verba non abjecta, res compositæ diligenter; nullus flos tamen, neque lumina

ullum ; animi magna , vocis parva contentio , omnia ferè ut similiter atque uno modo dicerentur . Nam hujus æqualis , & inimicus C. Fimbria , non ita diu jactare se potuit ; qui omnia magnâ voce dicens , verborum sanè bonorum cursu quodam incitato , ita furebat tamen , ut mirarere tam alias res agere populum , ut esset infano inter desertos locus .

234. Cn. autem Lentulus multò majorem opinionem dicendi actione faciebat , quàm quanta in eo facultas erat ; qui quum esset nec peracutus , quamquam & ex facie & ex vultu videbatur , nec abundans verbis , etsi fallebat in eo ipso ; sic intervallis , exclamationibus , voce suavi & canorâ , admirando irridebat , calebat in agendo , ut ea , quæ deerant , non desiderarentur .

235. Ita tamquam Curio copiâ nonnullâ verborum , nullo alio bono , tenuit oratorum locum ; sic Cn. Lentulus ceterarum virtutum dicendi mediocritatem actione occultavit , in qua excellens fuit . Neque multò secus P. Lentulus , cujus & excogitandi , & loquendi tarditatem tegebat formæ dignitas , corporis motus plenus & artis , & venustatis , vocis & suavitas , & magnitudo . Sic in hoc nihil præter actionem fuit , & cetera etiam minora , quàm in superiore .

- LXVII. M. Piso quidquid habuit, habuit ex disciplina; maximèque ex omnibus, qui antè fuerunt, Græcis doctrinis eruditus fuit. Habuit a natura genus quoddam acuminis, quod etiam arte limaverat, quod erat in reprehendendis verbis versutum, & solers; sed sæpe stomachosum, nonnumquam frigidum, interdum etiam facetum. Is laborem, quasi cursum, forensem diutius non tulit, quod & corpore erat infirmo, & hominum ineptias ac stultitias, quæ devorandæ nobis sunt, non ferebat, iracundiùsque respuebat, sive morosè, ut putabatur, sive ingenuo, liberoque fastidio. Is quum satis floruisset adolescens, minor haberi est coëptus postea: deinde ex virginum iudicio magnam laudem est adeptus, & ex eo tempore quasi revocatus in cursum, tenuit locum tam diu, quàm ferre potuit laborem: postea, quantum detraxit ex studio, tantum amisit ex gloria.

237. P. Murena mediocri ingenio, sed magno studio rerum veterum; litterarum & studiosus, & non imperitus; multæ industriæ, & magni laboris fuit. C. Censorinus Græcis litteris satis doctus; quod proposuerat, explicans expeditè; non inveniustus actor, sed iners, & inimicus fori. L. Turius parvo ingenio, sed multo labore, quoquo modo poterat, sæpe dice-

bat. Itaque ei paucae centuriae ad consulatum defuerunt.

238. C. Macer auctoritate semper eguit, sed fuit patronus propemodum diligentissimus: hujus si vita, si mores, si vultus denique non omnem commendationem ingenii everterent, majus nomen in patronis fuisset: non erat abundans, non inops tamen; non valde nitens, non planè horrida oratio; vox, gestus, & omnis actio sine lepore; at in inveniendis, componendisque rebus mira accuratio; ut non facile in ullo diligentiorē majoremque cognoverim; sed eam ut citius veteratoriam, quàm oratoriam dicerēs: hic etsi etiam in publicis causis probabatur, tamen in privatis illustriorem obtinebat locum.

LXVIII. C. deinde Piso, statarius, & sermonis plenus orator, minimè ille quidem tardus in excogitando, verumtamen vultu & simulatione multò etiam acutior, quàm erat, videbatur. Nam ejus æqualem M'. Glabrimonem, bene institutum avi Scævolæ diligentia, socors ipsius natura negligensque tardaverat. Etiam L. Torquatus elegans in dicendo, in existimando admodum prudens, toto genere perurbanus. Meus autem æqualis Cn. Pompeius, vir ad omnia summa natus, majorem dicendi gloriam habuisset, nisi eum majoris gloriæ cupiditas ad bellicas laudes abstra-

xisset : erat oratione satis amplus ; rem prudenter videbat ; actio verò ejus habebat, & in voce magnum splendorem, & in motu summam dignitatem.

240. Noster item æqualis D. Silanus, vitricus tuus, studii ille quidem habuit non multum, sed acuminis, & orationis satis. Q. Pompeius, A. filius, qui Bithynicus dictus est, biennio quàm nos fortasse major, summo studio dicendi, multâque doctrinâ, incredibili labore atque industriâ, quod scire possum ; fuit enim mecum, & cum M. Pisone quum amicitia, tum studiis, exercitationibusque conjunctus : hujus actio non satis commendabat orationem : in hac enim satis erat copiae, in illa autem leporis parum.

241. Erat ejus æqualis P. Autronius, voce peracutâ, atque magnâ, nec aliâ re ullâ probabilis. Et L. Octavius Reatinus, qui quum multas jam causas diceret, adolescens est mortuus : is tamen ad dicendum veniebat magis audacter, quàm paratè. Et C. Stalenus, qui se ipse adoptaverat, & de Staleno Ælium fecerat, fervido quodam, & petulanti, & furioso genere dicendi ; quod quia multis gratum erat, & probabatur, adscendisset ad honores, nisi in facinore manifesto deprehensus, poenas legibus & judicio dedisset.

LXIX. Eodem tempore C. & L. Cæ.

paſſi fratres fuerunt , qui multâ operâ , ignoti homines & repentini , quæſtores celeriter facti ſunt , oppidano quodam & incondito genere dicendi. Addamus huc etiam , ne quem vocalem præteriſſe videamur , C. Coſconium Calidianum , qui nullo acumine , eam tamen verborum copiam , ſi quam habebat , præbebat populo cum multa concuſſatione , magnoque clamore. Quod idem faciebat Q. Arrius , qui fuit M. Crassi quaſi ſecundarum. Is omnibus exemplo debet eſſe , quantum in hac urbe polleat multorum obedire temporibus , multorumque vel honori vel periculo ſervire.

243. His enim rebus , infimo loco natus , & honores , & pecuniam , & gratiam conſecutus , etiam in patronorum , ſine doctrina , ſine ingenio , aliquem numerum pervenerat : ſed ut pugiles inexercitati , etiam ſi pugnos & plagas , Olympiorum cupidi , ferre poſſunt , ſolem tamen ſæpe ferre non poſſunt ; ſic ille , quum omni jam fortunâ proſperè functus , labores etiam magnos excepiffet , illius iudicialis anni ſeveritatem , quaſi ſolem , non tulit.

244. Tum Atticus , Tu quidem de face , inquit , hauris , idque jam dudum ; ſed tacebam : hoc verò non putabam , te uſque ad Stalenos & Autronios eſſe venturum. Non puto , inquam , exiſtimare te ,

ambitione me labi, quippe de mortuis; sed ordinem sequens in memoriam notam & æqualem necessario incurro. Volo autem hoc perspici, omnibus conquisitis, qui in multitudine dicere ausi sint, memoriâ quidem dignos perpancos; verum, qui omnino nomen habuerint, non ita multos fuisse: sed ad sermonem institutum revertamur.

LXX. T. Torquatus, T. filius, & doctus vir ex Rhodia disciplina Molonis, & a natura ad dicendum satis solutus, atque expeditus (cui si vita suppeditavisset, sublato ambitu consul factus esset) plus facultatis habuit ad dicendum, quàm voluntatis: itaque studio huic non satisfecit; officio verò nec in suorum necessariorum causis, nec in sententia senatoria defuit.

246. Etiam M. Pontidius, municeps noster, multas privatas causas agitavit, celeriter sanè verba volvens, nec hebes in causis, vel dicam, plus etiam quàm non hebes, sed effervescens in dicendo stomacho sæpe, iracundiâque vehementius; ut non cum adversario solum, sed etiam, quod mirabile esset, cum iudice ipso, cujus delinitor esse debet orator, jurgio sæpe contenderet. M. Messalla minor natu, quàm nos, nullo modo inops, sed non nimis ornatus genere verborum; prudens, acutus, minime incautus, patronus in cau-

sis cognoscendis componendisque diligens, magni laboris, multæ operæ, multarumque causarum.

247. Duo etiam Metelli, Celer & Ne-
pos, nihil in causis versati, nec sine in-
genio, nec indocti, hoc erant popolare di-
cendi genus assecuti. Cn. autem Lentulus
Marcellinus, nec umquam indifertus, &
in consulatu pereloquentis visus est, non
tardus sententiis, non inops verbis, voce
canorâ, facetus satis. C. Memmius,
L. filius, perfectus litteris, sed Græcis;
fastidiosus sanè Latinarum; argutus ora-
tor, verbisque dulcis, sed fugiens non
modò dicendi, verùm etiam cogitandi la-
borem, tantùm sibi de facultate detraxit,
quantùm imminuit industriæ.

LXXI. Hoc loco Brutus, Quàm vel-
lem, inquit, de his etiam oratoribus, qui
hodie sunt, tibi dicere luberet: &, si
de aliis minùs, de duobus tamen, quos
a te scio laudari solere, Cæsare & Mar-
cello, audirem non minùs lubenter, quàm
audivi de iis, qui fuerunt. Cur tandem,
inquam? an exspectas, quid ego judicem
de istis, qui tibi sunt æquè noti, ac mihi?
Mihi mehercule, inquit, Marcellus satis
est notus; Cæsar autem parum. Illum enim
sæpe audivi: hic, quum ego judicare jam
aliquid possem, absuit.

249. Quid igitur de illo judicas, quem

sæpe audisti? Quid censes, inquit, nisi id, quod habiturus es similem tui? Næ ego, inquam, si ita est, velim tibi eum placere quàm maximè. Atqui & ita est, inquit, & vehementer placet; nec verò sine causa: nam & didicit, &, omissis ceteris studiis, unum id egit, seseque quotidianis commentationibus acerrimè exercuit.

250. Itaque & lectis utitur verbis, & frequentibus; & splendore vocis, & dignitate motûs fit speciosum & illustre, quod dicitur; omniaque sic suppetunt, ut ei nullam deesse virtutem oratoris putem; maximèque laudandus est, qui hoc tempore ipso, quum liceat, in hoc communi nostro, & quasi fatali malo, consoletur se quum conscientia optimæ mentis, tum etiam usurpatione & renovatione doctrinæ. Vidi enim Mytilenis nuper virum, atque, ut dixi, vidi planè virum. Itaque quum eum antea tui similem in dicendo viderim, tum verò nunc a doctissimo viro, tibi que, ut intellexi, amicissimo Cratippo instructum omni copiâ, multò videbam similiorem.

251. Hic ego, Etsi, inquam, de optimi viri, nobisque amicissimi laudibus lubenter audio, tamen incurro in memoriam communium miseriarum, quarum oblivionem quærens, hunc ipsum sermonem produxi longiùs. Sed de Cæsare cupio audire, quid tandem Atticus judicet.

LXXII. Et ille, Præclarè, inquit, tibi constas, ut de iis, qui nunc sint, nihil velis ipse dicere; & hercle si sic ageres, ut de iis egisti, qui jam mortui sunt, neminem ut prætermitteres, næ tu in multos Autronios, & Stalenos incurreres. Quare sive hanc turbam effugere voluisti, sive veritus es, ne quis se aut præteritum, aut non satis laudatum queri posset; de Cæsare tamen potuisti dicere, præsertim quum & tuum de illius ingenio notissimum iudicium esset, nec illius de tuo obscurum.

252. Sed tamen, Brute, inquit Atticus; de Cæsare & ipse ita iudico, & de hoc hujus generis acerrimo æstimatore sæpissime audio; illum omnium ferè oratorum Latinè loqui elegantissimè: nec id solum domesticâ consuetudine, ut dudum de Læliorum & Muciorum familiis audiebamus; sed, quamquam id quoque credo fuisse, tamen ut esset perfecta illa bene loquendi laus, multis litteris, & iis quidem reconditis & exquisitis, summoque studio & diligentia est consecutus.

253. Quin etiam in maximis occupationibus, quum ad te ipsum, inquit in me intuens, de ratione Latinè loquendi accuratissimè scripserit; primoque in libro dixerit, verborum delectum originem esse eloquentiæ; tribueritque, mi Brute, huic nostro, qui me de illo maluit, quàm se di-

cere, laudem singularem (nam scripsit his verbis, quum hunc nomine esset affatus: *Ac, si cogitata præclare eloqui possent, nonnulli studio & usu elaboraverunt, cujus te pene principem copiæ atque inventorem, bene de nomine ac dignitate populi Romani meritum esse existimare debemus*) hunc facilem, & quotidianum novisse sermonem, nunc pro relicto est habendum.

LXXIII. Tum Brutus, Amicè, hercule, inquit, & magnificè te laudatum puto, quem non solum principem atque inventorem copiæ dixerit, quæ erat magna laus, sed etiam bene meritum de populi Romani nomine & dignitate: quo enim uno vincebamus a victa Græcia, id aut ereptum illis est, aut certè nobis cum illis communicatum. Hanc autem, inquit, gloriam testimoniumque Cæsaris tuæ quidem supplicationi non, sed triumphis multorum antepono.

255. Et rectè quidem, inquam, Brute, modò sit hoc Cæsaris judicii, non benevolentiae testimonium: plus enim certè attulit huic populo dignitatis, quisquis est ille, si modò est aliquis, qui non illustravit modò, sed etiam genuit in hac urbe dicendi copiam, quàm illi, qui Ligurum castella expugnaverunt; ex quibus multi sunt, ut scitis, triumphi.

256. Verum quidem si audire volumus,

omissis illis divinis consiliis; quibus sæpe constituta est imperatorum sapientiâ salus civitatis aut belli, aut domi; multò magis orator præstat minoris imperatoribus. At prodest plus imperator. Quis negat? sed tamen (non metuo ne mihi acclametis: est autem quod sentias, dicendi liber locus) malim mihi L. Crassi unam pro M'. Curio dictionem, quàm castellanos triumphos duos.

257. At plus interfuit reipublicæ castellum capi Ligurum, quàm bene defendi causam M'. Curii. Credo. Sed Atheniensium quoque plus interfuit firma tecta in domiciliis habere, quàm Minervæ signum ex chore pulcherrimum; tamen ego me Phidiam esse malle, quàm vel optimum fabrum tignarium. Quare non, quantum quisque prosit, sed quanti quisque sit, ponderandum est: præsertim quum pauci pingere egregiè possint, aut fingere; operarii autem, aut bajuli deesse non possint.

LXXIV. Sed perge, Pomponi, de Cæsare, & redde quæ restant. Solum quidem, inquit ille, & quasi fundamentum oratoris vides, locutionem emendatam & Latinam; cujus penes quos laus adhuc fuit, non fuit rationis, aut scientiæ, sed quasi bonæ consuetudinis. Mitto C. Lælium, P. Scipionem: ætatis illius ista fuit laus, tamquam innocentiae, sic Latine lo-

quendi ; nec omnium tamen : nam illorum æquales , Cæcilium & Pacuvium , malè locutos videmus : sed omnes tum ferè , qui nec extra urbem hanc vixerant , nec eos aliqua barbaries domestica infuscaverat , rectè loquebantur. Sed hanc certè rem deteriore vetustas fecit & Romæ , & in Græcia ; confluerunt enim & Athenas , & in hanc urbem multi inquinatè loquentes ex diversis locis : quò magis expurgandus est sermo , & adhibenda , tamquam obrussa , ratio , quæ mutari non potest ; nec utendum pravissimâ consuetudinis regulâ.

259. T. Flaminium , qui cum Q. Metello consul fuit , pueri vidimus : existimabatur bene Latinè , sed litteras nesciebat. Catulus erat ille quidem minimè indoctus , ut a te paulò est antè dictum : sed tamen suavitas vocis , & lenis appellatio litterarum , bene loquendi famam confecerat. Cotta , quia se valde dilatandis litteris a similitudine Græcæ locutionis abstraxerat , sonabatque contrarium Catulo , subagreste quiddam , planèque subrusticum ; aliâ quidem , quasi incultâ & silvestri viâ , ad eandem laudem pervenerat. Sisenna autem , quasi emendator sermonis usitati quum esse vellet , ne a C. Rusio quidem accusatore deterreri potuit , quominus inusitatis verbis uteretur.

260. Quidnam istuc est? inquit Brutus; aut quis est iste C. Rutilus? Et ille, Fuit accusator, inquit, vetus, quo accusante Chritilium, Sisenna defendens, dixit, quædam ejus *sputatilica* esse crimina. Tum C. Rutilus, *Circumvenior*, inquit, *Judices, nisi subvenitis. Sisenna quid dicas, nescio: metuo insidias. Sputatilica, quid est hoc? sputa quid sit scio, tilica nescio. Maximi risus: sed ille tamen familiaris meus rectè loqui putabat esse, inusitatè loqui.*

LXXV. Cæsar autem rationem adhibens, consuetudinem vitiosam & corruptam purâ & incorruptâ consuetudine emendat. Itaque quum ad hanc elegantiam verborum Latinorum (quæ etiam si orator non sis, & sis ingenuus civis Romanus, tamen necessaria est) adjungit illa oratoria ornamenta dicendi; tum videtur tamquam tabulas bene pictas collocare in bono lumine. Hanc quum habeat præcipuam laudem in communibus, non video cui debeat cedere: splendidam quamdam, minimèque veteratoriam rationem dicendi tenet, voce, motu; formâ etiam magnificâ, & generosâ quodam modo.

262. Tum Brutus, Orationes quidem ejus mihi vehementer probantur; complures autem legi. Atque etiam commentarios quosdam scripsit rerum suarum. Valde quidem, inquam, probandos: nudi enim

sunt, recti & venusti, omni ornatu orationis, tamquam veste, detracto: sed dum voluit alios habere parata, unde sumerent, qui vellent scribere historiam; ineptis gratum fortasse fecit, qui volent illa calamistris inurere: sanos quidem homines a scribendo deterruit. Nihil enim est in historia, purâ & illustri brevitate dulcius. Sed ad eos, si placet, qui vitâ exceßerunt, revertamur.

LXXVI. C. Sicinius igitur, Q. Pompeii illius, qui censor fuit, ex filia nepos, quæstorius mortuus est, probabilis orator; jam verò etiam probatus, ex hac inopi ad ornandum, sed ad inveniendum expedita, Hermagoræ disciplina: ea dat rationes certas & præcepta dicendi; quæ si minorem habent apparatus, sunt enim exilia, tamen habent ordinem, & quasdam errare in dicendo non patientes vias. Has ille tenens, & paratus ad causas veniens, verborum non egens, ipsâ illâ comparatione disciplinæque dicendi jam in patronorum numerum pervenerat.

264. Erat etiam vir doctus in primis C. Visellius Varro, consobrinus meus, qui fuit cum Sicinio ætate conjunctus: is quum post curulem ædilitatem judex quæstionis esset, est mortuus: in quo fateor vulgi judicium a judicio meo dissensisse: nam populo non erat satis vendibilis: præceps

quædam, & quum idcirco obscura, quia peracuta, tum rapida, & celeritate cæcata oratio: sed neque verbis aptiorem citò alium dixerim, neque sententiis crebriorem. Præterea perfectus in litteris, jurisque civilis jam a patre Aculeone traditam tenuit disciplinam.

265. Reliqui sunt, qui mortui sint, L. Torquatus, quem tu non tam citò rethorem dixisses, etsi non deerat oratio, quàm, ut Græci dicunt, πολυλόγος. Erant in eo plurimæ litteræ; nec eæ vulgares, sed interiores quædam, & reconditæ; divina memoria, summa verborum & gravitas, & elegantia: atque hæc omnia vitæ decorabat dignitas & integritas. Me quidem admodum delectabat etiam Triarii, in illa ætate, plena litteratæ senectutis oratio: quanta severitas in vultu! quantum pondus in verbis! quàm nihil non consideratum exhibat ex ore!

266. Tum Brutus, Torquati & Triarii mentione commotus (utrumque enim eorum admodum dilexerat) Næ ego, inquit, ut omittam cetera, quæ sunt innumerabilia, de istis duobus quum cogito, doleo, nihil tuam perpetuam auctoritatem de pace valuisse! nam nec istos excellentes viros, nec multos alios præstantes cives respublica perdidisset. Sileamus, inquam, Brute, de istis, nec augeamus dolorem:

nam & præteritorum recordatio est acerba; & acerbior expectatio reliquorum. Itaque omittamus lugere, & tantum, quid quisque dicendo potuerit, quoniam id quærimus, prædicemus.

LXXVII. Sunt etiam ex iis, qui eodem bello occiderunt, M. Bibulus, qui & scriptitavit accuratè, quum præsertim non esset orator, & egit multa constanter: Appius Claudius, socer tuus, collega & familiaris meus; hic jam & satis studiosus, & valde quum doctus, tum etiam exercitatus orator, & quum auguralis, tum omnis publici juris, antiquitatisque nostræ bene peritus fuit. L. Domitius nullâ ille quidem arte, sed Latinè tamen, & multa cum libertate dicebat.

268. Duo præterea Lentuli consulares, quorum Publius ille, nostrarum injuriarum ultor, auctor salutis, quidquid habuit, quantumcumque fuit, illud totum habuit ex disciplina: instrumenta naturæ deerant; sed tantus animi splendor, & tanta magnitudo, ut sibi omnia, quæ clarorum virorum essent, non dubitaret adsciscere, eaque omni dignitate obtineret. L. autem Lentulus satis erat fortis orator, si modò orator, sed cogitandi non ferebat laborem: vox canora, verba non horrida sanè, ut plena esset animi & terroris oratio. Quæreret in judiciis fortasse melius: in republica,

republica, quod erat, esse judicares satis.

269. Ne T. quidem Postumius contemnendus in dicendo; de republica verò non minùs vehemens orator, quàm bellator fuit: effrenatus; & acer nimis, sed bene juris publici leges atque instituta cognoverat. Hoc loco Atticus, Putarem te, inquit, ambitiosum esse, si, ut dixisti, ii, quos jamdiu colligis, viverent. Omnes enim commemoras, qui ausi aliquando sunt stantes loqui, ut mihi imprudens M. Servilium præterisse videre.

LXXVIII. Non, inquam, ego istuc ignoro, Pomponi, multos fuisse, qui verbum numquam in publico fecissent, quum meliùs aliquanto possent, quàm isti oratores, quos colligo, dicere: sed his commemorandis etiam illud assequor, ut intelligatis, primùm ex omni numero, quàm non multi ausi sint dicere, deinde ex iis ipsis quàm pauci fuerint laude digni.

271. Itaque ne hos quidem equites Romanos, amicos nostros, qui nuper mortui sunt, P. Cominium Spoletinum, quo accusante defendi C. Cornelium, in quo & compositum dicendi genus, & acre, & expeditum fuit: T. Attium Pifaurem, cujus accusationi respondi pro A. Cluentio; qui & accuratè dicebat, & satis copiosè, eratque præterea doctus Hermagoræ præceptis; quibus etsi ornamenta non satis

opima dicendi, tamen, ut hastæ velitibus amentatæ, sic apta quædam & parata singulis causarum generibus argumenta traduntur.

272. Studio autem neminem, nec industriâ majore cognovi; quamquam ne ingenio quidem qui præstiterit, facilè dixerim, C. Pisoni, genero meo: nullum tempus illi umquam vacabat, aut a forensi dictione, aut a commentatione domestica, aut a scribendo, aut a cogitando: itaque tantos processus efficiebat, ut evolare, non excurrere videretur: eratque verborum & delectus elegans, & apta, & quasi rotunda constructio: quumque argumenta excogitabantur ab eo multa, & firma ad probandum, tum concinnæ acutæque sententiæ; gestusque naturâ ita venustus, ut ars etiam, quæ non erat, & e disciplina motus quidam videretur accedere: vereor, ne amore videar plura, quàm fuerint in illo, dicere; quod non ita est: alia enim de illo majora dici possunt: nam nec continentia, nec pietate, nec ullo genere virtutis quemquam ejusdem ætatis cum illo conferendum puto.

LXXIX. Nec verò M. Cœlium prætereundum arbitror, quæcumque ejus in exitu vel fortuna, vel mens fuit: qui quamdiu auctoritati meæ paruit, talis tribunus plebis fuit, ut nemo contra civium perditorum popularem, turbulentamque demen-

tiam, a senatu, & a bonorum causa steterit constantius; quam ejus actionem, multum tamen & splendida, & grandis, & eadem in primis faceta, & perurbana commendabat oratio. Graves ejus conciones aliquot fuerunt, acres accusationes tres, eæque omnes ex reipublicæ contentione susceptæ: defensiones, etsi illa erant in eo meliora, quæ dixi, non contemnendæ tamen, saneque tolerabiles. Hic quum summâ voluntate bonorum ædilis curulis factus esset, nescio quomodo discessu meo discessit a sese, ceciditque posteaquam eos imitari cœpit, quos ipse perverterat.

274. Sed de M. Calidio dicamus aliquid, qui non fuit orator unus e multis; potius inter multos propè singularis fuit; ita reconditas exquisitasque sententias mollis & pellucens vestiebat oratio: nihil tam tenerum, quàm illius comprehensio verborum; nihil tam flexibile; nihil, quod magis ipsius arbitrio fingeretur, ut nullius oratoris æquè in potestate fuerit: quæ primum ita pura erat, ut nihil liquidius; ita liberè fluebat, ut nusquam adhæresceret; nullum, nisi loco positum, & tamquam *in vermiculato emblemate*, ut ait Lucilius, structum verbum videres: nec verò ullum aut durum, aut insolens, aut humile, aut longiùs ductum; ac non propria verba rerum, sed pleraque tralata; sic tamen, ut

ea non irruisse in alienum locum, sed immigrasse in suum diceret: nec verò hæc soluta, nec diffluentia, sed adstricta numeris, non apertè, nec eodem modo semper, sed variè, dissimulanterque conclusis.

275. Erant autem & verborum & sententiarum illa lumina, quæ vocant Græci *σχηματα*, quibus tamquam insignibus in ornatu distinguebatur omnis oratio. Qua de re agitur autem, illud quod multis locis in jurisconsultorum includitur formulis, & ubi esset, videbat. Accedebat ordo rerum plenus artis, actio liberalis, totumque dicendi placidum, & sanum genus.

LXXX. Quòd si est optimum suaviter dicere; nihil est, quod melius hoc quærendum putes. Sed quum a nobis paulò antè dictum sit, tria videri esse, quæ orator efficere deberet, ut doceret, ut delectaret, ut moveret: duo summè tenuit, ut & rem illustraret differendo, & animos eorum, qui audirent, devinciret voluptate. Aberat tertia illa laus, quâ permoveret, atque incitaret animos, quam plurimum pollere diximus; nec erat ulla vis, atque contentio, sive consilio, quòd eos, quorum altior oratio, actioque esset ardentior, furere & bacchari arbitraretur; sive quòd naturâ non esset ita factus; sive quòd non consueisset; sive quòd non posset: hoc unum illi, si nihil utilitatis habebat, abfuit; si opus erat, defuit.

277. Quin etiam memini, quum in accusatione sua Q. Gallio crimini dedisset, sibi eum venenum paravisse, idque a se esse deprehensum, seseque chirographa, testificationes, indicia, quæstiones, manifestam rem deferre diceret, deque eo crimine accuratè & exquisitè disputavisset; me in respondendo, quum essem argumentatus, quantum res ferebat, hoc ipsum etiam posuisse pro argumento, quòd ille, quum pestem capitis sui, quum indicia mortis se comperisse manifestò & manu tenere diceret, tam solutè egisset, tam leniter, tam oscitanter.

278. *Tu istuc, M. Calidi, nisi fingeres, sic ageres? præsertim quum istâ eloquentiâ, alienorum hominum pericula defendere acerrimè soleas, tuum negligeres? ubi dolor? ubi ardor animi, qui etiam ex infantium ingeniis elicere voces, & querelas solet? nulla perturbatio animi, nulla corporis, frons non percussa, non femur; pedis, quod minimum est, nulla supplotio. Itaque tantum absuit, ut inflammares nostros animos; somnum isto loco vix tenebamus. Sic nos summi oratoris vel sanitate, vel vitio, pro argumento ad diluendum crimen usi sumus.*

279. Tum Brutus, Atqui dubitamus, inquit, utrùm ista sanitas fuerit, an vitium? quis enim non fateatur, quum ex omnibus oratoris laudibus longè ista sit maxima,

inflammare animos audientium, & , quocumque res postulet modo, flectere, qui hac virtute caruerit, id ei, quod maximum fuerit, defuisse?

LXXXI. Sit sanè ita, inquam: sed redeamus ad eum, qui jam unus restat, Hortensium: tum de nobismetipsis, quoniam id etiam, Brute, postulas, pauca dicemus: quamquam facienda mentio est, ut quidem mihi videtur, duorum adolescentium, qui si diutius vixissent, magnam essent eloquentiæ laudem consecuti.

280. C. Curionem te, inquit Brutus, & C. Licinium Calvum arbitror dicere. Rectè, inquam, arbitraris: quorum quidem alter, quod verisimile dixisset, ita facilè, solutèque verbisolvebat satis interdum acutas, crebras quidem certè sententias, ut nihil posset ornatius esse, nihil expeditius. Atque hic a magistris parum institutus, naturam habuit admirabilem ad dicendum: industriam non sum expertus; studium certè fuit: qui si me audire voluisset, ut cœperat, honores, quàm opes, consequi maluisset. Quidnam est, inquit, istud? & quemadmodum distinguis? Hoc modo, inquam.

281. Quum honos sit præmium virtutis, iudicio, studioque civium delatum ad aliquem, qui eum sententiis, qui suffragiis adeptus est, is mihi & honestus & hono-

ratus videtur. Qui autem occasione aliquâ, etiam invitis suis civibus, nactus est imperium, ut ille cupiebat; hunc nomen honoris, non honorem, adeptum puto. Quæ si ille audire voluisset, maxima cum gratia & gloria ad summam amplitudinem pervenisset, adscendens gradibus magistratuum, ut pater ejus fecerat, ut reliqui clariores viri. Quæ quidem etiam cum P. Crasso, M. filio, quum initio ætatis ad amicitiam se meam contulisset, sæpe egisse me arbitror, quum eum vehementer hortarer, ut eam laudis viam rectissimam esse duceret, quam majores ejus ei tritam reliquissent.

282. Erat enim quum institutus optimè, tum etiam perfectè, planèque eruditus: ineratque & ingenium satis acre, & orationis non inelegans copia: prætereaque sine arrogantia gravis esse videbatur, & sine segnitia verecundus. Sed hunc quoque absorbuit æstus quidam non insolitæ adolescentibus gloriæ: qui quia navarat miles operam imperatori, imperatorem se statim esse cupiebat: cui muneri mos majorum ætatem certam, sortem incertam reliquit. Ita gravissimo suo casu, dum Cyri & Alexandri similis esse voluit, qui suum cursum transcurrerant; & L. Grassi & multorum Crassorum inventus est dissimillimus.

LXXXII. Sed ad Calvum (is enim nobis erat propositus) revertamur: qui orator

fuiſſet quum litteris eruditior, quàm Curio; tum etiam accuratius quoddam dicendi & exquisitius afferebat genus : quod quamquam ſcienter, eleganterque tractabat, nimirum tamen inquirens in ſe, atque ipſe ſeſe obſervans, metuenſque ne vitioſum colligeret, etiam verum ſanguinem deperdebat. Itaque ejus oratio nimirum religione attenuata, doctis, & attentè audientibus erat illuſtris : a multitudine autem, & a foro, cui nata eloquentia eſt, devorabatur.

284. Tum Brutus, Atticum ſe, inquit, Calvus noſter dici oratorem volebat : inde erat iſta exilitas, quam ille de induſtria conſequebatur. Dicebat, inquam, ita : ſed & ipſe errabat, & alios etiam errare cogebat. Nam, ſi quis eos, qui nec ineptè dicunt, nec odioſè, nec putidè, Atticè putat dicere; iſ rectè, niſi Atticum, probat neminem : inſulſitatem enim & inſolentiam, tamquam infaniam quamdam orationis, odit; ſanitatem autem & integritatem, quaſi religionem & verecundiam oratoris probat : hæc omnium debet oratorum eadem eſſe ſententia.

285. Sin autem jejunitatem, & ſiccitatem, & inopiam, dummodo ſit polita, dum urbana, dum elegans, in Attico genere ponit; hoc rectè duntaxat : ſed quia ſunt in Atticis alia meliora, videat ne ignoret & gradus, & diſſimilitudines, & vim,

& varietatem Atticorum. Atticos, inquit, volo imitari. Quos? nec enim est unum genus. Nam quid est tam dissimile, quàm Demosthenes & Lysias? quàm idem, & Hyperides? quàm omnium horum Æschines? Quem igitur imitaris? Si aliquem; ceteri ergo Atticè non dicebant: si omnes; quì potes, quum sint ipsi dissimillimi inter se? In quo etiam illud quæro, Phalereus ille Demetrius Atticène dixerit? mihi quidem ex illius orationibus redolere ipsæ Athenæ videntur. At est floridior, ut ita dicam, quàm Hyperides, quàm Lysias: natura quædam, aut voluntas ita dicendi fuit.

LXXXIII. Et quidem duo fuerunt per idem tempus dissimiles inter se; sed Atticè tamen: quorum Charisius multas orationes scribebat aliis, quum cupere videretur imitari Lysiam: Demochares autem, quì fuit Demostheni sororis filius, & orationes scripsit aliquot, & earum rerum historiam, quæ erant Athenis ipsius ætate gestæ, non tam historico, quàm oratorio genere perscripsit. At Charisii vult Hegesias esse similis, isque se ita putat Atticum, ut veros illos præ se pene agrestes putet.

287. At quid est tam fractum, tam minutum, tam in ipsa, quam tamen consequitur, concinnitate puerile? Atticorum similes esse volumus. Optimè. Suntne igitur.

ii Attici oratores? Quis negare potest? Hos imitatur. Quo modo, qui sunt & inter se dissimiles, & aliorum? Thucydidem, inquit, imitatur. Optimè, si historiam scribere, non si causas dicere cogitatis. Thucydides enim rerum gestarum pronuntiator sincerus, & grandis etiam fuit: hoc forense concertatorium judiciale non tractavit genus: orationes autem, quas interposuit, multæ enim sunt, eas ego laudare soleo: imitari neque possim, si velim; nec velim fortasse, si possim: ut, si quis Falerno vino delectetur, sed eo nec ita novo, ut proximis consulibus natum velit; nec rursus ita vetere, ut Opimium, aut Anicium consulem quærat. Atqui eæ notæ sunt optimæ. Credo: sed nimia vetustas nec habet eam, quam quærimus, suavitatem, nec est jam sanè tolerabilis.

288. Num igitur qui hoc sentiat, si is potare velit, de dolio sibi hauriendum putet? Minimè: sed quamdam sequatur ætatem. Sic ego istis censuerim, & novam istam quasi de musto ac lacu fervidam orationem, fugiendam; nec illam præclaram Thucididi nimis veterem, tamquam Anicianam notam, persequendam. Ipse enim Thucydides si posterius fuisset, multò maturior fuisset, & mitior.

LXXXIV. Demosthenem igitur imitemur. O dii boni! quid, quæso, nos aliud

agimus, aut quid aliud optamus? At non assequimur. Isti enim videlicet Attici nostri, quod volunt, assequuntur. Ne illud quidem intelligunt, non modò ita memoriæ proditum esse, sed ita necesse fuisse, quum Demosthenes dicturus esset, ut concursus, audiendi causâ, ex tota Græcia fierent. At quum isti Attici dicunt, non modò a corona, quod est ipsum miserabile, sed etiam ab advocatis relinquuntur. Quare si angustè, & exiliter dicere, est Atticorum, sint sanè Attici: sed in comitium veniant, ad stantem judicem dicant. Subsellia grandiore, & plenior vocem desiderant.

290. Volo hoc oratori contingat, ut quum auditum sit eum esse dicturum, locus in subselliis occupetur, compleatur tribunal, gratiosi scribæ sint in dando & cedendo loco, corona multiplex, iudex erectus: quum surgit is, qui dicturus sit, significetur a corona silentium, deinde crebræ assensiones, multæ admirationes: risus, quum velit; quum velit, fletus: ut, qui hæc procul videat, etiamsi, quid agatur, nesciat; at placere tamen, & in scena esse Roscium intelligat. Hæc cui contingant, eum scito Atticè dicere, ut de Pericle audivimus, ut de Hyperide, ut de Æschine, de ipso quidem Demosthene maxime.

291. Sin autem acutum, prudens, & idem sincerum, & solidum, & exsiccatum

genus orationis probant, nec illo graviore ornatu oratorio utuntur, & hoc proprium esse Atticorum volunt; rectè laudant: est enim in arte tanta, tamque varia, etiam huic minutæ subtilitati locus: ita fiet, ut non omnes, qui Atticè, iidem bene; sed, ut omnes, qui bene, iidem etiam Atticè dicant. Sed redeamus rursus ad Hortensium.

LXXXV. Sanè quidem, inquit Brutus: quamquam ista mihi tua fuit perjucunda a proposita oratione digressio. Tum Atticus, Aliquoties sum, inquit, conatus, sed interpellare nolui. Nunc, quoniam ad perorandum spectare videtur sermo tuus, dicam, opinor, quod sentio. Tu verò, inquam, Tite. Tum ille, Ego, inquit, ironiam illam, quam in Socrate dicunt fuisse, quâ ille in Platonis, & Xenophontis, & Æschinis libris utitur, facetam & elegantem puto: est enim & minimè inepti hominis, & ejusdem etiam faceti, quum de sapientia disceptetur, hanc sibi ipsum detrachere, eis tribuere illudentem, qui eam sibi arrogant: ut apud Platonem Socrates in cœlum effert laudibus Protagoram, Hippiam, Prodicum, Gorgiam, ceteros; se autem omnium rerum inscium fingit & rudem: decet hoc nescio quomodo illum; nec Epicuro, qui id reprehendit, assentior. Sed in historia, qua tu es usus in omni sermone, quum qualis quisque orator fuisset

set, exponeres, vide, quæso, inquit, ne tam reprehendenda sit ironia, quàm in testimonio.

293. Quorsus, inquam, istuc? non enim intelligo. Quia primum, inquit, ita laudavisti quosdam oratores, ut imperitos posses in errorem inducere. Equidem in quibusdam risum vix tenebam, quum Attico Lysiae Catonem nostrum comparabas, magnum mehercule hominem, vel potius summum, & singularem virum: nemo dicet secus: sed oratorem? sed etiam Lysiae similem, quo nihil potest esse pictius? bella ironia, si jocaremur: sin asseveramus, vide, ne religio nobis tam adhibenda sit, quàm si testimonium diceremus.

294. Ego enim Catonem tuum, ut civem, ut senatorem, ut imperatorem, ut virum denique quum prudentiâ, & diligentia, tum omni virtute excellentem probabo: orationes autem ejus, ut illis temporibus, valde laudo: significant enim quamdam formam ingenii, sed admodum impolitam, & planè rudem. Origines verò quum omnibus oratoris laudibus refertas diceres, & Catonem cum Philisto & Thucydide comparares, Brutone te id censebas, an mihi probaturum? quos enim ne e Græcis quidem quisquam imitari potest, iis tu comparas hominem Tusculanum, nondum suspicantem quale esset copiosè & ornatè dicere.

LXXXVI. Galbam laudas : si ut illius ætatis principem , assentior ; sic enim accepimus : sin ut oratorem , cedo , quæso , orationes , sunt enim , & dic , hunc , quem tu plus , quàm te , amas , Brutum , velle te illo modo dicere. Probas Lepidi orationes : paulum hîc tibi assentior , modò ita laudes , ut antiquas : quod item de Africano , de Lælio , cujus tu oratione negas fieri quidquam posse dulcius. Addis etiam nescio quid augustius , nomine nos capi volens summi viri , vitæque elegantissimæ verissimis laudibus. Remove hæc : næ ista dulcis oratio ita sit abjecta , ut eam adspicere nemo velit.

296. Carbonem in summis oratoribus habitum scio : sed quum in ceteris rebus , tum in dicendo , semper , quo nihil est melius , id laudari , qualecumque est , solet. Dico idem de Gracchis : etsi de iis ea sunt a te dicta , quibus ego assentior. Omitto ceteros : venio ad eos , in quibus jam perfectam putas esse eloquentiam , quos ego audiui , sine controversia magnos oratores , Crassum & Antonium. De horum laudibus tibi prorsus assentior : sed tamen non isto modo , ut Polycleti Doriphorum sibi Lysippus aiebat , sic tu suasionem legis Serviliæ tibi magistram fuisse. Hæc germana ironia est. Cur ita sentiam , non dicam , ne me tibi assentari putes.

297. Omitto igitur, quæ de iis ipsis, quæ de Cotta, quæ de Sulpicio, quæ modò de Cœlio dixeris: ii enim fuerunt certè oratores: quanti autem, & quales, tu videris. Nam illud minùs curo, quod con-gessisti operarios omnes; ut mihi videan-tur mori voluisse nonnulli, ut a te in ora-torum numerum referrentur.

LXXXVII. Hæc quum ille dixisset; Longi sermonis initium pepulisti, inquam, Attice, remque commovisti, novâ dispu-tatione dignam, quam in aliud tempus dif-feramus. Volvendi enim sunt libri quum aliorum, tum in primis Catonis: intelli-ges, nihil illius lineamentis, nisi eorum pigmentorum, quæ inventa nondum erant, florem, & colorem defuisse. Nam de Cras-si oratione sic existimo, ipsum fortasse me-liùs potuisse scribere: alium, ut arbitror, neminem. Nec in hoc ironiam duxeris esse, quòd eam orationem mihi magistram fuisse dixerim: nam etsi tu meliùs existimare vi-deris de ea, si quam nunc habemus, fa-cultate; tamen, adolescentes quid in La-tinis potiùs imitemur, non habebamus.

299. Quòd autem plures a nobis nomi-nati sunt, eò pertinuit, ut paulò antè dixi, quòd intelligi volui, in eo, cujus omnes cupidissimi essent, quàm pauci digni no-mine evaderent. Quare εἰπαυα me, ne si Africanus quidem fuit, ut ait in historia sua C. Fannius, existimari velim.

300. Ut voles, inquit Atticus. Ego enim non alienum a te putabam, quod & in Africano fuisset, & in Socrate. Tum Brutus, De isto postea : sed tu, inquit, me intuens, orationes nobis veteres explicabis? Verò, inquam, Brute : sed in Cumanò, aut in Tusculano, aliquando, si modò licebit : quoniam utroque in loco vicini sumus. Sed jam ad id, unde digressi sumus, revertamur.

LXXXVIII. Hortensius igitur, quum admodum adolescens orsus esset in foro dicere, celeriter ad majores causas adhiberi cœptus est : quamquam inciderat in Cottæ, & Sulpicii ætatem, qui annis decem majores, eccellente tum Crasso, & Antonio, deinde Philippo, post Julio, cum iis ipsis dicendi gloriâ comparabatur. Primùm memoria tanta, quantam in nullo cognovisse me arbitror, ut, quæ secum commentatus esset, ea sine scripto verbis eisdem redderet, quibus cogitavisset : hoc adjumento ille tanto sic utebatur, ut sua & commentata, & scripta, &, nullo referente, omnia adversariorum dicta meminisset.

302. Ardebat autem cupiditate sic, ut in nullo umquam flagrantius studium viderim : nullum enim patiebatur esse diem, quin aut in foro diceret, aut medicaretur extra forum : sæpissime autem eodem die

utrumque faciebat. Attuleratque minimè vulgare genus dicendi : duas quidem res , quas nemo alius ; partitiones , quibus de rebus dicturus esset , & collectiones , memor & quæ essent dicta contrà , quæque ipse dixisset.

303. Erat in verborum splendore elegans , compositione aptus , facultate copiosus ; eaque erat quum summo ingenio , tum exercitationibus maximis consecutus : rem complectebatur memoriter , dividebat acutè , nec prætermittebat ferè quidquam , quod esset in causa , aut ad confirmandum , aut ad refellendum : vox canora & suavis : motus & gestus etiam plus artis habebat , quàm erat oratori satis. Hoc igitur florescente, Crassus est mortuus , Cotta pulsus , judicia intermissa bello , nos in forum venimus.

LXXXIX. Erat Hortensius in bello , primo anno miles , altero tribunus militum : Sulpicius legatus aberat , etiam M. Antonius : exercebatur unâ lege iudicium Variâ , ceteris propter bellum intermissis : qui frequentes aderant , quamquam pro se ipsi dicebant , oratores non illi quidem principes L. Memmius , & Q. Pompeius , sed oratores tamen , teste diserto uterque Philippo , cujus in testimonio contentio & vim accusatoris habebat , & copiam.

305. Reliqui , qui tum principes nume-

rabantur, in magistratibus erant, quotidieque ferè a nobis in concionibus audiebantur. Erat enim tribunus plebis tum C. Curio : quamquam is quidem silebat, ut erat semel a concione universa relictus. Q. Metellus Celer, non ille quidem orator, sed tamen non infans; disertum autem Q. Varius, C. Carbo, Cn. Pomponius : & ii quidem habitabant in rostris. C. etiam Julius, ædilis curulis, quotidie ferè accuratas conciones habebat. Sed me cupidissimum audiendi primus dolor percussit, Cotta quum est expulsus : reliquos frequenter audiens acerrimo studio tenebar, quotidieque & scribens & legens, & commentans, oratoriis tamen exercitationibus contentus non eram. Jam consequente anno Q. Varius suâ lege damnatus excefferat.

306. Ego autem, juris civilis studio, multum operæ dabam Q. Scævola, P. filio, qui quamquam nemini se ad docendum dabat, tamen, consulentibus respondendo, studiosos audiendi docebat. Atque huic anno proximus Sullâ consule, & Pompeio fuit : tum P. Sulpicii in tribunatu quotidie concionantis totum genus dicendi penitus cognovimus : eodemque tempore quum princeps Academiæ Philo cum Atheniensium optimatibus Mithridatico bello domo profugisset, Romamque venisset, totum ei me tradidi, admirabili quodam ad philosophiam

studio concitatus ; in quo hòc etiam commorabar attentius , quòd , etsi rerum ipsarum varietas & magnitudo summâ me delectatione retinebat , tamen sublata jam esse in perpetuum ratio judiciorum videbatur. Occiderat Sulpicius illo anno , tresque proximo trium ætatum oratores erant crudelissimè interfecti , Q. Catulus , M. Antonius , C. Julius. Eodem anno etiam Moloni Rhodio Romæ dedimus operam , & actori summo caufarum , & magistro.

XC. Hæc etsi videntur esse a propositâ ratione diversa , tamen idcirco a me proferuntur , ut nostrum cursum perspicere , quoniam voluisti , Brute , possis (nam Attico hæc nota sunt) & videre , quemadmodum simus in spatio Q. Hortensium ipsius vestigiis persecuti.

308. Triennium ferè fuit urbs sine armis , sed oratorum aut interitu , aut discessu , aut fugâ (nam aberant etiam adolescentes M. Crassus , & Lentuli duo) primas in causis agebat Hortensius ; magis magisque quotidie probabatur. Antistius , Piso sæpe dicebant ; minùs sæpe Pomponius ; rarò Carbo ; semel aut iterum Philippus. At verò ego hoc tempore omni noctes & dies in omnium doctrinarum meditatione versabar.

309. Eram cum stoico Diodoto ; qui quum habitavisset apud me , mecumque vi-

xisset, nuper est domi meæ mortuus: a quo quum in aliis rebus, tum studiosissimè in dialectica exercebar; quæ quasi contracta, & adstricta eloquentia putanda est: sine qua etiam tu, Brute, judicavisti, te illam justam eloquentiam, quam dialecticam dilatatam esse putant, consequi non posse. Huic ego doctori, & ejus artibus variis atque multis ita eram tamen deditus, ut ab exercitationibus oratoriis nullus dies vacuus esset.

310. Commentabar declamitans (sic enim nunc loquuntur) sæpe cum M. Pione, & cum Q. Pompeio, aut cum aliquo quotidie; idque faciebam multum etiam Latinè, sed Græcè sæpius: vel quod Græca oratio plura ornamenta suppeditans, consuetudinem similiter Latinè dicendi affererat; vel quod a Græcis summis doctoribus, nisi Græcè dicerem, neque corrigi possem, neque doceri.

311. Tumultus interim pro recuperanda republica: & crudelis interitus oratorum trium, Scævolæ, Carbonis, Antistii: reditus Cottæ, Curionis, Crassi, Lentulorum, Pompeii: leges & judicia constituta: recuperata respublica: ex numero autem oratorum Pomponius, Censorinus, Murena sublati. Tum primùm nos ad causas & privatas, & publicas adire cœpimus, non ut in foro disceremus, quod plerique fe-

cērunt, sed ut, quantū nos efficere potuissemus, docti in forum veniremus.

312. Eodem tempore Moloni dedimus operam. Dictatore enim Sullā, legatus ad senatum de Rhodiorum præmiis venerat. Itaque prima causa publica, pro Sex. Roscio dicta, tantū commendationis habuit, ut non ulla esset, quæ non digna nostro patrocínio videretur. Deinceps inde multæ, quas non minùs diligenter elaboratas & tamquam elucubratas afferebamus.

XCI. Nunc, quoniam totum me non nævo aliquo, aut crepundiis, sed corpore omni videris velle cognoscere, complectar nonnulla etiam, quæ fortasse videantur minùs necessaria. Erat eo tempore in nobis summa gracilitas & infirmitas corporis: procerum & tenue collum; qui habitus, & quæ figura non procul abesse putatur a vitæ periculo, si accedit labor, & laterum magna contentio. Eoque magis hoc eos, quibus eram carus, commovebat, quòd omnia sine remissione, sine varietate, vi summâ vocis, & totius corporis contentione dicebam.

314. Itaque quum me & amici & medici hortarentur, ut causas agere desisterem; quodvis potius periculum mihi adeundum, quàm a sperata dicendi gloria discedendum putavi. Sed, quum censerem, remissione & moderatione vocis, & commutato gene-

re dicendi, me & periculum vitare posse, & temperatiùs dicere : ut consuetudinem dicendi mutarem, ea causa mihi in Asiam proficiscendi fuit. Itaque quum essem biennium versatus in causis, & jam in foro celebratum meum nomen esset, Româ sum profectus.

315. Quum venissem Athenas, sex menses cum Antiocho, veteris Academiae nobilissimo & prudentissimo philosopho, fui, studiumque philosophiae numquam intermissum, a primaque adolescentia cultum & semper auctum, hoc rursus summo auctore, & doctore renovavi. Eodem tamen tempore Athenis apud Demetrium Syrum, veterem, & non ignobilem dicendi magistrum, studiosè exerceri solebam. Post a me Asia tota peragrata est, cum summis quidem oratoribus, quibuscum exercebar ipsis lubentibus, quorum erat princeps Menippus Stratonicensis, meo iudicio, totâ Asiâ, illis temporibus, disertissimus, &, si nihil habere molestiarum, nec ineptiarum, Atticorum est, hic orator in illis numerari rectè potest.

316. Assiduissimè autem mecum fuit Dionysius Magnes : erat etiam Æschylus Cnidius, Adramytenus Xenocles : hi tum in Asia rhetorum principes numerabantur. Quibus non contentus, Rhodum veni, meque ad eundem, quem Romæ audi-

veram, Molonem, applicavi, quum actorem in veris causis, scriptoremque præstantem, tum in notandis animadvertendisque vitiis, & instituendo docendoque prudentissimum. Is dedit operam, si modò id consequi potuit, ut nimis redundantes nos, & superfluentes juvenili quadam dicendi impunitate & licentiâ, reprimeret, & quasi extra ripas diffuentes coaceret. Ita recepi me biennio post, non modò exercitior, sed propè mutatus: nam & contentio nimia vocis reciderat, & quasi deferbuerat oratio, lateribusque vires, & corpori mediocris habitus accesserat.

XCII. Duo tum excellabant oratores, qui me imitandi cupiditate incitarent, Cotta, & Hortensius: quorum alter remissus & lenis, & propriis verbis comprehendens solutè & facilè sententiam; alter ornatus, acer, & non talis, qualem tu eum, Brute, jam deflorescentem cognovisti, sed verborum, & actionis genere commotior. Itaque cum Hortensio mihi magis arbitrabar rem esse, quòd & dicendi ardore eram propior, & ætate conjunctior. Etenim videram in iisdem causis, ut pro M. Canuleio, pro Cn. Dolabella consulari, quum Cotta princeps adhibitus esset, priores tamen agere partes Hortensium. Acrem enim oratorem, incensum, & agentem, & canorum, concursus hominum, forique strepitus desiderat.

318. Unum igitur annum, quum rediissemus ex Asia, causas nobiles egimus, quum quæsturam nos, consulatum Cotta, ædilitatem peteret Hortensius. Interim me quæstorem Siciliensis excepit annus: Cotta ex consulatu est profectus in Galliam: princeps & erat & habebatur Hortensius. Quum autem anno post e Sicilia me recepissem, jam videbatur illud in me, quidquid esset, esse perfectum, & habere maturitatem quamdam suam. Nimis multa videor de me, ipse præsertim; sed omni huic sermoni propositum est, non ut ingenium, & eloquentiam meam perspicias, undè longè absuam, sed ut laborem, & industriam. Quum igitur essem in plurimis causis, & in principibus patronis quinquennium ferè versatus, tum in patrocinio Siciliensi maximè in certamen veni designatus ædilis cum designato consule Hortensio.

XCIII. Sed quoniam omnis hic sermo noster non solum enumerationem oratoriam, verum etiam præcepta quædam desiderat; quid tamquam notandum, & animadvertendum sit in Hortensio, breviter licet dicere.

320. Nam is post consulatum (credo quòd videret, ex consularibus neminem esse secum comparandum, negligeret autem eos qui consules non fuissent) summum illud suum

suum studium remisit, quo a puero fuerat incensus, atque in omnium rerum abundantia voluit beatiùs, ut ipse putabat, remissiùs certè, vivere. Primus, & secundus annus, & tertius tantùm quasi de picturæ veteris colore detraxerat, quantùm non quivis unus ex populo, sed existimator doctus, & intelligens posset cognoscere. Longiùs autem procedens, quum in ceteris eloquentiæ partibus, tum maximè in celeritate & continuatione verborum adhærescens, sui dissimilior videbatur fieri quotidie.

321. Nos autem non desistebamus, quum omni genere exercitationis, tum maximè stilo, nostrum illud, quod erat, augere, quantumcumque erat. Atque, ut multa omittam, in hoc spatio, & in iis post ædilitatem annis, & prætor primus, & incredibili populari voluntate sum factus. Nam quum propter assiduitatem in causis & industriam, tum propter exquisitius, & minimè vulgare orationis genus, animos hominum ad me dicendi novitate converteram.

322. Nihil de me dicam : dicam de ceteris, quorum nemo erat, qui videretur exquisitiùs, quàm vulgus hominum, studuisse litteris, quibus fons perfectæ eloquentiæ continetur : nemo, qui philosophiam complexus esset, matrem omnium bene

factorum, beneque dictorum: nemo, qui jus civile didicisset, rem ad privatas causas, & ad oratoris prudentiam, maximè necessariam: nemo qui memoriam rerum Romanarum teneret, ex qua, si quando opus esset, ab inferis locupletissimos testes excitaret: nemo, qui breviter, argutèque, incluso adversario, laxaret iudicum animos, atque a severitate paulisper ad hilaritatem, risumque traduceret: nemo, qui dilatare posset, atque a propria ac definita disputatione hominis, ac temporis, ad communem quæstionem universi generis orationem traduceret: nemo, qui delectandi gratiâ digredi parumper a causa; nemo, qui ad iracundiam magnopere iudicem, nemo, qui ad fletum posset adducere: nemo, qui animum ejus (quod unum est oratoris maximè proprium) quocumque res postularet, impelleret.

XCIV. Itaque, quum jam pene evanisset Hortensius, & ego anno meo, sexto autem post illum consulem, consul factus essem, revocare se ad industriam cœpit; ne, quum pares honore essemus, aliquâ re superiores videremur. Sic duodecim post meum consulatum annos in maximis causis, quum ego mihi illum, sibi me ille anteferebat, conjunctissimè versati sumus; consulatusque meus, qui illum primò leviter perstrinxerat, idem nos rerum mearum

gestarum , quas ille admirabatur , laude conjunxerat.

324. Maximè verò perspecta est utriusque nostrum exercitatio paulò antè , quàm perterritum armis hoc studium , Brute , nostrum conticuit subitò , & obmutuit ; quum lege Pompeiâ ternis horis ad dicendum datis , ad causas simillimas inter se , vel potiùs easdem , novi veniebamus quotidie : quibus quidem causis tu etiam , Brute , præstò fuisti , compluresque & nobiscum , & solus egisti : ut qui non satis diu vixerit Hortensius , tamen hunc cursum confecerit. Annis antè decem causas agere cœpit , quàm tu es natus : idem quarto & sexagesimo anno , perpaucis ante mortem diebus , unà tecum socerum tuum defendit Appium. Dicendi autem genus , quod fuerit in utroque , orationes utriusque etiam posteris nostris indicabunt.

XCV. Sed , si quærimus , cur adolescens magis floruerit dicendo , quàm senior Hortensius ; causas reperiemus verissimas duas. Primùm , quòd genus erat orationis Asiaticum , adolescentiæ magis concessum , quàm senectuti. Genera autem Asiaticæ dictionis duo sunt : unum sententiosum & argutum , sententiis non tam gravibus & severis , quàm concinnis & venustis : qualis in historia Timæus ; in dicendo autem , pueris nobis , Hierocles Alabandeus , ma-

gis etiam Menecles, frater ejus, fuit; quorum utriusque orationes sunt in primis, ut Asiatico in genere, laudabiles. Aliud autem genus est non tam sententiis frequentatum, quàm verbis volucre, atque incitatum; quali est nunc Asia tota; nec flumine solum orationis, sed etiam exornato, & faceto genere verborum: in quo fuit Æschylus Cnidius, & meus æqualis Milesius Æschines. In iis erat admirabilis orationis cursus, ornata sententiarum concinnitas non erat.

326. Hæc autem, ut dixi, genera dicendi aptiora sunt adolescentibus: in senibus gravitatem non habent. Itaque Hortensius utroque genere florens, clamores faciebat adolescens. Habebat enim & Meneclium illud studium crebrarum, venustarumque sententiarum; in quibus, ut in illo Græco, sic in hoc, erant quædam magis venustæ, dulcesque sententiæ, quàm aut necessariae, aut interdum utiles. Et erat oratio quum incitata, & vibrans, tum etiam accurata & polita. Non probantur hæc senibus. Sæpe videbam quum iridentem, tum etiam irascentem & stomachantem Philippum; sed mirabantur adolescentes, multitudo movebatur.

327. Erat excellens judicio vulgi, & facile primas tenebat adolescens. Etsi enim genus illud dicendi auctoritatis habebat pa-

rum, tamen aptum esse ætati videbatur; & certè, quòd & ingenii quædam forma lucebat, & exercitatione perfectæ erat, verborumque adstricta comprehensio, summam hominum admirationem excitabat. Sed, quum jam honores, & illa senior auctoritas gravius quiddam requireret, remanebat idem, nec decebat idem; quòdque exercitationem, studiumque dimiserat, quod in eo fuerat acerrimum, concinnitas illa, crebritasque sententiarum pristina manebat, sed ea vestitu illo orationis, quo consueverat, ornata non erat: hoc tibi ille, Brute, minùs fortasse placuit, quàm placuisset, si illum flagrantem studio & florentem facultate audire potuisses.

XCVI. Tum Brutus, Ego verò, inquit, & ista, quæ dicis, video qualia sint, & Hortensium magnum oratorem semper putavi, maximèque probavi pro Messalla dicentem, quum tu abfuisti. Sic ferunt, inquam, idque declarat totidem, quot dixit, ut aiunt, scripta verbis oratio. Ergo ille a Crasso consule & Scævola usque ad Paulum & Marcellum consules floruit: nos in eodem cursu fuimus a Sulla dictatore ad eosdem ferè consules. Sic Q. Hortensii vox extincta fato suo est, nostra publico.

329. Meliùs, quæso, ominare, inquit Brutus. Sit sanè ut vis, inquam; & id non tam meâ causâ, quàm tuâ: sed fortuna-

tus illius exitus, qui ea non vidit quum fierent, quæ providit futura. Sæpe enim inter nos impendentes casus deflevimus, quum belli civilis causas in privatorum cupiditatibus inclusas, pacis spem a publico consilio esse exclusam videremus. Sed illum videtur felicitas ipsius, quâ semper est usus, ab eis miseriis, quæ consecutæ sunt, morte vindicavisse.

. 330. Nos autem, Brute, quoniam post Hortensii, clarissimi oratoris, mortem orbæ eloquentiæ quasi tutores relictî sumus, domi teneamus eam septam liberali custodiâ; & hos ignotos atque impudentes procos repudiemus, tueamurque, ut adultam virginem, castè; & ab armatorum impetu, quantum possumus, prohibeamus. Equidem, etsi doleo me in vitam paulò seriùs, tamquam in viam, ingressum, priusquam confectum iter sit, in hanc reipublicæ noctem incidisse: tamen eâ consolatione sustentor, quam tu mihi, Brute, adhibuisti tuis suavissimis litteris; quibus me forti animo esse oportere censebas, quòd ea gessissem, quæ de me, etiam me tacente, ipsa loquerentur, mortuoque viverent. Quæ, si rectè esset, salute reipublicæ; sin secus, interitu ipso, testimonium meorum de republica consiliorum darent.

XCVII. Sed in te intuens, Brute, doleo; cujus in adolescentiam, per medias

laudes quasi quadrigis vehentem, transversa incurrit misera fortuna reipublicæ: hic me dolor tangit, hæc me cura sollicitat, & hunc mecum, socium ejusdem & amoris & judicii. Tibi favemus, te tuâ frui virtute cupimus: tibi optamus eam rempublicam, in qua duorum generum amplissimorum renovare memoriam, atque augere possis. Tuum enim forum, tuum erat illud curriculum: tu illuc veneras unus, qui non linguam modò acnisses exercitatione dicendi, sed & ipsam eloquentiam locupletavisses graviorum artium instrumento, & iisdem artibus decus omne virtutis cum summa eloquentiæ laude junxisses.

332. Ex te duplex nos afficit sollicitudo, quòd & ipse republicâ careas, & illa te. Tu tamen (etsi cursum ingenii tui, Brute, premit hæc importuna clades civitatis) contine te in tuis perennibus studiis, & effice id, quod jam propemodum, vel planè potius effeceras, ut te eripias ex ea, quam ego congeffi in hunc sermonem, turba patronorum. Nec enim decet te, ornatum uberrimis artibus, quas quum domo haurire non posses, arcessivisti ex urbe ea, quæ domus est semper habita doctrinæ, numerari in vulgo patronorum. Nam quid te exercuit Pammenes, vir longè eloquentissimus Græciæ? quid illa vetus Academia, atque ejus heres Aristus, hospes, & fami-

512 *DE CLARIS ORATORIBUS.*

liaris meus, si quidem similes majoris partis oratorum futuri sumus?

333. Nonne cernimus, vix singulis ætatibus binos oratores laudabiles constitisse? Galba fuit inter tot æquales unus excellens, cui, quemadmodum accepimus, & Cato cedebat senior, & qui temporibus illis ætate inferiores fuerunt, Lepidus postea, deinde Carbo: nam Gracchi in concionibus multò faciliore, & liberiore genere dicendi; quorum tamen ipsorum ad ætatem laus eloquentiæ perfecta nondum fuit: Antonius, Crassus, post Cotta, Sulpicius, Hortensius: nihil dico amplius: tantum dico, si mihi accidisset, ut numerarer in multis*** si operosa est concursatio magis opportu-
norum***.



M. T. CICERONIS

D E

OPTIMO GENERE ORATORUM.

HÆC est præfatio, quam Cicero conversis a se ex Græco in Latinum sermonem orationibus Æschinis & Demosthenis in Ctesiphontem & pro Ctesiphonte præmisit. Quo consilio id fecerit, quum ex ipsa scriptione intelligi potest, tum ex Quinctiliano lib. 10, 10. scilicet ut eorum reprehensiones dilueret, qui ipsius dicendi genus nimis redundans, & Asianum, atque vitiosum esse dicebant. Ostendit ergo plerosque, quid sit Atticè dicere, nescire, atque optimum dicendi genus esse Atticum, hoc est, quod tenuia subtiliter, mediocria mediocriter, summa graviter tractet. Hæc ERNESTUS. At Manutius exis-

*timat librum hunc esse, sed mutilum ;
& illam partem de conversis duabus
Græcis orationibus nullam cum hoc li-
bro societatem habere. Nam in parte,
quæ ad oratores pertinet, oratio signi-
ficatur pro Milone habita, Cicerone
jam senescente. Duas autem illas ora-
tiones non senior, sed potius adoles-
cens convertisse Cicero videtur.*





D E

OPTIMO GENERE ORATORUM.

I. **O**RATORUM genera esse dicuntur tamquam poëtarum : id secus est : nam alterum est multiplex. Poëmatis enim tragici, comici, épici, melici etiam, ac dithyrambici, quòd magis est tractatum a Latinis, suum quodvis est diversum a reliquis genus. Itaque & in tragœdia comicum vitiosum est, & in comoedia turpe tragicum : & in ceteris suus est cujusque certus sonus, & quædam intelligentibus nota vox.

2. Oratorum autem si quis ita numerat plura genera, ut alios grandes, aut graves, aut copiosos ; alios tenues, aut subtiles, aut breves ; alios eis interjectos, & tamquam medios putet : de hominibus dicet aliquid, de re parum. In re enim, quod optimum sit, quæritur : in homine dicitur, quod est. Itaque licet dicere & En-

ciens, numerum & lenitatem : & sententiæ suam compositionem habent, & ad probandam rem accommodatum ordinem. Sed earum omnium rerum, ut ædificiorum, memoria est quasi fundamentum, lumen actio.

6. Ea igitur omnia in quo summa, erit orator peritissimus : in quo media, mediocris ; in quo minima, deterrimus. Et appellabuntur omnes, oratores ; ut pictores appellantur etiam mali : nec generibus inter sese, sed facultatibus different. Itaque nemo est orator, qui se Demosthenis similem esse nolit : at Menander, Homeri noluit : genus enim erat aliud. Id non est in oratoribus ; aut si est, ut alius gravitatem sequens, subtilitatem fugiat ; contra alius acutior se, quàm ornatior, velit : etiam si est in genere tolerabili, certè non est in optimo : siquidem, quod omnes laudes habet, id est optimum.

III. Hæc dixi brevius equidem, quàm res petebat : sed ad id, quod agimus, non fuit dicendum pluribus. Unum enim quum sit genus, id quale sit, quærimus. Est autem tale, quale floruit Athenis, ex quo Atticorum oratorum ipsa vis ignota est, nota gloria. Nam alterum multi viderunt, vitiosi nihil apud eos : alterum pauci, laudabilia esse multa. Est enim vitiosum in sententia, si quid absurdum, aut alienum, aut non acu-

518 DE OPTIMO GENERE

tum, aut subinsulsum est: in verbis, si inquinatum, si abjectum, si non aptum, si durum, si longè petium.

8. Hæc vitaverunt ferè omnes, qui aut Attici numerantur, aut dicunt Atticè. Sed qui eatenus valuerunt, fani & sicci duntaxat habeantur, sed ita, ut palæstricè spatium in xisto iis liceat, non ab Olympiis coronam petant. Qui quum careant omni vitio, non sunt contenti quasi bonâ valetudine, sed vires, lacertos, sanguinem quærunt, quamdam etiam suavitatem coloris; eos imitemur, si possumus: sin minus, illos potiùs, qui incorruptâ sanitate sunt, quod est proprium Atticorum, quàm eos, quorum vitiosa abundantia est, quales Asia multos tulit.

IV. Quod quum faciemus (si modò id ipsum assequemur: est enim permagnum) imitemur, si poterimus, Lysiam, & ejus quidem tenuitatem potissimum. Est enim multis in locis grandior: sed quia & privatas ille plerasque, & eas ipsas aliis, & parvarum rerum causulas scripsit, videtur esse jejunior, quoniam se ipse consultò ad minutarum genera causarum limaverit. Quod qui ita faciet, ut, si cupiat uberius esse, non possit, habeatur sanè orator, sed de minoribus: magno autem oratori etiam illo modo sæpe dicendum est in tali genere causarum.

10. Ita fit ut Demosthenes certè possit sum-
missè dicere : elatè Lysias fortasse non pos-
sit. Sed si eodem modo putant, exercitu
in foro, & in omnibus templis, quæ cir-
cum forum sunt, collocato, dici pro Mi-
lone decuisse, ut si de re privata ad unum
judicem diceremus; vim eloquentiæ suâ
facultate, non rei naturâ, metiuntur.

11. Quare quoniam nonnullorum sermo
jam increbuit, partim seipsos Atticè dicere,
partim neminem nostrum dicere : alteros
negligamus. Satis enim his res ipsa respon-
det; quum aut non adhibeantur ad causas,
aut adhibiti derideantur. Nam si arridean-
tur, esset idipsum Atticorum. Sed qui dici
a nobis Attico more nolunt, ipsi autem se
non oratores esse profitentur, si teretes
aures habent, intelligensque judicium;
tamquam ad picturam probandam, adhiben-
tur etiam inscii faciendi cum aliqua soler-
tia judicandi.

12. Sin autem intelligentiam ponunt in
audiendi fastidio, neque eos quidquam ex-
celsum magnificumque delectat: dicant se
subtile quiddam & politum velle, grave
ornatumque contemnere: id verò desinant
dicere, qui subtiliter dicunt, eos solos Atticè
dicere, id est, quasi siccè, & integrè. At si
amplè, & ornatè, & copiosè cum eadem
integritate, Atticorum est: quid? dubium est,
utrùm orationem nostram tolerabilem tan-
tùm, an etiam admirabilem esse cupiamus?

Non enim jam quærimus, quid sit Atticè, sed quid sit optimè dicere.

13. Ex quo intelligitur, quoniam Græcorum oratorum præstantissimi sunt ii, qui fuerunt Athenis; eorum autem princeps facilè Demosthenes: hunc si quis imitetur, eum & Atticè dicturum, & optimè: ut, quoniam Attici nobis propositi sunt ad imitandum, bene dicere, id sit Atticè dicere.

V. Sed quum in eo magnus error esset, quale esset id dicendi genus; putavi mihi suscipiendum laborem, utilem studiosis, mihi quidem ipsi non necessarium. Converte enim ex Atticis, duorum eloquentissimorum nobilissimas orationes inter se contrarias, Æschinis, Demosthenisque: nec converti ut interpres, sed ut orator, sententiis iisdem, & earum formis, tamquam figuris, verbis ad nostram consuetudinem aptis: in quibus non verbum pro verbo necesse habui reddere, sed genus omnium verborum, vimque servavi. Non enim ea me annumerare lectori putavi oportere, sed tamquam appendere.

15. Hic labor meus assequetur, ut nostri homines, quid ab illis exigant, qui se Atticos volunt, & ad quam eos quasi formulam dicendi revocent, intelligant. Sed exorietur Thucydides: ejus enim quidam eloquentiam admirantur. Id quidem rectè: sed nihil ad eum oratorem, quem quærimus. Aliud est enim explicare res gestas

narrando, aliud argumentando criminari, crimenve dissolvere: aliud narratione tenere auditorem, aliud concitare. At loquitur pulchrè. Num meliùs, quàm Plato? Necessè tamen est oratori, quem quærimus, controversias explicare forenses dicendi genere apto ad docendum, ad delectandum, ad permovendum.

VI. Quare si quis erit, qui Thucydidio genere causas in foro dicturum se esse profiteatur, is abhorreat etiam a suspitione ejus, quæ versatur in re civili & forensi: qui Thucydidem laudavit, adscribat suæ nostram sententiam.

17. Quin ipsum Isocratem, quem divinus auctor Plato suum ferè æqualem admirabiliter in Phædro laudari fecit a Socrate, quemque omnes docti summum oratorem esse dixerunt: tamen hunc in numero non repono. Non enim in acie versatur, & ferro; sed quasi rudibus ejus eludit oratio. A me autem, ut cum maximis minima conferam, gladiatorum par nobilissimum inducitur. *Æschines*, tamquam *Æserinus*, ut ait Lucilius, non *spurcus homo*, sed doctus & acer,

Cum Placidejano hic componitur, optimu' longè

Post homines natos:

Nihil enim illo oratore arbitror cogitari posse divinius.

18. Huic labori nostro duo genera reprehensorum opponuntur : unum hoc, Verum melius Græci. A quo quærat, equid possint ipsi melius Latine. Alterum, Quid istas potius legam, quàm Græcas? Nec Andromacham igitur, aut Antiopam, aut Epigonos Latinos recipiant. Sed tamen Ennium, & Pacuvium, & Accium potius, quàm Euripidem & Sophoclem legunt. Idem Andriam, & Synephebos : nec minùs Terentium, & Cæcilium, quàm Menandrum legunt. Quod igitur est eorum, in orationibus e Græco conversis, fastidium, nullum quum sit in versibus?

VII. Sed aggrediamur jam quod suscepimus, si priùs exposuerimus, quæ causa in iudicium deducta sit. Quum esset lex Athenis, *Ne quis populi scitum faceret, ut quisquam coronâ donaretur in magistratu priùs, quàm rationes retulisset* : & altera lex, *Eos, qui a populo donarentur, in concione donari debere : qui a senatu, in senatu* : Demosthenes curator muris reficiendis fuit, eosque refecit pecuniâ suâ. De hoc igitur Ctesiphon scitum fecit, nullis ab ipso rationibus relatis, ut coronâ aureâ donaretur; eaque donatio fieret in theatro, populo convocato ; qui locus non est concionis legitimæ : atque ita prædicaretur, EUM DONARI VIRTUTIS ERGO, BENEVOLENTIÆQUE, QUAM ERGA

POPULUM ATHENIENSEM HABERET.

20. Hunc igitur Ctesiphontem in iudicium adduxit Æschines, quòd contra leges scripsisset, ut & rationibus non relatis coronâ donaretur, & ut in theatro, & quòd de virtute ejus, & benevolentia, falsa scripsisset; quoniam Demosthenes nec vir bonus esset, nec bene meritus de civitate. Causa ipsa abhorret illa quidem a formula consuetudinis nostræ: sed est magna. Habet enim & legum interpretationem satis acutam in utramque partem, & meritorum in rempublicam contentionem sanè gravem.

21. Itaque causa fuit Æschini, quoniam ipse a Demosthene esset capitis accusatus, quòd legationem e mentitus esset, ut ulciscendi inimici causâ, nomine Ctesiphontis, iudicium fieret de factis famaue Demosthenis. Non enim tam multa dixit de rationibus non relatis, quàm de eo, quòd civis improbus, ut optimus, laudatus esset.

22. Hanc multam Æschines a Ctesiphonte petiit quadriennio ante Philippi Macedonis mortem: sed iudicium factum est aliquot annis pòst, Alexandro jam Asiam tenente: ad quod iudicium concursus dicitur e tota Græcia factus esse. Quid enim aut tam visendum, aut audiendum fuit, quàm summorum oratorum in gravissima

524 *DE OPTIMO GENERE, &c.*

causa, accurata, & inimicitis incensa contentio?

23. Quorum ego orationes si, ut spero, ita expressero, virtutibus utens illorum omnibus, id est, sententiis, & earum figuris, & rerum ordine, verba persequens eatenus, ut ea non abhorreant a more nostro (quæ si e Græcis omnia conversa non erunt, tamen ut generis ejusdem sint, elaboravimus) erit regula, ad quam eorum dirigantur orationes, qui Atticè volunt dicere. Sed de nobis satis. Aliquando enim *Æschinem* ipsum Latinè dicentem audiamus.





Q. C I C E R O,

D E

PETITIONE CONSULATUS,

A D M. F R A T R E M.

*Exstat hic unicus Q. Ciceronis libellus, sanè
luculentus & elegans, quem accuratissi-
mè, atque artificiosissimè scripsit, quo
Marcum fratrem, consulatûs candidatum,
ad petitionem instrueret.*

I. **E**RSI tibi omnia suppetunt, quæ consequi ingenio, aut usu homines, aut diligentia possunt: tamen ab amore nostro non sum arbitratus alienum, ad te perscribere ea, quæ mihi veniebant in mentem, dies ac noctes de petitione tua cogitanti: non ut aliquid ex iis novi addisceres, sed ut ea, quæ in re dispersa atque infinita viderentur esse, ratione & distributione sub uno adspectu ponerentur.

2. Quamquam plurimum natura valet; tamen videtur in paucorum mensium negotio posse simulatio naturam vincere. *Civitas quæ sit, cogita; quid petas; qui sis.* Propè quotidie ad forum tibi descendenti, meditatum hoc sit: *Novus sum; Consulatum peto; Roma est.* Nominis novitatem dicendi gloria maximè sublevabis. Semper ea res plurimum dignitatis habuit. Non potest, qui dignus habetur patronus consularium, indignus consulari putari.

3. Quamobrem, quoniam ab hac laude proficisceris, & quidquid es, ex hoc es; ita paratus ad dicendum venito, quasi in singulis causis iudicium de omni ingenio futurum sit. Ejus facultatis adjumenta, quæ tibi scio esse seposita, ut prompta ac parata sint, cura; & sæpe, quæ de Demosthenis studio & exercitatione scripsit Demetrius, recordare. Deinde & amicorum multitudo, & genera appareant. Habes enim ea, quæ novi, omnes publicanos, totum ferè equestrem ordinem; multa præterea municipia, multos abs te defensos homines cujusque ordinis, aliquot collegia; præterea studio dicendi conciliatos plurimos adolescentulos, quotidianam amicorum assiduitatem & frequentiam. Hæc cura ut teneas, & commendando, & rogando, & omni ratione efficiendo, ut intelligant, & qui debent tuâ causâ, referendæ gratiæ; & qui volunt, obligandi tui tempus sibi aliud nullum fore.

4. Etiam hoc multùm videtur adjuvare posse novum hominem, hominum nobilium voluntas, & maximè consularium. Prodest, quorum in locum ac numerum pervenire velis, ab his ipsis illo loco ac numero dignum putari. Hi rogandi omnes sunt diligenter, & ad eos allegandum; persuadendumque est iis, nos semper cum optimatibus de republica sensitse; minimè populares fuisse; si quid locuti populariter videmur, id nos eo consilio fecisse, ut nobis Cn. Pompeium adjungeremus; ut eum, qui plurimùm posset, aut amicum in nostra petitione haberemus, aut certè non adversarium. Præterea adolescentes nobiles elabora ut habeas, vel ut teneas studiosos tui, quos habes: multùm dignitatis afferent. Plurimos habes: perfice, ut

sciant, quantum in his putes esse. Si adduxeris, ut ii, qui non nolunt, cupiant; plurimum quidem proderunt.

II. Ac multum etiam novitatem tuam adjuvat, quod ejusmodi nobiles tecum petunt, ut nemo sit, quiaudeat dicere, plus illis nobilitatem, quam tibi virtutem, prodesse oportere. Nam P. Galbam, & L. Cassium, summo loco natos, quis est, qui petere consulatum putet? Vides igitur, amplissimis ex familiis homines, quod sine nervis sint, tibi pares non esse.

6. At Antonius & Catilina molesti sunt. Immo homini navo, industrio, innocenti, diserto, gratioso apud eos qui res judicant, optandi competitores: ambo a pueritia sicarii, ambo libidinosi, ambo egentes. Eorum alterius bona proscripta vidimus; vocem denique audivimus jurantis, se Romæ judicio æquo cum homine Græco certare non posse; & ex senatu ejectum scimus. Optimam verò cenforum existimatione in prætura competitorem habuimus, amico Sabidio, & Panthera; quod ad tabulam, quos poneret, non habebat. Quo tamen in magistratu amicam, quam palam domi haberet, de machinis emit. In petitione autem consulatus, cauponas omnes compilare per turpissimam legationem maluit, quam adesse, & populo Romano supplicare.

7. Alter verò, dii boni, quo splendore est! Primum nobilitate eadem. Num majore virtute? Non, sed audaciâ. Quamobrem? Quia Antonius umbram suam metuit: hic ne leges quidem, natus in patris egestate, educatus in sororis stupris, corroboratus in cæde civium; cujus primus ad rempublicam aditus in equitibus Romanis occi-

528 DE PETITIONE

dendis fuit. Nam illis, quos meminimus, Gallis, qui tum Titiniorum, ac Nanniorum, ac Tanusiorum capita demetebant, Sulla unum Catilinam præfecerat; in quibus ille hominem optimum, Q. Cæcilium, sororis suæ virum, equitem Romanum, nullarum partium, quum semper naturâ, tum etiam ætate jam quietum, suis manibus occidit.

III. Quid ego nunc dicam, petere cum eo te consulatum, qui hominem carissimum populo Romano, M. Marium, inspectante populo Romano, vitibus per totam urbem ceciderit; ad bustum egerit; ibi omni cruciatu vivum lacerarit; stanti colum gladio suâ dexterâ secuerit, quum sinistrâ capillum ejus a vertice teneret; caput suâ manu tulerit, quum inter digitos ejus rivi sanguinis fluere: qui postea cum histrionibus, & cum gladiatoribus ita vixit, ut alteros libidinis, alteros facinoris adjutores haberet; qui nullum in locum tam sanctum ac tam religiosum accessit, in quo non, etsi in aliis culpa non esset, tamen ex sua nequitia dedecoris suspicionem relinqueret: qui ex curia Curios & Annios; ab atriis Sapalas & Carvilius; ex equestri ordine Pompilios & Vestios, sibi amicissimos comparavit; qui tantum habet audaciæ, tantum nequitiae, tantum denique in libidine artis & efficacitatis, ut propè in parentum gremiis prætextatos liberos constuprarit?

9. Quid ego nunc tibi de Africa; quid de testium dictis scribam? nota sunt, & ea tu sæpius legito. Sed tamen hoc mihi non prætermittendum videtur, quod primùm ex eo judicio tam egens discessit, quàm quidam judices ejus ante illud judicium fuerunt: deinde tam invidiosus, ut aliud

in

In eum iudicium quotidie flagitetur. Hic se sic habet, ut magis timeat, etiamsi quieverit, quàm ut contemnat, si quid commoverit. Quantò melior tibi fortuna petitionis data est, quàm nuper homini novo, C. Cœlio? Ille cum duobus hominibus ita nobilissimis petebat, ut tamen in iis omnia pluris essent, quàm ipsa nobilitas; summa ingenia, summus pudor, plurima beneficia, summa ratio ac diligentia petendî: tamen eorum alterum Cœlius, quum multò esset inferior genere, superior nullâ re pene, superavit.

10. Quare, si facies ea, quæ tibi natura & studia, quibus usus es semper, largiuntur; quæ temporis tui ratio desiderat; quæ potes; quæ debes; non erit difficile certamen cum iis competitoribus, qui nequaquam sunt tam genere insignes, quàm vitiis nobiles. Quis enim reperiri potest tam improbus civis, qui velit uno suffragio duas in rempublicam sicas destringere?

IV. Quoniam igitur, quæ subsidia novitatis haberes, & habere posses, exposui; nunc de magnitudine petitionis dicendum videtur. *Consulatum petis*; quo honore, nemo est, quin te dignum arbitretur; sed multi, qui invidiant. Petis enim homo ex equestri loco summum locum civitatis; atque ita summum, ut forti viro, diserto, innocenti, multò idem ille honos plus amplitudinis, quàm ceteris afferat. Noli putare, eos, qui sunt eo honore usi, non videre, tu, quum idem sis adeptus, quid dignitatis habiturus sis: eos verò, qui consularibus familiis nati locum majorum consecuti non sunt, suspicor, tibi, nisi qui admodum te amant, invidere.

12. Etiam novos homines prætorios existimo,

nisi qui tuo beneficio vincti sunt, nolle abs te se honore superari. Jam in populo quàm multi invidi sunt, quàm multi consuetudine horum annorum ab hominibus novis alienati, venire tibi in mentem certò scio : esse etiam nonnullos tibi iratos ex iis causis, quas egisti, necesse est. Jam illud tute circumspicito, quòd ad Cn. Pompeii gloriam augendam tanto studio te dedisti, num quos tibi putes ob eam causam esse non amicos. Quamobrem, quum & summum locum civitatis petas, & videas, esse studia, quæ tibi adversentur; adhibeas necesse est omnem rationem, & curam, & laborem, & diligentiam.

V. Ac petitio magistratuum divisa est in duarum rationum diligentiam : quarum altera in amicorum studiis ; altera in populari voluntate ponenda est. Amicorum studia beneficiis, & officiis, & verustate, & facilitate ac jucunditate naturæ, parata esse oportet. Sed hoc nomen amicorum in petitione latius patet, quàm in cetera vita. Quisquis est enim, qui ostendat aliquid in te voluntatis, qui colat, qui domum ventitet, is in amicorum numero est habendus.

14. Sed tamen, qui sunt amici ex causa honestiore cognationis, aut affinitatis, aut sodalitatis, aut alicujus necessitudinis, his carum & jucundum esse, maximè prodest. Deinde, ut quisque est intimus, ac maximè domesticus, ut is amet, & quàm amplissimum esse te cupiat, valde elaborandum puto; tum ut tribules, ut vicini, ut clientes, ut denique liberti, postremò etiam servi tui : nam serè omnis sermo ad forensam famam a domesticis emanat auctoribus.

15. Denique instituendi sunt cujusque generis

amici : ad speciem , homines illustres honore ac nomine ; qui etiamsi suffragandi studia non navant , tamen afferunt petitori aliquid dignitatis : ad justitiam obtinendam , magistratus ; ex quibus maximè consules , deinde tribuni plebis : ad conficiendas centurias , homines excellenti gratiâ. Qui abs te tribum , aut centuriam , aut aliquod beneficium , aut habeant , aut habere sperent , eos prorsus magnopere compara & confirma : nam per hos annos homines ambitiosi vehementer omni studio atque opere laborarunt , ut possent a tribulibus suis ea , quæ peterent , impetrare. Hos tu homines quibuscumque rationibus poteris , ut ex animo atque ex illa summa voluntate tui studiosi sint , elaborato.

16. Quòd si satis grati homines essent , hæc omnia tibi parata esse debebant , sicut parata esse confido : nam hoc biennio quatuor sodalitates civium ad ambitionem gratiosissimorum tibi obligasti , M. Fundanii , Q. Gallii , C. Cornelii , C. Orchinii. Horum in causis ad te deferendis , quidnam eorum sodales tibi receperint & confirmarint , scio : nam interfui. Quare hoc tibi faciendum est , ut hoc tempore ab iis , qui debent , exigas , sæpe commonendo , rogando , confirmando , curando ut intelligant , nullam tempus aliud se umquam habituros referendæ gratiæ. Profectò homines & spe reliquorum tuorum officiorum , & recentibus beneficiis ad studium avandam excitabuntur.

17. Et omnino , quoniam eo genere amicitiarum petitio tua maximè munita est , quod causarum defensionibus adeptus es , fac , ut planè iis omnibus , quos devinctos teneas , descriptum ac

dispositum suum cuique munus sit : & quemadmodum nemini illorum ulla in re umquam molestus fuisti ; sic cura , ut intelligant , omnia te , quæ ab illis tibi deberi putaris , ad hoc tempus reservasse.

VI. Sed quoniam tribus rebus homines maximè ad benevolentiam , atque ad hæc suffragandi studia ducuntur , beneficio , spe , adjunctione animi , vel voluntate ; animadvertendum est , quemadmodum cuique horum generi sit inserviendum. Minimis beneficiis homines adducuntur , ut satis causæ esse putent ad studium suffragationis ; nedum ii , quibus saluti fuisti , quos tu habes plurimos , non intelligant , si hoc tuo tempore tibi non satisfecerint , se probatos nemini umquam fore. Quod quum ita sit , tamen rogandi sunt ; atque etiam in hanc opinionem adducendi , ut , qui nobis adhuc obligati fuerint , iis vicissim nos obligari posse videamur. Qui autem spe tenentur , quod genus hominum multò est diligentius atque officiosius ; iis fac ut propositum ac paratum auxilium tuum esse videatur : denique , ut spectatorem te suorum officiorum esse intelligant diligentem ; ut videre te planè atque animadvertere , quantum a quoque proficiatur , appareat.

19. Tertium illud genus est studiorum voluntarium , quod agendis gratiis , accommodandis sermonibus ad eas rationes , propter quas quisque studiosus esse tui videbitur , significandâ erga illos pari voluntate , adducendâ amicitia in spem familiaritatis & consuetudinis , confirmari oportebit. Atque in iis omnibus generibus judicato & perpendito , quantum quisque possit ; ut scias , & quemadmodum cuique inservias , & quid a quoque exspectes & postules.

20. Sunt enim quidam homines in suis vicinitatibus & municipiis gratiosi ; sunt diligentes & copiosi ; qui etiamsi antea non studuerunt huic gratiæ , tamen ex tempore elaborare ejus causâ , cui debent aut volunt , facîle possunt : his hominum generibus sic inserviendum est , ut ipsi intelligant , te videre , quid a quoque expectes ; sentire , quid accipias ; meminisse , quid acceperis. Sunt autem alii , qui aut nihil possunt , aut odio sunt etiam tribulibus suis ; nec habent tantum animi , aut facultatis , ut enitantur ex tempore : hos ut internoscas , videto ; ne , spe in aliquo majore positâ , præsidii parum comparetur.

VII. Et quamquam partis & fundatis amicitiiis fretum ac munitum esse oportet ; tamen in ipsa petitione , amicitia permultæ ac perutiles comparantur : nam in ceteris molestiis habet hoc tamen petitio commodi , ut possis honestè , quod in cetera vita non queas , quoscumque velis , adjungere ad amicitiam ; quibuscum si alio tempore agas , ut te utantur , absurdè facere videare : in petitione autem nisi id agas & cum multis , & diligenter , nullus petitor esse videare. Ego autem tibi hoc confirmo , esse neminem (nisi aliquâ necessitudine competitorum alicui tuorum sit adjunctus) a quo non facîle , si contenderis , impetrare possis , ut suo beneficio promereatur , se ut ames , & sibi ut debeas : modò ut intelligat , te magni æstimare , ex animo agere , bene se ponere , fore ex eo non brevem & suffragatoriam , sed firmam & perpetuam amicitiam.

22. Nemo erit , mihi crede , in quo modò aliquid virtutis sit , qui hoc tempus sibi oblatum amicitia tecum constituendæ prætermittat ; præ-

fertim quum tibi hoc casus afferat, ut n̄ tecum petant, quorum amicitia aut contemnenda, aut fugienda sit; & qui hoc, quod ego te hortor, non modò assequi, sed ne incipere quidem possint. Nam quid incipiat Antonius homines adjungere, atque invitare ad amicitiam, quos per se suo nomine appellare non possit? mihi quidem stultius nihil videtur, quàm existimare eum studiosum tui, quem non noris. Eximiam quamdam gloriam & dignitatem, ac rerum gestarum magnitudinem esse oportet in eo, quem homines ignoti, nullis suffragantibus, honore afficiant: ut quidem homo nequam, iners, sine officio, sine ingenio, cum infamia, nullis amicis, hominem plurimorum studio atque omnium bonâ estimatione munitum præcurrat, sine magna culpa negligentiae fieri non potest.

VIII. Quamobrem omnes centurias multis & variis amicitiiis cura ut confirmatas habeas. Et primùm, id quod ante oculos est, senatores equitesque Romanos, ceterorum ordinum navos homines & gratiosos complectere: multi homines urbani industrii; multi libertini in foro gratiosi navique versantur: quos per te, quos per communes amicos poteris, summâ curâ, ut tui cupidi sint, elaborato; appetito; allegato; summo beneficio te affici, ostendito.

24. Deinde habeto rationem urbis totius, collegiorum omnium, pagorum, vicinitatum: ex iis principes ad amicitiam tuam si adjunxeris; per eos reliquam multitudinem faciliè tenebis. Postea totam Italiam fac ut in animo & memoria tributum descriptam comprehensamque habeas: ne quod municipium, coloniam, præfecturam, locum

denique Italiæ ne quem esse patiari, in quo non habeas firmamenti quod satis esse possit. Perquiras etiam & investiges homines ex omni regione, eosque cognoscas, appetas, confirmes; cures, ut in suis vicinitatibus tibi petant, & tuâ causâ quasi candidati sint. Volent te amicum, si suam a te amicitiam expeti videbunt. Id ut intelligant, oratione, quæ ad eam rationem pertinet, abunde consequere.

25. Homines municipales & rustici, si nomine nobis noti sunt, in amicitia se esse arbitrantur: si verò etiam præsidii se aliquid sibi constituere putant, non amittunt occasionem promerendi. Hos ceteri, & maximè tui competitores ne norunt quidem: tu & nosti, & faciliè cognoscas; sine quo amicitia esse non potest. Neque id tamen satis est, tametsi magnum est, si non consequatur spes utilitatis atque amicitiae, ne nomenclator solùm, sed amicus etiam bonus esse videre. Ita, quum & hos ipsos, propter suam ambitionem qui apud tribules suos plurimùm gratiâ possunt, tui studiosos in centuriis habebis, & ceteros, qui apud aliquam partem tribulium, propter municipii, aut vicinitatis, aut collegii rationem valent, cupidos tui constitueris, in optima spe esse debebis.

26. Jam equitum centuriæ multò faciliùs mihi diligentia posse teneri videntur. Primùm cognoscis equites; pauci enim sunt; deinde adepti: multò autem faciliùs illa adolescentulorum ætas ad amicitiam adjungitur: deinde habes tecum ex juventute optimum quemque & studiosissimum humanitatis: tum autem, quòd equester ordo tuus est, sequentur illi auctoritatem ordinis, si abs te adhibebitur ea diligentia, ut non ordinis solùm vo-

luntate, sed etiam singulorum amicitii eas centurias confirmatas habeas. Jam studia adolescentulorum in suffragando, in obeundo, in nuntiando, in affectando, mirificè & magna & honesta sunt.

IX. Et quoniam affectationis mentio facta est; id quoque curandum est, ut quotidianâ cujusque generis, & ordinis, & ætatis utare frequentia. Nam ex ea ipsa copia conjectura fieri poterit, quantum sis in ipso campo virium ac facultatis habiturus. Hujus autem rei tres partes sunt: una *Salutatorum*, quum domum veniunt; altera *Deductorum*; tertia *Affectatorum*. In *Salutatoribus*, qui magis vulgares sunt, & hac consuetudine quæ nunc est, plures veniunt, hoc efficiendum est, ut hoc ipsum minimum officium eorum tibi gratissimum esse videatur. Qui domum tuam venient, iis significate animadvertere; & eorum amicis, qui illis renuntient, ostendito; sæpe ipsis dicito: sic homines sæpe, quum obeunt plures competitores, si videant unum esse aliquem, qui hæc officia maxime animadvertat; ei se dedunt; deserunt ceteros; minutatim ex communibus proprii, ex fucosis firmi suffragatores evadunt.

28. Jam illud teneto diligenter, si eum, qui tibi promiserit, audieris fucum, ut dicitur, facere velle, aut senseris; ut te id audisse, aut scire dissimules. Si quis tibi se purgare velit, quod suspectum se esse arbitretur; affirmes, te de illius voluntate numquam dubitasse, nec debere dubitare: is enim, qui se non putat satisfacere, amicus esse nullo modo potest. Scire autem oportet, quo quisque animo sit; ut & quantum cuique confidas, constituere possis. Jam *Deductorum* officium

quò majus est, quàm salutatorum, hòc gratus tibi esse significato atque ostendito; & quoad ejus fieri poterit, certis temporibus descendito: magnam affert opinionem, magnam dignitatem quotidiana in deducendo frequentia.

29. Tertia est ex hoc genere assidua *Affectorum* copia: in ea quos voluntarios habebis, cura ut intelligant, te sibi in perpetuum summo beneficio obligari: qui autem tibi debent, ab iis planè hoc munus exige, qui per ætatem ac negotium poterunt, ipsi tecum ut assidui sint; qui ipsi sectari non poterunt, necessarios suos in hoc munere constituent. Valde ego te volo, & ad rem pertinere arbitror, semper cum multitudine esse. Præterea magnam affert laudem & summam dignitatem, si ii tecum erunt, qui a te defensi, & qui per te servati ac judiciis liberati sunt. Hæc tu planè ab iis postulato, ut, quoniam nullâ impensâ per te alii honestatem, alii salutem ac fortunas omnes obtinuerunt, nec aliud ullum tempus futurum sit, ubi tibi referre gratiam possint, hoc te officio remunerent.

X. Et quoniam in amicorum studiis hæc omnis ratio versatur; qui locus in hoc genere cavendus sit, prætermittendum non videtur. Fraudis, atque insidiarum, & perfidiæ plena sunt omnia. Non est hujus temporis perpetua illa de hoc genere disputatio, quibus rebus benevolus & simulator dijudicari possit: tantum est hujus temporis admonere. Summa tua virtus eosdem homines, & simulare tibi se esse amicos, & invidere coegit. Quamobrem *Επιχαρμειον* illud teneto: *nervos atque artus esse sapientia, non temerè credere*. Et quum tuorum amicorum studia constitueris, tum

etiam obrectatorum atque adversariorum rationes & genera cognoscito.

31. Hæc tria sunt : unum ex iis , quos læsisti ; alterum , qui sine causa non amant ; tertium , qui competitorum valde amici sunt. Quos læsisti , quum contra eos pro amico diceres , his te purgato planè ; necessitudines commemorato in spem adducito , te in eorum rebus , si se in amicitiam contulerint , pari studio atque officio futurum. Qui sine causa non amant , eos aut beneficio , aut spe , aut significando tua erga illos studia futura , delinito , dans operam , ut de illa animi pravitate deducas. Quorum voluntas erit abs te propter competitorum amicitias alienior , his quoque eadem inservito ratione , quàm superioribus ; & , si probare poteris , te in eos ipsos competitores tuos benevolo esse animo , ostendito.

XI. Quoniam de amicitiiis constituendis satis dictum est ; dicendum est de illa altera parte petitionis , quæ in populari ratione versatur : ea desiderat *Nomenclationem* , *Blanditiam* , *Assiduitatem* , *Benignitatem* , *Rumorem* , *Spem in republica*. Primum id , quod facis , ut homines nôris , significa , ut appareat ; & auge , ut quotidie melius fiat : nihil mihi tam popolare , neque tam gratum videtur. Deinde id , quod naturâ non habes , induc in animum , ita simulandum esse , ut naturâ facere videare : nam comitas tibi non deest ea , quæ bono ac suavi homine digna est : sed opus est magnopere *Blanditiâ* ; quæ , etiamsi vitiosa est & turpis in cetera vita , tamen in petitione est necessaria : etenim , quum deteriore aliquem assentando facit , tum improba est ; quum amicio rem , non tam vituperanda : petitori verò necessaria est , cujus & frons ,

& vultus, & sermo, ad eorum, quoscumque con-
venerit, sensum & voluntatem accommodandus est-

33. Jam *Assiduitatis* nullum est præceptum;
verbumque ipsum docet, quæ res sit. Prodest
quidem vehementer, nusquam discedere: sed ta-
men hic fructus est assiduitatis, non solum esse
Romæ, atque in foro, sed assidue petere; sæpe
eosdem appellare; non committere, ut quisquam
possit dicere, quid ejus sit, quod consequi possis,
si abs te non sit rogatum, & valde ac diligenter
rogatum.

34. *Benignitas* autem latè patet: & est in re
familiari; quæ quamquam ad multitudinem per-
venire non potest, tamen ab amicis laudatur, &
multitudini grata est: est in conviviis, quæ fac,
& abs te & ab amicis tuis concelebrentur, &
passim, & tributim: est etiam in opera, quam
pervulga & communica: curaque, ut aditus ad
te diurni atque nocturni pateant, neque foribus
solum ædium tuarum, sed etiam vultu & fronte,
quæ est animi janua: quæ si significant voluntatem
abditam esse ac retrusam, parvi refert patere
ostium: homines enim non modò promitti sibi,
præsertim quæ a candidato petant, sed etiam largè
atque honorificè promitti volunt.

35. Quare hoc quidem facilè præceptum est, ut
quod acturus sis, id significes te studiosè ac li-
benter esse facturum: illud difficilius, & magis ad
tempus, quàm ad naturam accommodatum tuam,
quod facere non possis, ut id haud injucundè ne-
ges: quorum alterum est boni viri; alterum ho-
ni petitoris. Nam, quum id petitur, quod ho-
nestè, aut sine detrimento nostro, promittere
non possumus (quo modo si quis roget, ut con-

Z vj.

tra amicum aliquam causam recipiamus) bellè negandum est, ut ostendas necessitudinem; demonstres, quàm molestè feras; aliis te id rebus ex-farturum esse, persuadeas.

XII. Audivi hoc dicere quemdam de quibusdam oratoribus, ad quos causam suam detulisset, gratiorem sibi orationem fuisse ejus, qui negasset, quàm illius, qui recepisset. Sic homines fronte & oratione magis, quàm ipso beneficio reque capiuntur.

36. Verùm hoc probabile est. Illud alterum subdum tibi homini Platónico suadere; sed tamen tempori tuo consulam: quibus enim te propter aliquod officium necessitudinis affuturum negaris, tamen ii possunt abs te placati æquique discedere; quibus autem idcirco negaris, quòd te impeditum esse dixeris, aut amicorum negotiis, aut gravioribus causis antè susceptis, inimici discedunt; omnesque hoc animo sunt, ut sibi te mentiri malint, quàm negare.

37. C. Cotta, in ambitione artifex, dicere solebat, se operam suam, quoad non contra officium rogaretur, polliceri solere omnibus; impertire iis, apud quos optimè poni arbitraretur: ideo se nemini negare, quòd sæpè accideret ut is, cui pollicitus esset, non uteretur; sæpè, ut ipse magis esset vacuus, quàm putasset: neque posse domum ejus compleri, qui tantum modò reciperet, quantum videret se obire posse: casu fieri, ut agantur ea, quæ non putaris; illa, quæ credideris in manibus esse, ut aliqua de causa non agantur: deinde esse extremum, ut irascatur is, cui mendacium dixeris: id, si promittas, & incertum est, & in diem, & in paucioribus: sin

autem id neges; & certè abalienes, & statim, & plures: plures enim multò sunt, qui rogant, ut uti liceat operà alterius, quàm qui utantur. Quare satius est, ex iis aliquos aliquando tibi in foro irasci, quàm omnes continuò domi; præsertim quum multò magis irascantur iis, qui negent, quàm ei, quem videant justà causà impeditum, ut facere, quod promisit, cupiat, si ullo modo possit.

38. Ac, ne videar aberrasse a distributione mea, qui hæc in hac populari parte petitionis disputem; hoc sequor, hæc omnia non tam ad amicorum studia, quàm ad popularem famam pertinere. Etsi enim inest aliquid ductum ex illo genere, benignè respondere, studiosè inservire negotiis amicorum ac periculis; tamen hoc loco ea dico, quibus multitudinem capere possis: ut de nocte domus compleatur; ut multi spe tui præsidii teneantur; ut amiciores abs te discedant, quàm accesserint; ut quamplurimorum aures optimo sermone compleantur.

XIII. Sequitur, ut de *Rumore* dicendum sit; cui maximè serviendum est. Sed quæ dicta sunt omni superiori oratione, eadem ad celebrandum rumorem valent: dicendi laus; studia publicanorum & equestris ordinis; hominum nobilium voluntas; adolescentulorum frequentia; eorum, qui abs te defensi sunt, assiduitas; ex municipiis multitudo eorum, quos tuâ causâ venisse appareat; bene homines nosse; comiter appellare; assiduè ac diligenter petere; benignum ac liberalem esse; bene ut omnes loquantur & existiment; domus ut multà nocte compleatur; omnium generum frequentia adsit; satisfiat oratione omnibus, re

operâque multis; perficiatur, id quod fieri potest labore & arte & diligentia, non ut ad populum ab iis omnibus fama perveniat, sed ut in his studiis populus ipse versetur.

40. Jam urbanam illam multitudinem, & eorum studia, qui conciones tenent, quæ adeptus es in Pompeio ornando, Manilii causâ recipiendâ, Cornelio defendendo, excitanda nobis sunt; quæ adhuc habuit nemo, quin idem splendorem omnium voluntatesque haberet. Efficiendum etiam illud, ut sciant omnes, Cn. Pompeii summam erga te esse voluntatem; & vehementer ad illius rationes, te id assequi, quod petis, pertinere. Postremò tota petitio cura ut pompæ plena sit, ut illustris, ut splendida, ut popularis; ut habeat summam speciem ac dignitatem; ut etiam, si qua possit, in competitoribus tuis exsistat, aut sceleris, aut libidinis, aut largitionis accommodata ad eorum mores infamia.

41. Atque etiam in hac petitione maximè videndum est, ut *Spes reipublicæ* bona de te sit, & honesta opinio: nec tamen in petendo reipublica capessenda est, neque in senatu, neque in concione: sed hæc tibi sunt retinenda; ut senatus te existimet ex eo, quòd ita vixeris, defensorem auctoritatis suæ fore; equites Romani, & viri boni & locupletes, ex vita acta te studiosum otii ac rerum tranquillarum; multitudo, ex eo duntaxat, quòd oratione in concionibus ac iudicio popularis fuisti, te a suis commodis alienum non futurum.

XIV. Hæc mihi veniebant in mentem de duabus illis commonitionibus matutinis, quas tibi quotidie ad forum descendenti meditandum esse

dixeramus : *Novus sum ; Consulatam peto.* Tertium restat : *Roma est*, civitas ex nationum conventu constituta ; in qua multæ insidiæ, multa fallacia, multa in omni genere vitia versantur : multorum arrogantia, multorum contumacia, multorum malevolentia, multorum superbia, multorum odium ac molestia perferenda est. Video, esse magni consilii atque artis, in tot hominum cujusquemodi vitiis tantisque versantem, vitare offensionem, vitare fabulam, vitare insidias ; esse unum hominem accommodatum ad tantam morum, ac sermonum, & voluntatum varietatem. Quare etiam atque etiam perge tenere istam viam, quam instituisti ; excelle dicendo : hoc & tenentur Romæ homines, & alliciuntur, & ab impediendo ac lædendo repelluntur.

43. Et quoniam in hoc vel maximè vitiosa est civitas, quòd, largitione interposità, virtutis ac dignitatis oblivisci solet ; in hoc fac, ut te bene nôris, id est, ut intelligas, eum esse te, qui iudicii ac periculi metum maximum competitoribus afferre possis. Fac, ut se abs te custodiri atque observari sciant : quum diligentiam tuam, quum auctoritatem vimque dicendi, tum profectò equestris ordinis erga te studium pertimescant. Atque hæc ita te volo illis proponere, non ut videare jam accusationem meditari, sed ut hoc terrore faciliùs hoc ipsum, quod agis, consequare. Et planè sic contende omnibus nervis ac facultatibus, ut adipiscamur, quod petimus.

44. Video, nulla esse comitia tam inquinata largitione, quibus non gratis aliquæ centuriæ renuntient suos magnopere necessarios. Quare, si advigilamus pro rei dignitate ; & si nostros ad summum studium benevolos excitamus ; & si ho-

544 *DE PETIT. CONSUL.*

minibus gratiosis studiosisque nostri suum cuique munus describimus ; & si competitoribus judicia proponimus , si sequestribus metum injicimus , diviso- res ratione aliquà coercemus ; perfici potest , ut largitio aut nulla fiat , aut nihil valeat.

45. Hæc sunt , quæ putavi non meliùs scire me , quàm te ; sed faciliùs his tuis occupationibus colligere unum in locum posse , & ad te perscripta mittere : quæ tametsi ita scripta sunt , ut non ad omnes , qui honores petant , sed ad te propriè , & ad hanc tuam petitionem valeant ; tamen tu si quid mutandum esse videbitur , aut omnino tollendum , aut si quid erit præteritum , velim hoc mihi dicas : volo enim hoc commentarium petitionis haberi omni ratione perfectum.

FINIS.

NOTANDA ET CORRIGENDA.

Prior numerus paginam indicat, alter lineam.

7, 1. *Quaecumque possent.* Ita cum Grutero Pearcius. Vulgò *quaecumque essent*, quod sanè jactantiùs quàm veriùs diceretur.

Ibid. 15. *Scientiæ cogitatione.* Ita plures mss. Alii, *scientiâ & cogitatione*, minùs nervosè, inquit Gruterus.

11, 23. *Quaecumque sit proposita.* Ita quidem codices: sed plures editi habent *posita*, & sic solet Tullius.

19, 9. *Manu' consortum*, pro *manus*, detractâ litterâ s ex more Ennii, cujus hæc sunt verba, & veterum poetarum. Pearcius dedit *manum consortum*.

Ibid. 14. *Jure suo physici vindicarent.* Ita e mss. & editis veteribus Pearcius. Recentiores dederunt *in suo genere physici, vindicarentque*.

20, 28. *Charmadas.* Ita hoc loco, & tribus sequentibus, restituit Pearcius, duobus mss. auctoribus, & aliis eòdem alludentibus. Priùs legebatur *Carneades*, quod absurdum: neque enim Crassus aut Antonius Carneadem videre potuerunt, neque de eo tamquam de homine quem viderint, sed de quo audierint, loquuntur.

21, 4. *Peripatetici Critolai Diodorus.* Ita Gruteri & Pearcii codices. Inepta est vulgata Lectio, *Peripatetici Critolaus & Diodorus*: quis enim credat, ad annum urbis 643 quo Crassus quæstor fuit, vixisse Critolaum, qui senex unâ cum Carneade & Diogene Legatus Romam venit anno urbis 599.

26, 16. *Atque sumendum*. Ita Jac. Gronovii & Pearcii codices. Vulgò & *assumendum*.

28, 27. *Quàm ipse, illa scire*. Ita mss. & Pearcius. Vulgò *quàm ipse ille scire*.

36, 20. *Huic ille respondebat*. Voculam *ille* omittunt vulgati, quam restituit Pearcius.

38, 11. *Quibus dicere*. Locus corruptus. Lambinus Hotomani conjecturam sequutus, dedit, *quibus adjicere*.

44, 29. *De me promississe*. Ita plures mss. Gronovio & Pearcio inspecti. Vulgati, *a me promississe*.

46, 16. *Naturæ muneribus*. Hæc verba in vulgatis membro superiori annectuntur.

57, 13. *Atque id egisse*. Locus corruptus. Lambinus emendabat, *atque in artem redegisse*, aut *digessisse*.

59, 20. *Quum remiges inhibuerunt*. Lambinus & Pearcius edidere *sustinauerunt*, monente, ut existimant, ipso Cicerone, quem vide Lib. 13. ad Atticum, Epist. 21. ubi tamen Cicero loquitur de quodam loco Philosophicorum, in quo, pro *sustinere* assensionem, reposuerat, admonitu ipsius Attici, *inhibere*. Alia videtur esse hujus loci ratio.

64, 6. *Ain' tu*. Ita Lambinus, quod firmant Gruteri & Pearcii codices. Vulgò *an tu*.

71, 3. *Memoriâ esset proditum*. Lege *memoriâ sic esset proditum*.

91, 14. *Quem hominem probè*. Addunt vulgati *nosse &*, quas voces ignorant Gruteri & Pearcii codices.

94, 29. *Quum indotatam esse*. Addunt vulgati, *atque incomitatam*, quas voces ignorant Pearcii codices.

98, 12. *Juris in controversi.* Ita Lambinus & Pearcius. Alii, *juris in controversiis*, & sic mss.

104, 2. *Quum ipsi sint peritissimi.* Lambinus dedit *imperitissimi* e conjectura, quam probat Pearcius.

112, 7. *Quamquam non ita.* Negationem Gruterus, & qui eum sequuntur, malè ejiciunt, quam restituit Pearcius.

117, 24. *Ita me frater exoravit, ne ipsum quidem.* Ita Gruteri codex, quem sequitur Pearcius. Vulgati, *ita frater exoravit meipsum, non quidem.*

120, 16. *Aut inopportunum tempus.* Ita Lambinus & Pearcius e mss. Vulgò *aut importunum.*

121, 21. *Ut, quemadmodum... sic nostri animi... gestiunt, ac... cupiunt.* Vel delenda vovula *ut* cum Lambino, vel legendum, monente Pearcio, *gestiant, ac... cupiant.*

128, 19. *Vestrum hoc totum.* Lege, *vestrum esse hoc totum.*

131, 10. *Quamvis egregia sint.* Ita e suis Pearcius. Vulgati, *quamvis exigua sint.*

133, 6. *Hique etiam nunc.* Ita cum Pearcio e mss. dedimus pro vulgato *ii qui etiam nunc.*

136, 13. *Cantu.... colorari.* Celeberrimus Rollinus observat vix posse has voces ex rebus omnino disparibus translatas conjungi, aut cantum dici de scriptis. Locus est corruptus.

137, 6. *Ne quid veri.* Adde vocem omissam, deinde *ne quid veri.*

138, 3. *Aut monita.* Ita Gulielmii codices, pro vulgato *admonita.*

145, 3. *Neminem posse.* Vulgati addunt vocem *apè*, quam ignorant codices Pearcii.

147, 14. *Tentabo quid eum deceat.* Pronomen *eum* cum Pearcio delevimus, volentibus mss. Infrà cum eodem Pearcio, & Jac. Gronovio dedimus, *omnia summè fecerit*, ubi vulgati *omnia summa*.

150, 8. *Fufius.* Ita quidem codices & editi. Quidam tamen habent *Fusius*. Sed hìc & Libro 3, 5º. & de Claris Oratoribus 182 & 222 legendum videtur *Furius*. Notum est ex Quinſtiliano 1, 4. *Valesios*, & *Fusios*, in *Valerios* & *Furios* venisse.

156, 26. *Definiatur.* Ita, teste Grutero Pal. 2, ut volebat Manutius. Vulgò *uterque definiat*. Sed vocem *uterque* ignorant codices.

158, 6. *Quum plura.* Vulgati mendosè *complura*. Emendavit Pearcius e mss.

171, 1. *Vel acutè describere.* Ita Pearcius, & sic codices & veteres editi: ineptè vulgati, *vel aptè describere*.

172, 25. *Intra quas venire & pervestiges.* Ita rectè Manutius & Gruterus, quos sequitur Pearcius: hic enim verba a venatione transferuntur. Vulgò, *intra quas venire debeas, ut pervestiges*.

177, 6. *Nam omne quod eloquimur, eloquimur sic.* Alterum *eloquimur*, prætermisſum a librario, ut sæpe fit, quum idem verbum geminatur, restituit Petrus Faber, idque sententia postulat, ut vidit Pearcius.

187, 14. *Aut sperent.* Vulgò *aut spernant*. Emendarunt e mss. Lambinus & Pearcius. Iidem paulò post dederunt e suis codicibus *deducantur*, pro vulgato *adducantur*.

188, 17. *Inclinantem impellere.* Debemus eruditissimo & celeberrimo viro Joan. Bapt. Crevier hanc emendationem, quam hujus loci sententia flagitat, & adstruunt ipsa Ciceronis verba, *si se*

dant, & quò impellimus inclinant. Vitiosa est, & a correctoris manu profecta vulgata lectio, *inclinantem erigere*.

199, 28. *Æquabilitatem communis juris*. Vocem *communis* cum Lambino & Pearcio delevimus. Infra cum iisdem dedimus, *non esse tanta ulla merita*, pro vulgato *non esse tanti*.

201, 11. *Aliquid inflandum est*. Ita Pearcius e conjectura Gulielmii. Plerique codices habent *influumdum*. Gruterus dedit *inflammandum*, Lambinus *infundendum*.

202, 24. *Inferenda*. Vox corrupta. Valkerus e conjectura reponebat *infirmenda*. Pearcius mallet *effereuda*. Hoc est vincenda, superanda, & sic in suis libris legebant Car. Stephanus & Calepinus.

205, 15. *Minimè*. Addunt vulgati, *mirum*, quam vocem auctoritate duorum mss. rectè deleuit Pearcius.

215, 7. *Scurrile ridiculum*. Ita e suis codicibus Pearcius. Alii, *scurrile iudicium*.

217, 7. *Me a te circumveniri*. Pearcius cum Stephano & Lambino dedit, *me a te non conveniri, sed circumveniri*.

221, 28. *Certè negaram*. Ita ex uno codice Pearcius. Alii *certè negaras*.

222, 32. *L. Ælius Lamia*. Ita legendum esse monuit Ursinus : & sic habent duo codices Pearcii. Vulgò, *L. Helvius Lamia*.

224, 29. *Tito Pinario*. Vulgò, *Testio Penario*. Ursinum sequimur. Pearcius conjicit *Testi Pinario*.

232, 9. *Et jocus est familiaris*. Hic Turnebus e libris veteribus emendat, & senarium agnoscit : *Est jocus, est familia ; sapiens si algebis tremes*.

236, 20. *TeAissimum*. Ita Lambinus & Pear-

cius ex quibusdam suis. Gruterus maluit *redissimum* : Clericus *cautissimum* : alii *lectissimum*.

237, 27. *Apud Græcos fertur*. Ita Pearcius. Vitiosè vulgati. *Ut apud Græcos*.

244, 26. *Non vis potius, quàm*. Ita Pearcii mss. & Gruteri. Vulgati, *non vis potius, sed*.

247, 7. *Nolle videantur*. Ita eorundem Gruteri & Pearcii codices. Vitiosè vulgati, *velle videantur*.

255, 7. *Qui eas in se habent*. Voculas *in se* ignorant codices Pearcii.

Ibid. 17. *Ferunt enim aures*. Ita Victorius emendabat, & firmant Pearcii codices. Vitiosè vulgati, *seriunt enim aures*.

259, 13. *Unde discas*. Ita rectè Pearcius ex mss. quibusdam suis. Vulgò *unde dicas*.

260, 8. *Affigi*. Ita Pearcius. Vulgò *effingi*.

273, 20. *Audierit . . . possit*. Mallet Pearcius, *audierint . . . possint*.

275, 21. *Est etiam*. Legendum videtur cum Pearcio, *est tamen*.

280, 25. *In verbis & in sententiis eligendis, quàm cum, labor, &c.* Ita codices & veteres editi. Lambinus, & Pearcius ex unico codice minùs rectè, *in verbis, quàm in sententiis eligendis labor*.

285, 25. *Videtur imitari*. Ita Manutius, & veteres editi, quos sequitur Pearcius. Vitiosè vulgati, *videris imitari*.

294, 27. *Ac tandem*. Ita Lambinus & Clericus, pro vulgato, *attamen*.

297, 10. *Usque ad Socratem*. Ita Manutius & Lambinus ex mss. Alii mendosè, *usque ad Iso-cratem*, quos tamen sequitur Gruterus, ne scil. Lambini sententiæ accedat.

298, 8. *Quantum ipse forsitan.* Voculam *ipse*, malè hic ex versu præcedenti repetitam, rectè deleuit Pearcius.

300, 15. *In utramque partem sententiam.* Ita Gruteri & Pearcii codices. Vox *partem* malè omititur in vulgatis.

301, 6. *Nemo rhetorum istorum.* Vulgò *oratorum.* Emendavit Pearcius. Hic enim agitur de Corace & Pamphilo.

303, 18. *Cuivis satis asper.* Mss. habent, *cujus*, aut *causis*, aut *cuivis*. Ultimum cum Lambino & Pearcio sequimur. Gruterus maluit *civis*.

313, 1. *Utuntur.* Nempe *rhetores*, quæ vox fortasse excidit.

316, 13. *In utriusque disputatione.* Ita e mss. suis Pearcius. Vulgati in *utriusque disputationibus*.

322, 29. *At utroque in genere.* Primam vocem ignorant Pearcii codices.

325, 31. *Philœtæ.* Vulgò, *de Philœtæ.* Codices Pearcii sequimur.

333, 3. *Iste circumvestit.* Mallet Pearcius *is se*.

Ibid. 27. *Sumpta ratione est.* Vitiosè in vulgatis, *summâ ratione est*.

334, 20. *Lumen radiatum.* Muretus variarum lectionum 11, 9. legendum putat, *radiantis*, quo nomine solem vocabant poëtæ veteres. Vide Oratore ad Brutum, 152.

338, 6. *Qui faimus.* Ita codices & editi præter Pearcium, qui metri causâ legit *fuvimus*: quâ voce usi sunt Plautus & Lucretius.

339, 12. *Endo pavimento.* Vide Oratore 149.

343, 3. *Quàm cavernæ.* Ita cum pluribus mss. Pearcius. Alii, *quàm carinæ*, aut *carina*.

353, 11. *Et ab re digressio.* Ita e pluribus suis

Pearcius. Alii *ab re non longa digressio* : sed infra appellatur *declinatio brevis a proposito*.

354, 12. *Effrenatio*. Ita e suis Pearcius, ut figura sit a præcedenti distincta. Alii legunt *effrenatior*, & ad vocem liberam referunt.

372, 28. *Volui id quidem efficere certè*. Voces *id & efficere*, tamquam ab indocta manu profectas, delebat Gulielmius.

374, 29. *Ausim*. Ita regius codex, cujus excerpta habuimus, & sic volebat Gulielmius, pro vulgato, *ausus sim*.

380, 2. *Quam nemo, meo quidem iudicio, est postea consecutus*. Ita idem codex regius pro vulgato, *quam nemo quidem, meo iudicio, est poëta consecutus*.

388, 24. *De plebe consulem*. Vulgò *de plebe consules*. Regius codex habet quod dedimus; idque Lambinus olim præceperat.

394, 6. *Ut aptior sit oratio*. Ita regius codex non ut vulgò, & *aptior sit oratio*.

395, 30. *Post Romam autem conditam*. Leve est, sed hic est ordo verborum in regio codice.

401, 4. *In Silva sila*. Ita legit Turnebus ex mss. in quibus mendosè scribitur *in silva sua*. Alii maluerunt *in silva Scantia*; quæ lectio longius abit a codicibus.

Ibid. 24. *In dicendo fortior*. Alii *ornatior*. Vox est in mss. *corrupta*. Gronovius suspicatur legendum *in dicendo altior*. Infra pro vulgatorum *comperendinatus*, dedimus ex codice regio *comperendinatum* : & sic volebat Corradus.

404, 17. *Plerumque contingit*. Ita codex regius. *Vulgati contigit*.

410, 22. *Quod tribuebat*. Ita dedimus ex codice

ce

ce regio. Vulgati minùs rectè , quæ tribuerat.

413, 26. *Scis tamen esse exile.* Ita plerique codices, idque prætulimus vulgato, *sed tamen exile.*

421, 10. *Sed hæc mea culpa est.* Ita libri veteres. In quibusdam editis legitur, *sed nec mea culpa est*: quam lectionem a Rivio profectam arripuit Lambinus: sed id rectè Corrado videtur ita sine joco frigide dici, ut ne cum joco quidem satis probari possit.

426, 6. *Versabatur.* Vulgò *vertebatur.* Sequimur codicem regium.

436, 6. *Qui scriptitavit orationes multis.* Ita rectè codex regius. Alii, librariorum errore non insolito, habent *orationes multas.* Vide infra 206.

449, 18. *Ab integro.* Dedimus ex regio codice *de integro.*

454, 30. *Illuminatam.* Grutero non displicet Lambini conjectura reponentis *illiminatam.*

465, 30. *Et cetera.* Dele conjunctionem.

469, 11. *Quasi secundarum.* Scil. *partium.* Vox a theatro sumpta. Ita omnes libri veteres, quos Lambinus secutus est. Gruterus, invitis codicibus, maluit *secundarius.*

471, 5. *Nihil in causis versati.* Rivius & Lambinus reponunt *nonnihil.*

472, 15. *Quum liceat.* Rectum videtur, *quantum liceat.*

473, 9. *Queri posset.* Ita codex regius, pro vulgato, *queri possit.*

474, 8. *Nunc pro relicto est habendum.* Lambinus reponit, *non pro derelicto.* Quid si legamus cum nota interrogationis, *num pro relicto est habendum?* hoc est, pro re, quæ relicta & negligenda sit.

476, 29. *A. C. Rusio*. Pighiū verisimilis conjectura reponentis, & *C. Erucio*, qui accusator Roscii Amerini.

479, 31. *Nec augeamus dolorem*. Hanc regii codicis lectionem prætulimus vulgatæ, *ne augeamus*.

485, 16. *Sic ageres? præsertim quum istâ eloquentiâ aliorum &c.* Lambinus levi transpositione locum restituit: *sic ageres, præsertim istâ eloquentiâ? quum aliorum &c.*

487, 3. *Hunc nomen honoris, non honorem, adeptum puto*. Hic est vocum ordo in regio codice, melior quàm in vulgatis; *hunc nomen honoris adeptum, non honorem puto*.

495, 10. *Pepulisti*. Ita Victorius e mss. in quibus vitiosè scribitur, *depulisti*. Manutius & Lambinus dederunt *detulisti*, quod rectè improbant Gronovii.

503, 13. *Corpori*. Vitiosè in plerisque editis legitur *corporis*.

510, 16. *Ab armatorum impetu*. Lambinus maluit *ab amatorum impetu*.

512, 15. *Ut numerarer in multis*. Hæc mutila esse, nemo non videt: pauca tamen deesse videntur.

515, 5. *Quod magis est tractatum a Latinis*. Quum poëma magis tractatum sit a Latinis. Ita lectionem omnium mss. interpretatur Turnebus. Muretus verba refert ad poëma dithyrambicum, & e conjectura reponit, *quod magis est tractatum a Græcis, quàm a Latinis*.

518, 5. *Sed qui catenus valuerunt*. Ita Gulielmus ex quibusdam mss. Alii mendosè, *sed quatenus valuerunt*, quæ est vulgata lectio.

521, 27. *Cum Placidejano*, Leve est; sed ita gladiatorem hunc vocat Horatius satir. 2, 7. vulgò *Pacidiano*.

522, 6. *Nec Andromacham igitur.* His Viët. Manut. & Gruterus præponunt, *iidem Andriam &c.* quam verborum trajectionem sustulit Lambinus.

Ibid. 22. *Qui a senatu, in senatu : Demosthenes.* Ita ex emendatione Mureti & Fabri edidit Olivetus ; & hanc lectionem confirmant verba ipsa legis Atticæ, quam hic Cicero respicit. Vulgati prorsus mendosè, *quia in senata Demosthenes.*

525, 6. *Addisceres.* Vulgò *adjiceres.* Sequitur Lambinum, qui in duobus mss. legi testatur, *addisceres.* Veteres editi habent *adjiceres.*

526, 9. *Habes enim ea, quæ novi.* Quæ mihi nota sunt. Ita Muretus, deletâ voce *habuerunt*, quam de suo librarii addiderant. Hac retentâ Lambinus negationem inserit : Facciolatus pro *novi* reponit *nulli*, uterque parum feliciter.

527, 7. *Nam P. Galbam.* Vulgò, *jum.* Muretum & Lambinum sequimur.

Ibid. 24. *De machinis.* De catasta, ubi servi vendebantur. Palermus legebat, *decem drachmis emit.*

Ibid. 29. *Primum nobilitate eadem, &c.* Ex Puteani emendatione locum hunc dedimus, in mss. & editis vulgò corruptissimum : *primum nobilitate eadem quâ Casilina. Num majore ? non, sed virtute : quamobrem, quod inanius, umbram, &c.* Puteano præverat Muretus, sed in extremis hæserat.

528, 12. *Vixibus.* Vulgò, *virgis.* Correxerit Turnebus e mss.

529, 23. *Quin te dignum arbitretur.* Ita Turnebi codices. Vulgati habent, *qui non te dignum &c.*

530, 9. *Esse non amicos.* Ita Turnebus. In vulgatis deest particula negans.

Ibid. 29. *Et quàm amplissimum.* Ita Muretus & Turnebus. Alii *fidelissimum*, aut *felicissimum.*

531, 6. *Qui abs te tribum aut centuriam &c.* Ita ut dedimus, habet Turnebi vetus liber, multò integrius, quàm in vulgatis, *qui tribuent centuriam, quòd abs te beneficium &c.*

Ibid, 21. *Orchinii*, Cujus mentio est in Cluentiana. Ita Turnebus pro vulgato *Orcinini*. Infrà cum eodem Turnebo dedimus, *ab iis qui debent*. Vulgò *ab iis quod debent*.

532, 1. *Et quemadmodum nemini illorum ulla in re umquam, &c.* Ita Muretus & Turnebus, pro vulgato, *& quemadmodum, quod memini, nulla in re illis umquam, &c.*

533, 1. *In suis vicinitatibus*. Vulgò, *civitatibus*. Emendavit e suo codice Turnebus.

534, 4. *Non modò assequi*. Vulgati malè, & *invitis codicibus, non modò non assequi*.

Ibid. 13. *Ut quidem homo nequam, iners*. Ita Turnebus & Gulielmus. Vulgati, *itaque ut homo iners*.

Ibid. 32. *Tributim descriptam*. Ita Turnebi liber. Vulgò, *tibi distributam*.

535, 8. *Abunde consequere*. Ita Gronovii codices. Turnebi liber habet, *habenda consequere*. Quidam editi omittunt vocem *abunde*.

Ibid. 24. *Aut vicinitatis*. Ita codices. In editis malè *aut civitatis*.

Ibid. 27. *Primum cognoscis equites . . . deinde adepti . . . deinde habes*. Ita Turnebiani codices. Vulgati ex correctoris manu, *primum cognoscendi sunt equites . . . deinde adipiscendi . . . deinde habebis*.

536, 26. *Audieris fucum . . . facere velle, aut senseris*. Ita Turnebus. Vulgati omittunt vocem *audieris*.

538, 9. *Officio futurum*. Addunt vulgati, *spondeo*. Quam vocem ignorat Turnebi vetus liber. Infra ex eodem libro dedimus *inservito ratione*, pro vulgato, *inservi oratione*.

539, 5. *Nusquam discedere*. Ita mss. vulgati, *nusquam deesse*.

Ibid. 10. *Si abs te non sit rogatum*. Rectè Patermus delet negationem.

Ibid. 30. *Haud injucundè neges*. Ita proximè ad suum codicem Turnebus. Lambinus multis additis legit, *ut id aut jucundè promittas, aut ingenuè neges*.

540, 3. *Exsarturum*. Est a Lambino, probatque Muretus: neque tamen Grutero displicet Turnebiani codicis lectio, *exauclurum*. Malè editi veteres *exaclurum*.

541, 6. *Iis qui negent, quam ei quem videant*. Ita Mureti liber. Vulgati, *ei qui neget, quam iis &c.*

Ibid. 32. *Bene ut omnes loquantur, & existiment*. Ita Turnebi codices. Vulgò, *bene omnes loqui & existimare*.



INDICULUS AUCTORUM,

Quos in lucem edidit J. BARBOU,
quorumque Editio locupletatur quum
egregiis diagrammatibus, tum emenda-
tissimis viticulis, a celebratissimo D.
COCHIN, aliisque celeberrimis Ma-
gistris exaratis.

Catullus, Tibullus & Propertius, *in-12.*

Lucretius, *in-12.*

Virgilius, 3 *vol. in-12.*

Horatius, *in-12.*

Juvenalis & Persius, *in-12.*

Phædri Fabulæ, *in-12.*

Martialis Epigrammata, 2 *vol. in-12.*

Bezæ, Mureti & J. Secundi, Juvenilia, *in-12.*

Sarcotis, Carmen P. Masenio Auct. *in-12.*

Plauti Comoediæ, 3 *vol. in-12.*

Sarbievii, Casimiri, Carmina, *in-12.*

P. Desbillons Fabulæ, *in-12.*

Cæsaris Commentaria, 2 *vol. in-12.*

Cornelius Nepos, *in-12.*

Sallustius, *in-12.*

Velleius Paterculus, *in-12.*

Eutropius, *in-12.*

Quintus Curtius, *in-12.*



Cornelius Tacitus, 3 vol. in-12.

Selecta Senecæ philosophi Opera, in-12.

Imitatio Christi, ex recensione J. Valart, in-12.

S U B P R E L O.

Ciceronis Opera, in-12.

Justinus, in-12.

Novum Jesu-Christi Testamentum, in-12.

Plinii Naturalis Historia, in-12.

Titus Livius, in-12.

*Reliqui Auctores singulis annis ab eodem Bibliopola
prelo subjicientur.*





